

1500

1500

Impictur de dicitur videntur
per Mediam mentem

~~D. 78.10~~

TH. 355 / 42

Handwritten text, likely bleed-through from the reverse side of the page.

36

L'IMPIETE

DES DEISTES, ATHEES,
ET LIBERTINS DE CE
temps, combatuë, & renuersee de
point en point par raisons tirees de
la Philosophie, & de la Theologie.

Ensemble la refutation du Poëme des Deistes.

Oeuure dedié à Monseigneur le Cardinal de
RICHELIEU, Par F. MARIN
MERSENNE, de l'Ordre des
PP. Minimes.

*In multiplicatione impiorum multiplicabuntur scelerat:
& iusti ruinas eorum videbunt. Prouerb. 29.*

Du Content des Religieux Minimes de Reims

1660.

Sub lit. Fr. n. 261.



A PARIS,

Chez PIERRE BILAINE, rue saint
Jacques, à la bonne Foy.

M. DC. XXIV.

Avec Privilege du Roy.



The University of Regensburg
1660
1660

Bibliothèque des Fontaines
BP 319
60631 CHANTILLY Cedex
Tel. (16) 44.67.24.00



A
MONSEIGNEVR
L'ILLVSTRISSIME
CARDINAL DE
RICHELIEV.

MONSEIGNEVR,

M Bien que ce petit ouvrage
porte gravé sur le front le
nom de vostre plus capital
ennemy, aſſçavoir de l'impieté, i'ay neant-
moins eſperé que la vûe ne vous en ſeroit
point deſagreable, puis qu'il la fait voir au
public en un eſtat, ou ſa conſuſion rend
des preuues tres-legitimes de ſa foibleſſe,
& ſa nudité fait paroître au iour l'impu-

à ij

pudence de ses sentimens, & l'horreur de
ses maximes. Ce monstre enfant du
chaos, & de la nuit a depuis quelques an-
nees sous le nom de l'Atheisme (qui ne se
deuroit seulement pas nommer parmy les
hommes) vommy des blasphemes contre
Dieu, qui ont irrité le ciel contre nous, &
que la terre a expiez par les flammes ven-
geresses de l'offense de son seigneur. Mais
comme le superbe n'a point de bornes, &
va tousiours croissant, il a faict renaistre
en nos iours, & dans le cœur de nostre
France des cendres de ces malheureux
un autre secte, qui sous l'appas d'un nom
plus specieux expose un venin bien plus
pernicieux en sa contagion que le pre-
mier. Les complices de ceste faction, Mon-
seigneur, empruntent le nom, & le titre de
Deistes, pour abuser les ames plus sim-
ples, & credules par l'opinion qu'ils leur
donnent de recognoistre un Dieu, & leur
dessein est ce pendant de sapper sourde-

ment les colonnes , & les fondemens de la verité Catholique.

Dieu, de qui tous les desseins tendēt à sa gloire, m'ayant fait recognoistre tout le premier de ce Royaume , la naissance de ce monopole de libertins par un effect procedant également de sa misericorde, & de sa providence, obligeoit ce semble mon zele, & mon deuoir tout ensemble a contribuer mes efforts pour arrester le cours , & empêcher le progrez de ce malheureux dessein: mais ie me suis senti combatu en même temps de diuerses raisons , qui tenoient ma resolution en balance: d'un côté la foiblesse de mon esprit de beaucoup inégal à une si haute, & genereuse entreprise, & d'ailleurs la honte que i'auois de publier à ceux qui viendront apres nous l'ignominie de nostre âge destiné à produire , & souffrir de semblables prodiges arrestoient les religieux mouuemens de mon ame iustement indignée contre ces profanes. De

l'autre tout au contraire ie considerois le mal en sa naissance encore foible, sa malice encore mal établie, ce qui me sollicitoit d'en minuter la ruine de bonne heure, & me faisoit quant & quant esperer qu'il seroit aisé de l'étoufer en son berceau, ainsi que la forest d'un an seulement est facilement arrachée de la main mesme d'un ieune enfant, laquelle à la faueur de quelques années estant deuenüe plus espaisse, & montée en haute fustaie eust fait suer plusieurs iours les bucherons au pied de ses vieux chesnes.

Mais en fin dans ces irresolutions i'ay pris le party qui m'a semblé le plus auantageux à la gloire de mon Dieu: ce coup funeste qui portoit droit à l'honneur de mon m^{ist}re Iesus-Christ, & du pere commun de toutes les creatures de cet vniuers m'a puissamment obligé de suivre les premiers mouuemens de mon Zele, lequel i'ay estimé trop iuste pour pouuoir

estre reputé temeraire, mesme par quicon-
que considerera que ie ne me suis laissé
emporter a ses saincts mouuemens, que
sous l'esperance de l'appuy fauorable de
vostre autorité, Monseigneur: autorité
fondée en la pourpre venerable qui vous
met au rang des Princes de ceste Eglise
que ie deffens contre ses pires ennemis:
mais plus encore sur les brillantes ver-
tus, & rares qualitez qui vous l'ont fait
meriter, & qui releuent son lustre, & son
éclat aux yeux de toute la France: Les
miens n'ont pas esté des deniers, ny des
plus louches à recognoistre combien les ef-
fects de cette votre autorité pouuoient
estre grans, ma petitesse en auoit grand
besoin pour rabhatre l'orgueil insolent des
ennemis que ie combas, vostre courtoisie
me faisoit esperer la faueur de son secours
mais en fin vostre pieté singuliere m'a
obligé de la reclamer en ce sujet, sur ce que
ce ne sera pas un effet indigne d'elle de

paroiſtre à la teſte de ces forces icy vnies
& ramassees pour combattre l'impieté
son ennemie, de laquelle elle a si souuent,
& si glorieusement triomphé par l'inté-
grité grande, dont elle a rempli toutes vos
actions, qui seruent aujour d'huy d'exem-
ple aux ames les plus saintes, & par
tant de doctes, & de religieux écrits
qu'elles vous a dictez pour establir son
troſne dans les cœurs de tous les Fran-
çois auſſi abſolumēt, & ſouuerainement,
comme dedans le voſtre.


Ayez donc pour agreable, Monſei-
gneur, que les partisans de ceſte fille de
l'enfer voyent briller voſtre nom tres il-
luſtre ſur la face de cet œuvre à leur tres-
grande conſuſion: car il ne le verront pas
ſi toſt oppoſé à leurs trames impies qu'in-
continent les tenebres deſquelles ils vont
courant l'enormité de leur attentat ne
diſparoiffent. La gloire de Dieu en rece-
ura de tres-grāds auantages, qui rehaus-

*ſant reciproquement la voſtre, rendront à
tout iamais voſtre memoire glorieuſe par-
my les hommes, & moy en mon particu-
lier ie me ſentiray tres-obligé de la pu-
blier hautement ſi vous me faiçtes l'hon-
neur d'agreer ces vœus de mon obeïſſan-
ce, & ce teſmoignage de l'affection que
i'ay d'eſtre.*

MONSIEUR,

Vostretres-humble, & tres-
obeïſſant ſeruiteur Fr.
MARIN MERSENNE
Minime.

De voſtre Conuent de la
place Royale des FF.
Minimes de Paris ce 8.
Iuin 1624.



ODE SVR LE LOVABLE
DESSEIN QV'A EV LE
Venerable Pere Mersenne à
escrire contre l'impieté des
Deistes.

I Amais l'erreur prenant les armes,
Ne conduit ses foibles gendarmes
De front contre la verité,
Les destours leur sont favorables,
Et la seule infidelité
Assseure ces cœurs misérables.

Ne se sentans pas assez forts,
Ils déguisent tous leurs efforts,
Et pleins d'une malice noire,
A laquelle ils se vont fiant,
S'ils emportoient une victoire
Comme les Parthes en fuyant,
Ce leur seroit assez de gloire.

Les soldats de la verité,
Contre leur folle vanité
N'ont qu'à se garder des surprises,
Les autres cognoissent assez,
Que si l'on sçait leurs entreprises,
Tous leurs desseins sont renuersez.

Aussi n'ont ils ruse plus fine
Que de faire un peu bonne mine,
Et quand on les bat dans leur fort,
Ils ont recours à l'eloquence
De quelqu'un qui dit qu'on a tort,
Et qu'on fait plus mal qu'on ne pense
De s'opposer à leur effort.

Que leurs flèches sont si perçantes,
Que les raisons les plus puissantes
Ne les peuvent pas émousser:
Et qu'on en recoit plus d'offence
À tascher à les repousser,
Qu'à ne se point mettre en deffence.

Par des propos si mal conceus,

Les plus gens de bien sont deceus,
Estimans que l'erreur couuerte,
Et qui coule secrettement,
Nuit moins que quand elle est apperte
Lors qu'on la voit publiquement
Marcher à face découuerte.

Moy n'estant pas de cette humeur,
Je tiens qu'il est beaucoup meilleur
De tirer au iour le mensonge,
Afin de le combattre mieux,
Car dissimulant on prolonge
Le mal qu'il fait en diuers lieux.

La ieune plante de cigüe
Qui croist auprès de la laictüe,
Peut facilement tromper l'œil
De celuy qui dans la salade
La mange comme du cerfueil,
Ce qui le fait tomber malade,
Ou le couche dans le cercueil.

Alors que la couleuvre fiere

Suit l'anguille dans la riuere,
C'est un cas assez dangereux
Pour celuy qui l'ayant pescée,
Trouue à ce serpent venimeux
Sa main par mégarde attachée.

Ainsi la fausse opinion,
Se masquant de religion,
Elle peut nuire dauantage,
Que quand ce masque étant osté,
On se garde qu'elle n'outrage,
En découurant de quel costé
Pourroit arriuer le dommage.

L'air mauuais étant renfermé
En deuient plus enuenimé,
Et iamais la cruelle peste
Ne sortira d'une maison,
Mais luy sera tousiours funeste
Tant qu'on la tire de prison.

Ainsi l'erreur prend nourriture,
Quand elle a quelque couuerture,

Et d'un petit commencement,
Presque sans qu'on s'en appergoie
Elle croist merueilleusement,
Jusqu'à ce que l'on en reçoive
Un manifeste detrimement.

Vne viue flamme cachee,
Est mal-aisément empeschée
Qu'elle n'embrase un bastiment,
Celle qu'on voit est moins à craindre,
Pource qu'en son commencement
Il est facile de l'esteindre.

Les serpents couverts d'un fumier,
Ou dans le touffu d'un hallier
Couuent leurs œufs en assurance,
Mais lors que leurs trous sont ouverts,
On étouffe toute l'engeance
De ces animaux découverts,
Qui font horreur de leur presence.

Apprenons donc de cet auteur
A bien recognoistre l'erreur,

*Afin de la pouvoir destruire,
Et n'ayons peur que les discours
Des Deistes nous puissent nuire
Cet Auteur nous donnant secours.*

*Car tirant d'un esprit fertile
Des raisons pour rendre inutile
Tout l'effort de ces malheureux,
A chaque blesseure de l'ame,
Autant pour nous comme pour eux,
Il offre un souverain dictame,
Si nous en sommes desirieux.*

P. NICOLAS GIRAVLT, Minime.

AV DEISTE.

Ignorant, & meschant Deiste
Que l'on peut nommer aujourd'huy
Le tiercelet de l'Atheiste,
Voire quasi pire que luy;
Lis ce liur', abhorre ton vice,
Euite la double Iustice
Qui tient tousiours le glaive en main
Plus pres de frapper qu'on ne pense,
Et minuit' une repentance
Plustost aujourd'huy que demain.

Chancelant à la poësie
Autant comm' au sçauoir diuin,
Quelle Mus' aurois-tu choisie
Autre que la fureur du vin?
Suivant ton erreur coustumiere,
Pour Apollon porte-lumiere
Tu pris le Demon Lucifer,
Car la veine de ton poëme,
Qui n'est qu'un continu blaspheme
Ne peut sortir que de l'enfer.

Tu

Tu meritois mieux des supplices
Après les obscures prisons,
Que ces chetifs vers tes complices
Responc' à leurs folles raisons:
Mais la pitié de ta misere
A fait resoudre ce bon Pere
A tracer ces doctes escrits,
Pour retirer d'enire les flames
Toy si tu veux, & puis les ames
De ceus que ta p'st' a surpris.

Je n'ay pas pourtant cett' enuie
Chrestien d'effet comme de nom,
De voir aux despens de ta vie,
Qu'une promptie poudr' à canon
Tes deux flancs, & ton ventre creue
Dans un feu brûlant à la Greue
Pour la foy que l'enfer r'apprit:
Mais que ton ame detestable
Ressemble l'ardeur charitable
De la flame du saint Esprit,

L. M. P.



AV DEISTE.

DEiste malheureux plein de déloyauté,
De qui l'esprit brutal cherchant la volupté
S'establit vne loy selon sa fantaisie;
Iett' vn petit les yeux sur les doctes discours
Dont ce bon Pere veut guerir ta frenesie,
Et redonner encor du repos à tes iours.

Quoy que tu sois troublé de ta contagion,
Tu peux y remarquer que sans religion
La raison est vn corps separé de son ame;
Sans elle la raison n'a point de fondement,
C'est, comme les ardens, vne legere flamme
Qui parmy les esprits voltig' incessamment.

C'est la Religion, où tant de beaux esprits
Bruslez d'un saint amour aux mortels ont appris
A souffrir constamment la rigueur du martyre;
Non pas celle qu'un peuple au gré de ses fureurs
Establit depuis peu dans le François Empire:
La raison ne peut estre ou regne tant d'erreurs.

Deiste sans vertu, sans foy, sans iugement,
N'est-ce pas vn effet de ton aveuglement
De vouloir de s'armer ton Dieu de sa Justice?
Quel homme apres cela craindroit de l'offencer?
Comment donneroit-il aux meschans le supplice?

Et comment pourroit-il les bons recompenser?

*Si parmy ces Payens qui furent autresfois,
Quelque esprit Heretique aux idolatres loix
Eût voulu desarmer Iupiter du tonnerre,
Quel tourment rigoureux n'eust-il point meritè
Eût-il bien peu trouuer vn azile sur terre
Contre les chastimens de sa temerité?*

*Toy de qui le peché merite le trespas,
Si la terre & le ciel ne te punissent pas,
Admire de ton Dieu l'excessive clemence,
Reprend toy viftement de ton crime infiny,
Et ne retarde plus d'en faire penitence:
Pour cela seulement tu demeure impuny.*

*Que ton impieté ne cause point ta mort;
M^RSENNE en ses escrits t'enseigne le vray port
Où tu peux euitersurement le naufrage:
Si tu veux destourner le cours de tes malheurs
Vien-t'en avec nous sur le Chrestien riuage
Effacer ton peché dans les eaux de tes pleurs.*

I. VILLENEUVE.

LICENTIA SUPERIORIS.

V Tomnia quæ ad Ecclesiæ Catholi-
cæ gloriam, ordinisque nostri splen-
dorem meditatus est V. Pater MARI-
NVS MERSENNVS instituti nostri
Theologus in lucem prodeant licentiam
facimus, modò a duobus ordinis nostri
Theologis à Reuerendo Patre Prouin-
ciali Prouinciæ Franciæ ad id speciali-
ter deputatis approbentur. Datum Ro-
mæ in Conuentu nostro sanctissimæ Tri-
nitatis de urbe, die duodecimâ Iunij anni
Domini 1623.

F. ÆGIDIVS CAMART,
Generalis indignus.

Approbation des Religieux.

NOus foubfignez Lecteurs en Theologie , Religieux de l'Ordre des Minimes , fuiuant le pouuoir à nous donné , auons leu le liure portant ce titre *l'Impieté des Deistes entierement renuersee* , composé par le V. P. F. MARIN MERSENNE, Religieux du mesme Ordre , duquel nous louions autant le zele, & approuuons les doctes raisons , que nous detestons de tout nos cœurs l'execrable poëme qu'il refute. Fait à Paris ce 25 Ianuier, mil fix cens vingt quatre.

F. CLAVDE RANGVEIL.

F. IACQUES BREMANT.

Approbation des Docteurs.

NOus sous-signez Docteurs en Theologie de la Faculté de Paris, certifions auoir veu, & leu vn liure intitulé *l'Impieté des Deistes refutée*, composé par le R. P. F. MARIN MERSENNE, de l'Ordre des Minimes, auquel nous n'auons rien treuue contraire à la foy Catholique, Apostolique, & Romaine, ny aux bonnes mœurs, ains vn œuvre qui se recommande, tant à cause de son Autheur, qu'à cause du subiet, & l'auons iugé digne d'estre mis en lumiere pour l'vtilité du public. Fait à Paris, ce cinquiesme May, 1624.

CHASTELLAIN.

CHAPELAS.


Extrait du Privilège de Roy.

PAR grace, & priuilege du Roy,
il est permis à Pierre Billaine
de faire imprimer, vendre, & di-
stribuer vn liure intitulé, *l'Impieté
des Deistes refutée*, composé par le
R. P. F. Marin Mersenne, avec de-
fence à tous Libraires, & Impri-
meurs de ce Royaume, de l'impri-
mer, vendre, ne distribuer d'autre
que de ceux dudit Billaine, pendât
le temps, & espace de six ans, sur
peine de confiscation des exem-
plaires, & de quatre cens liures d'a-
mende, comme plus amplement
est déclaré es lettres. Donné à Pa-
ris le 8 May, 1624.

Signé par le Conseil,

TARDIEV.

é iiii



P R E F A C E

A V L E C T E V R.



L'EGLISE militante
ressemble à l'air qui
n'est iamais sans nua-
ges, exhalaisons, va-
peurs, ou tonnerres,
car elle est tousiours combatue de
quelques heresies, & erreurs, mais
elle n'est iamais abbattue, parce
qu'elle est assistée de la toute puis-
sance de Dieu, qui l'esclere par les
raisons de la foy, & par la commu-
nication qu'il luy faiet du verbe
Eternel, & de sa science : & l'es-
chauffe par l'ardeur du S. esprit,
& de son amour. Iamais ceste Egli-
se que ie deffens en ce traicté, n'a

esté assaillie, que quant & quant
quelque braue soldat de Iesus-
Christ ne se soit présenté, pour la
deffendre courageusement, la for-
ce, & la ferueur des fidelles croif-
sant à mesure que les persecutions,
les contradictions, & l'impieté se
sont esleuees: par où nous pouuôs
reconoistre l'admirable proui-
dence de Dieu, qui tire le bien du
mal, la vertu du vice, la grace de la
disgrace, & conduit toutes choses
heureusement à leur fin.

L'Eglise Chrestienne n'estoit en-
core qu'à son berceau, quand Simô-
le Magicien, les Nicolaites, & plu-
sieurs autres se banderēt cōtre elle
& s'opposerent aux veritez qu'elle
enseignoit, mais toutes ces rebel-
liôs lui ont esleué des glorieux tro-
phées, car les afflictions, & les mise-
res que les fidelles endurent pour

l'amour de leur souuerain Seigneur, leur seruent à multiplier leurs bonnes œuvres, & leurs couronnes, comme les debordemens du Nil seruent à l'Egypte, & l'ouuerture des cataractes du Ciel à toute la terre pour la rendre féconde en toutes sortes de fruits.

*L'auan-
sage que
les Chre-
stiens ci-
rent des
persecu-
tions.*

Vous sçauiez de quelle ardeur Origene s'opposa à Celse, Arnobe, Lactance, Athenagore, & Clement Alexandrin aux Gentils, S. Augustin aux Manicheans, & aux Pelagiens, & S. Hierosme à Vigilance; enfin vous voyez que si tost que les Diables, ou les hommes ont liuré quelque assault à l'Eglise Catholique, plusieurs l'ont soustenu, & ont viuement repoussé tous les efforts des ennemis de Dieu, & de son Eglise. Je ne dois, ny ne puis me mettre au rang de ces grands

personnages, si ie ne veus comparer la Fourmy au Lyon, & l'ombre à la lumiere, tant ie me recognois, & me ressens esloigné de leur saincteté; & de leur doctrine: mais ie puis asseurer que ie ne manque pas d'affection à seconder leurs desseins, ou plustost à suivre leurs demarches, comme verront ceus là qui prendront la peine de ietter l'œil sur ce traicté, que i'ay dressé contre les Deistes, qui s'efforcent de ruiner tout ce qu'il y a de plus sainct dans la religion Chrestienne.

Plusieurs considerations me portoient à cette entreprise, mais le malheureus poëme, que ie refute dans ce liure, m'a fait prendre la derniere resolution, & m'a mis la plume à la main pour rabattre l'orgueil insolent de ces impies,

qui sous l'appas, & l'ombre de leur nom specieus veulent persuader aux ignorans, & aus libertins qu'il n'y a point d'autre religion qui soit veritable, que celle des Deistes, dans laquelle ils font enrroller tous ceus, à qui ils peuuent persuader ce que portent les cent six quatrains qui sont amplement refutez dans ce traité, l'un apres l'autre.

Le stile dont ie me suis serui en tout ce discours, est fort simple, & succint, d'autant que i'ay creu que la simplicité, & la cādeur de la foy Catholique ne desiroit pas estre expliquee, ou deffenduë par des paroles affaitees, enflees, releuees, ou metaphoriques, mais par vn discours qui n'eût autre dessein que de proposer naiuement nostre creance, & de monstrier les er-

reurs, dans lesquels trempent les Deistes, & toutes sortes de Libertins, desquels ie desire, & recherche le salut avec affection, & sincerité, comme ils verront dans ces Dialogues, que ie leur adresse.

Or ie ne doute pas que plusieurs demanderont, ou douteront pourquoy ie n'ay pas fait imprimer les quatrains du Deiste avec leurs rimes, c'est pourquoy ie veus icy en donner la raison, afin qu'on ne pense pas que ie les aye supprimez sans consideration, & sans conseil. La premiere est parce qu'il y a plusieurs paroles dans les quatrains, qui ne seruent de rien qu'à rimer, ou a remplir le vers, & qui diminuent plustost la force des raisons pretenduës, qu'elles ne l'augmentent. La seconde raison est, afin que le malheureus Liber-

tin, qui a consommé ses meilleures
annees à l'estude de la Dialectique
remplie de toutes sortes d'impie-
tez, ne puisse se vanter que son
maudit poëme ait veu le iour, le-
quel n'est digne d'autre iour que
de celuy des flammes vengeresses,
qui brusleront eternellemēt l'im-
posteur, (s'il ne fait penitence) qui
a trempé sa plume dans vne mali-
ce plus noire que n'est celle des
damnez, pour souïller le papier
de ce malheureux poëme, par le-
quel il combat la religion Chre-
stienne, que les Diables mesmes
confessent estre veritable, quand
ils sont forcez de quitter les corps
des possédez par la seule inuoca-
tion du nom de Iesus-Christ no-
stre Sauueur, & Redempteur.

Ce qui fait que ces confidens
mesmes ont horreur de son impie-

té, & de ses blasphemes, tant ils
font enormes : malheureux ! ne
crains-tu point que la terre s'en-
tr'ouure sous tes pieds pour t'en-
gloutir tout viuant, quand tu blas-
pheme si furieusement contre Je-
sus-Christ, que les plus meschans
& les Libertins en ont horreur, car *Malice*
tu ne portes respect ny a Dieu, ny *du Diable*
aux hommes, & fais trophée de tes *ste.*
impietez.

Souuienne toy que la iustice di-
uine prendra la vengeance des in-
iures que tu vomis contre le fils de
Dieu, contre sa mere, contre ses
Saints, & contre ceus qui luy font
hommage, & le recognoissans
pour vray Dieu l'adorent, luy ser-
uent, & l'ayment de tout leur
cœur, lesquels neantmoins tu ap-
pelle *Bigots, superstitieux, oysons &c.*
C'est à quoy tendent la Dialecti-

que que tu leur enseigne, les vers
que tu compose, & les fantaisies
que tu roule continuellement
dans ton esprit: c'est là où tu mène
tes escoliers, & c'est ce qui te fera
brusler par les mains de la iustice,
si tost que quelqu'un de tes fami-
liers t'aura deferé aus Magistrats.
Pour moy ie ne desire rien davan-
tage que ta cōuersion, & ta penité-
ce, de laquelle pleust à Dieu que
iè fusse le fidelle tesmoing, & que
ie te peusse voir aussi zelé à pour-
chasser l'honneur de Dieu, & de la
religion Chrestienne, comme tu
l'es à tes railleries, & tes boufon-
neries, par lesquelles tu rabaisse, &
destruis tant que tu peus, l'autho-
rité, de l'escriture sainte & te mo-
ques du respect que nous luy por-
tons, & des veritez qu'elle con-
tient, & qu'elle nous propose.

Orie

Or ie laisse quelques autres raisons , pour lesquelles ie n'ay pas mis les quatrains avec leurs rimes, excepté les deux premiers , les deux du milieu , & les deux derniers, que i'ay rapportez, à ce qu'un chacun vist la teste , le ventre , & la queue du Dragon que ce Deïste (monstre horrible de nostre France) a produit , & que de ces trois échantillons on iugeast de toute la pièce.

De plus, i'ay mis cinq quatrains qui combattent les penitences , & macerations que les Chrestiens embrassent, à ce que ces impies ne pensent pas que nous craignons d'eüenter leurs impietez , comme fils auoient des raisons qu'on ne peult refuter ; ce qu'ils voudroient bien faire à croire à ceux qui ont l'esprit foible , & qui n'ont pas ap-

profondi les sciences, car ils n'osent pas decouvrir leurs folies à ceux qui sont sçauans, & qui ont vn bon iugement.

Les quatrains sont le 84, 85, 86, 87, & 88, côme vous verrez à la suite du discours dans le 23 chapitre, qui ruine tout ce qu'ils mettent en auant. Pour ce qui regarde tous les autres quatrains, ie me suis contenté d'en rapporter le sens, & n'en ay retranché que la rime, & les dictions superflües, ou mal-scantes, me seruant des propres termes de l'auteur du poëme, & retenant toute la force, & la vigueur des raisons que ce Poëte a mis en auant contre la religion Chrestienne, comme pourront tesmoigner quelques signalez persónages qui respondront de ma fidelité sur ce sujet, auxquels i'ay communiqué

ce poëme , & la prose qui y respond. l'ay aussi combattu l'Atheisme , & decouvert les erreurs de Charron , de Cardan , & de Iordan Brun , à ce que ce liure puisse servir de bouclier contre toutes les impietez de ce siecle. Cette premiere partie contient aussi d'autres discours , qui pourront donner quelque sorte de recreation au lecteur , tels que sont ceux de l'excellence du corps humain , de l'essence , & nature des actions libres , & morales , & des parties de la Cabale.

*Ce que
contient
la pre-
miere
partie.*

En suite de cette premiere partie ie donneray la seconde ; dans laquelle i'esclairciray tout ce qui s'y sera rencontré de difficile , touchant les comparaisons prises de Mathematiques ; & apporteray deux , ou trois explications de l'E-

*Sommaire de ce
que contient la
seconde
partie.*

nigme qui a esté proposé dans le
vingt-vniesme Chapitre sur le soi-
xante-neufiesme quatrain. Je vous
y donneray aussi vn poëme entier
de plus de deux mille vers, ou de
plus de cinq cens quatrains, par le-
quel celuy du Deïste, qu'il nom-
me l'Antibigot, sera refuté mot à
mot. En fin ie respondray aux rai-
sons que Iordan Brun met en a-
uant pour establir l'infinité des
mondes, & l'ame de l'Vniuers.

Or ie prie l'eternelle bonté de
tout mon cœur, qu'il luy plaise ra-
mener tous ces impies à ce qui est
de leur deuoir, & qu'il leur fasse re-
cognoistre sa prouidence, sa iusti-
ce, sa puissance, sa liberté, & tous
ses autres attributs, afin que l'ayās
seruy, & adoré dans l'Eglise Ca-
tholique pendant cette vie, ils
iouyssent eternellement de sa fa-

ce, & de sa diuine essence, quand Dieu les appellera de ce monde.

Peut estre qu'ils craindront de deuenir melancholiques, & de perdre leur liberté, s'ils embrassent la pieté, & qu'ils penseront ne pouuoir changer de sentimens, & de discours, si quant & quant ils ne se dépouillent de l'humanité, & ne quittent toutes sortes de plaisirs; mais cette crainte n'a aucun fondement, car ie leur proteste, & suis prest de leur signer de mon propre sang qu'ils n'auront pas si tost abjuré leurs foles opinions, & qu'ils n'auront pas plustost gousté le plaisir qu'on treuve à seruir Dieu, qu'ils confesseront, & publieront par tout, qu'il y a plus de plaisir en vn iour de viure en fidele Chrestien, qu'il n'y peut auoir en mille, viuant avec le deregle-

*Craintes
frivoles
des Li-
berins.*

ment, & le libertinage, qui sert de
regle à leur vie, à leurs penſees, à
leurs paroles, & à leurs actions.

*La facilité que les
Deiſtes
ont à ſe
conuertir
& quit-
ter leurs
impietez.*

Il leur ſera fort facile d'embraſ-
ſer la deuotion, car ils ne man-
quent pas d'amour, mais ils ne
l'ordonnent pas comme ils de-
uoiẽt; ſi bien que ſ'ils veulent
mettre l'ordre, qui eſt requis dans
le vray, & legitime amour, ils au-
ront ce qui eſt neceſſaire pour ſe
rendre agreables à la diuine Maje-
ſté; le motif de leur affection ſe ti-
re des creatures friſſes, changean-
tes, & ſuiettes à l'erreur; l'ordre de
leur amitié ſe regle ſelon leur ap-
petit deregle, & ſelon leur raiſon
abrutie par le plaifir des ſens, au
lieu qu'ils ne deuoiẽt auoir autre
motif, autre regle, ny autre but
que la volonté de Dieu, laquelle
rendroit leurs actions auſſi rele-

uees, & excellentes, cōme ils les ra-
uallēt, & auilissent par la seule con-
sideratiō qu'ils ont de se contenter
eux-mesmes en tout ce qu'ils font.
Ie me persuade qu'il y en a beau-
coup entr'eux qui desireroient se
departir des opinions qu'ils ont
sucees dans la conuersation d'un
tas de Libertins, qui s'en font à
croire, & qui voudroient persua-
der, si faire se pouuoit, qu'ils sont
les Aigles, & les Roys de bons es-
prits, mais ils n'ont pas assez de
courage, retenus qu'ils sont de la
crainte d'encourir le blasme de
quelque legereté d'esprit parmy
leurs confidens, & de se voir pri-
uez de la douceur, & du contente-
mēt, qui se retreuue dās la liberté
de leurs cōpagnies, s'ils se sentoiet
obligez par le desauē de leur
party, de mener vne vie toute dif-

ferente de la leur, mais cette apprehension est puerile, & friuole, d'autant que la pieté, & la religion Chrestienne ne les empeschera, ny ne les priuera d'aucune volupté, d'aucun plaisir, ny d'aucune compagnie licite, & honneste.

L'estude qui leur conuiendra embrasser ne sera pas beaucoup difficile, car c'est assez qu'ils détournent leur affection desordonnée des creatures, & la conuertissent au Createur; c'est assez qu'ils transportent leur cœur, & leur amour à Dieu, qui bruloit auparavant de la flamme des plaisirs impudiques, & deshonestes; en fin ce sera assez qu'ils ayent deuant les yeux cet excellent précepte de saint Augustin, qu'il nous a donné en ces termes, *Ordinate charitatem, ut per desiderium currat de Deo, &*

Chap. 8.
de sub.
stantia
dilectio-
nis.

cum Deo, & in Deum; de proximo, cum proximo, & non in proximum: de mundo, non cum mundo, nec in mundum, ut in solo Deo requiescat per gaudium.

Je me suis souuent estonné comme il se peut faire qu'il y ait des hommes dans la France, qui soient si dépourueus de iugement, de suiure plustost les opinions fantaisques d'un estourdy, que la vérité inébranlable de la foy Catholique, veu particulièrement qu'il ne peut y auoir aucun fondement dans toutes leurs fantaisies, & qu'elles ne peuuent pretendre de recompense ny en ce monde icy, ny apres cette vie, & qu'ils sont en un perpetuel danger, & en vne perpetuelle gesne de conscience, qui les menace incessamment d'une eternelle damnation, si nostre religion, & ce qu'elle nous ensei-

gne est veritable (comme il est.)

*L'avan-
tage que
les Chre-
stiens ont
par dessus
les Liber-
tins.*

Sçauent-ils pas qu'ils ne cour-
roient aucun danger, encore qu'ils
creussent tout ce qu'enseigne la
foy Chrestienne, bien que toutes
ses doctrines fussent imaginaires,
& controuuees ? car si nos ames
sont mortelles, comme dit l'auteur
de ce poëme que ie refute, quand
il tourne en rîlee les sainctes cere-
monies de nos pompes funebres,
nous ne serons pas punis pour
auoir creu qu'elles estoient im-
mortelles ; il n'y aura non plus de
punition pour ceux qui croient
que Dieu est tres-iuste, & qu'il y a
vn enfer pour les meschans, quand
bien il n'y auroit point ny de Dieu,
ny d'enfer.

De sorte que les Catholiques
sont asseurez (de quelque costé
qu'on les prenne) qu'ils suiuent le

meilleur chemin, & tiennent la
verité la plus certaine, & la plus
avantageuse, laquelle neantmoins
ne leur interdit aucune recreation
honneste, & raisonnable. Au reste
la source des Deistes, & des Athees
ne doit point se rechercher plus
loin que dans les heresies, lesquelles ^{Les heresies sont}
leur fournissent des maximes, ^{l'origine}
comme il vous paroistra facile- ^{des Deistes.}
ment par l'vnzieme opposition
qu'a fait depuis peu Pierre du
Moulin, iadis Archiministre de
Charenton, & maintenant do-
cteur de l'impieré à Sedan; voicy
comme il parle dans le libelle, au-
quel il a donné pour titre, *Les op-
positions de la parole de Dieu avec la do-
ctrine de l'Eglise Romaine.*

*L'Ecriture sainte, dit-il, appelle
Iesus Christ nostre seul Aduocat, &
moyenueur, lequel estant assis à la dex-*

tre de Dieu fait requeste pour nous, &
lequel nous ayme d'un souverain amour,
iusques à s'estre donné à la mort pour
sauuer ses ennemis.

Au contraire en l'Eglise Romaine
il est representé comme iuge seuer, &
plein de courroux contre nous, &c.

La doctri-
ne de P.
du Mou-
lin sem-
blable à
celle des
Deistes.

Le vous prie de remarquer ces
paroles, & les conferer avec les
quatrains du Deiste, ie suis assure
que vous confesserez que du Mou-
lin, & le Deiste ont vne mesme
creance, & que ce Ministre, ou ses
liures ont enseigné à ce Poëte ce
qu'il a escrit dans ses quatrains. Car
si du Moulin ne veut point de iu-
stice en Dieu, & qu'il accuse l'Egli-
se Catholique de ce qu'elle repre-
sente la seuerité des iugemens di-
uins à ses enfans, le Deiste n'en
veut non plus ouyr parler, car c'est
cette iustice diuine qui luy déplaist.

si fort, qu'il a fait rouler sa Diale-
ctique, & tout ce que ses pensées,
& ses lectures luy ont peu fournir
de plus subtil, & de plus captieux
dans tous ses quatrains. Veritable-
ment si ie sçauois que du Moulin
s'addonnast à la poésie, ie conje-
cturerois qu'il seroit l'auteur de
ce poëme, tant sa doctrine luy est
conforme, comme verront ceux-
là, qui prendront la peine de met-
tre en paralelle cette ⁱⁱ opposi-
tion, & les cent six quatrains du
Deiste. C'est pourquoy si on vou-
loit punir ce Deiste à cause de son
poëme, ie desirerois premiere-
ment qu'il fût ouy, & interrogé,
sil n'auroit pas tiré ses opinions
des liures, ou des predications de
P. du Moulin, en suite dequoy il
faudroit punir le maistre auant le
Disciple, car il se faut tousiours

prendre à l'auteur du mal pour le
defraciner entierement.

Je ſçay bien que ce Dialecticien
ne manquera pas d'excuse, ou de
repartie, & qu'il dira qu'il ne parle
que de Christ, lequel est Aduocat,
mais si vous lisez ſes liures, ou que
vous ſondiez ſon eſprit, vous treu-
uerez qu'il tend au libertinage,
qu'il dira la meſme choſe de Dieu
que de Ieſus-Chriſt, & qu'il ſac-
cordera facilement avec les Dei-
ſtes, qui n'ayment non plus que
luy, ny que les autres Miniſtres,
les macerations par leſquelles
nous faiſons penitence: Deſquels
ſi vous examinez la doctrine,
vous verrez plus clairement ce
que ie vous diſ en peu de paroles,
& m'auouerez qu'ils tendent au
meſme but que les Libertins. Car
ces braues reformateurs ne iugent

personne, & croient que chacun
sera sauué en sa religion, aussi bien
le Turc, & le Iuif, comme le reformé,
afin qu'ils s'accordent avec les
beaux esprits de ce temps, qui ont
coustume de iurer à tout propos le
nom de Dieu, quand on leur parle
de la iustice diuine, & de l'enfer.
Vous iugeriez à les entendre qu'ils
sont les plus zelez de tous les hommes,
& qu'ils ne respirent rien que
l'honneur, & l'amour de Dieu,
mais s'ils voyent quelque oraison,
par laquelle on prie Dieu pour
impetrer quelque faueur temporelle,
ou qu'on leur die que Dieu
veut qu'on obserue ses commandemens
sur peine de la damnation
eternelle, & que tous ceux-là seront
priuez de la beatitude, qui
n'auront pas esté baptisez, ou qui
s'addonnent par trop à leurs plai-

firs, & qui ne veulent point se repentir de leurs pechez, ils se mettent incontinent en colere, ou se moquent, disans que c'est parler tres-indignement de Dieu que de dire qu'il punira les meschans d'un supplice eternal.

C'est vne chose merueilleuse que quelques-vns de ces Deistes osent approcher de la sainte Communion demeurans en cette opinion fausse, & heretique, sçauoir est, que les meschans seront aussi bien sauuez que les bons, & que Dieu a aussi bien choisi l'Alcoran pour sauuer les Mahometans, comme il a choisi l'Euangile pour nous rendre bien-heureux.

Veritablement ie ne sçay pas comme ils ont porté leur esprit à ces refueries, mais ie suis asseuré que

que leurs caprices n'ont autre fondement que le Libertinage, & que cet effort fantasque auquel ils laissent emporter leurs esprits, est appuyé sur le desir qu'ils ont de viure sans apprehension du futur, & sans scrupule de conscience: s'ils pouuoient reietter bien loing de leur esprit la pensee des iugemens de Dieu lesquels il leur faudra subir, & qu'ils peussent se persuader d'estre independens, ie croy qu'ils feroient arriuez au comble du contentement qu'ils s'imaginent, & qu'ils desirent, encore qu'ils fussent au plus profond de l'impieté.

Ie pensois qu'il n'y eust que quelques ieunes éuentez qui s'amusassent à toutes ces resueries, mais il se treuve des vieillards qui leur prestent la main, lesquels au lieu d'accompagner leur venera-

ble vieillesse d'une sagesse Chrestienne, & du zele de la religion Catholique, entretiennent ceux qui les vont visiter, ou ceux avec qui ils conuersent familièrement, de discours qui buttent à ruiner nostre creance, & à faire embrasser les vices, auxquels vn chacun pense estre porté selon la peruerse inclination de sa nature corrompue, & depourueue de la iustice originelle, & de la grace.

O Dieu tresbon, tres-misericordieux, & tres-juste, ayez pitié, si vous plaist, de ces pauures esprits, qui n'estiment rien que ce qui vient de leur part, & qui abandonnent si facilement la religion, laquelle vous nous avez donnee pour nous guinder au Ciel, & estre couronnez de la gloire eternelle. Faites, mon Sauueur, que tous les

Ministres, que tous les heretiques,
que tous les Libertins, & Deistes
se recognoissent, & embrassent
courageusement la foy Catholi-
que, qui est la seule, par laquelle
vous auez voulu que les hommes
soient sauuez ; afin que comme
nous recognoissons l'vnité de vô-
tre essence, nous n'ayons plus aussi
qu'une mesme foy, une mesme loy,
& une mesme religion, & que nous
soyons tous participans de la bea-
titude eternelle, que vous auez
preparee de toute eternité à tous
ceux qui obserueront vos saincts
commandemens, & suiuront vo-
stre diuine volonté, laquelle i'ado-
re, i'embrasse, & recognois pour la
souueraine regle de toutes nos
pensees, de toutes nos paroles, &
de toutes nos actions.

ó ij

IMPIETE

DES DEISTES, ET DES
ATHEES DESCOUVERTE,
& renuersee.

ET LES

OPINIONS DE CHARON,
*de Cardan, de Iordan Brun, avec les
quatrains du Deiste refutez.*

IMPIETE' DES DEI- STES REFVTEE.

CHAPITRE PREMIER.

Dans lequel l'excellence de l'homme est declaree.

LE THEOLOGIEN.

MONSIEVR, apres vous auoir presenté le salut que tous les hommes se doiuent desirer les vns aux autres, ie vous diray que du plus loïn que ie vous ay apperceu d'as cette route, i'ai hâté le pas pour vous joindre, & consoler dans la douceur de vostre compagnie, si vous l'avez pour agreable, l'ennuy qu'apporte d'ordinaire avec soy la fatigue, & la solitude du chemin.

LE DEISTE. Monsieur. pour chemin ie n'en tiens point d'arresté, ie vas errant à l'auanture dans ces forests, recherchant autât que ie puis

les lieux les plus écartez du commerce des hommes , que ie fais profession de hayr tous comme monstres en la nature , c'est pourquoy de salut d'eux ie n'en desire point, nō plus que ie ne puis auoir pour agreable qu'ils recherchent ma compagnie: la malice, & infidelité de leurs esprits , & la misere de leurs corps sont les causes de l'ennuy que vous pouuez lire dās mon visage, ce me sont des obiets insupportables aussi biē que les miseres qui les enuironent de toutes parts; & en effet ie me sens beaucoup plus consolé de la diuersité du ramage de ce petit rossignol que vo⁹ voyez , que de l'entretien du plus homme de bien d'entr'eux, aussi estimay ie sa cōdition plus heureuse mille fois que celle du plus grād monarque de la terre, ie le dis avec verité , & sans rougir de honte,

& ne ſcay neantmoins à qui ie m'en
dois prendre, ou à la nature mara-
ſtre, ou à moy meſme.

LE T H. Si voſtre triſteſſe n'a
point d'autre ſource que ceſte con-
ſideration, i'eſtime que le chant des
roſſignols ne ſera pas neceſſaire
pour vous tirer de ceſte melan-
cholie. S'il vous plaist m'accompa-
gner, ie croy que ie vous deliureray
facilemēt de ce chagrin, car ce que
vous penſez de l'homme eſt mer-
ueilleuſement eſloigné de la verité,
veu qu'il n'y a rien de pareil en per-
fection dans tout le monde. N'im-
porte, qu'il y ayt des perſonnes vi-
tieuſes, cela n'empêche pas quel'e-
ſclat de l'image de Dieu ne reluife
ſur le front, & ſur l'ame de l'hom-
me, auquel il eſt facile de quitter ſa
malice, aydé qu'il eſt de la grace de
ſon Dieu. Voulez vous eſcouter

4 *Impieté des Deistes,*

vn discours, lequel vous fera paroistre l'excellence de son corps & de son ame, qu'un grãd personnage a dressé en forme de Dialogue, dedãs lequel *Æsculape*, *Vesta*, & *Vranie* sont introduits, & ie m'assure que vous louërez, & releuerez autant les hommes, comme vous les auez blasmez, & raualez par vostre discours.

LE D. Vous me ferés vn singulier plaisir, & tiédray ceste iournee pour tres-heureuse, si vous me tirez de ceste malheureuse tristesse, qui s'est emparee de mon esprit.

LE TH. Il faut que vous supposiez que *Vesta* auoit blasmé l'homme en tout ce qu'elle auoit peu en presence d'*Vranie*, lors qu'*Æsculape* deffendant l'excelléce de l'homme entama son discours en ceste façon.

Æsculape, Tout ce que vous auez dit iusques à present, ne me semble

renuersee & refutee. 3

rien en comparaiſon de mon petit monde, car il n'y a palais ſi beau, ny Republique ſi bien policee, que le microcoſme, auquel l'architecture a eſté obſeruee avec tant de perfection, qu'à bon droit on peut appeller le corps humain, le miracle du grand monde *θάνμα θανμάτων*, l'edifice incôparable, & le louure Royal, où les iambes ſeruent comme de chariot, les mains de viuandier, le cerueau de conſeiller, le foye, & le ventricule de cuiſinier, le cœur de moderateur, & ſolliciteur, la rate, & les reins d'arriere chambre, les veines ſeruent à table, & portent la viande, les arteres mettēt le réchaut, & les nerfs font la ſauce; l'humeur melancholic donne le maigre, le pituiteux le gras, le bilieux le chaud, le ſanguin le temperé: le ſang eſt comme le pain, qui n'énuye iamais,

Le corps de l'homme comparé à une maiſon avec tout ſon attirail.

6 *Impieté des Deïstes,*

la pituite ressemble au fruit doux,
& aqueux, la bile à l'espicerie, & le
suc melancholic avec son aigreur
donne le saupiquet: l'imagination
peint des tableaux, la memoire con-
te des histoires, les yeux sont les
chandeliers, & flambeaux, la bou-
che est le portail de la maison, la fa-
cele frontispice, les costes sont les
parois, les vertebres sont les mai-
tresses foliues, les autres os sont les
cheurons: le ventricule est la basse
court, les veines sont les fontaines,
les plus grands trous sont les fene-
stres; les veines meseraïques seruēt
d'alembic pour tirer le plus subtil.
Le ventricule est comme l'argétier,
& despencier, qui reçoit la viande,
la garde, la retient, la hache, & la
couppe, & puis l'ayant preparee
l'enuoye en vn autre membre du
logis, pour la presenter aux veines

mesaraiques, qui la tirent, la colorent, & la portent en la maistresse cuisine, où estant mise sur le feu, elle est bouïllie pour nourrir les parties molles, comme sont les membranes, & la graisse; elle est rostie pour alimenter les chaudes, comme le cœur; elle est fricassée pour les seiches, comme les os; & encore qu'elle paroisse rouge, toutefois il y a du noir pour la rate, il y a du blâc pour les cartilages, pour les membranes & pour les os; il y a du iaune verdoyant pour la bourse du fiel; il y a du iaune pailé pour la serosité, il y a du pourpre pour les poulmons.

Le maistre d'hostel est la veine caue, qui enuoye tous ses officiers pour seruir toutes les tables tant dedans que dehors le logis; dehors comme aux extremitez; dedans au plus bas estage, ou partie inferieure.

re, au milieu qui est vital, & au troi-
siesme qui est animal. Ainsi tout ce
que le Peritoine enuelope, est ce
que sont les officiers en vne grande
maison pour la cuisine, ou pour les
immondicitez. La vessie, les reins,
la ratte, & la bourse du fiel sont cô-
me les souillons, & chambrières qui
nettoient toute cette partie.

Le moyen estage, où est le cœur,
& où sont les poulmons, ressem-
ble aux sales, & aux chambres d'un
palais, où le maistre de la maison se
chauffe, comme le cœur, qui est la
fontaine de la chaleur : où il s'exer-
ce par le mouuement en s'estressif-
fant, ou en s'estendant, où il prend
la friscade en ouurant les fenestres,
lors qu'il respire, ou en les fermant
quand il aspire. Il se plaist à la
musique, à laquelle il sert d'organi-
ste, & les poulmons de soufflets, &

*Mouuemēt
de Diastole,
ou Sistolē.*

les anneaux de l'artere de clavier. De là mesme ce Seigneur enuoye ses commandemens à tout le corps par ses seruiteurs, qui sont les arteres, donnant faueur, & appuy à tous ceux qui en ont besoin.

Letroisieme, & plus haut estage est comme le cabinet, & le thesor d'un Loure enrichi de toutes parts de belles Morisques, grotesques, & païlages bigarrez, & tracez par l'imaginatio. C'est là qu'est l'espargne, car comme les anciens ont dit quel'argét est le nerf de la guerre, aussi le mouuement du corps est celuy, qui met les actions en execution : estant comme l'ame des offices, & officiers de ceste maison corporelle: & le sens est comme vn surcroist d'animosité, & de vie pour toutes les parties de ce corps. Et tout ainsi que la marmite ren-

uerferoit sans les commoditez du cabinet, aussi les membres pourriroient sans ce beau cabinet supérieur faict à cul de lampe basti sur la colonne du col vouté en parfaite rondeur ; où entre autres singularitez sont les quatre ventricules, comme quatre grands coffres. Car bien que les facultez soient vnies en leur essence, qui est l'ame diffuse par tout le corps, si est ce que l'imagination est vn coffre d'inuentions, la memoire d'especes, l'entendement de science, la volonté de vertu : Adioustez y le sens commun des especes singulieres, & l'appetit des passions.

VRAN. Vrayement vous m'avez grandement contenté, *Æsculape*, avec vne si belle description de vostre Microcosme, mais il me semble que vous le rabaissez vn peu

trop de le paragoner à vne maison,
 veu qu'il merite bien d'estre com-
 paré à vne Cité toute entiere. *Æf.*
 A cela ne tienne Vranie, que vous
 ne foyez parfaitement contente. Je
 diray donc que nostre corps est la
 viuë image d'une Republique, &
 d'un Royaume parfaict, où le Roy
 est la raison, & la Roynë l'affection,
 qui enfante de beaux enfans, sça-
 uoir est les vertus, & les bonnes œu-
 ures; son thresor est l'entendement,
 son conseil est le iugement, ses bate-
 leurs, ses sibilots, & harlequins est
 la phantasie. Lors qu'il tient ses
 estats, le troisieme est en l'estage
 plus bas, & aux extremittez, où il y a
 des escriuains, des peintres, des archi-
 tectes, des violons, qui sont les dix
 doigts de la main tant gauche que
 droite; Il y a des postillôs, des cou-
 riers, & des baladins, qui sont les

*Les trois
 estats d'un
 Royaume
 dedans le
 corps de
 l'homme.*

iambes; les marchans, & viuandiers sôt la bouche, & l'estomac; les boulangers, cuisiniers, & autres artisans plus mechaniques, & plus vils se retrouuent parmy les estats inferieurs de nostre corps, qui sont bien plus admirables que ceux d'une Republique, puis que la pluspart ne reposent iamais. L'estat de la Noblesse est en la poitrine, car la generosité, la vaillâce, & le courage ont leur seiour au cœur: aussi dit-on que la cholere n'est autre chose que le bouillonnement du sang à l'entour du cœur, & c'est le cœur qui resiste ordinairement aux ennemis: d'où viét que comme la Noblesse estant mise en desroute, le reste des estats ne semble plus rien; de mesme le cœur manquant tout meurt, comme tesmoignent les syncopes, & les defaillances.

La Noblesse se plait à la guerre, & le cœur comme braue guerrier a tousiours le tambour, qui avec les deux bastons de fistolé, & diastolé ne sonne pas seulement la diane, ou le changement de garde, mais ne cesse de battre. Le Clergé se trouue au cerueau par la foy qui est en l'entendement, par la meditation qui est en la memoire, par l'esperance, & la charité, qui sont en la volonté, par lesquelles nous deuôs eleuer nos esprits, & considerans les merueilles de ce corps conceuoir aussi qu'elles sont pour le rendre instrument du seruice de Dieu: & tout ainsi que les Temples, & les Eglises ne sont basties que pour la priere, *Domus mea, domus orationis vocabitur*, aussi ce temple viuant est basti pour honorer, & adorer le Tout-puissant.

Math. 13.

V E S T A. Je voy bien que vous auez rauy la belle Vranie par vos discours, mais ie ne croy pas que vous luy vueilliés donner la palme à mô preiudice, car ie veux que son petit monde soit semblable au Louure d'un grand Roy, & à tout un Royaume: mais combien tout mon grand monde contient-il de palais, decitez, de Republiques, de Royaumes, & d'Empires? ne vous en souuenez vous pas, lors que ie les ay racontéz?

Æ S C V L A P E. Vous plaist-il me permettre Vranie, que ie parangonne mon petit monde avec tout le grand, afin que Vesta n'ait aucun subiect de se plaindre, si ie remporte la victoire? V R A N. Je ne sçay à qui cét offre ne plairoit pas Æsculape, veu que vos discours sont si agreables, qu'ils seroient capables

de rãuir tout le monde.

Æscvl. Apprenez d'óc Vesta, que ce mōde visible, & l'inuisible sont comme vn simulachre de ce corps, ou si vous voulez, le corps en est la ressemblance: car tous les elemens, & tous les corps se retreuuent dans le microcosme, & comme ils font le monde inferieur, aussi la partie basse de ce petit monde les represente en tout, & par tout. La rate est ce pas vne terre, la bourse du fiel vn feu, la pituite de l'estomach, & des intestins vne eau; le vague d'entre-deux vn air? Y a-il arbre plus branchu, & qui ait plus de parties que la veine caue, & la veine porte? les animaux n'y repairent-ils pas en 3 especes de vers, qui s'engendrent aux intestins? les pluyes: & les gresles se forment en l'vretere, les vents, les tonnerres, & les orages

*Le corps
comparé
au tout
le monde.*

en la colique, & en diuerſes ventofitez; les cometes, & autres apparences de feu en la peſte, bubons, charbons, & entrax, qui ſe forment plus ſouuent en ſes parties inferieures, que dans les autres?

Nous trouuons és quatre humeurs corrompuës des pierreries, metaux, mineraux, gommes, & ſablons de toutes couleurs, & figures, & mille extraordinaires dans les reins, la rate, & ailleurs.

La poiçtrine eſt la vraye effigie du Ciel: le Ciel ſe remuë touſiours, auſſi fait la poiçtrine: il ſe meut d'Orient en Occident, & d'Occident en Orient: le mouuement du cœur va, & reuient, & ſe fait par cōtrariété: le ciel eſt incorruptible, le cœur eſt le dernier du corps, qui perd la vie: par les rayons du Soleil, & des autres flambeaux celeſtes,

nous

nous est communiquée l'influence aetherée, & par les rayons du cœur, qui sont les esprits vitaux, l'entretien est enuoyé par tous les membres : les yeux seruent de moyen pour monter au plus haut estage, & la faculté vitale du cœur est vne preparation à l'animale, & l'intelligible.

La teste finalement est le symbole du ciel empiree : là on void Dieu, icy on croit en luy; on iouÿt là de la gloire, icy on l'attend, la grace est commune, la liberté est en l'un & en l'autre : on prie en mesme sens icy, comme là, & peut-estre en mesme langage. Et par ainsi comme ce grand Vniuers, que Vesta a tant loué, est le temple de Dieu, le microcosme est celuy de l'ame. Dieu est par tout, mais il monstre principalement

& estale sa gloire dessus les Cieux, l'ame est diffuse par tout le corps aussi, mais elle exerce ses plus eminentes actions dedans la teste, si bien que Vesta n'aura plus aucun subject de se plaindre, puis que ce grand monde avec ses trois estages, l'intelligible, le celeste, & sublunaire, est le naïf portraict du corps humain; car la raison agissant en la teste, symbolise avec le monde intelligible, le cœur respond au ciel, sans lequel nous ne pouuons viure, bien que Galien au chapitre dernier du 7. de sa Methode, rapporte qu'un certain Marulus a marché le cœur luy ayant esté arraché; le ventre represente le monde elementaire remply de toute sorte de corruption.

Galien.

Vesta. Je vous prie, Vranie, ne prenez pas garde aux dis cours m-

miellez d'Æsculape, ou du moins ne luy donnez pas tellement vostre attention, que ne me reserviez vne oreille pour m'entendre. Je confesse que l'homme a quelque rapport à tout l'Vniuers, mais comme il n'est qu'une parcelle de la terre, tesmoin le nom que luy donne l'Hebrieu, *Adam*, & les Latins, *Homo*, qui ne sonnent que terre, il s'en faut beaucoup, qu'il arriue à l'excellence de ce monde sublunaire, si ce n'est que la partie soit plus noble que le tout, & l'effect que la cause.

Vranie. Voyez, Æsculape, si vous pourrez satisfaire à Vesta, car ie ne la veux mescontenter.

Æsculape. Madame, ie suis fort content de respondre à Vesta, car i'espere, qu'elle me cederà tout aussi tost. Il est vray que l'homme


*Diuers
noms de
l'homme.*

s'appelle *Homo*, & *Adam*, & qu'il a esté formé de poussiere, ou du limon, ainsi que nous assure le saint rexté de la Genese, mais cela n'empesche, que les autres noms, qu'on luy a imposez, ne luy conviennent, tels que sont *Vir*, parce que c'est son deuoir de suiure la vertu, & de se conformer par toutes sortes de bonnes mœurs à celuy qui luy a graué son image au profond de l'ame; ou *αἰθέριος*, qui monstre le rapport qu'il a aux choses superieures. Je ne veux maintenant rapporter les autres noms, qu'on lui donne, & qui font à sa louange, car ie l'ay desia fait ailleurs. Mais j'espere satisfaire à Vesta, si ie luy prouue que l'homme n'est pas seulement semblable au monde elementaire, qu'elle louë tant, & qu'elle luy prefere en

tout, & par tout, mais qu'il en est
comme le Roy, s'en seruant en
tout ce qu'il luy plaist.

CHAPITRE II.

*Comme l'homme fait tout, se sert de
tout, & commande à tout
le monde.*

 E s t vraiment vn
grand miracle que le
monde, mais l'homme
me semble d'autant
plus merueilleux, qu'il est plus pe-
tit, & neantmoins il a tant de sub-
tilité, que par la Magie naturelle il
peut représenter en vn corps dia-
phane, & ce fort distinctement,
tout ce qui paroist dedans l'hor-
izon. Il peut comme vn Vulcain,
& vn Promethee tirer le feu d'où

il luy plaira, contrefaire le tonnerre comme Salmonée, former l'arc en ciel par le iaillissement d'une fontaine: s'il est operateur il tirera l'eau, la terre, le sel, le souffre & le verre de toutes choses. Par la perspective il représentera mille phantomes, de façon que l'ignorant pèsera que ce soient des hommes qui marchent. Il n'y a plante, ny corps aucun qu'il n'effigie par la peinture, qu'il ne burine par la graueure, qu'il ne releue en bosse par la sculpture. Qu'est-ce que ne fait pas l'homme? puis qu'il engendre des poulains, côme une femme à Verone l'ã 1254. vn demy oyseau à Rauenne 1512. vn demy veau au village Stethel de Saxe, vn enfant à teste de grenouille à Boileroy 1517. vn demy chien l'an 1493. & vn vray chien, excepté la teste, à An.

*Prodiges
& mon-
stres.*

uers 1571. Mais parce que cela n'est pas selon l'art, ny suiuant la nature, ie di qu'il contrefait les metaux, & les pierreries par l'alchimie, de façon que les plus habiles lapidaires, ny les orfevres ne peuuent le recognoistre.

Il fait bien dauantage, lors qu'il applanit les montagnes, releue les valees, abyfme les campagnes, perce tout avec les mains; des pieds il marche dessus, & dessous les enfers, & ses yeux passent les estoiles. Que si châque animal a son alimēt particulier, & que les vns mangent la terre, comme les taupes, les autres soient carnaciers, comme les lyons: les autres se seruent de vegetables, comme les bœufs: d'autres viuent de l'air, cōme on dit du Chameleon, & d'autres viuent de l'eau, comme les poissons: l'homme se

fert de tous les corps simples, & meflangez, car il y en a peu, ou point, qui ne couurent la table.

Nous voyons que châque chose a son terroir, & fejour particulier,

-----non omnis fert omnia tellus;

India mittit ebur, molles sua thura Sabæi.

L'espicerie vient des Moluques, la pierrerie des autres Indes Orientales, l'or du Peru, la rheubarbe de Tartarie, le rapontique de Moscouie, les Elephans d'Afrique, & des Indes, l'encens de l'Arabie, les perles d'Ormus, la terre figilee de Lemnos, les lyons de Fez, les marthres zibelines de Ruffie, l'Alce de Scandie, l'estain de glace d'Angleterre, le gaiac des terres Neufues; le laule croist és lieux aquatiques, le pin és montagnes. Des terres, les vnes font argilleuses, les autres crayeuses, ou sablonneuses, les vnes

bonnes pour le froment, d'autres pour l'orge : Les bons cheuaux ne se treuuent pas par tout, les asnes ne vivent pas au Septentrion, non plus que les orangers ; & au Midy la cire, & le miel ne sont pas en telle abondance, non plus que le beure, & le vin, comme ils sont au Septentrion.

Mais l'homme ayant commandement sur tout l'Vniuers demeure par tout, & tire l'vſage de toutes choses. De là vient qu'il y a des habitans és plus hautes montagnes: dessus la mer glaciale 800 lieues de long il y a d'aussi beaux logis qu'à Paris ; il y en a qui habitent dans des trous, & des cauernes, au milieu des marets, des estangs, & des lacs: car la ville de Quinzai, où il y a 1260 pont, est bastie sur piloris. N'est-ce pas habiter dans le feu

*Voyez Or.
relins.*

que de demeurer dans la Guinée toute rostie du Soleil? n'est-ce pas estre aux fauxbourgs des enfers, que de viure avec les Gastadours, Pionniers, & tireurs de minieres cent brasses sous terre?

Que diray-ie de l'air, & des nuës, que penetrent souuent les tours, & les autres bastimens; & les Margajats dorment en l'air dans vn filet pendillant à deux petites cordelettes. Voila comme tous lieux s'accommodent à l'homme, & l'homme s'accommode à tout. Et ne croyez pas, Vesta, que l'homme ne surmonte l'Vniuers que par les actiôs, & par les facultez, & que tout le monde ne soit fait que pour lui preparer sa demeure, car toutes les pieces de ce grand monde contribuent à sa formation, coïnme à vne belle Pandore. Voyez vous pas que Dieu luy imprime son

image, que les Anges sont vouëz
à son seruice, & que le Ciel distile
sur luy les rays de sa lumiere, le be-
nefice de son cours, & la douceur
de son influence? Le feu l'eschauf-
fe, l'air l'humecte, l'eau le rafref-
chit, la terre le porte, les animaux
le seruent, les plantes l'alimen-
tent, le reste luy apporte mille for-
tes de contentement, & ce non
par contrainte, & contre nature,
mais par sympathie, & reuerence,
s'accordant aux inanimés par l'e-
stre, aux vegetables par la nourri-
ture, aux animaux par le sentimēt,
à la terre par la secheresse, & dure-
té, à l'eau par la mollesse, à l'air par
l'humidité, au feu par la legereté,
au ciel par l'incorruption, aux An-
ges par l'intelligence, à Dieu par
domination, ainsi que tesmoigne
le Psalmiste, *Omnia subieccisti sub pe-*

Voulez vous que i'adiouste quelque chose au riche equipage de ce microcosme ? lequel non seulement se trouue bien par tout, tire contribution de tout, & symbolise à toutes choses, mais il n'y a rié qui ne se retrouve dedans l'homme; car Dieu y est en presence, entant qu'il est par tout.

Dieu est en l'homme par grace, puisque, *qui manet in charitate in Deo manet, & Deus in eo.* Les Anges luy assistent tousiours comme fideles gardiens, les demons par tentation, ou punition le saisissent par fois: les cieux y sont par qualité (puisque, tesmoing Fernel, il y a vne chaleur celeste dedans nous) & par representation les estoiles sont dedans les yeux: le ciel, & toutes les choses naturelles sont

au sens par especes, en l'imagina-
tion par penſee, en la memoire
par ſouuenance, en l'entende-
ment par ſcience.

Le feu eſt és arteres, l'eau pure
eſt en la pituite eſpandue par le
corps, l'eau ſalee, & mixte eſt en la
veſſie, l'eau mareſcageuſe, & ver-
daſtre eſt en la bource du fiel: la
terre eſt en la rate, les rochers ſont
és os, les pierres menuës és mains,
les mineraux, & metaux ſe pro-
creent en diuerſes parties maſſi-
ues du corps, comme dans la rate:
l'air eſt aux poulmôs, les meteores
ſont aux inteſtins, l'or meſme ſ'eſt
trouué en vn enfant d'Alemagne,
qui en auoit vne dent entiere. Et
bien, Vesta, que voulez vous da-
uantage, puisque iuſques icy ie
vous ay môſtré que l'homme fait
tout, que l'homme eſt par tout,

qu'il peut tout , que tout est en l'homme en quelque façon que vous le puissiez considérer , & qu'il est toutes choses tant en bien qu'en mal, selon le party qu'il veut eslire ?

LE D. Veritablement ce discours m'a grandement pleu , & ne pense pas que si on consideroit les perfections de l'homme comme il faut , qu'on n'aduoüast incontinent qu'il est impossible que Dieu ne soit, lequel a basti ce microcosme, afin que tous les humains s'esleuassent à son amour, & à la contemplation de ses merueilles. Et neantmoins ie me retreuue souuent parmy des compagnies si malheureuses que les paroles , & actions d'un tas de ieunes badins font assez paroistre qu'ils ne croient aucune diuinité. C'est pourquoy ie desirerois fort qu'il vous pleust

m'enseigner quelques bones raisons, par lesquelles ie leur peusse preuuer clairement qu'il est necessaire d'aduouer vne diuinité: car ils font, pensent, & disent tout ce qu'ils peuuent lors qu'ils sont parmy leurs confidens, afin d'estouffer les semences de la vertu, & le sentiment qu'ils deuroient auoir de la Religion, & de leur Createur. I'estimerai ceste iournee tres-heureusement employée, si vous m'armez puissamment contre ces tisons d'enfer: neantmoins auant que d'entrer en ceste lice, ie desirerois fort qu'il vous pleust me declarer ce que c'est que viure moralement, & quelle difference il y peut auoir entre vne action bonne, moralement parlant, & parlant naturellement, ou physiquement cōme on dit aux escolles.

CHAPITRE III.

*En quoy consiste ce qu'on appelle viure
moralement, & quelle difference il y
a entre une action morale, & natu-
relle.*

LE THEOLOGIEN.



L n'y a quasi rien si
commun dedans la
bouche des hommes
sçauans, que ceste di-
stinction, lors qu'on
demande si quelque chose se peut
faire, ou si telle, ou telle chose est
bonne, ou mauuaise, l'un disant
qu'elle est bonne physiquement,
ou naturellement, & l'autre assen-
sant qu'elle est mauuaise parlant
moralement, comme si l'estre na-
turel estoit tout autre chose que
l'estre

l'estre moral. Pour bien entendre cecy, il faut supposer qu'il y a de bones, & de mauuaises actions, ce qui est si clair, & si euidēt, qu'il n'est besoin de recourir à l'Escriture sainte pour le prouuer, lors qu'elle deteste le fraticide de Cain, l'adultere de Dauid, & mille autres mauuaises actiōs, que Dieu a griēuement puny, & punira eternellement, ainsi que ceste sentence de S. Math. 23. *Ite maledicti in ignem* *Math. 23* *aternum*, fulminee par la bouche de Iesus-Christ, nous tesmoigne: il n'est (dis-ie) besoin de prouuer la bonté, ou malice des actions, que fait l'homme, par l'Escriture sainte, veu que les Payens, & toutes sortes de nations en tous siecles, & en tous lieux, ont recognu ceste verité, & l'ont tesmoignée par escrit, par paroles, & par les suppli-

*Heresies
de Lu-
ther, &
de Cal-
uin.*

tes, dont ils ont chastié les mes-
chans; meilleurs, & mieux sensez
en cela, (comme en beaucoup
d'autres choses) que Calvin, Kem-
nitius, Luther, & leurs disciples,
lesquels ont escrit, que l'homme;
bien qu'il fust iuste, ne faisoit au-
cune chose, qui ne fust peché mor-
tel, encore que cela ne luy fust im-
pieté, à cause de la pieté de Christ,
qui leur estoit imputee par la foy.
Ce qu'ils asseuroient à cause de
plusieurs passages mal entendus
par eux, tirez de l'Escripture sain-
cte, lesquels condamnent, ou sem-
blent condamner tout le monde;
tels que sont ceux-cy en la Gen. 6.
& 8. que toute la pensée des hom-
mes n'estoit attentive qu'au mal;
qu'il n'y a personne qui fasse ce
qui est du bien, Psal. 13. qu'il n'y a
point d'homme sur la terre, qui

*Gen. 6.
& 8.*

Psal. 13.

loit iuste, & fasse bien, & qui n'of-
fense point, dans l'Ecclesiastique *Ecclesi. 7.*
7. qu'un mauuais arbre ne scauroit
faire de bons fruiçts, en S. Math. 7. *Math. 7.*
& que tout homme à raison de la
concupiscence, laquelle entre-
tient, & allume le peché, qu'on ap-
pelle *fomite peccati*, est vn mau-
uais arbre, qui est caprif, de façon
qu'il ne fait le bien, qu'il veut,
mais le mal, qu'il hayt, comme S.
Paul enseigne dedans son Epistre *ad Rom.*
aux Romains c. 7. Ce sont ces pas-
sages, & quelques autres sembla-
bles, qui les ont fait chopper, car
estans bien entendus, ils ne disent
rien contre nostre supposition,
sçauoir est qu'il y a de bonnes a-
ctions, veu que cela est tesmoigné
en vn million de passages par l'Es-
criture sainte, comme lors qu'il
est dit que toute la terre estoit

remplie d'iniquité, & que tous les hommes ne vissoient qu'à faire mal au 6. & 8. de la Genese. Noë est appelé iuste, & homme de bien, Abraham, & quantité d'autres personnes sont louëz pour leurs bonnes actions: d'où vient qu'il faut expliquer ces lieux, qui semblent condamner tout le monde, de la plus grande partie des hommes, car elle se sert d'une maniere de parler vniuerselle, & generale, lors qu'elle veut comprendre une grande multitude.

Ces lieux se peuuent aussi entendre en ceste façon, que personne n'est iuste, de ceste grande iustice essentielle, que Dieu a en soy, avec qui nous ne pouuons estre comparez: ou qu'il n'y a personne, qui n'offense quelque fois, du moins veniellement: si ce n'est

que Dieu le preſerue particuliere-
ment: car pour les pechez enor-
mes, qu'on appelle mortels, il eſt
certain que les gens de bien n'en
font point; n'importe que le *for-
mes peccati* nous captiue, car ces pre-
miers mouuemens, deſquels ſaint
Paul ſe plaint, & ſ'ennuye, ne ſont
pas pechez à proprement parler,
mais ſeulement vne matiere de
peché, à laquelle nous pouuons, &
deuons reſiſter, iuſques à ce que
nous ayons donté tous leurs
mouuemens, & qu'ils ſoient par-
faitement ſujets à la raiſon, ce qui
ſ'accomplira dans tous ceux qui
ſeront bien heureux. Ce qui ſuffit
maintenant pour conclurre la ve-
rité de noſtre ſuppoſition, ſçauoir
eſt qu'il y a de bonnes, & de mau-
uiſes actions, comme il appert
par la louange, ou le blaſme, le

pris, ou le mespris qu'on en fait, & par la recompense, ou par le supplice qu'on ordonne pour les punir, ou pour les recompenser. Certainement puisque nous pouuons faire de mauuaises actions à raison de la desobeissance d'Adam, & de nostre mauuaise volonté, il est bien raisonnable que nous en puissions faire de bonnes à cause de l'obeissance de nostre Sauueur, & Redempteur, duquel le merite est beaucoup plus puissant, que le demerite d'Adam, & que les pechez de tous les hommes ne sont impuissants; & mal-faisans: nous pouuons donc faire de bonnes actions, puisque la grace de Dieu est vne seméce assez excelléte pour les faire germer, & croistre dans nostre volonté. Mais laissant cecy à part, il faut voir en quoy consiste

ceste bonté morale, qu'on attribue à nos actions, ce qui conuiendra aussi à la malice, ou mauuaitié morale: car l'estre moral est commun à l'une, & à l'autre; & par ainsi nous verrons s'il est nécessaire de recourir à vne fin dernière, pour trouuer ceste moralité, & si la science des morales peut estre estable à la façon de la Physique, ou des Mathematiques par des raisons *à priori*, & par des causes efficientes, sans en prendre le principe de la dernière fin, comme a fait l'Aristote, & tous ceux qui l'ont suiuy iusques à present. Ce que ie feray, Dieu aydant, en telle façon, que tous les Philothees, & Theotimes en pourront retirer du plaisir, & du profit spirituel, auquel butte ce traicté, & toutes mes pensées: car puis qu'il n'y a rien de

plus excellent dedans l'homme que l'esprit, il faut tascher de le perfectionner, puis qu'en cela consiste nostre felicité.

*In quoy
consiste
votre
morale-
ment.*

*1. opinio
des Theo-
logiens.*

L'action morale, ou la moralité de l'action, selon l'opinion de quelques vns, n'est autre chose, que quand nous agissons avec vne parfaite cognoissance, soit que nostre action soit libre, soit qu'elle soit necessaire, d'autant que cette cognoissance de la raison fait que nos actions sont humaines, & differentes de celles des bestes, lesquelles n'agissent point en cognoissant la fin, & la proportion des moyens avec icelle: mais ceste

opinio n'est approuuee des Theologiens, lesquels maintiennent, que les actions, par lesquelles les bien-heureux voyent, & aiment Dieu, ne sont pas morales, bien

qu'elles soient avec vne pleine, & claire cognoissance, & qu'elles soient humaines, d'autant qu'elles sont hors de l'estat, dans lequel on merite; & en disent autant de l'amour naturel, que les Anges portent à Dieu: & puis Dieu peut faire que la volonté d'un homme agisse necessairement, bien que l'entendement l'esclaire avec indifférence: car la volonté ne suit pas tousiours la façon que tient l'intellect en sa proposition, d'où vient que quand il propose deux moyens, ou deux biens, l'un plus grand, & l'autre moindre, nous pouuons choisir le moindre; & puisque la liberté ne consiste pas en l'indifférence de la raison, mais en celle de la volonté, la premiere indifférence demeurant en son entier, Dieu peut faire que la se-

II. op^{on}.
nion.

conde ne demeure pas, afin que la volonté agisse necessairement, car la liberté est finie, Dieu est infiny, & par consequent il peut empescher & surmonter ceste liberté.

Ces raisons ont fait que la plupart, outre ceste plenitude de cognoissance raisonnable, desirent que nos actions soient libres pour estre morales, de sorte que ce ne soit autre chose d'estre moral, que d'estre libre, & la moralité rien autre chose que la liberté, qui est dedans l'action; ce qu'ils prouuent parce que nos actions sont reputées loüables, ou vicieuses, entant qu'elles sont libres, c'est pourquoy on n'impute point ny à vice, ny à vertu, ce que fait vne beste, ou vn fol, d'autant qu'ils n'ont pas vn pouuoir libre sur leurs actions. Neantmoins il y a de scauans per-

sonnages qui ne veulent receuoir cette opinion, parce que (disent-ils) l'action peut estre changee quant à ce qui est de sa moralité, bien qu'elle demeure libre, & qu'elle soit en la parfaite puissance de la volonté, comme auparauant, ce qui ne se pourroit faire, si l'actio morale n'estoit autre que la libre, ou que la moralité ne fust rien que la liberté: car cependant que la raison formelle de la moralité demeure saine, & entiere, son effet, qui est de rendre l'action, morale, doit necessairement demeurer: aussi bien que les autres effets demeurent, quand leur cause formelle demeure. Or que cet effect ne demeure pas, ils le preuuent par l'acte de creance qu'a peu auoir vn Iuif deuant le point de la natiuité de Iesus Christ vray Mes-

*Mesme
acte libre
peut a-
voir deux
diuerfes
moralitéz.*

fic, le croy au futur Messie, lequel acte a peu estre continué iusques apres la natiuité de nostre Seigneur, quant à ce qui est de son estre physique, & de son estre libre, & humain, de sorte qu'auparauant la natiuité il estoit libre de la mesme liberté, qu'il est apres icelle, veu que c'est par la mesme puissance de l'entendement, & commandement de la volonté qu'il le continuë, & neantmoins il change d'espece en ce qui appartient à la moralité, car auant la natiuité, c'estoit vn acte de foy bon, & louable, qui meritoit recompense, lequel apres vne suffisante cognoissance de la venue de Iesus-Christ vray Messie, est vn acte d'infidelité, mauuais, vituperable, & qui merite vn iuste chastiment: & par ainsi

le mesme acte quant à la liberté, est differend en espece quant à la moralité, puis qu'il a diuers motifs, diuerses fins, & intentions.

Ce qui est encor euident en vne action, qu'on fait pour diuers motifs, comme lors que quelqu'un donne l'aumosne par misericorde pour subuenir au pauvre, par charité pour plaire à Dieu, & par penitence pour satisfaire à ses pechez, cet acte n'a qu'une liberté, & neantmoins il a plusieurs moralitez. Et puis la liberté est vne propriété naturelle de l'homme, à qui cette façon d'agir n'appartient pas moins naturellement qu'au feu d'eschauffer, & au Soleil d'esclairer, partant si l'estre moral, & l'estre naturel sont distincts, il faut confesser que la liberté n'est pas ce qui fait que l'a-

ction soit morale (or la façon d'agir avec liberté conuient à l'homme entant qu'il a son estre naturel d'homme:) car c'est ainsi, que chaque estre naturel, & chaque espece a sa façon propre d'agir différente d'avec la façon d'agir de toutes les autres especes. Et bien que la cognoissance de l'entendement avec son indifferéce, & celle de la volonté ne soient précisément la moralité, ou pour mieux dire, ne constituent pas nos actions en leur estre moral, neantmoins elles y sont nécessaires, comme matiere & fondement sans lequel elles ne pourroient estre morales, non plus que libres, si la cognoissance n'y estoit, & que l'entendement n'y fust conjoint comme vraye racine, & fondement de la liberté.

D'autres ont pensé que l'estre ^{III. op^o.}
moral, à cause duquel nous appel- ^{nion.}
lons nos actions morales, estoit
vne soubmission, ou subordina-
tion, qu'à la volonté à l'entende-
ment, entant qu'il luy propose ce
qu'il faut faire, ou obmettre, &
qu'il luy sert de regle pour s'exer-
cer en ses actions, de sorte qu'ils
appellent ceste action, laquelle est
conforme à ceste proposition, &
regle de l'entendement, morale; ie
dis regle, parce qu'il faut que l'en-
tendement soit comme regle,
comme precepteur, ou dictateur,
& qu'il soit vne loy, à laquelle la
volonté se conforme; autrement si
nous considerons la seule cognois-
sance de la raison, entant qu'elle
est necessaire pour vouloir, elle ne
fera cause de l'action entant que
morale, mais seulement entant

qu'humaine, & volontaire, ce qui demeure en l'estre naturel, à qui appartient la proposition, & irradiation de la raison sur la volonté, & sur la liberté d'agir. Il faut donc que ce respect de la volonté vers l'entendement, entant qu'il commande, & sert de loy, & de regle, interuienne à ce qu'une action soit morale, autrement il sera impossible qu'il y ait aucun acte moral: car si vous ostez toute sorte de regle, de precepte, & de loy, il n'y aura plus ny bien, ny mal: n'y ayant plus ny bien, ny mal, il n'y aura plus d'estre moral, puisque l'action morale se diuise en actions bonnes, & mauuaises: & neantmoins la liberté demeurera à l'homme, car l'entendement éclairera encores la volôté avec indifférence, mais il ne commandera plus

ra plus rien, ou ne seruira plus de
 regle, à ce que la vo'onté fasse ce
 qui est expedient: si biē que la mo-
 ralité sera prise du respect que nos
 actions ont avec la regle de la vo-
 lonté, laquelle regle est à nostre
 égard le dictamen de la raison:
 mais en Dieu, c'est sa volonté mes-
 me, car il n'a autre regle, autre loy, *Scavoir s'*
 ou obligation que soy mesme, si *Dieu a*
 bien que la moralité des actions *quelque*
loy.
 libres de Dieu, telles que sont sa
 misericorde, sa charité, & so amour
 enuers nous, n'est prise d'aucune
 loy, que donne l'intellect diuin à
 la volonté, mais de la volonté diui-
 ne, laquelle est seule inpeccable
 par nature, d'autant que toute seu-
 le elle est sa regle, & le principe
 formel de ses actions morales.

Ce qui n'empesche pas que la
 mesme formalité de l'action mo-

*Moralisé
és actions
de Dieu.*

rale ne conuienne aux actions diuines, veu que ce n'est que par accident, que l'entendement est la regle de la volonté: car si l'homme estoit infini, comme Dieu, il n'auroit rien que sa volonté pour regle: c'est pourquoi ceci ne doit pas estre cause que nous changions de raisons, ou d'opinion, nō plus qu'il n'en faut point changer, lors qu'il est question de parler des Sacramens, desquels bien que le materiel fust changé (comme quelques vns pensent qu'il est maintenant changé au Sacrement de l'Ordre) le formel, sçauoir est la significatiō pratique, demeureroit en son entier, quoi qu'elle fut transportee à ce signe, & à cette matiere, ou à une autre: de mesme pourueu que les actions libres soient faites avec ce regard, que nous auons dit, à leur

regle ; elles seront morales, soit que l'entendement, ou la volonté, ou quelque autre puissance que ce soit, serue de regle. D'où nous pouuons conclurre, que la loüange, ou le blasme (voire mesme la racine de ses proprietéz, qui est la dignité, pour laquelle on fait prix, ou on tient à mespris vne action, qu'ils nomment, *imputabilité*) ne sont pas ce qui fait qu'une action soit morale, mais ce sont seulement proprietéz, qui suiuent l'estre moral, côme l'ombre le corps. Il faut encore remarquer, pour bien entendre cette moralité, que la volonté humaine peut regarder le dictamen de la raison comme sa loy, & sa regle en deux façons. Premièrement entant que cette regle precede, & est comme l'acte premier, lors que la volonté n'a-

git pas encore, mais qu'elle regarde, ou apperçoit à sa façon le precepte de la raison; & ce precepte de l'entendement determine moralement la volonté, bien qu'elle puisse n'agir pas, ou faire le contraire de ce que l'entendement luy prescrit comme le plus expedient. Ce qui se peut expliquer par l'exemple d'un artisan, lequel est déterminé par les regles de son art, ou par l'exemplaire, & l'idée qu'il se propose avant que d'agir: pour la cause naturelle, laquelle opere sans liberté, elle est determinee à son action par une inclination naturelle: mais la volonté n'est determinee que par ce dictamen de raison, avant que d'agir. Secondement le regard de la volonté qu'elle a vers la raison, comme vers son Legislateur, peut estre

confideré comme vn acte fecond,
ce qui fe fait lors qu'elle agit selon
qui luy a esté prefcrit par l'enten-
dement: or la moralité de l'action
depend, & s'establit par le premier
regard, car auant qu'elle vueille,
ou ne vueille pas elle est fubjète à
cefte loy de la raifon, qui luy com-
mande, & luy enfeigne comme il
faut qu'elle fe comporte: c'eft
pourquoy à cet instant qu'elle n'o-
pere pas encore, & qu'elle est in-
differente à vouloir, ou ne vouloir
pas, elle est caufe de l'action libre,
entant que cefte action est mora-
le, laquelle elle rend par apres
bonne, ou mauuaife felon qu'elle
agit, comme nous dirons cy a-
pres.

CHAPITRE IV.

Où il est déclaré ce que c'est que de la moralité, & de la bonté morale, qui se retreuve en nos actions.

B IEN que nous ayons dit cy deuant que l'estre moral estoit le respect qu'auoit la volonté à sa regle, ou au commandement de la raison, neantmoins nous n'auons pas encore veu si cet estre est reel, où s'il n'est qu'imaginaire, c'est à dire, s'il n'a autre estre que ce pendant que nous y pensons actuellement, ou si c'est quelque chose de vray, & de reel, auant l'operation de l'entendement, & si ceste realité est interieure, ou seulement exterieure à l'action. Quant à ce qui est de la realité, il

est certain que la moralité est réelle, puis qu'une bonne action n'est pas moins distincte d'une méchante, avant que nous y pensions, que la volonté d'avec l'entendement, veu qu'elles sont toutes 2 de différentes especes. Mais il y en a beaucoup, qui croient que cette réalité n'est autre chose qu'un nom, ou une denomination extérieure, qu'on donne à l'action, laquelle ne reçoit en soy aucune mutation; ce qu'ils confirment par l'exemple d'un Juif, qui croyoit deuant l'aduenue de nostre Seigneur que le Messie n'estoit pas arriué, & qui demeure en cette mesme créance apres la natiuité, cet acte n'est changé intérieurement, bien qu'il soit bon, & mauuais, mais seulement à cause de la circonstance du temps, laquelle est extérieure. Le mesme se

*Sçauoir si
la moralité est
quelque
chose de
réel sans
l'ayde de
la pensee.*

peut dire de celuy qui par vn mesme acte voudroit manger de la viande à vn iour qui n'est point def fendu, & au iour suiuant deffendu, & de mille autres actes pareils.

Neantmoins il semble plus veritable, que cette realité morale est interieure à l'action, non pas entant qu'elle est simple action, mais entant qu'elle est morale, de façon que cette moralité, aussi bien que la liberté, est vne entité morale, laquelle aiouste quelque chose d'interieur à cette action : ce que ie monstre briefuement, afin de venir à ce qui est de la bonté morale.

Lors que plusieurs choses sont appellees telles, ou telles, par vne denomination exterieure à cause d'une autre, cet autre icy doit auoir en soy la raison formelle, pour laquelle les susdites ont ce

mesme nom, cōme lors que la medecine, & la pourmenade sont appellees saines, à raison qu'elles apportent la santé au corps, cette santé, qui n'est pas dans la medecine, doit estre au corps, ou pouuoir y estre. Or nous auons plusieurs choses, qui s'appellent morales, à cause de l'acte produit par la volonté, & réglé par la raison, telles que sont les actions commandées des autres facultez, comme sont les operations de l'entendement, de l'imagination, & de la puissance motiue, donc il doit y auoir vne raison interieure, ou vne forme de cette moralité dans la volonté, afin que les circonstances des actions, & tout ce que nous faisons pour la vertu, & en consequence de cet acte moral de la volonté, soit appellé moral.

*Qui est ce
qui doit
estre ap-
pellé mo-
ral.*

Ce que je confirme, parce qu'il

est impossible que cette action morale, entant que morale, procede d'un autre principe que de la volonté, de laquelle si elle ne dependoit point, elle ne seroit pas morale, par exemple si dieu la produisoit par soi-mesme, elle n'auroit plus cette dependance de la volonté, qui est necessaire à ce qu'elle soit morale; ce qui fait paroistre qu'une nouvelle raison de vie (les philosophes l'appellent *novam vitalitatem*) est ajoustee à l'action de la volonté, par la moralité, aussi bien que par la liberté. De plus, l'acte vital elicite, que produit la volonté avec indifference, & par commandement de la raison, est dit libre, & moral plus proprement, que n'est pas l'effet que Dieu produit hors de soy, comme quand il cree une ame dans le corps organisé : car

ceste moralité doit estre interieure à l'action de nostre volonté, mais l'œuvre exterieur que Dieu fait est appellé libre par vne denomination réelle, qui ne luy est qu'exterieure. Il s'ensuit donc que la moralité est vne nouvelle entité, ou modalité, laquelle est receuë d'as l'action de la volonté, & par laquelle elle se porte d'une autre façon vers son object, que si l'action estoit seulement libre, & non morale. Ce qui fait qu'il n'y a point d'autre cause pourquoy vne action est morale, que la volonté, entant qu'elle produit vn acte libre soumis au dictamen de la raison; & le mesme acte, entant que libre, n'est produit que par la mesme volonté, entant qu'elle peut agir, ou ne pas agir, si bien qu'en agissant, & quant &

*Pourquoy
l'acte de
la volon-
té est mo-
ral for-
melle-
ment
parlant.*

Depen-
dante de
la volon-
té entant
qu'elle est
cause de
l'estre
moral.

quant faisant vne reflexion ex-
presse ou virtuelle sur cette indif-
ference, elle produit ceste liberté,
laquelle enrichit ceste action d'v-
ne nouvelle raison, & comme d'v-
ne nouvelle *modification*: c'est ainsi
que les tapisseries enrichissent les
murailles d'une chambre, excep é
que le premier tapi est exterieur
au second, aussi bien que la mu-
raille: mais la liberté, & la morali-
té sont interieures à l'action vo-
lontaire. De là vient que la volon-
té, entant qu'elle est principe de la
moralité, depend de la conduite,
& de la regle de la raison, à laquel-
le elle a vne habitude essentielle,
ce que n'a pas le drap, ou la ligne,
à l'aune, ou à la regle, par laquelle
elle est mesurée; car la ligne ne de-
pend pas de la regle, comme la vo-
lonté, entant que principe de l'estre

moral, depend de ce rapport à la regle de la raison : c'est pourquoy la ligne peut estre sans la regle, mais l'action morale ne peut estre, que l'entendement ne iuge, & commande ou du moins n'adresse auparavant la volonté.

D'où ie concluds que viure moralement est viure en se soubmettant au dictamen de la raison ; & que l'estre moral n'est rien autre chose que ce respect vital qu'à la volonté au commandement de l'intellect, lors qu'elle veut agir, de façon que tout ce qui concerne ceste volonté agissante en ceste façon, est appellé moral à cause de la moralité, qui se retrouve formellement dedans l'action de la volonté reglée au niueau de la raison.

*Qu'est ce
que l'estre
moral*

Reste maintenant à monstrier

*D'où
vient
qu'une
action est
bonne ou
mauvai-
se mora-
lement
parlant.*

d'où vient qu'une action est dite bonne, ou mauuaife, moralement parlant, & que c'est qui la rend bonne de ceste bonté morale, à cause de laquelle nos actions sont loüables, & dignes de recompense. Nous parlons icy des actions produites par la seule volonté, car les actions des autres facultez, non plus que leurs objects, & habitudes, n'ont aucune liberté, que celle qu'ils empruntent des actions morales de la volonté. Or il est aisé à conclure de ce que nous auons dit cy dessus, que la bonté morale n'est pas seulement vne chose conceüe, & attribuee à l'action de la volonté, telle qu'est l'action de l'œil, qu'on attribue à ce qu'on a veu, & à cause de laquelle nous disons qu'une maison a esté veüe, ce qui n'apporte rien de nouveau

à la maison, mais ceste bonté est interieure, & reelle à l'action moralement bonne, comme la propriété de rire, & de pleurer est interieure à l'homme. Et bien que Dieu soit reellement Createur, encore que cela ne soit qu'une denomination exterieure, laquelle viét, & procede d'une habitude de raison, qu'à Dieu à la creature, neantmoins ceste realité est fondee sur la puissance de Dieu, qui luy est essentielle. Il n'y a donc nul doute que la bonté conuient reellement à nos actions, auant que l'entendement pense à ceste bonté, c'est pourquoy il y a diuerses especes reelles de bonté morale, comme nous verrons tantost.

*Pourquoy
Dieu est
appelle
Createur.*

La bonté morale prise formellement, & à proprement parler, n'est pas d'as la loy, ou d'as la droite

raison, ny tirée d'icelles, puis qu'elle n'y est pas; car puis qu'elle est intérieure à l'actiō, la loi, ny la raison ne peuuent estre ceste bonté, veu que toute sorte de loy est extérieure à l'action. Que si ceste bonté pouuoit estre quelque chose hors de l'action morale; vn homme pourroit estre bō, & mauuais sans aucun changemēt, à la façō d'vne colomne, laquelle sans se changer est tantost à droict, & tantost à gauche. Or bien qu'il soit nécessaire que l'objēt, la fin, & les circonstances soient coniointes à l'action selon que requiert le dictamen de la raison, neantmoins la bonté morale ne consiste point en tout cela, (non plus que l'art ne consiste pas formellement en tous les artifices qu'on faiēt par iceluy; car tout cela est extérieur
à l'a-

à l'action produite par la volonté, à laquelle seule conuient la bonté morale, de laquelle nous parlons. La raison n'a garde d'aduouër qu'une action soit bonne; si elle n'a tout ce qu'elle iuge estre de sa perfection, non plus que l'artiste n'approuuera iamais vn ouurage, si tout ce que requert son art, n'y est obserué; or la raison confessera ingenuëment, que l'objet, la fin, & les circonstances ne sont pas cette bonté morale, laquelle doit estre aussi intime, essentielle, & réelle à la bonne action, comme la moralité est essentielle à l'action morale, puisque la bonté morale est vne difference, qui restraint les limites de cette moralité, comme le genre moral a vne certaine espece d'estre moral, & puis que telles doiuent estre les differéces, quel

Bonté
morale
interieure
à la bon-
ne action.

Herésie de
Caluin.

Nouus
modus
vitalis.

est le gère. Or nous auons môstré cy dessus, que la moralité estoit interieure, reelle, & essentielle à l'action morale; il ne faut donc plus douter que la bonté, dõt nous parlons, ne soit intime à l'action bonne moralement parlant, afin que la bonté morale responde à la bonté furnaturelle, par laquelle nous sommes iustifiez, qui nous est interieure, ainsi qu'à definy le Concile de Trêre cõtre les heretiques, qui pensent que nostre bonté, & nostre iustification ne nous est qu'exterieure, & imputatiue.

Or ceste realité n'est autre chose qu'une nouvelle raison de vie, laquelle perfectione, & accõplit l'action, luy apportât vn nouuean degre de perfection, qui lui est cõme essentiel, entant qu'elle est bonne. de sorte que cõme la substâce n'est pas assortie de toutes ses perfe-

étions iusques à ce qu'elle ait sa
 subsistance, aussi l'action n'est en
 sa perfection, si ceste bonté mora-
 le ne l'enrichit, estant comme la
 perle, qui accomplit la beauté in-
 terieure de nos actions. Ceste
 bonté est produite en ce mesme
 instant que la volonté se soubmet
 à la droite raison, & qu'elle execu-
 te son raisonnable commande-
 ment, ou qu'elle suit sa direction:
 car le dictamen de la raison est le
 niueau auquel la volonté se doit
 conformer; c'est pourquoy ceste
 conformité à la raison est ce qui
 fait, que l'action produite par la
 volonté est bonne moralement
 parlant: & ceste conformité n'est
 rien autre chose qu'un rapport
 qu'à la volonté à l'entendement,
 ou à la droite raison; si bien que la
volonté produisant son acte en se

*En quel
 instant
 l'action
 morale
 deuenit
 bonne.*

rendant conforme à la droite raison, produit quant & quant ceste bonté morale, dont nous parlons. Et bien que l'action que nous devons faire, & que nous appellons bonne moralement, soit desia bonne en soy, avant que la raison dicte, qu'elle est bonne, puis qu'il est vray de dire, que telle, ou telle action est bonne, avant que l'entendement la prescrive, veu que la raison suppose que ce qu'elle propose, est bon lors qu'elle est droite: neantmoins ceste bonté n'est que fondamentale, & naturelle, entant qu'elle est conuenable afin de perfectionner l'homme, mais elle ne peut auoir ceste bonté formelle, par laquelle l'homme est dit auoir vne bonté morale: car il faut necessairement que l'homme produise ceste action avec vne en-

riere liberté selon que luy dicte la droite raison, auant que l'action qu'il produit, soit bonne de la bonté dont nous parlons. C'est pourquoy si vn homme faisoit la meilleure action du monde sans liberté, ou sans se conformer à la droite raison, elle ne pourroit estre bonne de ceste bonté morale, qui est interieure à l'action produite par la volonté. D'où sensuit que la science des morales ne peut estre establie, si premierement nous ne supposons la liberté, & la raison, sans lesquelles rien ne peut estre bon moralement: car la raison est si necessaire, que l'action ne peut estre que bonne, moralemēt parlant, qui se conforme à sa droicture, bien qu'elle fust deceuë, & qu'elle dictast le mal au lieu du bien, lors qu'elle ne peut apperce-

voir ceste tromperie, comme nous auons dit en vn autre lieu, lors que nous auons traicté de l'vsage de la raison.

LE D. Ie vous suis merueilleusement obligé de m'auoir tellement esclarcy ce point de la morale, pleust à Dieu que le temps permit que vous me donnassiez vne idee de tout ce qu'il faut sçauoir de ceste science, & que me fisses voir si on pourroit l'establir *à priori*, sans qu'il fust necessaire de recourir à vne derniere fin.

LE THEOL. Vous proposez icy vn point, sur lequel i'ay souuent medité, afin de voir si la morale se pourroit traicter à la façon des autres sciences, mais ce n'est pas vne difficulté, qu'il faille resoudre à la legere, car elle importe grandement. Ce qui me fait croire que

cela ne se peut, est que les plus sçauant du monde tât en Philosophie, qu'en Theologie, l'ont tousiours traictee par la consideration de la fin, tels qu'ont esté Aristote & S. Thomas. Touresfois si iamais l'occasion s'en presente, i'en descri-ray quelque lineament, par lequel ie monstrey ce qui s'en peut dire à *priori*, ou du moins ie declareray si cela est tout à fait impossible.

LE D. Ie suis merueilleusemēt satisfait de ce discours, mais ie vous prie vo⁹ ressouuenir de la requeste que ie vous auois faite cy-deuant, afin qu'estât armé de fortes raisons pour preuuer que Dieu est, ie retire beaucoup de Libertins, (avec lesquels ie me treuue souuēt) de leur impieté, & de leur aucuglemēt, qui est si grād qu'ils ne croyēt aucune diuinité, quoy qu'on leur puisse dire.

CHAPITRE V.

*Dans lequel le Theologien prouve que
Dieu est, contre les Athees, &
les Libertins.*

LE THEOLOGIEN,



JE suis bien aise que vous m'ayez ietté sur ce sujet ; car ie desire grandement que l'Atheisme prenne fin, & que tout le monde recognoisse le grād moteur de l'vniuers pour createur de toutes choses. le vo⁹ assure que ie me suis fort souuent esté né, lors qu'on m'a dit qu'il y auoit des Athees, veu qu'il n'y a creature si chetive qui n'enseigne que dieu est, & qu'il est vnique & souuerain. Je croy qu'il faut auoir l'ame mer-

ueilleusement abbrutie pour en venir iusques là que de penser qu'il n'y a point de Dieu. Certainement ie suis bien empesché par où ie commenceray pour vous mon-
strer qu'il est necessaire de confes-
ser que Dieu est, car il n'y a rien au monde, qui ne le preuue ; & ne le suis pas moins à trouuer ce qui a peu estre cause que quelques-vns soient tombez en cet abisme d'im-
pieté, bien que i'en aye rapporté dix-huict raisons en l'article 3 de la Question, que ie fis imprimer l'an passé contre les Athees. Je me contenteray maintenant d'en extraire quelques preuues pour vous armer contre les Athei-
stes.

Il n'y a personne qui ne m'ac-
corde que si l'y a vn estre souuerai-
nement bon, il merite le nom de

1. Raison
que Dieu
est.

Dieu, puis que nous n'entendons autre chose par ce nom, que ce qui a toutes sortes de perfections, & à qui rien ne manque : or que ce bien souverain soit, ie le monstre. S'il n'est pas, il faut donc que la priuation soit, laquelle fera le souverain mal, & par consequent le souverain non estre, puis que le mal, & le non estre sont vne mesme chose : mais il n'y a nulle apparence que la priuation soit plustost que son acte, lequel la doit necessairement precéder ; il faut donc confesser qu'il y a vne souveraine bonté, puis qu'il ne peut y auoir vne souveraine malice : nous auons donc vn estre souverain, puis que nous refusons vn souverain non estre, estant necessaire que l'vn, ou l'autre soit, il ne faut donc plus douter qu'il n'y ait vn Dieu,

lequel est si necessaire, qu'il est impossible que cela ne soit: car autrement il seroit impossible qu'il y eust rien de tout ce qui est, puis qu'il n'y auroit rien qu'un eternal non estre, avec lequel toute sorte d'estre est incompatible.

D'abondant il est necessaire qu'il y ait un estre independant, *2. Raison* qui n'ayt aucunes bornes, ou limites de perfections, autrement il seroit impossible qu'il y eust rien au monde, car il faudroit que tout ce qui y seroit, fust dependant, or cette dependance ne pourroit remonter iusqu'à l'infiny, de façon que tout ce qui seroit, eust receu son estre, & qu'il n'y eust point d'estre, lequel n'eust receu le sien de personne. Et puis s'il n'y auoit point de Dieu, ou d'estre independant, il seroit impossible qu'il

y en eust, & par ainsi nous aurions vne plus grande imagination, que tous les estres du monde : & l'estre de nos pensées, & de nos phantasies surmonteroit infiniment tous les estres reels, & ce qui seroit imaginaire surpasseroit ce qui est veritable, ce qui ne peut estre. Que nos imaginations & pensées fussent plus grandes, cela est clair; parce que nous conceuons vn estre infiny quand nous voulons : & quoy, sera il dit que ces pensées n'aurent aucun obiect? Comment est-il donc possible que l'entendement, ou la volonté sy portent, si grandement, si puissamment, & avec tant de ferueur? Arriere des bons esprits la maudite pensée de ceux qui sont si estourdis, qu'ils estiment qu'il n'y a point de Dieu.

3. *Raison.*

Dites moy, ie vous prie, est-il

possible de se persuader qu'il n'y a point de Dieu? ce peut il faire que ces beaux lambris celestes, ces 4. elemens, & tout ce que nous voyons, n'ait esté fait de personne? sera-il plus facile de croire qu'une oraison de Cicéron, que l'Æneide de Virgile, qu'une maison, ou une ville ne peut estre de soy mesme, que les estoilles, ou les elemens? Mais ie vous prie, pourquoy est ce que le Ciel n'est plus grand, pourquoy n'est il quarré, ou sexagone, au lieu d'estre rond, s'il ne depend d'aucun? C'est une contradiction tres-evidente de dire que ce qui n'est infiny, n'ait pas esté fait, car s'il est finy, il est necessaire que quelqu'un l'ait finy, & limité: or tout ce que nous voyons est finy, ensuite dequoy il faut qu'il ait receu ses bornes de quelqu'un, qui

ait vn estre infiny, qui est le vray Dieu, lequel estant immēse borne toutes choses selon son bō plaisir.

4. Raisō.

Voicy encore vne autre raison entre cent qu'on pourroit rapporter à ce sujet. Tout ce qui est au monde, se resoult és principes, desquels il est composé, car vous ne sçauriez trouuer corps aucun, qui ne se resoult en ces 3. principes, sel souffre, & mercure, ou, comme parlent quelques-vns, en corps, esprit, & ame, ou en terre, feu, & eau: or tout ce qui se resoût, & dissouît, a esté conioinct & composé, veu que le mesme ordre qu'on garde à la dissolution, s'est retrouué à la composition; il faut donc que quelqu'un ait fait ceste composition, lequel n'ait esté composé, mais qui soit tres-simple. De plus, puis que toutes choses, soient pierres, plan-

tes, animaux, ou minéraux, qui se retrouuent és 4, ou 5 familles, & estages de ce monde, prennent fin, & se font avec le temps, il est certain qu'elles ont aussi commencé avec le temps, comme a fort bien remarqué le premier Historiographe du monde, lors qu'il a dit que Dieu crea le Ciel, & la terre au commencement du temps. Mais il est impossible que Dieu ait esté créé, puis qu'il est deuant tout temps, & deuant tout ce que nous voyons: il estoit, côme il est encore, & sera eternellemēt, & immuablement, ce tres-profond Ensoph des Cabalistes, bien-heureux par soy mesme, lequel n'a fait les hommes que pour la gloire, & afin qu'ils cōtemplassent la bonté souveraine pour la servir, & l'adorer à tout iamais. C'est donc là où

nous deuons aspirer, & ne deuons auoir autre but, ou pretention que de jouyr de ce bien infiny, ne nous soucians, & n'vians d'aucune chose, qu'entant qu'elle nous seruira comme d'échelon pour nous vnir à Dieu, qui nous a faits, & nous entretient de nourriture, de vie, de vestemens, & de tout ce qui nous est nécessaire, à ce que nous le louïons eternellement, & que nous l'aymions par dessus toutes choses.

LE D. Beny soit l'Eternel, qui m'a donné ce iourd'huy vne telle rencôtre, iamais ie n'ay entendu discours qui m'ait plû dauantage. Bó Dieu! se peut il treuuer quelqu'un si abrupty, & si aueuglé, qui pense qu'il n'y ait point de Dieu: pour moy i'estime que cela ne peut venir que faute d'esprit, & de iugement, car tout
ce qui

ce qui est au monde nous présente
cette vérité.

5. Raison.

LE THEOLOG. Veritablement
quand on contemple le bel ordre
qui est au monde, & qu'on voit
que chaque chose retient son
rang, & son lieu, nonobstant tous
les desordres, qui semblent arri-
uer, il faut conclure qu'il y a quel-
qu'un qui gouverne tout le mon-
de, & qui maintient toutes choses
en bon ordre, car le monde ne
pourroit pas garder le branle in-
uiolable, & la cadence reguliere,
que nous y apperceuons, n'estoit
l'Orphee diuin, qui touche les cor-
des du grand luth de l'Vniuers, &
qui a soing de tous les ressorts, &
mouuemens, qui paroissent dans
les Cieux, & dans les elemens. Se
pourroit-il faire qu'une nef euitast
le naufrage, laquelle n'auroit pu

lote ny gouuernail? Nullement;
 que fera ce donc de ceste grande
 arche, & de ce grand nauire du
 monde, si Dieu ne le regit, & con-
 duit en toutes ses demarches? Ce
 qu'a fort bien considéré vn docte
 Poëte de nostre temps en ces vers.

*Raisons
 tirées du
 mouue-
 ment des
 Cieux, de
 la nauire
 & de
 plusieurs
 autres
 choses.*

Callez les voiles bas, ostez aux vents la
 prise,
 Montez dessus la prouë, & au ciel azuré
 Mirez au grand moteur la prouidence assise,
 Soubz qui les astres font tout leur bal mesuré
 Par vn art sans hazard, par entreprise apprise:
 Et lors voyant les cieux d'vn regard asséuré,
 Vous n'estimerez plus le monde sans pilote,
 Non plus que sans patron de naufs vne grand
 flotte.

*Mais dites, ie vous prie, comment se peut-il
 faire*

Que voyant vn tableau bien depeint, & orné,
 Ou vn iuste quadran, vne horloge, vne sphere,
 D'vn mouuement égal, & en soy retourné,
 Vous disiez que sans art hōme n'a peu peindre
 Vn si riche tableau, ny estre ainsi borné,

Le quadrans sans cōpas, ny l'horloge, ou la boule
Se mouuoir sans vn poids qui par art monte &
coule,

Toutesfois contemplant du monde le bel ordre,
Qui contient tous ces arts, & tous les artisans,
Vous osez impudēs ou meconnoistre, ou mordre
Du moteur le conseil, aueugles medisans:

Et ne voyez vous point que l'on ne pourroit
tordre

Contre les
Athees.

Ces cercles encerclez par mouuemens diuisans,
Sans vne grand raison, ven que pour les en-
tendre

Il nous faut tout l'esprit, & la raison estendre?
Que si quelqu'un auoit portē en l'Ameri-
que,

Ou dedans le Peru aux Barbares tous nus
Vn si bel instrument que la boule spherique
Qu'Archimede inuenta, où estoient recogmus
Les mouuemens reglez de ceste grand fabrique,
Ou Phebus & Phebé, & les cinq tant connus
Faisoient leurs tours diuers par mesure bornee,
Comme ils les font au Ciel chaque nuit &
iournee.

Sphere
d'Archi-
mede.

Qui seroit cestuy-là tant grossier, & barbare
Qui dist que sans raison eust peu estre parfaict
Vn globe tant exquis, vn instrument si rare,
Quoy qu'il n'en entendist les regles, ny l'effect

Et commet est-ce donc que vostre sens s'esgaré
 Quoy que vous n'étendiez par quel ordre se fait
 De ce monde le cours, de penser plus habile
 Archimede que Dieu, à qui tout est possible?

Archimede pourra dessous la grand ceinture
 Absens faire marcher sans erreur les Errans,
 Et Dieu ne pourra pas present en la nature
 Mener les sept flambeaux vn chacun en ses
 rangs:

Ains vous croirés plutôt que par cas d'aucture,
 Que par conseil diuin, ils vont ainsi courans?
 O trop barbare gent, trop aueugle, & brutale,
 Dignes à tout iamais viure en l'horreur naita-
 ble.

Encor si vous n'auiez non plus l'ame voilée
 Que ceux-là du Bresil, vn iour vous pourriés

Nauire

voir:

premiere Car quand premierement dessus la mer salée

apperceue Le nauire voguant peurent apercevoir,

par les D' Americ Florentin, en l'obscur valée,

Brasiliens Où ils estoient cachez, ne scachans concevoir

Ce qu'ils voyoient de loing, d'vn œillade éperdue
 Ils suiuoient ceste nef par eux non entendue.

Et disoient à part soy, quelle chose nouvelle,
 Qui se roule sur l'eau avec vn si grand bruit?
 Les ondes deuant soy retournent pesle mesle,
 Leuant des tourbillons qu'apres elle destruit:

Elle rase les flots, & delaisse apres elle
 Vn sentier escumeux, qui blanchissant le suit: Le canon
 Puis oyans le canon tonner espouuentable
 Pensoient ouyr, & voir quelque forme de dia-
 ble.

Mais quoy que vous voyez du monde la gran-
 de arche,

Sans cesse se mouuoir d'un ordre tant reglé, Le monde
 Inconstans vous pensez qu'inconstamment il comparé
 marche à l'arche.

Et l'œil de la pensée aués tant auéglé
 Que vous n'auisez point le Patron, & Monar-
 che

Qui tourne comme il veut son vaisseau égalé:

Et ne pensez oyans les esclats du tonnerre,

Bon, ne mauvais esprit au ciel, ny en la terre.

Parce, me dirés vous, qu'à contempler la
 diuine

Du monde nous auons les yeux accoustumez,

Nous ne remarquons point aucune providence

Au leuer, & coucher des astres allumez;

Et plus nous n'admirons leur branle, ny ca-
 dence,

Tousiours d'un mesme pas, & consommez

Vaire la nouveauté, non la grandeur des cho-
 ses,

Vous feroit rechercher les causes y encluses.

Non ce n'est pas cela, ô troupeau d'Epicure,
 Il ne faut sur ce point que vous vous excusiez.
 Mais du palais du ciel vous n'avez soing ny
 cure,

Aueugle
 ment des
 Athees.

Au palais de la bouche estans tous amusez:
 Dôc si plus qu'un hibou n'avez la veüe obscure,
 En terre baïssiez-la, ne soyez tant rusiez,
 Que pour tromper le temps, & vos ennuis
 extresmes,
 Seuls vous soyez trompez du temps, & de
 vous mesmes.

Montez au haut du mast, & que vostre œil
 contemple,

Raisons
 & rees du
 bel ordre
 des corps
 de ce
 monde.

Autant que le rayon en peut estre estendu,
 Le globe de la terre au milieu du grand temple
 D'un si bon contrepoids, dedans l'air suspendu,
 Auecque l'Ocean, qui d'un canal si ample
 Couure la plus grand part du centre descendu:
 Puis me dites qu'il est qui la terre compasse,
 Et met borne à la mer qu'onc elle n'outrepasse.

Orne-
 ment de
 la terre.

Voyez de ce costé la terre tapissée
 D'herbes, & d'arbrisseaux, & de tant belles
 fleurs:

Quel tableau est tant beau, quelle tente lincee
 Pourroit estre émaillee avec tant de couleurs?
 Voyez là d'autre part touffue, & herissée
 De si verdes forests, & de fruitiers meilleurs,

Voyez d'espis cretez blondoyer les campagnes,
Et oyez les sapins siffler sur les montaignes.

Voyez maint Val ombreux, mainte claire
fontaine,

Tant de fleuves qui font tant de tours, & replis,
Tant de prez verdoyans deffous l'aure seraine,
Tant d'antres encauez, tant de rochers emplis,
Tant de metal cache en mine fouterreine,
Le Plomb, l'Erain, le Fer, l'Or, l'Argent accom-
plis,

Tant de Marbre madré, tant d'Albâtre, &
Porphire,

Qui pour bastir Palais, & Temples doit suffire.

Puis voyez formiller tant de bestes farouches, Variété
Les vnes aux deserts, les autres par troupeaux d'ani-
Plus espais, & serrez que les effeins des mou- maux.
ches,

Tachetez mouchetez, & de diuerses peaux;
Les aucunes broutés aux taillis, & aux fouches,
Et les autres paissans par les herbus coupeaux,
Et toutesfois voyez qu'une chacune en somme
Oubie reuere, ou craint la presence de l'homme,

Et quelle est la beauté de la mer coleree,
D'Isles, de monts, de rocs d'istinguee en maint Beauté
lieux? de la mer.

Quelle est l'amenité de la riue, & cree,
La plaisance des ports tant agreables aux yeux?

Puis voyez cōme elle est de vaisseaux decoree,
 Chargee d'or, de ioyaux, & parfuns pretieux,
 Comme la terre en void reluire en villes belles,
 La mer on void aussi reluire en carauelles.

Mais qui pourroit conter les especes diuerses
 Des poissons escaillez, & des monstres qui
 vont

Espece
 diuerses
 de pois-
 sons.

Ronflans, & resouflans dessus les ondes perſes,
 Les vnes de costé les autres de droit front.

Les vnes sur le ventre, & les autres reuerſes,
 Baleines, Fouches, Thins, & le Dauphin ſt
 pront?

Dessus lesquels paroist plus grand le Tyſitere,
 Comme sur les troupeaux l'Elephant ſolitaire.

Merucib
 les de
 l'air.

Leuez les yeux a môr, & au prochain eſpace,
 Voyez l'air diſtingué du iour, & de la nuit,

En haut le delié, bas le gros a pris place,

En nués il s'amasse, & puis en vent il bruit:

Puis degoutant en pluye il rend la terre graſſe,

Oyt & void avec nous, avec nous ſuit, & ſuit:

Auecques nous il parle, & porte nos paroles

Qu'il multiplie en ſoy en cent mille crioles.

Voyez combien d'oſeaux, & de diuers plu-
 mages

Il contient, & ſouſtient, & qu'il faiet reten-
 tir

De fredons, decoupez, & de plaisans rimages:

Considérez comment il nous fait tant sentir
 De soüefues odeurs, & voir diuers images:
 Voyez oyseaux planer, aucuns s'appesantir,
 Et raser les estangs, & l'Aigle tant cognüe
 D'œil percer le Soleil, & des aïles la nuë.

Maintenant suiuez la, & allez recognoistre
 Dans vn char étheré l'enclos, & le pourpris
 Du celeste manoir, du grand, & large cloistre,
 Tenant dedans son corps tout autre corps com-

Descri-
 pti-
 on du
 Soleil.

pris;
 Et voyez le seul œil du Soleil apparoistre
 Sur les lampes du ciel, & tous ces feux épris
 D'vne telle splendeur, que ie ne trouue exemple
 A qui l'accomparrer en la rondeur du temple.

Quoy qu'il ne semble pas plus grand qu'vne
 rondelle,

Si excède-il encor cent soixante, & six fois
 La grandeur de la terre, & va tout autour
 d'elle

Filant le siecle, l'an, l'heure, le iour, & le mois:
 si tel ne le voyez, beaucoup moins son modèle
 Comprendre pourrez vous, qui est vnique en
 trois,

Qui n'a siecle, ny an, ny mois, ny iour, ny heure,
 Mais son eternité en vn seul point demeure.

Voyez tout droit sous luy ceste Lune argentée,
 Qui en l'obscur nuit fait renaistre le iour,

Descri-
 pti-
 on de
 la Lune.

Regardez que sa course est tant diligente
 Qu'en moins de trêze iours elle acheue son tour
 Voyez qu'elle darde en mer sa lumière empruntée
 Le flot, & le reflot luy causant sans sejour
 Puis ne dites comment la grand mer épanchée
 Est en telle distance avec elle attachée,

O elle est opposée, & de la terre l'ombre
 Se vient entreposer entre elle, & le Soleil,
 Dont elle est eclipsée, & ores elle encombre
 La terre d'en iour, & luy rend le pareil
 Quand ioindre elle se vient par certain ordre, &
 nombre,

Et humer à longs traits la lucur du grand œil:
 Ores elle est cornue, ores demie, & ores
 Sa face est toute pleine, & puis décroist encores.

Si vous n'avez loisir d'employer vostre étude
 A suivre les Errans, & si mieux vous aymez
 Errer aux voluptez sans grand sollicitude,
 Que remarquer de Dieu les œuvres estimez;

Exhorta-
 tion aux
 Athei-
 stes.

Si la tourbe vous plait, & non la solitude,
 Ne permettez pourtant vos sens estre abîmez,
 Tant qu'ils soient abrutis, n'osant leuer la teste,
 De peur de voir le iour, vers la voûte celeste.

Considerez vn peu par conseil, & prudence,
 Si le sort incertain auroit si bien rangé
 Les sept flambeaux tant beaux, & non la Pro-
 uidence,

Veu que si par entre-eux ils estoient eschangez, La prouidence
 Impossible il seroit de mettre en euidence de Dieu
 Vn ordre mieux réglé, quoy que vous y songez: naturelle.
 Ainçois songez y bien, & ie m'ose promettre
 Que vous n'y trouuerez à oster, ny à mettre. Effets de

Premieremēt la Lune est des terres prochaine, la Lune.
 D'autant que ses rayons presidens aux humeurs
 Elle lasche, & dissout des elemens la chaisne,
 Et fecōde, & empreint en terre les fruits meurs:
 Et est ceste vertu aux hommes tant certaine,
 Que même elle est cognuē aux rustiques semeurs
 Espians le croissant pour ietter leur semence,
 Afin qu'elle aux sillons en hume l'influence.

Dessus elle est stilbon, sur lequel estincelle Mercure.
 L'estoile des bergers, qui d'un ray l'empiegeant
 Inspire aux animaux vigueur, qui est bien telle, Venu.
 Que ceux qui vont volant, chemināt ou nageāt,
 Se sentent tous forcez de chercher leur femelle,
 Tāt vn aueugle feu leurs moëllles va rongeat,
 Et nature pouruoit tousiours par ceste sorte
 Que mort l'indiuidu, l'espece ne soit morte.

De puis de la clarté la source inepuisee
 Est comme au cœur du monde, où de tous les co Le Soleil.
 stez,

Comme d'un bon archer qui a pris sa visee,
 En mille, & mille traits penetrans sont iettez
 Sans que la pointe en soit ny mouffe, ny brisee,

Ne qu'ils soient d'auec l'arc separez, ou' ostez:
Et ainsi Apollon qui ses flesches élance,
Du grand serpent Python tousiours darde la
pance.

Les autres trois d'apres Mars, Iupiter, Sa-
turne,

Tiennent si bien leur rang que changer ne se
doit:

Proprie- Car estant Mars boüillant, Saturne taciturne,
tez des L'vn ardant, & hastif, l'autre pesant, &
trois pla- froid,
nettes su-
perieures. Iupiter temperé ainsi comme d'une vrne

Estoint du feu de Mars, & regardant tout droit
Saturne dessus luy de chaleur atiedie
Réchauffe, & éclarcit sa face refroidie.

Et que diray-ie plus à si des langues i'auoye
Autant que de clouds d'or luisent au firma-
ment,

Si ne pourrois-ie pas à tant trouuer la voye
De chanter du grand Dieu les œuvres digne-
ment,

Et si tout l'Vniuers reduire ie scauoye
En vne seule voix, non assez fermement
Je pourrois entonner aux Citez supernel-
les

De son œil tout-voyant les graces eternal-
les.

Ne doutez donc iamais voyant telle con-
corde

Conclu-
sion que
Dieu est,
& qu'il
gouverne
tout le
monde.

Qui secrete entretient le monde en sa beauté
Qu'il n'y ait vn Patron, qui manie, & qui
torde

L'anchre & le gouvernail selon sa volonté.

Pleust à Dieu que tous nos
Poëtes François voulussent em-
ployer leur temps, & leurs plumes
à descrire les merueilles de Dieu,
afin d'enraciner de plus en plus la
creance du Createur en ces esprits
qui sont si mal faits, que rien ne
leur est agreable, s'il n'est parsemé
de mille discours folastres de l'a-
mour impudique, au lieu qu'ils
s'amusent, & perdent le temps à
composer vne infinité de rauau-
deries, qui ne meritent pas d'estre
leuës, & pour lesquelles ils seront
griefuement punis apres ceste vie,
s'ils n'en font icy penitence, & s'ils

n'employent leur trauail à quelque chose de plus serieux, & qui soit agreable à Dieu.

*Remon-
strance
aux Poë-
tes.*

LE D. Veritablement ie croy que si vn tas d'Escriuains qui broüillent, & perdent le papier avec leurs friuoles, & inutiles inuentions pour attraper la piece des Imprimeurs, & des Libraires addonnez à leur auarice (qui n'ont que le lucre deuant les yeux, sans se soucier si ce qu'ils impriment est bon, ou mauuais, sale, ou honnesté, diffamatoire, ou non, pourueu qu'ils en fassent leur profit, & remplissent leur bourse) si, dis-je, ces Escriuains, qui semblent maintenant surpasser les mousches, si non en nombre, du moins en importunité, changeoient de batterie, & que leurs escrits dressassent les ieunes hommes à la vertu, ou

leur enſeignaffent quelque ſcience, nous ne verrions pas tant de ieuneſſe eneruee, perduë & quaſi abrutie. Il ſeroit à deſirer que la Juſtice y mit ordre : car il importe grandement pour le repos public, pour la conſeruation de l'Eſtat, & pour maintenir le reſpect qu'on doit porter aux Princes, aux Legiſlateurs, & aux Loix. Mais ie vous prie de me faire encore part de quelqu'autre raiſon pour eſtablir l'eſtre diuin dedans l'eſprit de quelques eſceruelez, avec leſquels ie me retrouue ſouuent, & qui font gloire de ne croire rien qui ſoit.

CHAPITRE V.

*Dedans lequel on continuë à prouver
que Dieu est.*

BIEN que les raisons
que ie vousay dedui-
tes iusques icy , ne
soient que trop suffi-
santes pour faire esuanouyr l'A-
theisme: neantmoins puis que vous
prenez plaisir à ce discours, & qu'il
semble que desirez vous en seruir
pour desabuser quelques vns de
vostre cognoissance, i'adiousteray
encore quelques raisons, que ie
prendray d'entre celles que i'ay
plus amplement deduites en la
question contre les Athees.

6. raison.

Il est impossible qu'il y ait vn
tel nombre de Planettes , & d'e-
stailles, comme il y a, & que les
Cieux

Cieux puissent garder la distance
qui se trouue des vns aux autres,
fil n'y a quelqu'un qui leur ait
donné ces proportions, & qui les
ait fait en ce nombre, plustost
qu'en vn autre; car ie vous prie,
pourquoy est-ce que la Lune est
esloignee de nous de cinquante
& six semidiametres de la terre,
lors qu'elle est en sa moyenne di-
stance: pourquoy le Soleil se re-
cule-il de nous par 1182. semidia-
metres, quand il est en son Apogee,
lequel se retrouue ceste annee
1624. au dixiesme degré de l'Escre-
uiffe: & pourquoy n'est-il distant
que de 1101. semidiametres, lors
qu'il est en son Perigee, qui se re-
trouue au signe du T. Qui est-ce
qui luy fait faire ce chemin en des-
cendant plus bas en l'un qu'il n'e-

stoit en l'autre de 81 semidiames-
tres.

Ie vous en pourrois demander
tout autant de Saturne, de Iupiter,
& de Mars, & m'enquister pour-
quoy ils sont tantost plus haut,
tantost plus bas, mais ie serois trop
long: c'est assez que vous voyez
clairement qu'il faut necessaire-
ment aduoüer qu'il y a vn estre di-
uin reglant tout, & qui n'est réglé
de personne.

Car le Soleil n'en seroit pas
moins Soleil, bien qu'il fust plus
prés, ou plus esloigné de la terre,
aussi bien que les estoiles pour-
roient encore estre estoiles, si elles
s'absentoient plus loing de nous
que de quatorze mille semidiame-
tres terrestres. La proportion qui
se trouue entre tous les corps du
monde, conclud aussi qu'il y a vn

*Proportio
de la ter-
re avec
toute la
solidité
du mon-
de.*

Dieu, qui a fait tout l'Vniuers en poids, en nombre, & en mesure: car la terre n'auroit pas vne pareille raison avec le Soleil, qu'a 1 à 140, & avec la Lune que quarante à avec 1, & ne seroit pas en comparaison de toute la solidité Spherique du monde visible comme vn à 2744000000000, (c'est à dire qu'elle n'auroit pas la proportion qui est entre l'vnité, & deux trillions, sept cents quarante & quatre bilions: ce que d'autres diroient deux mille sept cents quarante & quatre milliards, prenant chaque milliard pour dix cents millions:) la terre dis-ie n'auroit pas ceste raison avec les planettes, & avec tout le monde, s'il n'y auoit vn souuerain Architecte, qui leur eust donné ces quantitez, ces mesures, ces distances, & ces

Proportion de la terre avec toute la solidité du monde.

proportions.

LE D. Vous me feriez vn singulier plaisir, si vous vouliez prendre la peine de me dire toutes les proportions qu'ont les cinq autres planettes, & toutes les estoilles avec la terre, & par ensemble.

LE THEOL. Il me semble qu'il est plus à propos de passer outre, tant parce que vous pouuez voir tout cela en la 19. 26. & 33. raison, que j'ay rapportee en la susdite Question contre les Atheïstes, que parce que Tycho Brahe, Kepler, Blancan, l'Astronomie Danique, & plusieurs autres deduisent ces matieres fort amplement. C'est pourquoy ie mets fin à ce discours, c'est assez que vous consideriez attentiuement d'où la raison tiree de ces distances, & proportions prend sa force, qui est

que le Soleil, ou quelqu'autre planette que ce soit, n'a peu se determiner soy-mesme à l'esloigner tantost plus, & tantost moins, & n'a peu faire que sa grandeur fust autre qu'elle n'est: non plus que la terre n'a pas eu 7200 lieues en son circuit, parce qu'elle n'a voulu en auoir dauantage, mais parce que celuy qui l'a faite, ne luy a voulu donner que cela. Il n'y a pas moyen d'en trouuer vne autre cause; cherchez tant que vous voudrez pourquoy le circuit du firmament a cent millions huit cens mille lieues; & par consequent pourquoy son diametre est de trente & deux millions, & septante & quatre mille lieues, vous n'en scauriez donner autre raison, sinon que Dieu l'a ainsi voulu pour beaucoup de raisons que

*Circuit
de la terre
& du
firmament
de combien
de lieues.*

Impietè des Deistes,
nous ne ſçaurons qu'en Paradis.

*Mouue-
ment de
la Lune,
& des
eſtoiles.*

On trouue auſſi la meſme rai-
ſon dedans les mouuemens cele-
ſtes, n'y ayant autre cauſe que la
volonté diuine, pourquoy la mer
ſe meut pluſtoſt en 25 heures,
qu'en 100, ou en quelqu'autre
nombre; pourquoy la Lune court
tout le Zodiaque en 27 iours, &
huit heures, & r'atteint le Soleil
en vingt neuf iours, & 13. heures:
pourquoy le Soleil demeure 365
iours 5 heures $\frac{1}{2}$ à faire ſon cours
annuel, & pourquoy ſon Apogee
eſt 28800 ans, auant que d'acheuer
tout le Zodiaque, qui eſt le temps
du propre mouuement des eſtoil-
les. Car nous ne pouuons dire que
le Soleil, ou les autres Aſtres ayent
beſoin de ces mouuemens pour
leur conſeruatiſon, veu que le re-
pos ne leur eſt contraire; & bien

que quelqu'un pensast que ce mouuement fust necessaire pour empescher la corruption ou de l'Astre, ou des indiuidus qu'il s'imagineroit estre là, comme de nouueaux mondes, il faudroit neantmoins venir à sonder la raison pourquoy ces indiuidus auroient besoin de ce mouuement, & toujours auoir recours à vn premier moteur, si bien que de quelque costé que nous nous tournions, il faut confesser que Dieu est.

LE D. Je voy clairement que toutes ces raisons sont irrefragables, car bon gré mal gré qu'on en ait, il est necessaire que tout ce qui est limité en grandeur, en figure, en nombre, en poids, & en mouuement, ait esté limité par quelqu'un, lequel n'ait point de bornes, & qui soit infiny, veu

qu'il est impossible, qu'on ne vienne à vne premiere cause, qui donne l'estre, la difference, & toutes les proprieté à toutes choses, & qui ait aussi bien déterminé le nombre des genres, & des especes, comme celuy des indiuidus. Or auant que nous sortions de ces mouuemens, ie vous supplie de me dire si on pourroit prouuer combien de lieuës fait chaque estoille du firmament en vne heure.

LE THEOL. Vostre demande peut auoir vn double sens, car vous demandez cela ou du mouuement qu'elles ont d'Orient en Occident, par lequel elles font le tour entier en vingt quatre heures, ou du mouuement, qui leur est propre de l'Occident à l'Orient, lequel ne s'acheue qu'en

vingt & huit mille huit cents
ans, comme i'ay desia dit. Si vous
parlez du premier mouuement,
qu'on appelle rapide à cause de sa
vitesse, il est fort facile de sçauoir
combien chaque estoile de l'e-
quinoctial fait de lieuës en vne
heure : car il ne faut que diuiser
100800000. qui est le nombre des
lieuës de tout le circuit du firma-
ment par vingt quatre, & le quo-
tient donnera les lieuës pour cha-
que heure du iour, qui seront
4200000. c'est à dire, quatre mi-
lions deux cents mille : De là mes-
me vous pourrez sçauoir com-
bien de lieuës feront ces estoiles
dedans vne minute d'heure, car
4200000. diuisé par 60. qui sont
les minutes d'une heure, donne-
rent sept mille lieuës, que les sus-
dites estoiles ferôt en vne minute;

*Combien
de lieuës
font les
estoiles en
vne heu-
re.*

*Combien
de lieuës
font les
estoiles
en vne
minute,
& en v-
ne secon-
de par le
mouue-
ment ra-
pide.*

si par apres vous diuisez 7000 par 60, le quotient vous donnera les lieües, que font les estoiles en vne seconde minute, & seront 116 lieües $\frac{40}{60}$. On pourroit ainsi proceder à l'infiny pour trouuer combien de lieües elles font en vne tierce, vne quarte, vne dixiesme, & ainsi des autres. Ce qui monstre clairement qu'il faut que nous ayons receu nostre entendement d'un estre infiny, puisque nous aperceurons qu'il penetre tout sans borne, & sans fin.

Mais pour trouuer le chemin qu'elles font l'espace d'une heure par leur propre mouuement, il est vn peu plus difficile, neantmoins ie vous le diray pour en auoir la memoire fresche, car ie l'ay desia fait sur la fin de la 33 raison contre les Athees, au lieu que j'ay cy de-

uant allegué. Or pour entendre *Combien*
 cecy, il faut supposer qu'elles ne *par leur*
 font en vn an entier que si secon- *propre*
 des, & par cōsequent qu'en l'espa- *mouue-*
 ce de 1461.iour qui font 4 ans, elles *ment.*
 font 204 secondes, ou 12240 tier-
 ces seruez-vous maintenant de la
 regle de trois, en disant si 1461
 donnent 12240 tierces, combien
 vn iour en donnera-il, vous aurez
 8 tierces ^{752.}_{1461.} qui est le chemin par-
 ticulier des estoiles durant vn
 iour.

De plus il faut sçauoir qu'il y a
 dedans le circuit du firmament *Combien*
 1296000, lesquelles respondent *de secon-*
 à 360 degrez: or ces degrez, ou *des de-*
 ces secondes de tout le circuit *dans le*
 donnent 100800000 lieuës, donc *circuit du*
 si (qui est ce que font les estoiles *firmamēt*
 en vn an par leur propre mouue-
 ment) donneront 3967 lieuës

avec ^{71.}_{162.} donc le mouuement d'un iour, ſçauoir eſt 8'' ^{752.}_{1461.} donneront vnze lieuës, & preſque ^{1.}_{25.} que les ſuſdites eſtoiles feront en vn iour. D'où il ſenſuit encore par vne infallible raiſon qu'elles chemineront en vne heure 1380. pas qui reſpondent a 21. quatrieſme, 27. cinquieſmes, 12. ſixieſmes, & 27. ſeptieſmes. Bref vous ſçaurez quel chemin elles font en vne minute, ſi vous diuiſez 1380. pas par 60. car vous aurez 23. pas que font les eſtoiles, qui ſont dedans l'equinocſial. Par où vous voyez quelle proportion il y a entre leur mouuement rapide, & ceſtuy cy, qui leur eſt propre, veu que par celuy la elles font 7000. lieuës en vne minute, & par ceſtui cy 23. pas.

Le D. Je prendray encore la hardieſſe de vous demander à

*Combien
de lieuës
elles font
en un
iour, en
vne heu-
re, en vne
minute
par leur
propre
mouue-
ment.]*

quel espace de la terre respondent
 23. pas du firmament, si vous iu-
 gez que ie le puisse comprendre.
 Le Theol. I'ay aussi monstré cela
 au lieu susallegué, où i'ay dit que
 la raison qu'il y a du circuit du fir-
 mament 100800000. au circuit
 de la terre 7200. lieuës, se retrou-
 uoit presque entre 23. pas, & deux
 tiers d'une ligne: d'où ie concluds
 que les estoiles passent les ²/₃ d'une
 ligne sur la terre en l'espace d'une
 minute de temps. Mais il faut *Lieuës*
 que vous preniez garde que ie ne *François*
 parle que des estoiles de l'equino- *ses quel-*
 ctial, ou de celles, qui en sont fort *les.*
 proches, car tant plus elles s'en es- *15. mille*
 loignent, & moins font elles de *pieds de*
 chemin. De plus lors que ie vous *Roy en*
 ay parlé de lieuës, j'entends des *une lieuë*
 Françoises, auxquelles ie donne *François-*
 trois mille pas, & à chaque pas *se, ou 18.*
mille se-
lon quel-
ques vns.

5 pieds de Roy, sans m'astreindre à l'ancien pied des Geometres, qui n'est en commun vſage parmy nous.

Ne vous ſemble-il pas que l'homme a de merueilleuſes prerogatiues par deſſus les animaux, puis qu'il ſaſſuiettit le Ciel, & la terre par la force de ſon entendement? par lequel il trouue que ces eſtoiles ne ſont que 23 pas en vne minute, & en vne ſeconde quaſi 2 pieds, & en vne tierce 5 lignes, & mille autres choſes, qui ſemble-roient ſurpaſſer noſtre capacité, ſi nous n'auions quelque ſemence d'immortalité.

Le D. Il n'y a pas moyen de nier cela, c'eſt pourquoy ie croy fermement l'immortalité de l'ame, & que Dieu accomplira tous les deſirs que nous auons en cē

monde de ſçauoir, & de iouyr de toutes choſes, autrement il faudroit dire que nos ſouhaits ſeroient inutiles, & que la nature nous ſeroit maſtre de nous faire deſirer ſi ardemment ce qu'il nous ſeroit impoſſible d'acquérir ſi Dieu ne le nous donnoit.

LE THEOL. Nous ne manquons d'autres raiſons pour conuaincre les Athees, telles que ſont celles qui ſont priſes de cet Axiome, *tout ce qui ſe meut, eſt meū par quelqu'un: ou, tout ce qui eſt, a eſtre d'un autre, qui ne reçoit ſon eſtre d'ailleurs, excepté Dieu qui a ſon eſtre de ſoy-mesme.* Mais ie me contente de les auoir deduites en la 1^{re} queſtion ſur la Ge-neſe, d'où ie vous en rapporteray encore deux; L'une ſe prendra de la verité, & l'autre de la bonté, & de l'eſtre ſouuerain.

7. raison.

Pensez, si vous pouuez, quand il n'a pas esté veritable que quelque chose estoit future, ou passée: que si vous ne sçauriez vous imaginer ne l'un ne l'autre, & que neantmoins ne l'un ne l'autre ne puisse estre veritable sans la verité, il est impossible de s'imaginer que la verité ait fin, ou commencement, donc elle est eternelle, & par suite necessaire, elle est Dieu; car si la verité a commencé, ou si elle doit finir, il estoit vray que la verité estoit avant qu'elle fust, & apres qu'elle ne sera plus, il sera vray qu'elle ne sera plus, or le vray ne peut estre sans la verité, donc apres qu'il n'y aura plus de verité, il y aura de la verité, car la verité sera que la verité ne sera plus, donc la verité sera, & ne sera pas, ce qui est une absurdité trop manifeste

renuersee & refutée.

II

manifeste; pour laquelle finir, il faut confesser qu'il y a vne verité eternelle; laquelle ne depend d'ailleurs, & est Dieu mesme,

S. Augustin se sert aussi d'une raison prise de la verité, lors qu'il dit.

August.
in soliloq.

Si veritas non est, quia consequitur veritatem non esse, verum esse, quod si dixeris veritatem non esse, simpliciter verum non esse, saltem ex parte, & secundum quid verum erit, at omne secundum quid est, atque dicitur facta collatione & habita proportionem cum alio, quod est simpliciter, quandoquidem illud quod est secundum quid, tale per participationem existit; cum igitur sit aliquid verum ex parte, secundum quid, & participatione, necessario debet esse verum simpliciter, & per essentiam, à quo cetera veritatem suam repetant, eique ferant acceptam, quæ veritas est ipsemet Deus.

Acheuons ce discours par l'au-

H

8. raison.
prise de
S. An-
selme.

tre raison tirée de la suprême
bonté en nous adressant à elle a-
uec S. Anselme en son Profologe.
O Seigneur, nous croyons que
vous estes si grand qu'on ne peut
rien penser de plus grand, ny de
meilleur; faud a-il dire que telle
nature n'est point, parce que le fol
a dit en son interieur qu'il n'y a-
uoit point de Dieu? Certainement
lors qu'il escoute ce que ie dis, lors
qu'il m'entend prononcer, & as-
seurer qu'il y a vn estre si bon,
qu'on ne sçauroit en conceuoir vn
meilleur, il entend quelque chose
si grand, qu'il ne peut y auoir rien
de plus grand: or ce qu'il conçoit,
est en son entendement, bien
qu'il n'entende pas que cela soit
réellement, & de fait, car c'est au-
tre chose, qu'on ait cela en l'intel-
lect, & autre chose qu'il soit en

estre ; & le Peintre pensant à ce qu'il doit faire, sçait bien mettre difference entre ce qui est à faire, & ce qu'il a desia fait, & cognoist que ce qui est à faire, n'est pas encore fait.

Le sole est donc conuaincu que du moins il a en son entendement vne chose si grande, qu'il ne peut y en auoir de plus grande, car il m'escoute, & m'entend, & tout ce qu'il entend, est en son entendement. Or l'estre, qui est le plus grand de tous ceux qu'on peut conceuoir, ne peut estre dedans le seul entendement, car s'il est dans le seul intellect, on peut conceuoir qu'il est reellement, & en effect ; ce qui est plus grand que s'il estoit dedans le seul entendement. D'où il s'ensuit que si cet estre, par dessus lequel on n'en peut

concevoir vn plus grand, est dans le seul entendement, cela mesme qui est le meilleur, & le plus grand de tout ce qu'on peut concevoir, fera l'estre, au delà duquel on en pourra concevoir vn plus grand, ce qui ne se peut dire, ny ne peut estre, il faut donc necessairement qu'il y ait vne chose non seulement en l'intellect, mais reellement, & de fait, qui soit si bonne, & si excellente, qu'on n'en puisse concevoir vne meilleure, & que vraiment il n'y en puisse auoir vne plus excellente, laquelle sera ce grand Dieu, qui nous a faits, & formez à son image pour le seruir, l'aymer, & l'adorer, & pour iouyr de sa diuine essence en la gloire des bien-heureux.

Vous pouuez tirer de semblables raisons de tout ce que nous

voyons icy bas: car il n'y a propriété aucune, laquelle ne depende de Dieu, & ne soit vne veritable participation de ses perfections, comme quand nous disons que le Ciel est grand, il faut que Dieu soit plus grand: mais d'une grandeur plus releuee, & plus eminente, laquelle n'ait aucune imperfection: si la terre est, si le Ciel, si le Soleil a l'estre, il faut conclure qu'il y a vn estre, incomparablement plus excellent, selon la maxime de tous les Philosophes, *propter quod vnumquodque tale, & illud magis.* 9. Raison.

De plus, si vous pensez à l'eternité, à la toute puissance, à la souveraine bonté, à la Iustice, à la sagesse, à l'entendement, à la volonté, bref à tout ce que nous pouons dire, vous trouuerez qu'il ne peut y auoir nul temps, nulle bon;

10. *Rai-
son.*

té, nulle Iustice, nulle sagesse, nul entendement, nulle volonté dedans les estres finis, si premièrement vous n'aduoüiez qu'il y a vn estre eternal, tout puissant, souverainement bon, & iuste, sage & sçauant à l'infiny, de qui depend le temps, & tout ce qui est icy bas. Car le temps ne peut s'estre faict soy-mesme, & nos puissances, nos bontez, nostre iustice, & toutes nos autres facultez n'ont pas leur estre d'elles-mesmes, il faut donc qu'elles l'ayent receu de quelqu'un, lequel n'ait pas reçu le sien d'ailleurs, autrement nous retomberions en la mesme absurdité.

11. *Raison*

Et puis, si l'n'y auoit point d'estre eternal, independant, souverainement sçauant, iuste, & bon, nos pensées seroient meilleures

que cet estre souuerain, d'autant qu'il ne seroit pas en estre, & ne pourroit y estre, & neantmoins seroit dedans nos entendemens: il ne seroit pas en estre, côme nous supposons, il n'y pourroit estre: car qui est-ce qui le feroit, & qui luy donneroit estre? Et par ainsi cet estre souuerain seroit meilleur n'estant qu'imaginaire, & prôduit par nostre seule pensee, laquelle ne met rien en l'estre des choses, que s'il estoit reellement en soy-mesme, & qui ne se peut pas concevoir, & est tout à fait impossible. Par où vous voyez qu'il est si necessaire que Dieu soit, qu'il est infiniment necessaire, qu'il soit impossible que Dieu ne soit pas. Si vous comprenez ces raisons, & que vous les puissiez entendre, & deduire bien à propos, quand

vous vous trouuerez parmy ces malheureuses compagnies d'Atheïstes, & de libertins, ie m'asseure que vous les ramenez au bon chemin, & les contraindrez de dire, & confesser ingenuement, qu'il est impossible que Dieu ne soit, & d'aduouër qu'il est necessaire qu'il y ait vn estre souuerain en toutes perfections, duquel depend tout ce qui est en tout l'Vniuers.

CHAPITRE VI.

Par lequel les Medecins sont iustifiez, contre ceux qui disent qu'ils sont le plus souuent Atheistes, & où il est monstre que les hommes sçauants soit en Mathematique, soit en Philosophie, soit en la Cabale, ne sont ny Athees, ny Deistes, ny Libertins.



E D. Je vous demanderois volôtiers d'où vient que les Medecins, les Mathematiciens, & ceux qui ont beaucoup estudié en Philosophie, & à la science de la Nature, sont estimez Athees, & se moquent de toute sorte de creance: car ils ont ce bruit là, ce qui n'est pas à mon aduis sans suiect: & croy

que cela est en partie cause pourquoy tant de ieunes hommes fuient ceste impieté, parce qu'ils voyent que c'est le sentiment des plus sçauans, sans mettre les plus grands, & les plus riches en ligne de conte, lesquels ne monstrent que trop par leur tyrannie enuers les pauvres, par leurs opressions, & par leur maniere de viure à qui la regardera de bien près, qu'ils ne croient point qu'il y ait de diuinité. C'est la seule difficulté qui me reste sur ce sujet, c'est pourquoy ie vous prie de m'esclaircir là dessus, afin que nous passions outre.

4. sortes
de person-
nes soup-
çonnees
d'Athe-
isme, ou
Liberti-
nage,

LE THEOL. Il semble que vous ayez desseing d'attaquer 4. sortes de personnes, lesquelles ne sont pas telles que vous les faites, entre lesquelles vous donnez le premier rang aux Medecins, & les distin-

guez d'auec les Philosophes. Je
sçay que les Medecins n'ont be-
soin de ma deffence, leur preu-
d'homie, & leur vertu estant trop
esclatante pour faire éuanouir
toutes les calomnies dont on les
voudroit noircir. Si est-ce que i'en-
treprendrois hardiment de faire
vne Apologie en leur faueur con-
tre tous leurs ennemis, & médi-
sans, n'estoit que la plus part de
leurs liures donnent vn clair, & so-
lemnel dementir à tous ces cajo-
leurs, qui parlent sans sçauoir ce
qu'ils disent. Vous pouuez voir en
la question contre les Athees
combien facilement la Medecine
nous porte à la recognoissance
d'vn vray Dieu. Je me contenteray
pour ceste heure de vous rappor-
ter le sentiment que Galien a eu
de Dieu, vous ne sçauriez refuser

son tesmoignage , car il estoit Payen, ie m'asseure que tous les Medecins du monde, s'ils ont l'esprit bié fait, aduoüeront ce qu'il a couché disertement par escrit au 3. liure de l'vsage des parties chap. 10. Voicy le passage comme ie l'ay retenu en Latin.

Galien a
reconnu
Dieu.

At verò si de eiusmodi pecudibus plura verba fecero, melioris mentis homines mihi fortè succenseant, dicant que me polluerè sacrum sermonem, quem ego conditoris nostri verum hymnum comparo; par où vous voyez qu'il appelle ces liures de l'vsage des parties vn hymne fait à la loüange de Dieu, d'autant qu'il n'y a corps, il n'y a membre, ny veine, ny nerf, ny artere, qui ne rende vn euident tesmoignage que Dieu est, si on considere leur ordre, leur grandeur, leur figure, leur action, leur vsage,

& tout ce qui les concerne: Suy-
 uons maintenant avec luy. *Existi-*
moque in hoc veram esse pietatem, non si
taurorum hecatombas ei plurimas sacri-
ficauerim, & casias, aliaque sexcenta
odoramenta, ac unguenta suffumigave-
rim; sed si nouerim ipse primus, deinde &
alijs exposuerim quanam sit ipsius sa-
pientia, quæ virtus, quæ bonitas.

Voilà les trois attributs que les
 Theologiens donnent aux trois
 personnes de la bien heureuse
 Trinité, comme S. Thomas le de-
 clare subtilement, & fort au long
 en la premiere partie de sa Som-
 me, question 39. Article 8. Escou-
 rez le reste. *Quod enim cultu conue-*
niente exornare omnia, nihilque suis be-
neficijs priuatum esse voluerit, id perfe-
ctissimæ bonitatis specimen esse statuo, &
hac quidem ratione eius bonitas hymnis
nobis est celebranda: hoc autem omne in-

3. attri-
 buts ap-
 propriés
 aux 3.
 personnes
 de la Tri-
 nité reco-
 gnus par
 Galien.

uenisse, quo pacto omnia potissimum adornarentur, summa sapientiæ est: effecisse autem omnino quæ voluit, virtutis est inuictæ, ac insuperabilis. Ne igitur mireris Solem, Lunam, & uniuersam aliorum astrorum seriem summo artificio dispositam esse; ne uete attonitum magnitudo eorum, vel pulchritudo, vel motus perpetuus, vel circuituum certa descriptio reddat, adeò ut si inferiora hæc comparaueris parua tibi videantur esse, & omni ornatu carere. Etenim sapientiam, & virtutem, & prouidentiam hîc quoque similem inuenies. Considera enim mihi materiam ex qua quodque factum est, & ne temerè tibi persuadeas ex sanguine menstruo & spermate immortale animal posse conflare, aut imparibile aut semper mobile, aut splendidum, & pulchrum æquè ac Sol est. Sed ut Phidiæ artem expendis ita & artem omnium conditoris perpende.

Galenus
soli tribuit
animam,
eum illi
vocat animal.

Prenez garde à vne chose fort importante, qui est que Galien aduouë que le Ciel, & le Soleil ont esté faicts, encore qu'il estime qu'ils ayent vne ame; ce qui est contre certains ignorans, lesquels faisans les Platoniciens, se plaisent à rouler l'ame vniuerselle de tout le monde dans leur creuse imagination, pensans qu'il n'y a point d'autre Dieu que ceste ame chimeriquement vniuerselle de tout l'Vniuers. Mais Galien, plus sçauant que tout ce qu'ils font, confesse que ceste ame depend de Dieu. Passons outre

Sed te fortassis attonitum reddet Iouis Olympici ornatus undiq; mirabilis, ebur lucidum, aurum multum, magnitudo totius statuæ: porro si ex luto eiusmodi videas, contemptim fortasse præterieris: at non item certè quisquis est artifex, ar-

tisque in operibus dignoscenda peritus;
sed laudat Phidiam pariter siue lignum
vile, siue lapidem quemcunque, siue ce-
ram, siue lutum similiter videat ab illo
ornatum, attonitum enim facit idiotam
quidem materia, artificem autem artifi-
cij pulchritudo.

Age iam, & tu natura peritus sis, ut
te non idiotam, sed Physicum nomine-
mus; relinque materiarum differen-
tiam, & ipsam artem nudam conspice;
& cum oculi constructionem consideras,
organum visorium mente complectere,
cum verò pedem, instrumentum ambu-
latorium, & parvam, & abiectam esse
partem animalis pedem quis neget?

Magnum verò & pulcherrimum om-
nium quæ sunt in mundo, esse solem, ne
hoc quidem ignoramus: sed hoc conside-
ra, ubi oportuerit locatum esse Solem in
uniuerso mundo, & ubi in animali pe-
dem necesse fuit, unde hoc intelligi potest?

Alium

Alium ipsi situm mente tribuens considera quid casurum sit, si enim inferius posueris Solem, ubi nunc est Luna, ardebunt hîc vniuersa; si verò superius ad Pyroentis, vel Phaetontis regionem, nulla terræ pars erit habitabilis propter vim frigoris. Cæterum quod Sol tantus sit, ac talis, quantus & cuiusmodi nunc est, id ei domesticum, & à se ipso inest: verum quod in hoc mundo solus sit, digerentis in ordinem, ac dispensantis est opus; cum enim tantus ac talis sit, nequaquam ei locum in vniuerso mundo aptiorem inuenias.

Or il faut neantmoins prendre garde que Galien a grandement failly en ce qu'il a dit que le Soleil auoit sa grandeur, & sa qualité de soy-mesme, aussi bien comme il a manqué, quant à ce qui estoit de la vraye religion, qu'il deuoit embrasser pouuant sçauoir;

fileust voulu l'en enquerter, qu'il n'y auoit que les Chrestiens qui recogneussent parfaictement la puissance, la sagesse, & la bonté de Dieu, & qui l'aymassent de tout leur cœur en le seruant, & l'adorant: ce que j'ay voulu dire en passant, afin de vous aduertir. Suyuons.

Caterum nec pedi sanè inuenias locum in corpore animalis commodiorem eo quem nunc obtinet. Aequalem in ambobus positionis artem considera, non enim frustra comparo honoratissimum sydus abiectissima omnium animalis particula Quid utilius calcaneo? nihil: sed ne is quidem in uniuerso mundo ponatur melius. Maximum, & pulcherrimum rerum omnium esse mundum quis tandem neget? Sed & animal velut paruum quendam mundum esse aiunt viri veteres natura periti, eandem nam-

que in ambobus inuenies sapientiam creatoris. Ostende igitur (aiunt) mihi in animalis corpore Solem , quid hoc rogas ? an ex sanguinea substantia adeò putredini obnoxia , ac lutu'enta) Solem vis generari ? Deliras , à miser hoc est reuera impium esse non quod à sacrificio abetineas , ac suffimentis. Solem qui tem non ostendam tibi in corpore animalis , sed ostendam oculum , organum lucidissimum & Soli quàm simillimum , ut in animalis particula : exponam autem & positionem eius , & magnitudinem , & figuram , & alia vniversa , ostendamque tam commode omnes habere , ut non potuerint habere aliter melius.

Pourroit-on desirer vne confession plus claire , ou plus franche d'une diuinité , laquelle a tout fait , & qui regit , & gouerne toutes choses par sa prouidence ? Or ie vous defie de pouuoir treuuer au-

cun Medecin lequel n'embrace
 ceste verité, & qui ne confesse que
 jamais Galien n'a mieux dit que
 lors qu'il a descrit la puissance, la
 sagesse, & la bonté de Dieu, les-
 quelles reluisent en chaque indi-
 vidu. Et afin que vous ne pensiez
 pas 'que ce soit vne boutade, en
 laquelle il se soit oublié, voicy ces
 paroles tirees du 17. liure du mes-
 me vsage chap. 1. *Si quis nulli sectæ
 addictus, sed libera sententia rerum con-
 siderationem inierit, conspiratus in tan-
 ta carniū, ac succorum colluuiē mentem
 tamen habitare, conspiciat item & cu-
 iusvis animalis constructionem (omnia
 enim declarant Opificis sapientiam)
 mentis quæ cælo * inest, excellentiam in-
 telliget ; tum opus de partium utilitate,
 quod sibi prius exiguum esse videbatur,
 perfectissimæ Theologiæ verum princi-
 pium constituet ; quæ Theologia multo*

* alias
 homini.

est maior, atque præstantior totâ Medicinâ. Non igitur soli Medico opus de usu partum est utile, sed multo certè magis Medico Philosopho, qui totius naturæ scientiam studeat sibi comparare, eumque oportet his sacris initiari.

Et au 2. chapitre blasmant les Athees il dit, *Vnum igitur ac maximum hoc nobis accedit ex hoc opere commodum, non tãquam Medicis, sed (quod eo est præstantius) tanquam scire aliquid cupientibus de vi ipsius opificis, quam Philosophorum nonnulli omnino esse negant, tantum abest ut animalibus prospicere fateantur, &c.* Bref pour monstrier la creance qu'il auoit d'une souueraine cause, il tesmoigne sur la fin de tous ses liures, qu'ils ne sont que comme vn Hymne, & vne loüange dresseë à la gloire de Dieu. C'est au chap. 3. & dernier, où il parle ainsi.

Hæc tota, ac tanta huius quod ad finem perduximus, operis commoda liber iuste, velut bonus quidam ^{ἱπποδῶς} explicat. Dico autem ^{ἱπποδῶν}, non enim qui ^{ἱπποδῶς} id est incantationibus utitur: sed quemadmodum apud poëtas ^{μελικῶς} (quos nonnulli lyricos appellant) in choris est ^{σπεῖον} quedam, atque ^{ἀντισπῶπος}, sic & tertius est ^{ἱπποδῶς}, quo stantes ante Deorum aras canunt, ut aiunt, hymnis Deos celebrantes: illi igitur librum hunc comparans, nomen ipsi illinc tractatum imposui.

Qui est quasi le mesme que si nous donnions ce tiltre aux liures que nous composons, *Loüange à Dieu*: en quoy Galien nous apprend nostre leçon; car nous devons rapporter toutes nos actions, & tout ce qu'il y a au monde, à sa gloire, & à son amour, puis que tout depend de luy, & qu'il est

la derniere fin de toutes choses. C'est assez (ie croy) pour defendre, & iustifier les Medecins, entre lesquels i'en recognois de grands seruiteurs de Dieu, & qui sont prests de répandre leur sang pour l'amour de Dieu, & pour la verité de la religion Catholique, s'il estoit question de ce faire.

LE D. Je suis merueilleusement satisfait, & entierement desabusé touchant ce qu'on m'auoit faict à croire des Medecins, & confesse ingenûment que ce que vous auez apporté de Galien est suffisant pour confondre tous les médians, & calomniateurs. Je vous prie de me dire vn mot des Mathématiciens, & des Philosophes, & des Cabalistes, car ie n'ay plus que ce doute sur ceste matiere.

LE TH. Si vous desirez estre in-

*Du Lau-
rent.*

*Defence
des Ma-
thema-
ticiens.*

formé plus amplement, lisez l'Anatomie du corps humain, que Monsieur du Laurent a faite, ie m'assure que vous vous rirez à bon escient de l'ignorance de ceux qui accusent les Medecins de Libertinage. Or ie viens aux autres, puis que vous desirez en estre esclarcy, & dis premierement que ce qu'on pense des Mathemati-
ciens, est vne fourbe, & vn conte fait à plaisir : car il n'est pas possible, si on n'est tout à fait hebeté, qu'on ne confesse qu'il y a vn premier moteur qui donne le branle à tous les Astres, qui d'une façon & d'un costé, & qui d'un autre, lors qu'on vient à considerer leur train si reglé, & leur course non iamais errante. J'ay eu cet honneur d'entretenir plusieurs fois quelques vns de ces personnages,

mais ie n'ay veu personne, qui
croye plus fermement vne diuini-
té, car quand ils considerent l'acti-
uité du Soleil, & la splendeur de sa
lumiere qui est si admirable que
nous ne sçaurions comprendre ce
que c'est, ils pensent incontinent
quelle doit estre la lumiere in-
créée, & infinie, d'où depend la lu-
miere créée, & finie du Soleil, & a-
uoüent franchement que comme
rien ne peut estre lucide, ou lumi-
neux sans la lumiere, aussi rien ne
peut auoir estre sans l'estre des e-
stres, lequel est le vray Dieu, qui
ne depend d'aucune chose, & de
qui depend tout ce qui est au ciel,
& en la terre.

Il n'est pas besoin de m'esten-
dre dauantage sur ce suieût, car
tous leurs liures crient, & ensei-
gnent haut & clair, que ce monde,

& toutes les parties, n'ont peu estre disposées comme nous les voyons, sans la prouidence d'un souuerain Seigneur: & puis i'ay deduit ces matieres icy fort au long en la question susdite, d'où vous pourrez prendre ce qu'il vous plaira. Or si l'on se retrouuoit quelque Mathematicien qui fust si étourdy, & si insensé que de oublier de Dieu, & de sa prouidence, ie serois d'aduis qu'on le bannit, & qu'on luy fist perdre la vie de laquelle il seroit tout à fait indigne. Mais on ne fera si il plaist à Dieu en ceste peine, car ie ne croy pas qu'il y en ait aucun qui se laisse emporter à ceste extrême impieté, & folie insupportable, que de penser que ces mouuemens celestes si bien ordonnez, soient sans vn premier moteur qui les conserue, &

qui leur donne le branle.

Passons donc aux Philosophes, & disons que nous n'auons point de motifs plus puissans en la nature pour recognoistre le Createur de toutes choses, que leurs discours, par lesquels ils font paroistre que comme par la force, & l'industrie de l'entendement nous rassemblons la varieté des indiuidus en vne mesme espee, les diuerses especes en vn mesme genre, & cathégorie, & les diuers genres en vn seul estre, quand nous entendons tout par ceste diction *en*: ainsi faut-il confesser que tous les estres particuliers se rapportent à vn seul estre, duquel ils dependent, qui est Dieu. Je ne veux pas vous rapporter vne infinité de passages de Platon, d'Aristote, & des autres Philosophes, pour vous

*Les Phi-
losofes
deffen-
dus.*

Eugub.
de peren-
ni Philo-
sophia.

2. sortes
de Caba-
listes.

monstrer la cognoissance qu'ils ont eüe d'une diuinité, & l'estat qu'ils en ont fait, de peur d'estre trop long en ce discours, voyez seulement Eugubin au liure qu'il a composé sur ce suiet.

Quant à ce qui est des Cabalistes, soit que vous les preniez pour ceux qui n'ont que la Cabale, commune parmy les Rabins, laquelle se sert des lettres, & de leurs combinations pour treuver quantité de secrets, & matiere de discours, soit que vous entendiez les autres, qui font estat de sçauoir la verité de la nature, ses causes, & ses principes, vous vous estes mépris, car les vns & les autres discourent fort aduantageusement de la diuinité, & de ses perfections, & attributs. Ceux-là mesmes font vne quantité de noms afin d'ho-

norer l'Eternel par diuerſes fa-
çons, & ſous diuerſes conſidera-
tions; & ceux cy recognoiſſent rel-
lement la preſence de Dieu en
toutes choſes que ſ'il leur eſtoit
poſſible ils le monſtreroient au
doigt à tout le monde, à ce qu'il
fuſt reconnu, ſeruy, & adoré par
tout l'Vniuers: ceux là prennent
l'Eſcriture ſaincte pour leur ſanal,
& ceux-cy en font plus grande-
ſtat que d'aucun autre liure: ceux
là fondent tout ſur le diſcours,
ceux-cy veulent eſtablir ce qu'ils
diſent ſur la realité des choſes;
bref les vns & les autres parlent
tres-dignement de l'Eternel, & de
ſa diuine prouidence, comme ie
pourray faire voir vne autrefois
plus amplement. Or de tout ce
que deſſus vous voyez qu'il n'y a
perſonne de quelque qualité, ou

condition qu'il soit, qui ne reconnoisse vne diuinité, de laquelle depend tout l'Vniuers; car bien que les Medecins, les Mathematiciens, les Philosophes, & les Cabalistes se puissent abuser, & decouoir en beaucoup de choses, si est-ce qu'en ce qui est de recognoistre vn vray Dieu, ils en sont tous d'accord, & ne pourroient autrement rendre raison de mille choses qui se rencontrent emmy la nature, s'ils ne presupposeroient vne souueraine cause infinie, & independante, par laquelle tout le monde est conserue, & subsiste en son estre.

CHAPITRE VII.

/ I

Dans lequel on voit que c'est que la Cabale, & quelles sont ses parties; & auquel le Deïste declare ce qui a esté cause de ce qu'il est tombé en impieté.

LE DEÏSTE.



E vous prie m'apprendre ce que c'est que la Cabale, de laquelle on fait vn si grand estat, & si c'est vne vraye science, ou non : car selon que vous en auez parlé cy deuant, il semble que ce soit quelque chose de grand, & de releué par dessus les autres sciences.

LE THEOL. Si la Cabale estoit telle que les Rabins disent, asseu-
rément elle surpasseroit toutes les

*opinion
des Ra-
bins con-*

thant la
Cabale.

Parties
de la Ca-
bale.

autres sciences: car ils veulent que par le *Beresith* בראשית, on cognoisse tout ce qui appartient à la nature, & par le *Mercaua* מרכנה tout ce qui concerne la diuinité. Il est vray que les Cabalistes choisissent particulièrement le *Mercaua*, & les Talmudistes le *Beresith*. Or entre tout ce qu'ils ont de plus excellent, ils se seruent particulièrement de leurs numerations qu'ils appellent *Sephirots*, par lesquels ils assurent que la sagesse diuine se respend sur eux, & donne à chaque indiuidu les trois degrez de vie, sçauoir est le vegetable, le sensible, & l'intellectuel: De plus, ils ont 32 chemins pour arriuer à la sapience; & 50 portes d'intelligence pour sçauoir tout ce qui appartient à la nature, & à la diuinité.

LE D. Je vous prie me fauoriser

tant

tant que de me dire qui sont ces
Sephiriots, & combien il y en a.

LE THEOL. Ils en content dix, *Les dix*
entre lesquels *Cheter* כתר est le pre- *Sephiriots*
mier, qui signifie vne couronne *avec au-*
representée par ☩ symbole de la *sant de*
Trinité, c'est pourquoy ils luy at- *noms de*
tribuent le nom essentiel de Dieu *usq's*
Ehiech אהיה, & disent qu'il influë par
les Seraphins au premier Ciel mo-
bile, & en toutes choses pour leur
donner l'estre. Le 2 Sephirot est
Hocma חכמה sagesse, qui influë avec
le grand tetragramme יהוה par l'or-
dre des Cherubins dedans le fir-
mament les idees de toutes cho-
ses. J'aurois beaucoup de choses à
rapporter sur ces deux noms, mais
passons outre de peur que cela
vous trouble la memoire.

Le troisieme Sephirot est *Bi-*
nah בנה, le nom duquel est *Elohim*

50. portes
d'intelli-
gence. &
32. voyes
Sapience.

Iesirah.

Les 3. let-
tres dites
meres.

אלהים, & influë par les Throfnés dans Saturne, & represente le saint Esprit, comme le 2 le Fils, & le premier le Pere: c'est de ce sephirot qu'ils tirent leurs 50 portes d'intelligence. De plus, ils tirent du nom *Elohim* les 32 chemins de la sapience, d'autant que ce nom est repeté trente & deux fois en la Genèse, auant que l'homme soit formé, comme si toutes les creatures auoient esté faites par les zirufs, ou diuerfes transpositions de ce mesme nom *Elohim*. Le Iesirah que i'ay rapporté sur le 207 probleme de Venetus, appelle א, ב, & ו les trois meres entre les lettres, que les Cabalistes accommodent à ces trois sephirots: א au Pere, & au sel; ב au Fils, & au mercure: & ו au saint Esprit & au soulfhre. Je laisse les autres applications de

Ces trois lettres à la loy de Nature, à celle de Moyse, & à celle de Grace; aux Ebaz, Thmuraths, & zirufs des elemens, & à la ligne, au triangle, & au quarré.

Le 4 *sephiroth* est (*hesed* חסד) commencement, son nom est ה, & influë par les Dominations dans Iupiter les exemplaires de tous les corps. Le cinquième est *Ghebourah* severité, & force גבורה, lequel a le mesme nom que le troisième. & influë par les Puissances, & par Mars la guerre, &c. Le sixième est *Tiphareth* תפארת grace, qui influë la lumiere, & la vie par les Vertus, & par le Soleil: il a pour son nom *Eloah* אלה. Le septième, נצח *Netse* victoire, influë l'amour de la justice dans Venus, par les Principautez, & a pour son nom יתרה צבאות *Iehoua tse-naot*, & produit les vegetaux. Le

huitiesme est *Hod* הוד loüange influé par les Archanges , & par Mercure la concorde avec son nom , עלהים אבאות *Elohim tseuaot*. Le 9 יסוד influé ce qui sert à accroître les choses d'icy bas , par les Anges, & par la Lune, & a pour son nom אלהי , ou שדי *Elohai*, ou *Sadai*, Dieu vivant, & tout puissant. Le dernier sephirot est *Malchout* מלכות Empire , qui influé par les ames bien heureuses & par les creatures raisonnables le sçauoir, & l'industrie, ayant pour son nom *Adonai* אדני, seigneur.

*Loüange
Rabines-
que des
dix Se-
phirot.*

Voila les dix numerations par lesquelles les Cabalistes veulent que Moysé soit paruenü à la connoissance du *Beresit*, & du *Merca-na*; les diuers rayons par lesquels Dieu nous depart tout ce qui est icy bas; la chaisne d'or avec la-

quelle Iupiter attire tout à soy: l'eschelle de Iacob, par laquelle nos prieres, & nos vœux montent à Dieu, & ses graces descendent à nous: en fin ils veulent que les 10 Cathegories, & les Cieux leur soient attribuez, & que Moyse ait surmonté les dix especes de charme, desquelles Ammonino, & Amaël Magiciens de Pharaon se seruoient, par les dix vertus de ces Sephirots respondantes aux dix Commandemens de Dieu.

Vous pouuez encore remarquer qu'on les appelle *Belimah* *Belimah*. בלמה, par ce qu'ils sont des nombres tres-purs sans addition, ou que les choses diuines se comprennent mieux par vne profonde meditation en silence, que par discours. Je ne vous dy point qu'ils pensent qu'Adam eut la science

de toute la nature par ces numérations, & que Moÿse fist ses miracles par les mesmes; que Salomon cogneut toutes les plantes, & acquit la grande sagesse, qui le faisoit admirer; & mesmes que le Messie doit faire tous ses prodiges, & miracles par ces Sephirots, car cela est assez vulgaire: bien que les autres dient que ç'a esté par la vertu du grand nom *יהוה* que tout cela a esté fait.

LE D. le vous supplie me donner quelque exemple, lequel me fasse comprendre la façon dont les Cabalistes se seruent de toute ceste cabale.

*Le nom
tetra
gramme
& ses
loüanges.*

LE THEOL. Je le veux, & suis content de me servir du grand nom de Dieu pour cet effet, car ils ont beaucoup pris de peine à dire tout ce qu'ils ont peu penser sur

ce subiect. Ils veulent donc que la premiere lettre represente la simplicité de l'essence diuine, lequel compose toutes les lettres, & contient tous les nombres, car il vaut dix; c'est pourquoy les Chaldeens representent le grand nom tetragramme avec vn seul, trois fois repeté.

C'est ce nom par lequel ils pensent que Moyse a fait des merueilles, & qui par sa vertu a créé le Ciel, & la terre, comme si toutes les creatures n'estoient que ce nom estendu par tout; le *n* y est deux fois, à ce que le premier represente la production *ad intra*, qui est en Dieu, & le second la production *ad extra*; celui-là respond à la pensée, celui-cy à la parole, celui-là est le modelle, & l'idée, & celui-cy en est comme

152 *Impieté des Deistes,*
l'effect.

Et tous deux representent les deux natures qui sont au Verbe eternal incarné : car le premier π qui suit apres ' lequel signifie le Pere, nous montre la nature diuine; apres lequel suit le γ symbole du saint Esprit: le second π respond à la nature humaine; ou bien les deux π nous feront ressouuenir de l'egalité des deux Personnes produites par le Pere, signifié par γ qui vaut dix, autant que les deux $\pi\pi$, lesquels multipliez l'un par l'autre font 25, le double duquel donne 50 pour le grand Iubilé.

Il n'y a que trois lettres diuerses en ce grand nom, lesquelles sont toutes circulaires: car si vous multipliez γ , ou π , ou γ , c'est à dire 10, ou 5, ou 6, ces nombres se rencontrent tousiours à la fin de la multi-

plication', car dix fois dix font cent, & dix fois cent font mille, qui a tousiours dix à la fin, & est le cube des cubes : de mesme cinq fois cinq font 25, & six fois six trente six, & ainsi iusques à l'infiny. Ils multiplient aussi ce ternaire de lettres par soy mesme, afin de treuuer neuf Cieux, & neuf ordres d'Anges : & disent que Moÿse entendit ce nom en trois fois 72 lettres, qui font 216, autant que le cube de six : De plus, qu'ils pensent que le *טורה Torah* ne soit autre chose que ce grand nom *Schemhamphoras*, & qu'il contient deux millions de lettres, autant qu'il sortit d'ames d'Ægypte, y compris les vieillards, les femmes, & les enfans.

Or ils tirent le susdit nombre 216 de 3 versets du 14 de l'Exode, *Exo. 14* chacun desquels contient 72 let-

tres au texte Hebrieu, lesquelles produisent autant de noms explicatifs du tetragramme, chacun de trois lettres, & ce en dix manieres differentes par autant de *Zyruphs*, ou commutations de lettres : ils tiennent aussi ce nombre de 72 en יהוה par leur *Ghematrie*, car י vaut dix, mais avec ה il fait 15, & puis ו , ה , valent 21, & finalement les 4 pris ensemble valent 26, or 10, 15, 21, & 26 font septante deux, par lesquels ils disent que Moysé prosterna non seulement les 6 cents chariots d'Ægypte, mais aussi les 72 potentats, & langages representez par autant de grenades, & de cymbales qui estoient au bord de la robe du grand Prestre, autant qu'il y eut de langues, & de nations diuisees à la confusion de Babylone. Enfin le grand nom de Dieu est si

remply de myſteres qu'on en pourroit faire des volumes entiers, ſi nous voulions ſuiure la force, ou la ſignification qu'ils donnent aux nombres : car ſi toſt qu'ils apperçoient quelque rapport d'iceux avec quelque effect de la nature, ou de la grace, ils ſe iettent incontinent ſur ces conſiderations, comme quand ils diſent que la derniere porte d'intelligence eſtoit reſeruee au Meſſie, d'autant qu'il deuoit nous deliurer parfaictement de l'Ægypte des pechez, & des imperfections, nous donnant la beatitude, qui eſt la fin du *Binah*, & le commencement du *Hochmah* ce qu'ils penſent auoir eſté ſignifié par la deliurace, & iſſuë de l'Ægypte, laquelle eſt repetee 30 fois ſeulement en l'Eſcriture ſaincte pour nous

monstrer le grand Iubilé de nostre Redemption, que le Messie a peu donner, Moÿse n'ayant entré qu'en la 49 porte denotée par le quarré des 7 inferieurs sephirot.

Ces Sephirot, vestemens, ou courtines, qu'ils attribuent à la divinité, ont plusieurs noms qu'il fera bon que vous sçachiez, afin de les comprendre plus facilement, voicy comme vn docte Poëte les décrit, lequel commence par la plus basse, que nous auons nommee *Malchut*.

Malchut. Tantost elle est le regne, & tantost on l'appelle

*La pierre de Saphir, l'esponse toute belle,
Le puits des vives eaux, & la profonde mer,
Où fleuves, & ruisseaux se viennent abysmer:
La terre des vivans, & le liure de vie,
De science le bois, dont l'homme eut trop d'envie
La Royne des oyseaux, aigle de dignité,
Et l'habitation de la divinité.*

La seconde son nom dessus le iuste fonde,
Pource que le seul iuste est fondement du mode: *Iesod.*

Elle s'appelle encor le bon entendement,
La memoire, la paix, & le commandement:

Le haut mont de Sion, l'alliance, & le signe,
Et le iour du repos entre les sept insigne.

La tierce est la loüange, & le Roy nompareil, *Hod.*
La fenestre colomne, & le lieu du conseil.

La quarte est dite aussi du conseil le Pretoire, *Netsa.*
Colomne du bras droit, le Prestre & la victoire.

Mais celle du milieu, ou reluit enfoncé *Tipheret*
Le nom quatre-lettré qui n'est point prononcé,
Se reuest d'ornement, & beauté admirable,
Et de l'arbre de vie à l'homme desirable.

En ce lieu fut couché l'un des peres qui vit
L'eschele au Ciel touchant, qui son ame ravit,
D'où les Anges benis remontent, & descen-
dent

Au gré de l'Eternel duquel seul ils dependent.

La sixiesme s'appelle, & force, & verité, *Gheburah.*
Aquilon, iugement, merite, ou purité:

Elle s'affuble encor de tremeur, & de crainte,
Le symbole d'Isaac qui en eut l'ame estreinte.

Isaac superieur portant le propre bois
Dont l'ardet feu d'amour le brusla sur la Croix.

La septiesme retient misericorde toute, *Chefed.*
L'amour, & le my-iour, & d'Abraham la route,

Binah.

L'huiſtième Ciel ſpiral de prudence habillé
Eſt la grande trompette, & le grand Jubilé,
La fontaine & ſourgeon qui d'eau de vie ar-
rouſe

Le blanc mont du Liban d'où doit venir l'Eſ-
poſe.

'Hochma.

Le neuſième plus haut de ſageſſe entourné
Eſt de penſer profond, & de vouloir orné:

Cheter.

Mais celui qui dans ſoy les autres environne,
• w Enſoph Se nomme l'Orient, le rien, & la couronne,

Nous parlerons, Dieu aydant,
vne autre fois de ces numerations,
ou ſephirots plus amplement, ſi ie
voy qu'il en ſoit beſoing, deſquels
il me ſouuient auoir diſcours en
la 50. queſtion ſur la Genèſe: ſou-
uenez vous cependant que ces di-
uerſes ſignifications des ſuſdits
ſephirots, ſeruent grandement
pour entendre le Zoar, & les au-
tres Cabaliſtes, qui ont preſque
touſiours en la bouche quelque vn
de ces noms.

Jamais ie n'aurois fait si ie vou-
lois vous raconter tout ce qu'ils
disent de leurs vingt & deux let-
tres , entre lesquelles ils pensent
que les trois meres du Iezirah $\alpha \beta \gamma$
representent les trois mondes, ^{3. meres.}
sçauoir est l'intelligible, le cele-
ste , & l'elementaire ; & par les
vingt & deux lettres multipliees
les vnes par les autres , ils croient
qu'on peut cognoistre le nombre
des estoiles , & de toutes les autres
creatures : voicy leur nombre

3403424372953868586410367999104.

Ils adioustent à ces vingt & deux
lettres les cinq finales pour faire
le nombre de vingt sept, cube du
ternaire, que Platon a pensé tenir
le lieu de la forme, du masse, & de
l'agent, comme 8 cube du binai-
re tient le lieu de la matiere, du pa-
tient, & de la femelle. Les , lettres

*Mystere
Rabines-
que sur la
langue
Hebrai-
que.*

susdites representent les trois éléments, les 12 signes du Zodiaque, & les 7 Planettes; mais les seules lettres ne sont que comme les parties materielles des indiuidus, iusques à ce que les poincts, ou voyelles leur donnent la forme, la vigueur, & l'ame : & les accents leur apportent les formes operatrices, lesquelles respondent aux influences superieures : de sorte que celuy qui prononcera la langue Hebraïque comme il faut, representera l'harmonie celeste, & archetype; parce que les lettres representent toutes les parties materielles, les poincts monstrent les formes, & les autres accents les operations du composé : si bien que ces 22 lettres seroient à ce conte les idees de toutes les creatures formees, & à former.

Voila

Voila en sommaire ce que le Zohar, & les autres Rabins, Talmudistes, & Cabalistes disent de leurs lettres, s'imaginans Dieu dedans son *Ensoph*, qui darde ses rayons, & ses influences par le grand nom יהוה representant les 4 elemens, & par les 10 Sephirot sur tout ce qui est icy bas selon les idees du Verbe eternal, que quelques vns pensent estre le *Mettatron*, l'ame de l'Vniuers, & la forme des formes, d'où les nombres formels prennent leur source, & leur origine, & vont aboutir au *Malchut*, qui represente la Lune Archetype, la cerue Vnicorne, ou le quadrilette ממ , qui se diuise en 4 fleuves à guise de la fontaine de *Genf. 2.* la Genese chap. 2. Le premier fleuve ou canal est l'amour *Ghedulah*; Le 2 la iustice, ou la force *Geburah*;

le 3 la vertu agissante & masculine
Tipheret ; & le 4 la feminine re-
 ceuante *Malchut* ; ces 2 derniers
 sont le Soleil, & la Lune, l'espoux,
 & l'espouse des Cantiques : le sens
 litteral, & le spirituel, la iustice, &
 la misericorde, le blanc, & le rou-
 ge Cant. 5. *Dilectus meus candidus, &*
rubicundus, l'eau, & le sang, qui sor-
 toient du costé de nostre Sauueur.

LE D. Je vous assure que ces
 inuentions semblent estre mer-
 ueilleusement subtiles, & croy
 qu'il n'y a rien de plus excellent
 au monde que l'Alphabet He-
 braïque, si tout ce que vous auez
 rapporté des Cabalistes a quelque
 fondement en la nature. Mais ie
 n'entends pas bien la methode
 qu'ils tiennent pour treuuer tous
 ces mysteres, c'est pourquoy ie
 vous prie de me la faire compren-

dre; & me dire librement vostre aduis sur ces inuentions.

LE THEOL. Ils ont plusieurs fa-
çons pour venir à leurs mysteres,
esquelles ie ne treuve pas grand
fondement, car bien que ce qu'ils
disent de Dieu, & de ses perfe-
ctions, soit conforme à l'Escripture
saincte, & à la verité, ils le tirent ne-
antmoins de certains principes,
qui ne me semblent pas receua-
bles : c'est pourquoy mon senti-
ment est que toute la Cabale Ra-
binesque n'est qu'une pure inuen-
tion des hommes, qui ne peuuent
auoir autre raison de leur dire que
ce qu'ils sçauent *à posteriori* par les
effects, soit par science, soit par re-
uelation. Ce qui n'empeschera pas
que ie ne vous rapporte ce qui est
de leur methode, & de leur art.

La premiere façon s'appelle

L ij

1.
Six fa-
cons Ca-
balisti-
ques pour
philoso-
pher.

Etbas, c'est à dire transpositions de lettres, ce qui se fait en deux sortes; Premièrement par equiualence de nombres, lors que deux dictions contiennent vne mesme somme, ce qui se voit en *Metatron* מטרון qui comprend 314, aussi bien que *Sadai* שדי, c'est pourquoy ils le mettent, ou l'interpretent souuent l'un pour l'autre, d'où l'Arithmantie des Grecs semble auoir pris son origine, laquelle i'ay refutée en la 50. question sur la Genese art. 3. 4. & 5. L'autre sorte est par metatheses, & anagrammes, telles que sont celles desquelles ie me suis seruy pour expliquer la premiere parole de l'écriture sainte *Beresit*, en la 4. question art. 2. & 3. voicy vne transposition plus briefue au nom de Dieu *El*, & *El*

lo qui veut dire *non*, comme si on vouloit dire que nous comprenons mieux ce qui est des grandeurs diuines par la negative, que par l'affirmatiue; la lumiere diuine estant comme la nuit d'Orphee, & d'Hesiodé, ou comme vn *Enjoph* à nostre regard. Vous pouuez voir quelque chose de semblable dans le Cratyle de Platon touchant le nom d'Apollon.

La seconde façon est appelée *Thmurah*, qui fait les changemens materiels; la troisiésme *Ziruph*, laquelle fait les mutations, & combinations formelles, & n'est guere esloignée du *Zairagia* des Mores: or par ceste voye ils conioignent les 22 lettres de leur Alphabet, selon qu'ils ont appris du Iezira, qui parle ainsi. *Qua de re appendit luterus Deus, & permutauit eas, Aleph*

2.
3.

cum omnibus, & omnes cum Aleph, Beth cum omnibus, & omnes cum Beth, afin qu'ils ayent 22. Alphabets.

4.

La quatriesme façon est leur *Ghilgul* quotité numerale, par laquelle ils treuvent quantité de mysteres dans chaque mot selon la valeur de son nombre, comme quand en מלח *Malah*, c'est à dire sel, ils treuvent 78, lequel diuisé en deux donne 39, qui est vn nombre pareil à ce mot כוז *Cuzu*, qu'ils appellent le fourreau du grand nom; diuisé en trois parties ils ont 26, autant que vaut le tetragramme: ie laisse le reste d'autant que ie ne voy aucune raison en tout cecy.

3.

La cinquiesme façon est le *No-taricon*, qui met vne lettre, ou vne syllabe pour vn mot, ou pour vne lettre vn mot entier: c'est ainsi que par ces trois lettres מם ils signi-

fient la *Ghematrie*, le *Notaricon*, & le *Themurah*, qui sont les 3. parties de la table: & que par *Amen*, qui se lit dans *Isaye* chap. 65. vers. 16. ils *Isai. 65.* entendent *Adonai melech neeman*, c'est à dire le Seigneur Roy fidelle: & par ce mot du 3. *Psalme* רבים *Psal. 3.* *Rabim, multi insurgunt aduersum me*, ils entendent les Romains, les Babylo niens, les Ioniens, & les Medois. Il seroit facile d'escrire aussi viste comme on parle, qui voudroit se seruir de ces abbreuiations.

Enfin la sixiesme façon est appelée *Ghematrie*, laquelle se sert des mesures, & des proportions. Mais laissons tous ces discours, puis que nous pourrions treuuer de semblables artifices en nostre Alphabet François, cela ne dependant que de l'institution, & de la volonté des hommes, c'est assez

que les Cabalistes nous fassent voir par les diuerses reuolutions, dont ils se seruent, qu'ils croient fermement que Dieu est, & qui luy attribuent les mesmes perfections que nous recognoissons, & adorons en la diuinité.

12. reuolutions de
יהוה

Leurs 12. reuolutions du nom tetragramme, qu'ils appellent *Havaioth*, afin que la vertu diuine passant par les 12. signes du Zodiaque, & par tous les Cieux iusques à nous, donnent vn certain telmoignage qu'ils ne s'esloignent point de l'arbre de vie qui porte douze fruiçts en l'an, vne fois chaque mois: ny des 12. portes de la cité celeste, ce qui nous represente nostre Sauueur, & le vray Paradis, auquel paruiendront tous ceux qui auront recognu le vray Dieu, & l'auront seruy selon la sainte vo-

lonté. Plaise à sa bonté diuine nous faire ceste grace, à ce que nous le benissions, & l'adorions éternellement avec tous les bienheureux. Je croy que tout ce que nous auons dit iusques à présent, est suffisant pour vous armer contre les Atheistes, & pour les faire rougir de honte en quelque cōpagnie que vous les puissiez treuuer, s'ils ne veulēt quitter leur impieté.

LE D. Ceste verité me semble si bien prouuee, qu'il n'est pas possible d'en douter, aussi n'ay-ie iamais voulu suiure ces malheureux Atheistes, qui sont indignes de viure, & croy que si Dieu n'estoit infiniment misericordieux, & souverainement bon, qu'il les reduiroit au neant, ou les puniroit d'une peine infinie.

LE THEOL. Il ne faut pas que

vous doutiez qu'il les punira, fils ne se repentent avant la mort: car estans hors la grace de Dieu, & ses ennemis iurez, ils meritent l'enfer, & tous les tourmens qui y sont.

LE D. Monsieur, ie sçay qu'en vostre religion vous tenez ces maximes, mais ie n'y trouue pas grande apparence: car seroit-il possible que Dieu, qui est si bon, voulust que sa creature fust à iamais miserable?

LE THEOL. Parlez vous tout à bon, ou si vous voulez vous donner carrière? comment, ne croyez vous donc pas que tout ce qui est en la Religion Chrestienne, est tres-veritable, puisque c'est Dieu mesme qui en est l'auteur? Il est vray que Dieu est souverainement bon, voire la bonté mes-

me, mais il est aussi iuste, comme il est bon, & par consequent il ne faut point douter qu'il ne chastie les meschans, aussi bien comme il recompensera les bons.

LE D. Monsieur, i'ay estudié à vne escole, laquelle ne m'a pas appris cela : car les maistres que i'ay eu, m'ont entretenu en ces pensées, que c'estoit assez de croire en Dieu, mais que tout le reste auoit esté inuenté par les hommes, & pour ce suiet veulent que nous portions le nom de Deistes.

LE THEOL. Il y a long temps que i'ay ouy parler de ceste secte, mais assurez vous qu'elle ne vient que d'un pur libertinage, lequel a pris pied en France, lors que les maudites heresies de Calvin, Luther, & des autres heretiques y ont entré. S'il y eut iamais vne

grande porte ouuerte à toutes sortes de desbauches, d'impietez, & de trahisons, c'est celle-cy, par laquelle le Dragon à sept testes tasche d'attirer avec sa queue endiablee vne grande partie des hommes à sa suite pour estre à iamais damnez avec luy. Or ie suis bien aise que vous m'ayez descouuert vostre esprit: car le mal estant cognu, est à demy-guery, & me fais fort avec l'ayde de Dieu de vous tirer de cet erreur.

LE D. Vous appelez erreur, ce que i'estime veritable, neantmoins si vous pouuez me monstrez que ie suis en mauuais chemin, & que nos opinions sont fausses, ie ne seray point opiniastre, ains i'embrasseray volontiers ce que vous me proposerez.

LE THEOL. Il ne se peut faire

que vous ne ſçachiez que c'eſt que la Religion Chreſtienne, car vous eſtes François de nation, c'eſt pourquoy ie penſe qu'il ſuffit que ie vous propoſe, & vous maintienne qu'il n'y a que cceſte ſeule Religion qui ſoit la vraye, d'où il ſ'enſuit que la voſtre pretendüe, & tout ce qu'il y en a au monde, ſont toutes fauſſes, & irreligions, non pas religions, excepté la pure, ſainte, & veritable Religion des Chreſtiens, qui ſont hommage au Verbe eternal, & à toute la Trinité bien-heureuſe, de leur ame, de leur corps, & de tout ce qu'ils ont, & deſteſtent tous ceux qui deſaduoiënt Ieſus-Chriſt noſtre Sauueur, & Redempteur, & quittent la voye qu'il nous a donnée pour aller regner avec luy au Ciel.

LE D. Pourriez vous me mon-

strer que vostre Religion fust telle que vous dites ? car bien que j'aye esté baptisé, & que j'aye receu la Confirmation; neantmoins estant plus grand, & plus aagé, certaines personnes de bon esprit, & de bon iugement (du moins ont-ils ceste reputation parmy les honnestes compagnies) m'ont fait entendre que la Religion Chrestienne ne seruoit que pour retenir les hommes brutaux en leur deuoir, afin que les loix en fussent mieux gardees: mais que les sages, & les esprits déniaisez, & releuez par dessus le commun, comme l'or par dessus les metaux, n'auoient que faire de telles considerations pour bien faire, la vertu estant aymee de tels personages pour la beauté qu'elle a en soy, & non pour l'vtilité, ou pour la peur

de quelque supplice. En quoy i'ay esté confirmé par la lecture que i'ay faite de quelques auteurs, qu'on estime tres-honnestes hommes, esprits forts, & excellens, & qui ont couché par escrit leurs aduis assez librement, tels que sont Charron, & Cardan en leurs sagesse, & quelques autres.

LE THEOL. Il faut estre merueilleusement credule, & foible d'esprit, pour s'estre laissé persuader à ces ieunes folastres, lesquels vous auez hantez, que la Religion Chrestienne n'estoit faite que pour la manutention des loix. Est il possible que vous vous soyiez laissé aller aux cajolleries de ces badins, qui ne desirent rien davantage que de se donner du bon temps à quelque prix que ce soit? Faut-il que vous ayez perdu la foy,

que vous auez receuë au saint Baptesme , & à la Confirmation, par la persuation de quelques é-tourdis, qui cherchent, & taschent par tous moyens de quitter la crainte de Dieu, à ce qu'ils puissent commettre leurs excez , & qu'ils se veautrent dans l'iniquité, & dans la lubricité sans aucune synderesse & remords de conscience?

Bon Dieu, où en sommes nous! ne rougissez vous point de honte de vous estre laissé abuser si facilement, & d'auoir renoncé à la Religion Chrestienne avec si peu de raison ? Mais quoy, prenez bon courage, il ne tiendra qu'à vous si vous ne quittez cet erreur, & reue-nez à la vraye creance, sans laquelle il est impossible d'estre sauué. Dites moy de grace, qu'auez vous
treuvé

trouué à redire en nostre religion? enseigne-elle rien qui ne soit conforme à la droite raison, & favorable aux bonnes mœurs? le sçay qu'elle fait pallir, & trembler les meschans, & qu'elle les empesche d'effectuer leurs mauuais desseings si librement comme ils feroient, s'ils pouuoient tout à fait bannir la crainte de Dieu, & de sa iustice de leur esprit. le sçay qu'ils ont la religion Catholique en horreur, par ce qu'elle repri-
 mende leurs appetits dereglez, & leur defend ce qu'ils ayment, & cherissent par trop. le sçay qu'ils redoutent qu'on leur en parle serieusement, & qu'ils n'y veulent pas mesme songer, de peur que l'apprehension des iugemens diuins ne leur oste vne partie de la volupté, qu'ils prennent à assouir

*Raisons
pourquoy
les Liber-
tins quit-
tent &
haïssent
la Reli-
gion Ca-
tholique.*

leurs sentimens, & leur donner tout ce qu'ils demandent, & au delà. Bref, ie ſçay que iamaïs ils ne ſ'accorderont à ce qu'enſeigne la religion Chreſtienne, cependant qu'ils viueront à la façon des beſtes, & qu'ils eſpouſeront le party de l'appetit inferieur commun à l'homme, & aux brutes, & qu'ils ſe banderont contre la raiſon, laquelle voyant les motifs de noſtre foy, & conſiderât la beauté, l'honneſteté, & l'vtilité de la religion Catholique, ne peut qu'elle ne l'embrasse, & qu'elle n'aduouë, que ceſte religion ne peut eſtre venuë que de Dieu, ſi tant eſt qu'elle vueille cooperer avec les graces diuines, que ſon Createur luy depart pour l'eſclairer, lors que de ſon coſté elle conſidere, & peſe ſerieuſement toutes les rai-

sons qu'elle propose pour se faire
cherir, & embrasser.

Ostez donc de vostre esprit ce
qui vous a fait quitter la foy, & la
religion, & croyez fermement
qu'il n'y a rien dans sa doctrine,
qui ne soit honnesté, saint, utile,
& veritable : pour ce qui est des
Autheurs, que vous avez rappor-
tez, ie suis content que me dispen-
siez d'en dire mon aduis, car ils
ont desia vn assez mauuais bruit,
sans que i'y adiousté mon senti-
ment.

LE D. Monsieur, il me semble
que vostre discours m'a fait ressen-
tir ie ne sçay quelle lumiere, c'est
pourquoy ie veux y penser vn peu
plus serieusement : neantmoins
vous m'obligeriez fort si vous me
vouliez dire ce que vous iugez des
Autheurs que i'ay citez, car c'est

par la lecture que ie suis tombé es opinions que vous auez touchez, assurez vous que cela pourra me seruir à quitter l'opinion que i'auois conceüe de la Religion Catholique.

CHAPITRE IX.

Auquel le Theologien porte son iugement touchant les œuvres, & les opinions de Charron, & de quelques autres Escriptuains, & où ses impietez sont descouuertes, & refutees.

LE THEOLOGIEN.



IE sçay que c'est vne matiere fascheuse, & odieuse, lors qu'il est question de porter son iugement de

quelques Autheurs , soit qu'ils soient morts , soit qu'ils soient vi-
uans , c'est pourquoy ie n'entre-
prends pas de dire ce que ie pense
de ceux que vous auez proposez,
sinon parce que vous iugez que
cela vous pourra esclaircir sur vos
doutes, & seruir à vous tirer de vos
erreurs. Ce qui rend tels iuge-
mens odieux est parce qu'il est
difficile de persuader qu'on ne
fasse cela par enuie qu'on porte à
leur plume, & à leur gloire; ou
qu'on ne se vueille venger pour
quelqu'autre consideration , ou
qu'on ne vueille faire paroistre
qu'on est plus habile, plus iudi-
cieux, ou plus eloquent qu'ils n'e-
stoient: or tous ces motifs sont au-
tant blasmables, comme ils sont
vicieux, & indignes d'un vray
Chrestien. Aussi ne suis-je poussé

de ces respects, & aymerois beaucoup mieux conuaincre les erreurs, qu'ils auroient commis par des raisons contraires, que de les blasmer sous d'autres pretextes.

C'est ce que j'ay souuent pensé touchant la sagesse de Monsieur Charron, mais le temps, & le loisir ne me l'ont encore permis, & ay tousiours attendu que quelqu'autre l'entreprist donnant vne sagesse qui soit aussi Chrestienne, qu'humaine, & politique, à ce que la police, & la Religion se conjoignent par le lien d'une veritable harmonie, & qu'un chacun voye deux choses tres clairement: Premièrement, que la Foy, & la Religion Catholique ne repugne en aucune façon à la meilleure police, qui se puisse imaginer au monde. Secondement, qu'elle n'em-

pesche point la subtilité de l'esprit, ny les belles, & curieuses recherches, & inuentions, ny mesme les recreatiōs, & les voluptez honestes, vertueuses & raisonnables, à ce qu'il n'y ait pas vn homme capable de raison sur la face de la terre, qui voyant l'excellence, la beauté, l'vtilité, & la facilité de la Religion Catholique, ne la suiue, & l'embrasse courageusement.

Neantmoins puisque vous me pressez, ie vous diray vn mot de ce que ie pense des œuures de ce personnage, sans toucher à ce qui est des propos, qu'il tenoit és compagnies qu'il auoit coustume de frequenter, lesquelles estoient fort libertines, & ressentoient souuent l'Atheisme: ny à ces façons de viure, desquelles ie pourrois dire beaucoup de particularitez, fil

estoit à propos, & necessaire. l'en ay veu bien peu, lesquels ayans leu ces trois Veritez, & les discours qu'il a fait de la diuinité, & des mysteres de noltre foy, n'en fassent de l'estime: mais si on les considere de pres, on y trouuera beaucoup de maximes, lesquelles approchent fort de l'impieté, particulièrement en sa première Verité. Il y a plus de difficulté en sa Sagesse, de laquelle on iuge diuersement: les vns disans qu'elle est seminaire d'irreligion, & d'Atheisme: les autres confessans que si vn homme n'est bien sur ses gardes en la lisant, qu'il court ris que d'estre esbranlé en sa creance, & en sa Religion; il y en a qui disent qu'ils n'ont iamais rencontré vn meilleur liure, à cause que le style en est pressé, & nerueux, & que les

*Iugemēs
diuers de
la sagesse
de Char-
ron.*

maximes y sont druës, & frequentes, & ceux-là sont ordinairement libertins, & se moquent des ceremonies de l'Eglise, marris de ce qu'il leur faut garder ses ordonnances, sur peine d'estre declarez heretiques.

Or laissant à part les iugemens qu'on en fait, ie me contenteray pour maintenant (attendant quelque autre occasion, où i'examine toute sa Sagesse, si quelque autre, selon que ie souhaitte, ne me pre- vient) de dire que cet homme estant Catholique, & escriuant entre les Chrestiens, deuoit s'abstenir de plusieurs choses qu'il a escrit, ou du moins les deuoit tellement addoucir, & modifier, que personne ne fust choqué particulièrement en ce qui est de la verité de nostre foy, laquelle est la ra-

186 *Impieté des Deistes,*
cine de nostre salut eternal.

Je dy donc qu'il a eu tort (luy qui estoit homme de iugement, & qui preuoyoit bien que plusieurs se scandaliseroient de la façon qu'il traittoit la sagesse humaine, comme il a assez tesmoigné en sa Preface) qu'il n'a esclaircy plusieurs difficultez, & qu'il n'a parlé plus Chrestienncment, & plus religieusement, qu'il n'a pas fait dedans ce liure, duquel nous parlons maintenant.

Ce n'est pas que ie croye qu'un bon esprit se puisse peruertir par ceste lecture, car il fera comme l'abeille, laquelle succote ce qu'il y a de bon en la fleur, & laisse le venin, & ce qui est inutile, ou mauuais. Mais il y a bien peu de tels esprits parmy le monde, nommément s'ils ne sont cultiuez par vne

longue estude, & meditation en ce qui est de la vraye Philosophie, & de la Theologie: car c'est à ces esprits qui sont fournis de toutes sortes de sciences, & qui ont la Religion grauee bien auant dans l'ame, de pouuoir lire, & iuger de tels liures cōme est la susdite Sagesse, & non pas vn tas d'ignorans, qui parlent comme Perroquets en cage, sans sçauoir le plus souuent ce qu'ils disent, & qui font trophee de n'entendre ny Grec, ny Latin, se contentans de sçauoir se moquer de la Religion, & de blasphemer, & renier Dieu parmy leurs confidens.

LE D. Monsieur, obligez moy rant que de me dire quelque chose en particulier de ce que vous y trouuez à redire, afin que ie puisse voir si ce sera ce qui m'a entretenu

en ceste mienne opinion de laquelle ie vous ay parlé.

LE THEOL. Il faut encore icy faire distinction , car il y a deux impressions de cé liure: La premiere est de Bordeaux , & l'autre plus recente est de Paris, de l'an 1618, laquelle a esté corrigee, & par conséquent il y a moins à reprendre qu'en la premiere , ce sera peut estre celle là que vous aurez leuë.

LE D. Veritablement c'est celle de Bordeaux que i'ay leuë, c'est pourquoy ie vous prie de m'en dire vostre sentiment , sans neantmoins oublier ce que vous penserez de l'autre edition, afin que ie m'en puisse deormais seruir, si n'y a plus d'erreurs, ny de danger en la lisant.

LE THEOL. Ce seroit vne chose trop longue de parler de tout ce

qu'on pourroit reprendre en ces deux editions ; & puis vous auez desia à la fin de la derniere edition ce qui a esté osté de la premiere ; le parcourray seulement l'epitome qu'il a fait de sa Sageſſe, d'où vous pourrez tirer le iugement de tout le reſte.

Commençons par la preface, *ſept ex-
cuſes de
Charron,
frivoles
& refu-
tées.*
dedans laquelle il touche 7 points qu'il dit eſtre cauſes pourquoy on le blaſme ; Le premier eſt, qu'on prend les choſes autrement qu'il ne les entend, rapportant au droit ce qui eſt du fait : mais il euſt deu tellement eſclarcir cela, lors qu'il a eſté queſtion d'en entamer le diſcours, que perſonne n'eufſt eſté deceu, & qu'un chacun euſt peu facilement diſtinguer, lors qu'il parle de faire, ou de iuger, & quand il n'a que propoſé ſans re-

foudre; quand il parle par la bouche, & selon l'opinion d'autrui, & non de son creu; car comment veut-il que le lecteur fasse choix de ses propres opinions entre celles des autres, puis qu'il broüille tellement son discours, & pesselme ce qui est du sien, & ce qui est des autres, qu'il faudroit vn Argus pour le recognoistre, encore ne sçay-ie pas s'il en pourroit venir à bout.

Il me semble que c'est abuser, & perdre le lecteur, quand on embarrasse tellement le discours, que celuy qui le list, est en vn danger perpetuel d'espouser les pësees, & les resolutions de ceux qui sont introduits, lesquelles sont fausses ou ne valent rien, comme si c'estoient les conceptions, & conclusions de l'Autheur; si bien que le mal qui

suit de ceste lecture , peut iustement estre imputé à la façon d'escrire, dont l'Auteur s'est seruy, soit qu'il l'ait ainsi voulu par malice, ou par imprudence : ce qui faict que ie ne puis excuser Monsieur Charron, lequel est d'autant plus blasmable, qu'il sçauoit mieux, ou aussi bien qu'aucun autre, que son liure feroit beaucoup de libertins, & que sa Sageſſe en rendroit vn grand nombre d'insensez, tels que sont ceux qui vous ont seduit par leurs propos emmielez, ou pour mieux dire enuenimés des pensees de Charron.

Certainement il ne merite point d'excuse, quoy qu'il pretéde qu'on entend des actions exterieures, ce qu'il a dit des interieures, veu que c'est à faire à vn hypocrite, & à vn sot, indigne de la conuersation hu-

maine de faire tout au rebours à l'exterieur, & en presence des hommes, que ce qu'il croit & pense en son interieur: car pourquoy le corps a-il vne si grande correspondance avec l'ame, & les sens avec l'esprit, si ce n'est afin qu'ils se rendent conformes en leurs actions? Pourquoy l'ame a-elle vn tel domaine, & vn si grand ascendant sur son corps? est ce pas à ce qu'elle luy donne le mesme branle qu'elle a en soy-mesme? Et quoy, si l'esprit, & le corps n'ont qu'un mesme auteur, (si ce n'est qu'on nous vueille renouueller l'heresie des Manicheens avec leurs deux principes, l'un de la lumiere, l'autre des tenebres, l'un du corps, l'autre de l'ame) pourquoy est-ce que nous déguisons nos comportements? Voyez, ie vous prie, où ceste
pernicieuse

pérnicieuse doctrine de Charron;
& de ceux de sa suite nous meine;
car si le sage a tout autre chose en
l'ame que ce qu'il fait paroistre au
dehors, quelle assurance y aura il
en ces paroles: lors qu'il dira vous
estre amy, ce fera lors qu'il vous
trahira, & pourchassera vostre
mort, ou vostre hōneur, & par ainsi
tout le fondement de la police, &
des estats s'en ira par terre.

Je ne croy pas qu'il y ait hom-
me d'esprit, & de iugement qui ne
die que iamais plus grande folie
n'a peu monter en la teste de
Charron, que lors qu'il a voulu es-
tablir ceste sottise, & la faire pas-
ser en maxime de sagesse; & me
semble que c'est assez pour decre-
diter tous ses discours, puis qu'ils
sont la pluspart fondez sur ceste
fole opinion. le vous donne à pen-

*Pernicieu-
se doctrine
de Charr-
ron.*

fer combien il est esloigné de la pensée , & de la volonté de Dieu, lequel ne prise rien tant qu'une simplicité , & candeur en nos actions, paroles, & pensées.

Si iamais aucun liure politique, ou sagesse humaine a esloigné du sentiment de la Religion , de la crainte de Dieu, de la vraye sagesse , & de l'establissement d'une vraye police, telle qu'elle doit se retrouver entre ceux qui suivent la droite raison, c'est celuy de la Sagesse de Charron, car lors qu'il est question de descrire les conditions du sage, il se rend si ridicule, qu'on voit assez que c'estoit un esprit extravaçant , & remply de presumption, lequel se croyoit plus habile, & de meilleur iugement que tout le reste des hommes, auxquels il veut prescrire des

loix non seulement de leurs actions exterieures, mais aussi de leurs pensees les plus secretes, comme fil estoit quelque souverain Dictateur ou Legislatteur.

Je sçay que vous me direz que son opinion n'est pas telle, ou du moins si cruë comme ie la fais: qu'il ne parle pas pour nous obliger à suiure ses propositions, ny pour nous lier à ses pensees, mais qu'il nous laisse en nostre liberté, & qu'il doit estre permis à vn chacun de donner son aduis, & de publier le sentiment qu'on a sur chaque chose, nommément en ce qui appartient aux mœurs, & façons de viure. A quoy d'autres adiousteront qu'il y a de grands personnages fort sçauans, & fort iudicieux, qui maintiennent qu'il n'y a rien dedans ceste sagesse, qui ne se

*Excuses
des Char-
ronistes
frivolos.*

puisse dire, & soustenir, s'il est bien entendu, comme il faut.

Iustification de Charron.

Mais ie responds à cela, premierement que ie ne doute point que beaucoup de choses ne puissent estre bien entendues, & tirees à vn bon sens, & se peut faire que Monsieur Charron n'ait pas tousiours eu mauuaise intention en publiant ses pensees; ce qui le peut iustifier là dessus, est que dés son vivant il a corrigé, & addoucy beaucoup de points, qui se retrouuoient en la premiere edition, comme il paroist en la seconde, & le testament qu'il fist vn peu deuant sa mort. lequel est en partie rapporté en l'eloge qu'on a faict de sa vie, qui se retrouve au commencement de la seconde edition: car ce testament nous donne assurance de sa bonne volonté,

& de sa pieté enuers Dieu, auquel il semble auoir recours.

Secondement, ie respons que son liure ne laisse pas d'estre dangereux pour les esprits foibles, tels que sont les libertins, & les Deistes, encore qu'un esprit fort, bien fait, & qui a la crainte de Dieu empreinte bien auant dedans son ame, en puisse faire son profit. En suite dequoy il eust deu tellement proposer ses opinions, que les Libertins n'eussent point eu d'occasion de fortifier leurs erreurs par la lecture de son liure, veu qu'il scauoit que ce siecle icy porte multitude d'esprits remuants, qui ne cherchent qu'à ruiner l'estat, & la Religion.

Tiercement, ie dy qu'il n'est pas permis de publier son sentiment, lors qu'on iuge, ou qu'on doit pro-

bablement iuger qu'il nuira, & fera cause de la perte de plusieurs esprits. Or ie maintiès que ces liures de la Sagesse ont plus fait de mal, que de bien, & ont fait égarer de la vraye Religion vn plus grand nombre de personnes, qu'ils n'en ont tiré d'erreur.

*Diuerses
coustumes
indiffé-
rentes.*

Ie passe sous silence beaucoup de choses qu'il a proposées, comme si luy seul les eust apperceuës, ou qu'elles eussent surpassé l'esprit du vulgaire, lesquelles neantmoins sont aussi bien recogneuës par les rustiques, & villageois, comme par ces esprits releuez, & déniaisez, qu'il nous décrit : car qui ne sçait, & ne confesse que nous auons mille coustumes, & façons de viure, & de signifier ce que nous auons dedans l'ame, lesquelles feroient aussi bonnes, ou

meilleures, si nous viuions d'autre façon ? Par exemple qu'il seroit aussi à propos de disner debout, comme assis: de se toucher à la poitrine, ou à quelque autre partie du corps pour s'entre-saluër, comme d'olter le chapeau : de porter vn habit plus leger, ou plus pesant, fait d'une piece, ou de plusieurs, & 1000 autres choses semblables, lesquelles sont si indifferentes que nous nous accommodons aux vtz, & coustumes de toutes sortes de nations, parmy lesquelles nous auons à conuerser, bien que plusieurs practiquent le contraire, comme les Espagnols, ou Italiens, qui retiennent leur particuliere façon d'habits, bien qu'ils demeurent en France.

Pour ce qui est de ces choses là chacun en peut iuger comme bon

luy sèble: mais il se faut biẽ garder d'estendre ces pensees à ce qui est de nostre foy, & de nostre créance, cõme fõt vn tas d'ignorãs, lesquels ayans leu ceste Sageſſe, ſ'estiment plus habiles que ceux qui ont viẽ leur vie à l'estude des bonnes lettres, & à la contemplation des myſteres diuins. Vous les verriez avec leur modestie Academique metrans tout en doute, & prenans autant de peine à se prendre garde de croire que les Catholiques ont la vraye Religion, comme ſils defendoient vne ville contre l'ennemy. Pourquoi cela? Parce qu'ils ont leu dedans la Sageſſe de Charron qu'une des conditions du ſage est iuger de tout, & ne ſ'aheurter, ou ne s'attacher à rien: afin que l'esprit de ces ſages demeure indifferant, general, & vniuerſel. Mais

c'est maintenant à eux que i'en
veux, & suis content d'excuser
Charron (par vne supposition pre-
tendue qu'il n'ait point eu mau-
uaise intention : nous supposons
bien quelquefois des choses im-
possibles) & rejeter tout le blasme
sur ces esprits boufons, & malins:
car bien qu'il ait dit quelque cho-
se en la premiere edition, qui les
ait peu mener au libertinage, ne-
antmoins il faut auoir recours à la
2^e impression, car estant la dernie-
re, & corrigee de sa main, elle doit
estre tenue pour la meilleure, or
il fait paroistre combien il est
esloigné du Pyrrhonisme en ma-
tiere de religion. Voicy ses paro-
les au 2^e chapitre de son Epitome.

*Ceste liberté tant au iuger qu'au surseoir
ne touche point les choses diuines, & sur-
naturelles, qui sont par dessus nous, des-*

*Profes-
sion de
Charron.*

quelles nous ne parlons en ce liure, lesquelles nous devons admirer, adorer & tout simplement recevoir. Il en dit encore autant au 2 liure de la Sagesse chap.2. Nous n'entendons les veritez diuines qui nous ont esté reuelees, lesquelles il faut recevoir simplement avec toute humilité, & submiſſion, sans entrer en diuiſion ny diſcution, la faut baiffer la teſte, brider, & captiuer ſon eſprit, captiuantes intellectum ad obſequium fidei.

Il faut donc remarquer que les Deïſtes tirent de pernicieuſes conſuſions du liure de Charron, contre ſon intention: ie le veux *ex hypotheſi*: car bien qu'il ait dit en la premiere edition page 351, que toutes les religions fourniffent de miracles, prodiges, oracles, myſteres ſacrez, ſaincts Prophetes, certains articles de foy, & creance

necessaire à salut : & quelques autres choses, lesquelles prises à la lettre sont tres-fausse, n'y ayant que la seule Religion Catholique qui ait de vrais miracles, de vraies Propheties, & de vrais Prophetes, & articles de foy : Neantmoins il n'y a point d'apparence qu'il vueille signifier par ces paroles, qu'aucune Religion que la Catholique ait rien de tout ce qu'il a dit, en verité, & realité (bien que toutes les sectes se vantassent de cela) mais il a seulement voulu expliquer ceste vanterie, laquelle est tres-fausse, estant impossible qu'aucun miracle se fasse en faueur des religions bastardes, qui n'ont rien qu'irreligion, & ne cognoissent pas le vray Dieu, ou le recognoissans ne suivent pas sa volonté, & la doctrine qu'il nous a reuelee.

Fauorable explication des paroles, & de l'intention de Charron.

Ce qui nous pourroit faire ainsi iuger de l'intention de Charron, est le liure des trois Veritez, auquel il monstre clairement contre les Athees, les Iuifs, les Mahometans, & les Heretiques, qu'il n'y a aucune autre vraye Religion que la Catholique : car lors qu'il est question de iuger de l'intention d'un Auteur sur quelque point, ou controuerse proposee, il faut auoir recours aux lieux, où il a traicté ceste matiere fort au long, & expressément, & non pas où il n'en a touché qu'un mot en passant, ou en quelque lieu, d'où on peut tirer des raisons pour & contre.

LE D. Monsieur, ie suis fort aise que vous vous soyiez vn peu estendu sur ceste matiere, mais ie demeure quasi en suspend si vous re-

soluez en dernier lieu que la lecture de Charron soit pernicieuse, & dangereuse ou non.

LE THEOL. Il me semble que vous n'auçz aucun sujet de douter de cela, puis que vous me tesmoignez vous mesme, que ceste lecture vous a faict tomber en vos erreurs, ou qu'elle vous y a confirmé; & puis que telles gens, comme vous, qui prennent l'effort à la premiere pensée, qui flatte leur humeur, & s'accommode à leurs desirs, ne peuuent qu'ils ne soient esbranlez, lors qu'ils lisent ce que dit cet Autheur, *Que l'immortalité de l'ame est la plus creüe parmy toutes les nations, & la moins prouuee; qu'il faut suivre la nature; que nous naissons Chre-* Erreurs
& impietéz de
Charron
refutées.
stiens, Turcs, ou Iuifs; & que la religion n'est pas en nostre choix, & eslection: que la religion est tenuë par moyës humains,

maines, & plusieurs autres choses qu'il met en auant, la plus part desquelles sont fausses, car entre toutes les choses morales ie ne sçay pas ce qui est mieux prouué que l'immortalité de l'ame, comme il paroist par les raisons qu'on rapporte pour ce suiet, desquelles i'ay fait vn abbrege en respondant à la 12. obiection des Athees; si vous vous donnez la patience de lire ce que i'en ay dit, i'estime que vous confesserez que Charron a tort.

Pour ce qui est de la nature, qu'il dit qu'il faut suiure, si vous l'entendez de la nature de l'homme, telle que Dieu l'a créée avec ses graces, & en la iustice originelle, i'accorde que si on l'auoit encore en ceste integrité, qu'il seroit bon de la suiure; il est maintenant tres-mauuais, car elle est decheute de ceste

perfection, de sorte que l'appetit
sensuel, & brutal a souuét le dessus,
& maistrise la raison au lieu de luy
obeyr, c'est pourquoy il faut sui-
ure la pilte que la foy nous mon-
stre, & gourmander nos passions,
afin que nous puissions retourner
à ceste premiere perfection, en la-
quelle les sens obeissoient à l'es-
prit à poinct nommé, & l'esprit à
Dieu. Il n'y a point d'autre moyen
d'estre restablis en cet estat, qu'en
embrassant le chemin que la reli-
gion Catholique nous enseigne,
ce que vous ne ferez pas facile-
ment en lisant la Sageffe de Char-
ron, laquelle se soucie fort peu des
choses immortelles, & diuines, car
cette Sageffe humaine ne vise qu'à
bien faire ses affaires en ce mon-
de, & viure paix, & ayle, comme on
dit.

*But de la
Sageffe de
Charron.*

Sageſſe
Chre-
ſtienne.

Or la ſageſſe du Chreſtien volé plus haut, car elle cherche l'honneur, & la gloire de Dieu aux dépens du ſien, ſi beſoing eſt, & ne respire autre choſe que l'amour de ſon Createur, ſ'eſtimant bien-heureuſe lors qu'elle endure quelque peine pour ce meſme amour: c'eſt elle qui fait courageuſement mépriſer tout ce qu'il y a en ce monde, honneurs, biens, dignitez, plaiſirs, & la vie meſme, & qui nous eſleue autant par deſſus nous-meſmes, comme nous ſommes éleuez par deſſus les beſtes.

Ce qu'il dit que nous naiſſons Chreſtiens, Iuiſs, &c. eſt auſſi cauſe de ce que beaucoup de ieunes folaſtres, & cerueaux mal timbrez, qui le liſent, ne font conte de la vraye religion, non plus que des autres, qui ſont fauſſes, au lieu qu'ils

qu'ils deuroient remercier Dieu de ce qu'ils font Chrestiens; ce que ne leur apporte pas le païs, ny le ventte de leur mere, mais le sang de nostre Redempteur Iesus-Christ, lequel opere sur eux au Baptisme, qui est la porte de la vraye religion, & comme le premier effect de la predestination; auquel Dieu les a choisis entre vn milion d'autres, qui ne reçoient point ceste premiere grace; laquelle conuainc Charron que la vraye religion ne se tient pas par moyens humains, car le premier moyen, qui est le Baptisme, aussi bien que tous les autres (tels que sont tous les Sacremens) sont voyes surnaturelles, lesquelles ne peuuent venir que de la main de Dieu, estant impossible que tous les hommes du monde; ny que toute la nature

La religion ne se tient pas par moyens humains.

nous puisse donner la grace de Dieu, ou nous esclairer par la lumiere de la foy.

Passons maintenant à Cardan, car de tout ce que dessus vous pouvez conclurre qu'on ne peut lire la Sageſſe de Charron ſans peril d'eſtre eſbranlé en la creance Catholique, ſi ce n'eſt quelque eſprit fort, ſçauant, & bien ferme en la foy, qui ſe ſerue de ceſte lecture. Nous reſeruerons pour vne autre-fois à peſer, iuger, & examiner toutes les autres opinions de cet Auteur.

CHAPITRE X.

*Dans lequel le Theologien porte son
iugement touchant les œuvres de Car-
dan, & de Iordanus Brunus.*



LE vous diray nettement mon aduis touchant Hierosime Cardan, car il a fait paroistre beaucoup plus d'impieté en ses escrits, lesquels nous ne pouuons parcourir en ce peu de temps qui nous reste, c'est pourquoy ie me contenteray de vous monstrier combien quelques vns de ses liures sont dangereux, tels que sont sa Sagesse, & beaucoup d'autres passages de son Commentaire sur les Iugemens de Ptolemee, & de son liure de la Subtilité, l. ii. dedás lequel il mon-

*Liures
perni-
cieux de
Cardan*

stre ce qu'il est en matiere de religion, & qu'il n'a autre pieté que l'extravagance de son esprit. Il veut quasi par tout faire accroire qu'il est si grand naturaliste, qu'il decredite la foy tant qu'il peut, comme vous pouuez voir en ce qu'il a escrit de l'Astrologie Iudiciaire: car il parle de la venuë de nostre Sauueur, & de la loy Chrestienne, qu'il a instituee, comme si les Astres estoient causes de tout cela, confondant par ces erreurs le Createur, & la creature, & faisant que ce qui est tout surnaturel, & miraculeux, vienne des causes naturelles.

C'est en quoy tous les Astrologues ignorans font naufrage, manque de faire distinction entre les œuvres naturelles, & les surnaturelles, entre la grace, & la nature.

Or ie ne veux pas examiner par le menu tout ce que Cardan a dit sans raison, ou sans iugement dedans son Asttologie, ce m'est assez de vous auoir aduertiy qu'elle est farcie d'erreurs ou contre la foy, ou contre la raison, ou contre les bonnes mœurs. Mais parlons vn peu de sa Sagesse, car c'est le tiltre *Sagesse de Cardan.* le plus specieux qu'il eust peu prendre pour attirer les sages à la lecture de ce liure, que quelques vns portent au lieu de Manuel, ou Enchiridion de deuotion.

Que voudriez vous de plus dangereux que ce qu'il aduance dedans son troisieme liure, lors qu'il veut que les Princes fassent autant d'estat des meschans, comme des bons, & qu'ils embrassent, & caressent les vns, & les autres indifferemment: de telle sorte qu'ils ne

*Erreurs
de Car-
dan en
ma-
niere
de police.*

demandent aucune iustice des meschans, mais qu'ils s'en seruent pour chastier les autres : comme si le Prince ne deuoit pas pluoist esli-
re les bons pour exercer la iustice tant vindicative, que premiatiue ; ie vous donne à penser ce que ce seroit, si les meschans l'administroient, elle se conuertiroit bien tost en iniustice. Il faut donc tenir tout le contraire, car le Prince doit estre estimé d'autant meilleur qu'il aura plus grand soin d'exterminer les meschans, afin que son Estat soit comme vn corps en parfaite santé, dedans lequel tout est si bien proportionné qu'il n'y a rien de mauuais.

Mais quoy, il veut que les Princes imitent la nature corrompue des corps, lesquels se seruent des mauuaises humeurs ; s'il eust pris

garde que ces humeurs peccantes corrompent la santé petit à petit, iusques à ce qu'elles ayent le dessus, d'où la mort s'ensuit, il eust veu que son opinion fait le mesme dedans les Royaumes, & dans les Republiques, car si on endure; ou qu'on caresse vn meschant homme, cela sera cause que pour vn vous en aurez bien tost à milliers, ce que nous voyons tous les iours arriuer en France, dans laquelle pour auoir enduré vn Athee, vn Libertin, ou vn Deiste, vne grande partie des ieunes hommes se sont perdus, & égarez de la foy.

Sçauiez vous pas que la maladie se communique des vns aux autres, & non la santé? ce n'est à propos qu'il prend Dieu pour confirmer son erreur, car il endure les meschans, & qu'il s'en serue pour

faire meriter les bons, il est tout puissant pour empescher leurs desseins, quand bon luy semble, & pour faire qu'ils n'exterminent les iustes, auxquels il donne la force de resister contre les peruers, & scelerats. Disons donc que les Princes doiuent auoir vn soin particulier de se desfaire de toutes sortes de personnes, qui n'ont ny la vertu, ny la iustice, ny la Religion en aucune estime, ou recommandation, & qu'ils ne doiuent fier ny leurs biens, ny leur vie, ny leurs subjects à telles gens, s'ils ne veulent que leurs Estats soyent en vn perpetuel desordre, & courent risque d'estre perdus.

Il eust deu se souuenir en plusieurs de ses liures, de ce qu'il reprend en Erasme au 3 liure de sa Sagesse, quand il le blasme de ce

qu'il a aporté des raiſons pour, & contre la penitence, afin de ſe mettre en bonne eſtime tant enuers les Catholiques, qu'enuers les Lutheriens; mais il ne l'a pratiqué en l'ynzième liure de la Subtilité, car *Mefchanceté de Cardan.* apres auoir mis l'opinion, & l'erreur des Gentils, des Iuiſs, & des Mahometans en parallele avec la vraye religion, au lieu de refuter, & renuerſer les pretenduës raiſons de ces irreligions, il laiſſe le tout à la force des armes, ſe contentant de dire en paſſant, qu'il luy ſeroit fort facile de reſpondre à leurs raiſons.

Eſt-ce pas là vn braue Chreſtien, & vn excellent champion, lequel pour tout payement, apres auoir eſtendu l'empire de l'erreur Turqueſque dans la Chreſtienté par toutes les raiſons dont il ſ'eſt

peu aduifer, il dit que s'il vouloit, il chasseroit bien les ennemis; à Dieu ne plaise que nous nous seruions de telles gens pour deffendre la vérité de nostre religion, lesquels font tout ce qu'ils se peuuent imaginer, afin qu'ils fassent passer les miracles de nostre Sauueur, & Redempteur, & de tous les Saints pour artifices, & effects naturels. Quiconque s'assurera de tels personnages, il peut fier son bercail aux loups, & aux lyons, & sa bourse aux plus grands voleurs du monde.

*Finesse
des lar-
rons com-
mune aux
pibertins*

Vous souuenez-vous point de la subtilité de certains larrons, lesquels n'osans, ou ne pouuans dérober vostre argent, de peur qu'ils ont d'estre apprehendez, & iusticiez, ils accompagnent ceux qui veulent duper, & apres s'estre in-

finuez en leur bonne grace, ou en leur familiarité, ils feignēt d'auoir trouué quelque chaisne d'or, ou d'argēt, ou quelque bague, & pierre precieuse: ce qu'ils pratiquent si industrieusement, qu'ils attrapent ceux qui pensent estre les plus fins, & les plus rusez. Car ils escriuent, ou font escrire des lettres par leurs associez, comme si c'estoient quelques notables personnes, qui escriuissent à leurs amis, ou à leurs parēs, & leurs enuoyassēt quelque chose de precieux, & feignans d'auoir trouué cela en leur chemin, où de l'auoir achepté à bon prix, ils vous en font participāt, & vous laissent le tout à moitié de profit, à condition que pour vostre part d'un diamant d'alençon, qui vaut peut-estre vn escu, ou pour vne chaisne de même prix, vous leur

donniez vne vingtaine de pistolles plus, ou moins selon qu'ils cognoissēt vostre portee. mais le premier Orfeure, ou Lapidaire, que vous abordez, vous ayant decouvert la happelourde, vous vous apperceuez de l'affronteur. Il me semble que Cardan, Machiauel, Brunus, & vn tas de semblables canailles en font de mesme en ce qui est de la foy, & de la religion Chrestienne, car ils taschent à persuader que leurs artifices sont miraculeux, & leurs pensees veritables en matiere de religion, & de police, & que la nature mesme confirme leurs opinions, qu'ils estalent cōme pierres precieuses, afin d'arracher la verité de la foy de nostre esprit, & de nous dérober la creance, que le fils de Dieu nous a gravee dedās le cœur avec les gouttes

de son sang precieux.

Ce sont ces brigands desquels il se faut soigneusement garder en ce temps icy, auquel il semble que l'impieté vueille empieter sur la vraye religion, & déraciner la verité Catholique de l'ame des gens de bien. A quoy Cardan semble viser lors qu'au mesme liure de sa Sageſſe il parle de nostre Redempteur Ieſus-Chriſt, comme d'un cauillateur, & d'un ſage mondain, voulant par ce moyen eſtouffer ſa diuinité, car il le fait reſpondre par la ſeule prudence humaine, au lieu qu'il deuoit móſtrer, ou du moins inſinuer & ſe ſouuenir que nostre Sauueur voyoit toutes nos penſées, & tous les deſſeings de ceux qui l'interrogoient, auxquels il reſpondoit tellement, qu'ils demeuroient confus, & qu'ils euſſent peu

*Impieté
de Car-
dan.*

facilement cognoistre que ces réponses ne pouuoient venir que de celuy, qui cognoissoit leurs pensées, & leurs volonte, & qui par consequent estoit le vray Dieu, & le Messie, qui leur auoit esté enuoyé, lequel respondoit plustost à leurs pensées qu'à leurs paroles.

Je laisse toutes les autres peruerfes opinions, desquelles sa sapience est farcie, comme quand il dit qu'il faut estre hardy, & temeraire iusques à commettre quelque grand crime, selon ce meschant vers,

Audi aliquid breuibus Gyris & carcere dignum,

si on veut estre riche, ou paruenir à quelque dignité; & que pour boire plus facilement l'iniquité, il est bon de se persuader qu'il n'ya rien apres ceste vie: voyla vne pe-

tite parcelle des opinions extrauagantes de Cardan; par lesquelles vous pouuez iuger quel il estoit en son ame: concluez maintenant si vn bon Chrestien doit lire ses liures, si premierement il n'est assez sçauant, & resolu, pour cognoistre ses erreurs, & pour les renuerfer.

Je ne veux pas maintenant discourir de l'immortalité de l'ame, de laquelle il parle si indignement au liure qu'il a fait de ce suiet, que i'ay honte quand il me souuient de ses resueries: comme quand il fait la question, si la creance de l'immortalité sert à l'homme pour viure vertueusement, & dit tout ce qui luy vient en l'esprit, afin de persuader que cela ne sert de rien, bien qu'il se cache tant qu'il peut dans l'ancre de son venin comme la Seche, de peur d'e-

*Examen
du liure
de l'im-
mortalité
de l'ame,
de Car-
dan.*

estre reconnu pour Athee; mais ny
luy ny ses complices, tels que sont
ces Deïstes Apostats, parmy les-
quels vous vous estes perdu, ne
sçauroiét si bien se deguïser qu'on
ne les reconnoisse incontinent à
leurs paroles, & à leurs façons de
faire.

Plus auant il doute si c'est vne
bonne chose de suiure la verité, il
eust peu semblablement douter
s'il fait clair en plain midy; mais si
nous prenons garde qu'il estoit
poussé du maistre de mensonge,
nous ne nous estonnerons pas
beaucoup; puis que chacun parle
fort librement de ce qu'il ayime, &
suit l'opinion du maistre qu'il sert.
N'eust esté la crainte du supplice;
ie croy qu'il en eust dit dauanta-
ge, comme il paroist par ses paro-
les de la page 280, *tum verò reliqua
dicere*

dicere fato, ac monitis nunc prohibemur;
 bien qu'il eust assez montré l'o-
 pinion qu'il auoit des miracles, car
 il les rapportoit à la seule nature, &
 les faisoit dependre des affections
 de nos esprits: opinion si ridicule
 qu'il ne peut y auoir nul bon esprit
 qui ne s'en moque; d'où vient que
 luy-mesme contraint par la force
 de la verité, confesse que la resur-
 rection des morts; & le transport
 des montagnes surpassent l'esten-
 duë de toute la nature, c'est en la
 page 214 *Neque verò mortuos resurre-*
cturos, aut montes transferendos hac fi-
de, & spe credas, hoc enim leges naturæ
transgreditur.

Je ne veux pas maintenant par-
 ler de la foy diuine; par laquelle
 nostre Sauueur assure que les
 montagnes peuuent estre trans-
 portees d'un lieu en vn autre; ce

*Commēt
se font
les mira-
cles.*

que Cardan , ny ses semblables
n'ont iamais entendu ; neant-
moins il faut que vous preniez
garde que quand les miracles ar-
riuent , que c'est Dieu le quel ope-
re par sa toute puissance, la creatu-
re ne luy seruans que d'organe , &
d'instrument, de laquelle il se veut
seruir pour l'honorer , & l'attirer à
vne plus grande recognoissance
de sa diuinité , ce qui deuroit estre
suffisant pour nous embraser de
son saint amour , & nous faire
quitter toutes sortes d'inutiles oc-
cupations, telles que sont les Son-
nets, les Odes, & mille sortes de li-
ures que ceux de vostre bande
composent tous les iours, qui sont
remplis d'amour impudique, de
sottises & d'impietez ; à ce que
nous n'eussions plus de temps, ny
de loisir que pour aymer Dieu, &

l'adorer en toutes façons en commençant icy la beatitude, de laquelle ceux là iouiront eternellement, qui auront assuietty leur esprit à la foy, & à la reuelation diuine, & leur volonté aux sainctes ordonnances de la diuine Majesté.

Voila ce que i'auois à vous dire touchant Cardan, qui a tasché tant qu'il a peu à decrediter la verité de la Religion Chrestienne, ce qui luy a fait dire en la page deux cens 97, que les Prophetes se font naturellement, à cause de la partie du monde qu'ils habitent, pensant qu'il n'y en peut auoir vers le Septentrion; mais les Propheties montrent assez qu'elles n'ont peu venir ny du temperament du corps, ny du lieu de la terre: & ceux qui ont tant soit peu de iugement,

*Comment
se fait la
Prophétie*

voyent assez que la Prophetie ne peut arriuer que par la lumiere diuine, que Dieu verse dans l'esprit des Prophetes, comme nous enseigne tresclairement le Coryphee des Apostres S. Pierre dans sa seconde epistre chap. 1. *Non enim voluntate humanâ allata est aliquando Prophetia; sed Spiritu sancto inspirati, locuti sunt sancti Dei homines.*

1. Petr. 1.

LE D. O Dieu, que j'ay esté trompé iusques à present! on m'a-
 uoit fait à croire que Charron,
 Cardan, Machiauel, & quelques
 autres Auteurs semblables estoient
 les meilleurs liures que ie peusse
 lire, & que tout ce que les autres
 Autheurs, qui traictent de la reli-
 gion, rapportent, n'estoit que fa-
 bles pour entretenir le monde, &
 pour donner de la terreur aux
 meschans: resoluëment il faut que

vous m'esclaircissiez sur cecy, avant que ie me départe d'auec vous; car ie me sens merueilleusement bourrelé depuis que vous m'avez descouuert les maudites opinions de ces Autheurs.

LE THEOL. Ie suis prest à vous satisfaire en tout ce que ie iugeray estre necessaire pour vostre instruction: mais voyons vn peu auparavant en quelle estime on doit auoir Iordanus Brunus, lequel seroit excusable s'il s'estoit contenté de philosopher sur le poinct, l'atome, & l'vnité, & qu'il n'eust eu autre dessein que de prouuer que la ligne circulaire, & la droite, le poinct, & la ligne, la surface, & le corps ne sont qu'une mesme chose; que le diuisible finy ne peut estre diuisé infiniment, mais qu'il faut venir à vn poinct: (ie lais-

*philosophie de
Iordanus
Brunus.*

se son infinité de mondes estoilés, & plusieurs autres choses, lesquelles appartiennent à la Philosophie, ou aux Mathématiques.) Je ne m'amuserois pas icy à le reprendre, mais puis qu'il a passé outre, & qu'il a attaqué la vérité Chrestienne, il est raisonnable de le décrier comme vn des plus meschans hommes que la terre porta iamais.

*Impietez
de Iordā
Brun.*

Et afin que vous ne pensiez pas que ie parle sans sçauoir, si vous lisez son troisieme chapitre de *Existencia Minimi*, vous cognoistrez aysement qu'il fauorise la transmigration des ames d'un corps en vn autre, & qu'il semble n'auoir inuenté vne nouvelle façon de philosopher, qu'afin de combattre sourdement la Religion Chrestienne, ne s'osant des-

courir plus clairement de peur du feu deu aux impies, mais il n'a peu si bien faire, qu'il ne l'ait expérimenté. Si on profonde vn peu ce qu'il veut dire par l'extention du centre, la consistance de la Sphere, & la contraction du centre, qui luy seruent pour expliquer la naissance, la vie, & la mort, on s'apperceura que son intention est de n'aduoüer aucune immortalité de l'ame raisonnable, que celle qu'il donne à l'ame des brutes, & des plantes, & à tous les indiuidus, qui sont icy bas.

Ce n'est pas tout, il tasche de prouuer que Dieu n'a point de liberté, afin qu'il persuade ses mondes infinis, mais c'est en vain, car la liberté ne seroit pas vne perfection, si elle n'estoit en Dieu. Je luy demanderois volontiers, où à

ceux de sa fuite, si Dieu n'a peu faire ceste terre, sur laquelle nous marchons, plus grosse, ou plus petite, s'il n'a peu esloigner le Soleil dauantage qu'il n'est: ie croy qu'il n'y a homme sur la terre, qui ne m'accorde que Dieu pouuoit faire vne terre cent fois moindre, ou plus grande; qu'il pouuoit placer le Soleil où sont les estoiles, & faire mille choses qu'il n'a pas voulu faire, autrement il faudra dire que Dieu est tellement attaché à ceste terre, & son infinité liee aux choses qui sont finies, qu'il ne peut estre tout puissant, & infiny sans elles, ce qui ne peut estre, ny se concevoir en aucune façon.

Ce meschant homme a encore esté pire que Cardan, comme sçauent ceux qui le hantoient lors qu'il estoit à Paris, & comme tes-

moigne le liure qu'il a intitulé *Sigillus Sigillorum*, dans lequel il met quinze sortes de contractions à ce qu'il puisse sapper les fondemens de la vraye Religion: car dans la premiere il rapporte les miracles de nostre Seigneur à la qualité du lieu; les ravissmens ecstatiques des saints en l'air à l'imagination, & à la melancholie dans la 2^e espece de ses contractions; dans la troisieme, il veut que la prophetie vienne par le racourcy qu'on fait de l'horizon au centre; dans la quatrieme, il feint que les reuelations arriuent par la force de la grande attention. La cinquiesme passe au delà de Cardan, qui disoit que le transport des montagnes surpassoit les forces de la nature, car il veut que cela se puisse faire par vne affection de foy, ou plustost

15. contractions
de l'ordon
Brun, qui
sont au-
tôt d'im-
pietè.

d'imagination , de presumption , & de fole creance, comme on verra si on le lit attentiuement , car pour ce qui est de la foy Chrestienne , & diuine , il n'en croit point.

Je laisse ses contractions de la pieté enuers le pere , de la crainte , de la conuoitise , des sens extérieurs , de la melancolie , & des esprits vitaux , animaux , & sensitifs , par le moyen desquels il pense qu'on peut s'esleuer en l'air , comme saint Paul , qui fut rauy iusques au troisiésme Ciel. Bref , ie passe la contraction qu'il fait venir du mauuais aliment , laquelle engendre la melancholie avec la fable de celuy qu'il rapporte estre deuenue grand Prophete , grand Theologien , & sçauant en toutes sortes de langues , & la contra-

ctiō, ou rappel de l'esprit, afin que nous ne perdions point le temps à refuter toutes les resueries, & que le voyage qui me presse ne nous separe auant que nous ayons examiné ce qui est de vos opinions.

Je vous eusse parlé de Machia-
uel, n'eust esté qu'il y en a plusieurs
qui ont renuersé ses impietez a-
uec des raisons qui sont suffisantes
à ce qu'on quitte les erreurs qu'on
auroit peu succer dans ses liures.
Passons donc à ce qui vous touche
de plus pres, car ie croy m'estre ac-
quitté de ce que vous auiez désiré
touchant les Autheurs, par la le-
cture desquels vous vous estiez é-
garé de la religiō Catholique, estāt
assez à vn bon esprit, tel qu'est
le vostre, de cognoistre le mal
pour le fuyr; car vous voyez claire-
ment que ces Authours sont fort

*Machia-
uel.*

dangereux, & qu'il faut que celuy qui les lit, soit continuellement sur ses gardes, & en vne perpetuelle deffiance, puis qu'ils semblent n'auoir eu autre plus grand dessein en publiant leurs liures que de nous faire quitter la verité de la Religion, & nous faire succer le venin de leurs malheureuses opinions, & de leurs imaginatiós fantasques, & bigearres; & bien que les propositions qu'ils mettent en auant semblent n'estre pas grande chose de prime abord, & qu'elles plaisent à cause de quelque image de probabilité, neantmoins si tost qu'on les embrasse, leurs consequences les trainent à l'impieré, de laquelle il est par apres tres-difficile de se retirer.

Si vous desirez sçauoir les impuretez, & les tours de souplesse

de Vanin , lequel a eſté bruſlé à Tholoſe pour ſes opinions brutales , & remplies d'Atheiſme , vous pourrez facilement les treuver dans la premiere Queſtion de la Genèſe , dans laquelle i'ay renuerſé la plus grande partie de ſes Maximes. Et puis i'eſpere que ie refuteray toutes les fantaſies de ce maudit Lucilio , & tous les paralogiſmes qui ſe rencontrent és œuvres de Iordan Brun , & és liures de ſemblables badins , quand ie mettray la main à quelque œuvre que i'ay dans la penſée , eſtant aſſez pour le preſent que ie vous aye fait toucher au doigt leur impertinence.

Je ne veux pas vous entretenir plus long temps ſur ce ſujet , attendant à refuter tout ce que ces Auteurs ont dit mal à propos en

Resueries
de Car-
pentarius

l'Encyclopedie, laquelle ie prepare en faueur de toutes les veritez, contre toutes sortes de menfonges, dedans laquelle i'examineray plus diligemment ce qu'ont aduancé Gorlee, Charpentier, Basso, Hill, Campanella, Brun, Vanin, & quelques autres. Je me contenteray pour maintenant de cotter quelques vnes de leurs impertinences, telles que sont celles-cy de Charpentier en sa premiere Decade, que *toutes choses se font, & se tirent du rien*, ce qui oste toutes sortes de generations, & ne laisse qu'une creation perpetuelle. *Qu'il n'y a point de mouuement d'un lieu en un autre.* En la seconde Decade, que *la transsubstantiation est impossible*, ce qu'il tasche de preuuer avec des argumens de paille, *Que nul n'est conjoint a son suiet par inherence.*

Gorlee s'accorde auec luy en ce point, *Que toutes choses se font de rien, & s'en retournent en rien, & par consequent que la creature peut produire quelque chose en le tirant du neant. Il adiousté que les accidens peuuent passer d'un subiet en vn autre, qu'ils peuuent estre sans aucun sujet d'inherence, & qu'ils se font de rien: qu'il y a des atomes dedans les corps, qui ont quantité, & figure, &c.*

*Exercit.
15.
Extrana-
gances de
Gorleus,
& de
Hill.*

Quant à ce qui est de la Philosophie Epicurienne de Hill, il faudroit la transcrire, si on vouloit en rapporter les resueries; au bout du conte ils sont tous Heretiques, c'est pourquoy il ne faut pas s'estonner s'ils s'accordent comme larrons en foire. Aduisez maintenant si vous desirez que nous parlions de la secte, laquelle vous

m'auez dit auoir embrassée , & y auoir esté confirmé par la lecture que vous auez faite de Charron, de Cardan, & de quelques autres, qui auoient l'esprit extrauagant, & qui ne respiroient rien que le Libertinage, & l'impieté.

LE D. Monsieur , si vous me pouuez oster de l'opinion, que i'ay eüe iusques à present touchant la religion, vous pouuez vous asseurer que vous aurez gagné vne ame à Dieu, car ie n'ay trouué personne qui m'ait satisfait sur ce sujet, & qui m'ait fait voir que la Religion Chrestienne soit meilleure que celle que i'ay espousée depuis neuf, ou dix ans ença.

CHAP:

CHAPITRE XI.

*Dedans lequel le Theologien preuue que
la Religion Catholique est la seule
veritable.*

BON Dieu en quel sie-
cle sommes nous, qu'il
faillie qu'on preuue la
parole de Dieu, & qu'il
y ait des hommes si auëuglez qu'il
leur faille monstrier qu'il est iour
en plein Midy. Est il donc possible
qu'apres vne si grande multitude
de Martyrs, qui ont respendu leur
sang, & donné leur vie pour tes-
moigner la verité de la Religion
Chrestienne, vous puissiez en dou-
ter? Certainement il n'y a conside-
ration aucune, sur laquelle ie puis-
se ietter les yeux, qui ne soit capa-
ble de me persuader qu'il n'y a

Q

1 motif
de nostre
religion.

Contra
epist. fun-
dam. c. 4.

point d'autre religion que la Catholique, soit que ie contemple la quantité d'hommes sçauans de toutes sortes, les nations, qui l'ont embrassée sans esperance d'aucune vtilité temporelle, ce qui a esté suffisant pour arrester ce grand Aigle des Docteurs saint Augustin, comme il tesmoigne par ces paroles : *Tenet me in Ecclesia consensus populorum, atque gentium*, soit que ie considere les miracles, *tenet autoritas miraculis inchoata, spe nutrita, charitate aucta, verustate formata*: par lesquels Iustin le Martyr dit en sa 1^{re} apol. au Senat de Rome, qu'il a esté conduit à la foy de Iesus-Christ.

Et quoy, Dieu auroit-il permis que tant de millions de personnes, qui ne respiroient rien que sa gloire, & son honneur, ayent perdu la

vie pour la Religion Chrestienne, & qu'elle ne fust pas veritable? ce pourroit-il faire que Dieu auteur de toute verité, eust fait des miracles en faueur d'une fausse opinion? Nenny certes, c'est pourquoy il est necessaire d'aduouer qu'elle est tres veritable, puisque la fontaine de la verité l'a tellement fauorisee, & la cherit tous les iours par tant de façons, que sa puissance, sa prouidence, & sa bonté reluisent à l'égal au soin qu'il en a. Remarquez ie vous prie avec combien d'affection, & d'ardeur ceux qui se sont conuertis au commencement du Christiniasme, ont embrassé la vertu, avec quelle sainteté de vie ils ont passé le reste de leurs iours, avec quelle fidelité, & diligence ils ont renuersé les erreurs par paroles, & par es-

244 *Impieté des Deïstes,*
crit, esquels ils auoient trempé
auant la lumiere de l'Euangile.

3. motif. Ce n'est pas tout, si vous prenez
garde à la façon, par laquelle la
Religion Chrestienne a esté intro-
duite au monde, vous confesserez
ingenuëment qu'il est impossible
que ce ne soit la vraye Religion,
car sont esté de pauures gens, &
des idiots, qui l'ont plantee, sça-
uoir est les Apostres, & leurs Dis-
ciples, la pluspart desquels n'a-
uoient point estudié, & n'auoient
ny or, ny argent pour se faire sui-
ure. Et puis ils ne propoisoient au-
cune volupté, aucun plaisir du
corps, aucune dignité, pas vn de-
nier: au cōtraire ils ne preschoient
que misere, que disette, que dou-
leurs, que gibets, & autres sortes de
tourmés: & neãtmoins ils ont esté
suiuis par les grãds, & par les petits,

par les pauvres, & par les riches,
 par les maistres, & par les serui-
 teurs, par les Princes, par les Roys,
 par les Empereurs, & par tous leurs
 subiects, ce qui n'a peu se faire que
 par vne vertu diuine, à laquelle
 nous en deuons rapporter tout le
 succez, comme aduouèront tous
 les hommes de la terre bien sen-
 sez, si on leur en demande leur ad-
 uis, ce qu'a fort bien remarqué
 saint Augustin, lors qu'il a dit que
 les Philolophes, & tous les sages
 du monde interrogez là dessus res-
 pondront que la Religion des
 Chrestiens n'a peu estre persuadée
 par des hommes, *Nisi quos ipsi Dei*
virtus, atque sapientia commendasset, ut
omnia contemnendo, quæ prauī homines
cupiunt, & omnia perpetiēdo quæ hor-
rescunt, genus humanum ad tam salu-
brem fidem summo amore, atque autori-

*l. de vera
 relig. c. 3.*

Pour faire embrasser la Religion Chrestienne à vn homme de bon iugement, ie ne voudrois autre chose que le tesmoignage de nos plus grands ennemis, lesquels sont miserables, & le rebut de tout le monde, à cause qu'ils ont crucifié le vray Messie, au lieu qu' auparauant ils estoient le peuple aimé, & chery de Dieu par victoires, miracles, & propheties. A quoy on pourroit adiouster les excellens tesmoignages, que les Empereurs ont donné des Chrestiens, bien qu'ils fussent idolatres, comme
l. 4. c. 13.
et l. c. 9. nous lisons dedans Eusebe, & Iustin le Martyr.

5. motif Que sera-ce si vous iettez l'œil sur toutes les propheties conte-
 nues dedans l'ancien Testament, lesquelles ont predit tout ce qui

est arriué à nostre Sauueur si clairement qu'Esaie semble voir les mysteres de la vie, & de la mort de Iesus-Christ. Vous sçauiez que nous n'auons pas inuenté ces predictions, car nos ennemis iurez, qui ont conserué ces liures iusques à present, nous garantissent de cela; & afin qu'on ne puisse dire que nous y auons adiousté, ils ont contré toutes les lettres de leur loy, qu'ils disent estre, si bien mesouient, huiet cens vingt & vn mil & quatre vingts vne: & puis nous nous seruons des mesmes Bibles qu'eux, lesquelles doiuent auoir vne plus grande authorité, que tous les autres liures du monde, encore que nous ne parlissions que de l'authorité naturelle, puis qu'ils sont les plus anciens, dedans lesquels les plus excellens

*En l'E-
criture
saincte
Hebraï-
que il y a
selo quel-
ques vns
deux mil
lions de
lettres
dans le
Pētateu-
che.*

Philosophes, & les plus sçauans de toute l'antiquité ont puisé ce qu'ils ont de meilleur.

6. *Motif.*

Certainement si les Chrestiens n'eussent eu la vraye religion, iamaïs ils n'eussent peu subsister parmy tant de persuasions des luges, & des Empereus: & si la vertu diuine ne les eust renforcez, ils eussent esté bien tost étouffez, laquelle a souuent empesché que les tourmens ne leur ayent fait mal, multipliant à cet effect miracle sur miracle. Mais à quel propos suis-ie si

7. *Motif.*

long-temps sur cecy, veu que les paroles, & les œuvres de Iesus-Christ estoient si merueilleuses, qu'elles ne pouuoient estre faites que par vn homme qui fust Dieu. Considérez quelle efficace auoient ses paroles, lors qu'il prêchoit, & avec quel zele il procu-

roit la gloire eternelle de son pere: & si vous me voulez croire, lisez les Euangiles, ie m'asseure que vous confesserez librement n'auoir iamais rien leu de semblable, car la lecture attentiuë de la Bible est si charmante, qu'on ressent ie ne sçay quelle vertu extraordinaire, qui nous frappe l'ame en la lisant, & nous console, si nous sommes affligez, nous fait embrasser la vertu, & quitter le vice, bref c'est vn banquet, vn remede, vn Soleil, vn contentement vniuersel.

Et quand tout cela ne seroit pas, *S. Motif.* ie dis que la religion Catholique ne contient rien que de tres-iuste, & raisonnable, & ne peut se faire qu'elle ne soit veritable, car elle n'embrasse que ce qui est digne de la diuine Majesté, reiettant bien loing tout ce qui est indigne d'un

si grand estre, si bien que quiconque aduoüera vne diuinité, confessera quand & quand que la maniere de laquelle nous seruons Dieu, est tres-saincte, & fort conuenable à la Majesté diuine. Voudriez vous vne meilleure religion que celle qui embrasse courageusement toute sorte de vertus, & deteste toutes sortes de vices, & d'imperfections? Desireriez vous vne créace plus releuee, & plus digne de Dieu que celle, laquelle ne reçoit rien que ce qui est à sa plus grande gloire? laquelle ne faict conte de la mort, des biens, des honneurs, & de la vie, lors qu'il est question de l'honneur de Dieu, & qui assuietit l'appetit sensitif à l'esprit, & la raison à Dieu, qui rend à vn chacun ce qui luy appartient, bref qui n'a autre motif, autre plai-

ſir, autre occupation que de plaire à la Majeſté diuine ? Veritablement quand Dieu n'auroit donné aucune loy, il ne ſeroit pas poſſible qu'on en peuſt trouuer vne plus excellente que la noſtre. Toute la lumiere de la nature, & tous les eſprits des hommes ne ſçauroient en inuenter vne ſemblable, comme vous pouuez iuger de toutes les loix qui ont eſté faites par tous les Legiſlateurs, leſquelles ont touſiours eſté vicieuſes, & imparfaites en pluſieurs choſes, c'eſt pourquoy il a eſté neceſſaire pour noſtre ſalut, que Dieu nous ait enſeigné ce qui eſtoit de la verité, & la vraye façon de le ſeruir, autrement nous fuſſions touſiours demeurez en nos erreurs.

Or ie croy que tous ces motifs ſont plus que ſuffiſans pour vous

remettre au bon chemin, & vous faire quitter vos opinions, car il est impossible qu'après tant de merueilles, qui ont esté faites en faveur de la Religion Chrestienne, elle ne soit pas veritable, & l'unique que Dieu approuue, autrement nous pourrions dire que Dieu nous auroit deceus, ce qui ne se peut faire. Tenez donc pour tout assuré qu'il n'y a que ceste creance, selon laquelle, & dans laquelle vous puissiez estre sauué.

CHAPITRE XII.

Dans lequel le Deïste rapporte ces trois premiers quatrains avec leur refutation, & est monstre que le Chrestien n'est pas superstitieux ; que Dieu fait tout par un mesme acte : qu'il n'est sujet à aucun changement, ou perturbation, & qu'il punit tres-justement les meschans, bien que le péché soit un rien.

LE DEÏSTE.



Onsieur, ce discours m'a satisfait entiere-ment, mais i'ay plusieurs difficultez, lesquelles m'ont tellement embarassé l'esprit, qu'il m'est quasi impossible de m'en depêtrer : ie voy bien d'un costé que

vos raisons sont merueilleusement fortes, mais d'un autre costé ie treuve tant de difficultez en la religion Catholique, que cela a esté cause que ie l'ay abandonnee il y a long temps.

LE TH. S'il ne tient qu'à resoudre vos doutes, ie m'offre à ce faire durant tout nostre voyage, pourueu que vous ne mettiez point en auant les mœurs, & la corruption des particuliers, car en tous estats, & en toutes conditions & compagnies il se trouue des meschans.

LE D. Vous me ferez vn singulier plaisir, ie vous promets que ie ne m'attacheray point aux vices, ou maluersations des particuliers, car ie sçay que la doctrine ne depend pas des mœurs; or ie ne sçauois pas proposer toutes mes objections, si ce n'est que ie vous les

dié par ordre selon les quatrains, qu'un des principaux de nostre Cabale a faits, afin qu'on sceut parfaitement ce qui est de nostre religion, & si ie ne puis me souuenir des quatrains, ie vous en diray la substance.

LE TH. Vous ne pouuez auoir aucune legitime religion, que celle dont ie vous ay parlé, si bien que la vostre ne peut estre que pretendue, afin que vous ne vous trompiez pas au commencement: neantmoins ie ne veux pas vous troubler si tost, proposez vos quatrains quand il vous plaira, pourueu que vous me promettiez que vous quitterez toutes les erreurs, qui y sont enfermées, & que vous embrasserez la Religion Catholique, si ie vous satisfais sur toutes vos difficultez: car ie ne desire pas

perdre ma peine, encore que tout le gain, s'il y en a, vous en doive reuenir.

Or si vos vers sont ceux qui me sont autrefois tombez entre les mains, nous aurons bien tost fait, car ie croy que le sommaire de la responce que i'auois preparee à ces mal-heureux vers, vous contentera parfaictement, reseruant à vous en faire voir vne plus longue, si ie voy qu'elle soit necessaire. N'importe pas beaucoup si vous ne pouuez vous souuenir de tous les quatrains, ce sera assez que vous en rapportiez le sens, neantmoins ie laisse le tout à vostre volonté, & à la bonté, & fidelité de vostre memoire, mais à telle condition que ie ne laisseray pas à vous satisfaire moyennant la grace de Dieu, bien que vous proposiez
d'autres

d'autres vers que ceux que i'ay entre les mains.

LE D. Je ne sçay pas quels sont ceux que vous auez, mais les nôtres sont fort secrets, car nous ne les communiquons à personne, que nous ne cognoissions bien auparavant, & que nous ne scachions s'il en fera son profit, quittant les erreurs populaires: or nous leur donnons pour tiltre, l'*Antibigor*.

LE THEOL. Ce sont les mêmes indubitablement, ne se comment-ils pas par ce vers.

Puis que l'estre eternal, &c.

LE D. Iustement, ie suis fort aisé qu'ils soient tombez en si bonne main, veu que ie ne desire rien tât que de me tirer d'erreur, si i'y suis, bien que ie sçache que tous ceux qui sont de mon party, en seront fort marris, car ils tiennent ces vers

comme vn threfor, & ne les departent que fous la cappe. Vous plaist il donc que ie commence; si premierement ie vous aduertis que nous entendons le Chrestien, ou le Catholique par le *bigot*, & par le *superstuiex*, afin que les equiuques ne nous arrestent point.

LE THEOLOG. Commencez quand il vous plaira, si vous pouuez reduire les quatrains en peu de mots, nous aurons plustost fait, car les vers ont coustume de contenir beaucoup de choses qui ne sont pas à propos.

LE D. I'en suis content, nommement parce que les vers sont mal faits, y ayant de mauuaises rimes, & quantité d'iniures, & de boufonneries : Je vous reciteray neantmoins les deux premiers quatrains tels qu'ils sont, & puis

j'apporteray la substance des autres, voicy donc le commencement de nostre poëme.

LE DEISTE.

Puisque l'estre éternel est éternellement
Tres-heureux, & parfait en toute suffisance,
Qu'il est la bonté mesme, & sage infiniment,
Sur tout ce qu'en conçoit l'humaine intelligence,

Le superstitieux est il pas insensé
De se le figurer constant, & variable,
Embrase de vengeance, & d'un rien offensé,
Ennemy des tyrans, & plus qu'eux redoutable.

LE THE. Je vous prie de vous rendre attentif aux réponses que ie feray à tous ces quatrains, car ie me promets avec la grace de Dieu de vous monstrier clairemēt qu'ils ne contiennent rien contre la religion Catholique, qui ne soit tres-faux; & que vostre poëte est vn caioleur, vn menteur, vn imposteur, & vn des plus melchans hommes qui la terre porta iamais. Le i qua-

train ne contient rien que ce que nous aduouions, car nous disons, & croions fermemét que tout ce qui est en Dieu, est tres parfait, puis qu'il est Dieu mesme, suiuant la maxime de la Theologie, *quicquid est in Deo, Deus est*: & que c'est vn estre essentiellement independant, & infiny, lequel surpasse toute sorte d'intelligence. Mais s'il entend le Chrestien par ce mot de *superstitieux*, c'est vn imposteur, veu qu'il n'y a personne qui soit tant esloigné de la superstition que le vray Chrestien. Que vostre Poëte cherche d'oc ailleurs son *superstitieux*, que parmy ceux qui embrassent nostre creance: car ie vous prie, qu'est-ce que la superstition? est-ce pas vn vice cōtraire à la religion, par lequel on rend le culte à celuy, qu'on ne doit pas? comme lors que les ido-

Que le
Chrestien
n'est
point su-
persti-
tieux.

2. especes
de super-
stition.

latres rendoient l'honneur aux creatures, lequel est deu au seul createur; à quoy on peut rapporter toutes les especes de diuination, par lesquelles on recognoist que les choses futures peuuent estre predites par les diables, ou bien on les consulte sur quelque difficulté: car c'est à Dieu seul que nous nous deuons adresser en nos difficultez, nommement en ce qui est des choses futures, lesquelles dependent de sa volonté ou de nostre liberal arbitre, puis qu'il n'y a que luy qui puisse penetrer ces ressorts. L'autre espece de superstition est quand on sert Dieu, mais par vne façon indecente, & qui n'est digne de la diuine maiesté. Or ie maintiens que le vray Chrestien n'est superstitieux en pas vne de ces façons, car il hono-

re le vray Dieu par les formes, & ceremonies que luy mesme nous a reuelees, ou qu'il a inspirees à l'Eglise son espouse; ce qui paroist en ce que nous n'auons aucune ceremonie, ou coustume de seruir Dieu, laquelle ne soit grandement conforme à la droite raison, & conuenable pour recognoistre la dependance que nous auons de l'estre eternal.

Je ne veux pas m'estendre sur les diuerfes especes de diuination, que Sathan a tasché d'introduire au monde, afin de se faire recognoistre autheur de ce qui se faict icy bas, car on sçait assez que le Chrestien ne deteste rien tant que la Negromantie, Lecanomantie, Gastromantie, Catoptromantie, Dactylomantie, & toutes les sortes de Magies, que la folie, la su-

perstitution, ou la malice a inuentees. Voyez donc maintenant que vostre Poëte s'est fort mal adressé, & qu'il ne trouuera pas vn superstitieux en tout le Christianisme. Que son superstitieux soit insensé tant qu'il voudra, iamaïs cela ne conuiendra à vn vray Catholique, lequel ne se figure point Dieu variable, au contraire il le croit tel qu'il est, sçauoir est tres-constant, & du tout immuable. Ce qui suit au 2, & 3 vers du 2 quatrain, semble butter contre l'Ecriture sainte, laquelle nous décrit la Majesté diuine embrasée de vengeance contre les pecheurs, comme quand Moyse la represente par ces paroles de l'excellent Cantique, lequel est au 23 du Deuteronomie verset 19 *Vidit Dominus, & ad iracundiam concitatus est.* Et au

*La foy du
Chrestien
touchant
la constā-
ce de Dieu*

*Deuter.
22.*

verſet 22. *Ignis ſuccenſus eſt in furore meo, & ardebit uſque ad inferni nouiſſima, deuorabitque terram cum germine ſuo, & fundamenta montium comburet.*

Et au verſet 41, & 42. *Si acuero ut fulgur gladium meum, & arripuerit iudicium manus mea; reddam ultionem hoſtibus meis, & his qui oderunt me retribuam. Inebriabo ſagittas meas ſanguine, & gladius meus deuorabit carnes,*

&c Et le Prophete Royal, en l'un de ſes plus grands Pſeaumes, qui

Psalm. 77. eſt le 77. verſet ſoixante cinq. *Et*

excitatus eſt tanquam dormiens Dominus, tanquam potens crapulatus à vino.

Or ces paſſages & pluſieurs autres, qui ſe trouuent dedans l'Eſcriture ſaincte, ne repugnent en aucune façon à l'immuabilité diuine, car ils ne déclarent autre choſe que les peines, que Dieu fera endurer aux meſchans, leſquelles ſurpaſſent

tous les tourmens , qu'on nous puisse faire souffrir en ce monde: ce qui ne se fait sans la colere, vengeance, ou furie de ceux qui nous tourmentent, comme vous pouuez voir dans les histoires des Martyrs. Mais ces émotions que nous apperceuons aux hommes, ne sont point en Dieu, les actions duquel nous expliquons par nostre façon de conceuoir, & d'entendre, sçachans neantmoins que tout ce qui est d'imparfait en nos pensées, ne peut estre attribué à la souueraine Majesté.

Peut estre que ce malheureux Poëte endurcy, & enuieilly en sa meschanceté, nous dira que nous *preoccu-* donnons ceste explication, *pation.* afin d'euites ses obiections, & eluder ses pointes, mais il se trompe fort, si i'auois affaire à quelqu'un, lequel

receust l'autorité de la sainte Escriture, il me seroit facile de luy môstrer par d'autres passages tres-exprez, que la furie, ny semblables passions ne peuvent se retrouver en Dieu, à la façon qu'il l'entend en ses quatrains; mais puis qu'il est si malheureux, & obstiné qu'il ferme les yeux à la lumiere de l'Evangile, & les oreilles du cœur, & du corps à tous ceux qui l'aduertissent de son salut, ie luy respons, qu'il doit par toutes sortes de loix, recevoir l'explication que nous luy apportons touchant les susdits passages, veu qu'ils sont pris de nos liures, & de nostre religion qu'il attaque.

Qu'il sçache donc avec tous ses confidens, que ny l'Escriture, ny les Predicateurs n'ont pas intention de mettre quelque chose de nou-

ueau en Dieu, lors qu'ils disēt qu'il se fasche, ou qu'il se recōcilie avec les pecheurs: ce n'est nō plus qu'ils entendent que cela se fasse selon le son des paroles, ains seulement à ce que nous conceuions la haine que Dieu porte à l'iniquité, & la peine de laquelle il la punit. Car la Bible n'est pas seulement pour les sçauans, qui ont des esleuations d'esprit plus épurees, & qui s'approchent de plus pres des veritez eternelles, mais elle est pour toutes sortes de personnes, pour les petits, & pour les grands, pour les pauvres, & pour les riches, & pour tous ceux qui voudront y profiter, soit en la lisant, soit en l'escoutant. Il ne faut donc pas que vous trouuiez estrange, si elle parle tantost en vne façon basse, tantost en vne plus releuee, & qu'elle touche

les effets de la volôté diuine en vn lieu, tels que sont les supplices eternels des damnez, & en vn autre l'essence mesme de ceste volôté, sans auoir égard aux effets qui en decoulent : plustost deuons nous remercier la diuine bonté de ce qu'elle nous a donné vne doctrine si bien assaisonnée, qu'elle peut repaistre toutes sortes de personnes, & satisfaire à tout le monde.

*Qu'est-ce
que la co-
lere diui-
ne, &
autres
mouue-
mens que
l'Escri-
ture sainte
attribue à
Dieu.*

C'est donc l'effect que l'Escri-
ture nous met deuant les yeux, la-
quelle n'a autre but que de nous
faire craindre les supplices deubs
aux pechez, & nous presenter
les iugemens diuins, à ce que nous
les éuitions, & que nous scachions
combien celuy-là est malheureux,
qui mesprise les ordonnances di-
uines, & combien Dieu est grand,

puissant, & redoutable, puis qu'il a de si grands supplices pour chastier tous ceux qui contreuendront à ses commandemens.

Vous pouuez encore mieux comprédre ceste difficulté, si vous faites reflection sur vostre premier quatrain, qui dit que Dieu est *vn estre eternal tres parfait*; ce qui ne peut estre veritable, si vous ne m'accordez qu'il est tres-simple, & par consequent qu'il est vn acte tres pur, & qu'il fait tout ce qui est créé, & tout ce qu'il fera desormais, par le mesme acte de volonté, par lequel il s'ayme soy-mesme: car Dieu n'a qu'un seul acte d'entéde-ment, & de volonté, lequel est vne mesme chose avec son essence, & par lequel il ordonne la gloire e-ternelle pour les bons, & l'eternel des-honneur pour les damnez, de

façon que quand il y a de la variété, & du changement, cela n'est qu'en la creature, Dieu demeurant toujours tres-immuable, & tel qu'il est de toute eternité, ne pouvant cesser d'estre inalterable, immobile, & souverainement parfait en toutes sortes de perfectiōs, fil ne cessoit quant & quant d'estre Dieu, ce qui est parfaitement, & souverainement impossible.

LE D. Comment est-il donc possible que Dieu fasse des choses si différentes, & que tantost il recompense, tantost il punisse, s'il n'a qu'un seul acte?

LE TH. Imaginez vous que l'action de l'entendement, par lequel vous avez cōceu ce que vous venez d'objecter, soit infinie en perfection, qu'elle soit toute puissante, & qu'elle puisse faire tout ce

qui n'a point de repugnance, est-il pas vray que si vous plaist, vous recompenserez les bons par ce seul acte d'intellect; & que par le mesme acte vous punirez les mauuais, & ferez tout ce qui peut tomber en l'entendement? Or l'acte diuin tres-simple est tres-parfait, infiny, & tout puissant, qui empesche d'oc que Dieu ne fasse tout ce qu'il fait, par la vertu de cet acte? Si le cêtre d'un cercle estoit tout puissant, il produiroit toutes les lignes qui vont à la circonference: Dieu est il pas le centre infiny de toutes choses? Voyez vous pas que le mesme point d'un miroir represente vne grande diuersité d'obiects? vne mesme colonne est-elle pas tantost en bas, tantost en haut, tantost à droit, tantost à gauche, biẽ qu'elle soit immobile? Sçachez d'oc que

*Dieu fait
tout par
vn mes-
me acte.*

Dieu fait tout ce qu'il fait sans aucune émotion, car son decret eternal est tres-vn, & tres-simple, bien que nous le conceuions par nos diuerfes imaginations, & qu'il nous faille de differétes pensees, quand nous voulons l'entendre.

Il faut donc bien se garder de croire que Dieu soit embrasé de vengeance à la façon des hommes: la cholere, & la vengeance dót il vse enuers les damnez, n'est autre chose que la ferme resolution, par laquelle il veut que les hommes recoiuent le loyer, ou la peine selon leurs merites, ou leurs iniquitez; il est en nous de choisir lequel que nous voudrons, car si nous aymons Dieu, comme il faut, il nous donnera la gloire eternalle: si nous mesprisons ses ordonnances, & que nous mourions
opiniastre-

opiniaftrement en nostre malice,
il nous punira par les flammes
deuorantes, lesquelles ne finiront
iamais.

Pleuft à Dieu que vostre Poëte
fembrast luy. mefme d'une iuste
vengeance contre ses pechez, &
qu'il se punist rigoureusement
pour auoir employé son esprit, ses
rimes, & sa Logique à prouigner
son impieté, & a renuerfer, s'il eust
peu; la religion Chrestienne, la-
quelle durera iusques à la fin du
monde malgré luy, & tous les De-
iftes, & les Athees, & s'en ira avec
tous les esleus trióphante droict és
paruis celestes, à ce qu'elle soit co-
ronée de la guirláde d'une felicité
qui durera tousiours. Je vouscôju-
re par l'amitié que ie vous porte
que vous tafchiez de le ramener à la
raison, & de luy faire quitter sa ma-

lice, & ses debauches; il ne faut pas sous pretexte qu'il y a trop longtemps qu'il s'est égaré de la creance des Chrestiens, & qu'il a sauté du Calvinisme au Deïsme, qu'il se desespere, car Dieu est tousiours prest de le receuoir à misericorde.

O Dieu ! seroit-il si perdu, si oublieux de son salut, si opiniastre en sa malice, qu'il ayme mieux estre damné à iamais, que de se recognoistre, & quitter ses erreurs, ses boufonneries, & ses autres sales voluptez, auxquelles il s'est abandonné iusques à present ? Mais voyons ce qu'il adioust, disant que puis que le peché est vn rien, que Dieu ne peut estre offensé par le peché. Il est vray que le peché n'est rien qui vaille; ce n'est qu'un défaut, & vn desordre, mais ne sçait-il pas que le Capitaine punit

*Le peché
doit estre
puny, biē
qu'il soit
vn rien,
& pour
quoy.*

iustement le soldat, quand il n'a rien fait de ce qu'il luy auoit commandé? & quoy, l'homme sera obligé d'observer les loix que Dieu luy a prescrites, & ne les voulans pas garder il ne sera pas puny? erreur manifeste contre les principes de la raison: car celuy-là merite d'estre griefuement puny, qui n'a voulu rien faire de ce que luy auoit commandé son Roy, ou son Superieur: ce que feroient tousjours les Superieurs, quels qu'ils soient, fils estoient tres-iustes, comme Dieu.

Ne trouuez donc pas estrange, si Dieu se tient offensé, & mesprisé, lors que nous ne faisons conte de ce qu'il nous commande, soit par la loy naturelle, qu'il nous a empreinte dedans le cœur, soit par la loy escrite, & la loy de grace. Plus

Iltoit deuriez vous trouuer estragé
si Dieu ne punissoit point ce rien,
ou ce peché, puis que quand nous
commandons à nos seruiteurs,
nous les chastions, fils y man-
quent, & si c'est vn amy sur lequel
nous n'ayons nul pouuoir, du
moins le iugeons nous indigne
d'estre aymé, si il ne fait ce dequoy
nous le prions. Par où vous voyez
que le rien du peché est punissa-
ble, n'y ayant aucune chose en ce
monde, qui ne soit en quelque fa-
çon semblable à Dieu, excepté le
peché, lequel est d'autant plus
horrible, qu'il s'oppose dauantage
à la bonté eternelle, ou à ses or-
donnnances, ou mesmes à son es-
sence, laquelle est vn tout trespar-
fait, & le peché vne priuation de
tout.

Passons outre, il conclud de ce

qu'il nous faict dire, que Dieu est ennemy des tyrans, & plus redoutable qu'eux : qui en doute? car les tyrans estans meschans, il ne se peut faire que Dieu ne soit leur ennemy, & leur iuge redoutable. Assurément il n'y a rien à redouter comme la iustice de Dieu : car tous les tourmens du monde ne font que des ombres au regard des peines que Dieu a preparees, & ordonnees pour punir tous ceux qui ayans transgressé ses commandemens, ne veulent point se recognoistre, & meurent obstinez.

Or si vous prenez garde, vostre malheureux Poëte s'est efforcé de représenter la iustice de Dieu par les façons les plus ridicules qu'il a peu choisir, afin de le rendre odieux, & d'arracher la crainte des

*Meschā-
ceré du
Poëte De-
iste.*

iugemens diuins de l'esprit de ceux, à qui il a donné son Poëme en cachette : mais qu'on sonde vn peu ses paroles, & son intention, on découurira soudain qu'il est malicieux, & ignorant, & que tout ce qu'il obiecte est pris d'un mauuais biais, ou que ce sont impostures, & calomnies. Ce qui se void en ce second quatrain, auquel il dict que Dieu est plus redoutable que les tyrans, non afin que nous nous esleuions à contempler la grandeur de la iustice diuine, laquelle est vn attribut infiny de Dieu, aussi bien que sa puissance, sa bonté, & sa volonté, mais à ce qu'on haye la doctrine Catholique, laquelle nous enseigne que Dieu est aussi redoutable aux meschans, comme il est aymable aux bons.

Pleust à Dieu qu'il redoutast

ceste iustice autant comme elle est redoutable, ie suis asseuré qu'il feroit tout ce qui seroit en luy, afin de pouuoir delàbuser tous ceux qu'il a seduit avec son Poëme. Faites luy entendre, si iamais vous le rencontrez en bonne humeur, que Dieu n'est point lesé, ny interessé en son essence par le peché, puis qu'il est impassible, & immortel, & neantmoins qu'il punist le pecheur aussi iustement que s'il auoit esté offensé en ceste façon, d'autant que le meschant a la volonté de ce faire, quand il peche, puis qu'il ne tient pas à luy que cela n'arriue; ce qu'il monstre par le mes-estime qu'il faiët de sa saincte volonté. Il n'y a homme si brutal, qui ne confesse que celuy là merite d'estre puny, qui se moque des ordonnances de son Roy;

*Comme
Dieu est
offensé
par le pe-
ché.*

& personne ne treuve à redire aux peines qu'on fait tous les iours endurer aux larrons, bien qu'ils n'ayent point offensé le Roy, ou le Iuge en sa personne: & m'asseure que ce Deïste seroit bien ayse qu'on fist subir la rigueur des loix à celuy qui luy auroit derobé sa bourse, ou faict perdre son honneur. Pourquoi est-ce donc qu'il reprend nostre doctrine, par laquelle nous sommes instruits que les damnez seront punis eternellement, puis qu'ils ont mesprisé les commandemens de leur createur, & les ont trangressé avec vne opiniaistreté, qu'ils ont renduë eternelle, entant qu'il a esté en eux, lors qu'ils sont morts en leur malice?

Par où vous voyez assez clairement à mon aduis que vostre de-

restable Poëte a eu tous les torts du monde de s'opposer à vne doctrine si veritable, si vtile, & si digne de la Majesté diuine, comme est celle des Catholiques.

Voila ce que i'auois à vous dire touchant vos premiers quatrains, ie croy que c'est assez pour vous contenter, neantmoins si vous auez encore quelque difficulté, vous la pouuez proposer, car comme ie n'entreprends ce discours que pour vostre salut, & afin que tous les Deïstes soient desabusez, ie vous donne toute liberté de repartir à toutes mes responses, à ce que vous n'ayez plus aucun doute sur ce qui est de l'impieté de vos opinions.

LE D. Je n'ay maintenant aucune cocation de vous retarder, c'est pourquoy ie poursuis.

LE DEÏSTE.

*Est-il pas insensé de penser, & de s'imaginer
qu'il est le souverain gouverneur de ce monde;
Et neantmoins qu'il se laisse conduire selon nos
passions humaines.*

LE THEOL. Ce Poëte est bien estourdy si il croit que nous nous imaginions seulement que Dieu regit cet Vniuers, car nous le croyons fermement, qui est beaucoup plus que de se l'imaginer. Et quoy, si Dieu ne le gouvernoit, qui est ce qui le pourroit entreprendre? qui a donné plus de lumière au Soleil qu'à la Lune? qui donne plus de force au Lyon qu'à la fourmis? qui fait que la terre n'est pas en la place de la Lune, & que ces Planettes ne sont plus grandes, ou plus petites, plus proches, ou

plus esloignees ? qui a ordonné toutes les parties du monde comme nous les voyons ? n'a ce pas esté Dieu ? Regardez ie vous prie tous les globes celestes, & vous adiuuerez ceste verité, car comment se pourroit-il faire que la Lune fist son cours en l'espace de 27 iours, & 8 heures, & qu'elle peust atteindre le Soleil en 29 iours, & 13 heures ? que le Soleil, Mercure, & Venus ne manquassent iamais d'accomplir leur cours chaque année ? Mars en vn an, & 322 iours ; Iupiter en 11 ans, & 215 iours ; Saturne en 24 ans, & 174 iours ; les estoilles en 28800 ans, avec vn mouuement si réglé, qu'ils ne manquent pas d'vn iota, si il n'y auoit vn souuerain moteur, qui les regist, & gouuernast. Le Soleil pourroit-il tousiours s'esloigner de la terre par 1181 semi-

En combien de temps chaque Ciel fait son mouuement.

*Esloigne-
ment de
chaque
Planette
d'avec la
terre.*

diamètres, lors qu'il est en son apo-
gee; la Lune de 56, Mercure, & Ve-
nus de 1142; Mars de 1745; Jupiter
de 3990, Saturne de 10550, & les e-
toilles de 14000; si l'n'y auoit vne
éternelle prouidence, qui main-
tient tous ces Astres, & ces globes
au mesme ordre, qu'elle a estably
dés le commencement du monde;
l'ay honte de m'amuser à prou-
uer vne verité si claire, & m'eston-
ne comment il est possible qu'il y
ait des hommes si aueuglez, qu'ils
nient la prouidence diuine, sans
laquelle les ressorts de l'Vniuers
ne sçauroient subsister, ou se mou-
voir. Dites moy de grace, si vostre
corps n'a aucun mouuement, si l'a-
me ne le meut, pensez vous que ce
monde puisse garder vn train si
reglé, si Dieu ne le conduit, & ne
luy donne le branle?

Certainement les Philosophes ont apperceu ceste verité , lors qu'ils ont voulu introduire vne ame vniuerselle, & vne forme generale de tout l'Vniuers, afin que par icelle le monde fust gouuerné comme vn grand animal, car bien que Dieu ne soit pas la forme d'aucune chose, neantmoins il est present en tous lieux, & ne se peut rien faire qu'il ne voye: de plus, il est impossible qu'aucú mouuemēt arriue sás son aide, & sans só secours car il est pl⁹ necessaire à tout ce qui est au monde, que n'est la lumiere aux couleurs, ou l'ame aux corps: ie ne sçauois mieux vous expliquer la necessité de ceste presence diuine que par ces vers, qui montrent aussi son immensité.

Dieu est dessus, dessous, dedans, & dehors tout;
Il n'est clos d'aucun lieu, ores qu'il soit par tout:
Dessus comme pilot qui le meut, & compose;
Dessous comme perron qui ferme le soustient,
Dehors comme cerceau, qui en rond le contient,
Dedans le penetrant, bref il est toute chose.

LE D. Nous ne nions pas que Dieu ne soit la guide souveraine de cet Vniuers, mais seulement nous tirons ceste consequence, que ceux-là sont insensé, qui croient ceste verité, & disent non-obstant que Dieu est subject à passion, comme les hommes: autrement il quitteroit bien tost le gouvernement de ce grand monde, quand on l'irriteroit, ce qui n'arrive point, car nous voyons que toutes choses vont tousiours d'un mesme train.

LE THEOL. Je sçay que vous ne niez pas expressément que Dieu

gouverne l'Vniuers , bien que ie ſçache d'ailleurs que ce ſont vos diſcours , lors que vous vous trouuez entre vos confidens : auſſi n'ay-ie pas dit que vous creuſſiez cela, mais qu'il faudroit eſtre merueilleuſement egaré d'eſprit, pour croire qu'il n'y euſt aucune prouidence, & que Dieu ne gouuernaſt pas ce monde.

Or ce qu'il inferoit en ces deux derniers vers, eſt tres-faux, car nous ſçauons fort bien que Dieu ne peut eſtre ſubieſt à aucune paſſion, comme ie vous ay monſtré cy deuant : ie vous donne à penſer ſ'il ne deſtourneroit pas ſon Soleil de deſſus les meſchans, & ſ'il ne les reduiroit pas au neant, ſ'il eſtoit ſubieſt aux paſſions humaines : comment y ſeroit-il ſubieſt, veu que ce ſont é motions de l'appetit

Impieté des Deistes,
sensitif, lequel n'est qu'en l'homme, & en la beste?

C'est assez que vous remarquiez icy la noire malice de vostre ri-mailleur, qui veut persuader que nous croyons que Dieu est suiet à nos passions: sçachez donc que nostre creance touchant ce suiet est que & Dieu est inalterable, immuable, & exempt de toutes sortes de passions: & delà concluez que cet imposteur vous a donné des bourdes, & des calomnies pour des veritez, comme i'espere vous faire voir tres-nettement en ce qui suit.

CHAP.

CHAPITRE XIII.


Dans lequel les quatrains du Deïste depuis le quatriesme iusques au neufliesme sont refutez ; & est monsté que Dieu declare l'amour qu'il se porte en punissant les damnez, & comment il ayme, il hayt, & fait tout par vne mesme action.

LE DEÏSTE.

Est-il pas effronté d'exalter son amour, & puis de le depeindre pire enuers nous, que n'est vn barbare enuers son pire ennemy?

IV.

LE THEOLOGIEN.

 E L A est tres faux que nous depeignons Dieu comme il le dit, & que nous disions aucune chose, qui con-

T

trarie tant soit peu à son amour; mais ie voy bien où il en veut venir, car il desireroit fort que Dieu n'eust ny force, ny iustice pour chastier les meschans : c'est cela qu'il appelle estre de mauuaise volonté enuers ceux qui l'offencent, ce qui n'est pas ainsi qu'il le dit, d'autant que Dieu se sert du mesme amour en punissant les damnez, duquel il vse en recompensant les bien-heureux, puis qu'il fait l'un, & l'autre pour sa gloire, & pour l'amour qu'il se porte à soy-mesme. Ie me doute bien que vous, & luy, & tous ceux de vostre faction aurez de la peine à vous persuader cecy, mais soyez attentif, & ie vous le feray comprendre.

Il est certain que Dieu ne faict rien qu'il n'ait quelque fin, & quelque raison, autrement son

action sembleroit estre vaine, ce qui est impossible: or il ne peut auoir d'autre fin à proprement parler, que soy-mesme, autrement s'il luy falloit mandier vne derniere fin hors de soy-mesme, il ne seroit pas Dieu. Cette fin qui est Dieu mesme, ne peut qu'elle ne soit tres-aymable, & le principal motif de tout ce qu'il a fait, de tout ce qu'il opere maintenant, & de tout ce qu'il fera iamais: donc quand il chastie les mauuais, ou recompense les bons, c'est à cause de soy-mesme, & parce qu'il est tresbon, donc c'est par amour qu'il fait l'vn, & l'autre.

Et si vous me demandez comment il se peut faire que Dieu hayssé les meschans par amour, aussi bien qu'il 'ayme les iustes, ie ne veux autre chose pour vous le

faire entendre , que la façon mesme par laquelle vous aymez , ou hayssiez quelqu'un.

Est-il pas vray que quand vous prenez vengeance de vostre ennemy , ou du moins que vous le hayssiez , que c'est à cause qu'il s'est opposé à ce que vous cherissiez , & qu'il empesche vos desseins ? Est-il pas encore vray que tout ce que vous caressez hors de vous mesme , que c'est à cause de l'affection , & de l'amour que vous vous portez vous mesmes ? si bien que vous voyez clairement que tout ce que vous faites en ce monde , & tout ce que vous pèsez , n'est pour autre fin que pour l'amour , ny pour autre raison , que pour l'affection que vous vous portez , soit qu'elle soit déreglée , ou non , car ie ne veux pas maintenant entrer en cette

nouvelle consideration,

C'est ainsi que Dieu s'aymant d'un amour infiny, rebutte, & punist eternellement tout ce qui s'oppose à cet amour, tel qu'est le peché, duquel on n'a point de repentance : car s'il s'ayme infiniment, est-il pas tres-raisonnable qu'il haye, & punisse eternellement ceux qui le hayssent, & le mesprisent, comme font les pecheurs? c'est donc par l'amour qu'il se porte qu'il chastie ses ennemis, c'est par amour qu'il deteste, & exterminie tout ce qui contreuiet à cet amour. Bref il est impossible de trouuer aucune chose, soit au Ciel, soit en la terre, ou au milieu des enfers, qu'il ne la fasse par amour.

De là vous conclurez que si nous exaltons l'amour de Dieu,

nous ne disons par apres rien au contraire, puisque nous ne l'esleuons pas moins en assurant, & croyât qu'il chastiera les meschâs, qu'en disant qu'il recompensera les bons, veu qu'il fait le tout pour l'amour, dont il s'ayme, auquel il n'y a rien qui puisse estre parangonné. Mais i'estime qu'il n'est besoin de m'estendre si au long sur ce quatrain, car ie coniecture que les suiuanz nous donneront assez de pareilles matieres. C'est pourquoy suiuez maintenant, si ce n'est que vous ayez quelque notable difficulté sur ce que ie viens de dire.

LE D. Veritablement cela me semble vn peu subtil, & difficile, car la punition semble estre vn effect de la iustice, & non pas de la bonté; de la hayne, & non de l'a-

mour: comment est-ce donc que Dieu chastie les meschans par amour.

LE THEOL. Cecy est facile à entendre, si nous conceuons ce qui est tres asseuré, sçauoir est que Dieu faict tout pour l'amour de soy-mesme, car puis qu'il est l'estre souuerain, il faut que tout ce qui est, se rapporte à luy, & par consequent que tous les chastimens des pecheurs buttent à sa gloire; or Dieu n'ayme sa gloire & son honneur, qu'entant qu'il s'ayme d'un amour infiny, si bien que nous pouuons dire que de mesme que tout ce que nous faisons, & toutes les actions de nostre appetit raisonnable, & sensitif prennent leur origine de l'amour que nous nous portons, ainsi toutes les actions que nous conce-

*Que Dieu
fait tout
pour l'a-
mour de
soy-mes-
me.*

uons en Dieu, & tous les effects, qui partent de sa puissance, viennent de l'amour qu'il se porte, suivant ceste riche sentence de saint Augustin, *Amor meus, pondus meum, illo feror quocunque feror.*

s. Au-
gustin.

Ce qui n'empesche pas qu'il ne soit vray que les supplices, que Dieu fait tres-iustement endurer aux malheureux damnez, soient les propres effects de la iustice diuine, entant que nous entendons que l'acte diuin tres simple, par lequel Dieu fait tout ce qu'il fait, respond à la conception que nous auons du supplice; si nous auons vne action infinie en nostre entendement, nous conceurons tout ce qu'il y a en Dieu, & tout ce qu'il a fait, qu'il fera, ou qu'il pourroit faire, mais nos péesces estât imparfaites, n'enuisagent l'acte diuin

que selon leur portee, & leur esté-
duë, & conformément à l'effet qui
paroist à nos yeux. Poursuiuez s'il
vous plaist, car no^s expliquerôs en-
core ceci plus clairement cy apres.

LE DEISTE.

*Et quoy? s'il ne voudroit pas engendrer des
enfans, s'il croioit qu'ils deussent estre misera-
bles, comment est-ce que Dieu qui est infini-
ment bon, pourroit nous mettre au monde s'il
sçauoit que nous deussions estre perdus.*

LE THEOL. Vostre rimeur a-
uoit rasché de nous ietter la pou-
dre aux yeux au 4 quatrain, nous
voulant persuader que c'estoit fai-
re Dieu cruel, de dire qu'il cha-
stie les meschans; & maintenant
il veut luy oster les verges de la
main comme l'enfant à son pere.
J'ay ouy dire qu'il y a vn franc res-
ueur à la Rochelle, qui maintient
n'y auoir point d'enfer, à cause de

cette seule comparaïson d'un pere avec Dieu: ie ne m'en estonne pas, car estant Huguenot, il luy est facile de passer à l'Artheïsme.

Voyons si cette semblance conclud quelque chose. Dites moy, Dieu crée-il nos ames à la façon que nos peres nous engendrent? nullement: car si tost que l'embryon est parfaitement formé, Dieu y conjoint l'ame raisonnable, afin de conseruer l'ordre, qu'il a estably au monde dès le commencement. Laissons la façon à part, car elle importe fort peu icy. le dy que si vn pere pouuoit tirer vn plus grand bien du mal, comme Dieu, qu'il pourroit engendrer vn enfant, bien qu'il sceust que son enfant deust estre tourmenté à iamais; par exemple, si vn pere estoit tout puissant, & qu'il voulust

faire paroistre sa toute puissance, il pourroit engendrer des enfans, bien qu'il preuist, qu'ils se perdroyent par leur malice, d'autant que par là il monstreroit que sa bonté, & sa puissance ne pourroient estre empeschées par quelque malice que ce soit, bien que cette malice deust estre eternelle. Et certes vn tel pere seroit content de s'estre manifesté en son enfant par le bien de l'estre, qu'il luy auroit communiqué, n'estant tenu de se manifester par le bien de la gloire, s'il ne fait les œuvres, qu'il luy auroit prescrites pour ce sujet. Or sus est ce pas vne grande merueille que ce que Dieu a donné (sçauoir est l'estre, & la nature,) ne puisse perir par quelque malice que ce soit, bien que tous les diables conspirassent à le ruiner. Est-

ce pas vne grande ioye aux bien-
heureux de voir tousiours l'œuvre
de Dieu en son entier, lors qu'és
damnez ils distinguent ce qui est
de Dieu, & du peché, cestuy-cy
n'estant rien que tenebres, & l'au-
tre rien que lumiere, & verité?

Que sera-ce, si ie vous dy que
la sagesse, & la bonté de Dieu re-
luit dauantage en la production
de celuy qu'il sçait qui l'offencera,
& qui refusant ses graces eslira la
malice, & l'enfer, qu'en la produ-
ction d'un autre, duquel il preuoit
qu'il sera seruy, & honoré? car ce-
luy-là semble tout à faict indigne
de receuoir l'estre de la main de
Dieu, lequel ne pourroit iamais
tant faire de bien à cet ingrat, s'il
n'estoit infiniment bon, non plus
qu'il ne pourroit le punir eternal-
lement, s'il n'estoit tout puissant,

voire meſme tout bon. Ouy ie maintiës ſur ma vie qu'il faut eſtre infiniment bon pour pouuoir chaſtier eternellement vne malice faite contre le ſouuerain Autheur de toutes choſes: car pour veoir ſi quelqu'un eſt infiniment bõ, quãd il eſt queſtion de chaſtier vn mé-faiët, par lequel la volôté de Dieu ſouuerainement bonne eſt meſpriſée, ie tiens qu'il faut qu'il chaſtie ce crime d'un ſuplice infiny.

LE D. Comment eſt-il poſſible que la bonté de Dieu paroiſſe par le ſupplice eternal des meſchans?

LE THEOL. Il eſt tref-aſſeuré que la malice eſt auſſi grande, que la bonté qui luy eſt oppoſée; il eſt auſſi certain que ſi on vouloit recompenser vne infinie bonté, qu'il faudroit que la recompense fuſt

*Comment
& pour-
quoy
Dieu cha-
stie les
damnez
eternelle-
ment.*

infinie, donc si on vouloit punir vne malice, qui fust opposée à certe bonté, il faudroit que le supplice fust infiny pour respondre à cette malice. Or la malice de celuy qui mesprise les commandemens de Dieu, est opposée à la bonté diuine, il faut donc que le supplice soit infiny, si on veut reparer le mespris, que le pecheur a fait de la bonté diuine, puis qu'elle est infinie. Partant ie dy que quand Dieu chastie le peché eternellement, il monstre par ce supplice, que sa bonté est eternelle, & par consequent ceste bonté paroist par la peine, qu'endurent les damnez. Certainement on pourroit penser que la bonté, contre laquelle se bande le peché, seroit finie, si la peine deue à ce peché estoit limitée, & que la puissance, & la iusti-

ce, par lesquelles le chastiment est ordonné, & executé, estoient bornees (telles que sont la iustice, & la puissance des hommes) si le supplice auoit quelque fin.

De là nous concluons que tant plus le chastiment des reprouuez est grand, & tant plus grande paroist la bonté de Dieu. Si vous considerez bien cecy, vous verrez clairement, que vostre Poëte ne conclud rien par la similitude d'un pere, qui n'est souuerainement bon, & puissant, comme Dieu. Et quoy si un pere estoit tout puissant, feinderoit-il d'engendrer des enfans, bien qu'il sceust qu'ils seroient pendus, ou roüez, si l'enfant n'encourroit aucune ignominie, ou honte de ce que ses enfans seroient suppliciés, au contraire qu'il en tireroit de la gloire,

& de l'honneur? Est-ce pas vne admirable sagesse de tirer de la gloire, & du bien de la malice des hommes? O Dieu que vous estes adorable en vos pensées, & en vos œuvres! ô Dieu que vous estes sage de tirer les grands biens des grands maux, & malgré les hommes impies, & les diables triompher de la mort, du peché, & de tous les defauts du monde: beny foyez vous par tous les esleus és siecles des siecles. O grand Dieu, i'adore vos arrestz, qui ordonnent le supplice eternal aux meschans; & la gloire aux bons. Faites sil vous plaist que tous les Deïstes quittent leurs erreurs, & embrassent ce qui est de vostre sainte volonté.

Or sus que vostre Poëte fort ignorant en matiere de religion,
fasse

fasse distinction entre pere, & pere, & qu'il considere leurs diuerſes qualitez, afin qu'il ne penſe pas nous piper, & nous faire à croire ſous ombres qu'un pauvre pere, qui ne ſçait le plus ſouuent ce qu'il faiſt en caeſſant ſes enfans, bien qu'ils ſoient tres-mauuais, que Dieu doit faire le meſme. Qu'il ſçache donc qu'il faut que Dieu ſe monſtre diſſemblable aux hommes en ſa iuſtice, & en puniſſant, puis qu'il ſe monſtre diſſemblable en leur pardonnant, & en les recompenſant. Quel pere a iamais tant enduré de ſes enfans, comme Dieu endure de nous? Quel pere leur a iamais ſi ſouuent pardonné? qui leur a promis, & donné de telles recompenſes côme eſt la gloire des eſleus? Mais quoy cecy n'entre point dans voſtre eſprit, car

vous quittez ce qui est de l'intelligible pour courrir à bride abatuë apres vos passions, & vos appetits brutaux, & desfreiglez. Si vous me voulez croire, vous quitterez bien tost ces opinions fantasques, sensuelles, & badines pour vous remettre au giron de l'Eglise Catholique.

LE D. Certainement ce discours icy ma fort esbranlé, ie commence à voir plus clairement en ceste matiere, c'est pourquoy ie vous prie ne vous ennuyer pas de respondre aux autres quatrains, car si vous me contentez aussi bien sur tout ce qui suit, ie quitteray toutes ces erreurs, voicy donc le sixiesme quatrain.

LE DEISTE.

Il est certain que Dieu nous aime beaucoup plus, & nous est meilleur que n'est la meilleure mere du monde à ses enfans, & par consequent il ne nous peut imposer vn malheur infiny pour satisfaire à vne cholere feinte.

VI.

LE THEOL. Cela est euident que Dieu est beaucoup meilleur qu'aucune mere, car il ne nous substente, & conserue pas seulement quant à l'exterieur, comme nos meres, mais, qui est bien d'auantage, quant à l'interieur, ce que ne peut faire la mere. Et puis les meres traittent bien leurs enfans à cause du seruice, & du plaisir qu'elles esperent retirer d'eux, quand ils seront grands, mais Dieu n'a que faire de nous, c'est sa seule bonté, qui le meut à nous mettre

*Car la
conserua-
tion est
vne crea-
tion con-
tinuée.*

au monde, & à nous donner l'air que nous respirons, la terre, qui nous porte, & les viures qui nous alimentent. Bref nous ne ſçaurions ſubſiſter vn ſeul moment, ſ'il ne conſerue noſtre eſtre, & n'vſe comme d'vne continuelle creation en noſtre endroit. Mais il ne ſ'enſuit pas delà, qu'il ne nous puniſſe eternellement; ce qui n'eſt pas nous impoſer vn infinny malheur, car c'eſt noſtre malice, qui eſt l'architectrice de ce malheur, veu qu'il n'y en a point de plus grand que le peché, car oſtez-le, & vous oſtez l'enfer, & toute autre ſorte de malheur, comme diſoit vn grand Docteur de l'Egliſe, *tolle peccatum, nullus erit infernus.*

Mais ſuppoſons que le ſupplice deu au peché, ſoit vn infinny malheur; ie dy que c'eſt fort mal parlé

d'asseurer que ce chastiment soit *que le*
pour assouuir la feinte cholere de *supplice*
Dieu : Premièrement , parce que *des dam-*
c'est vn blaspheme tres-grand de *nez n'est*
mettre aucune fiction en Dieu. *point*
Secondement , parce que ce n'est *pour as-*
pas pour assouuir l'ire diuine , veu *souuir la*
que pour estre assouuy, & receuoir *cholere*
vn nouveau contentement de *diuine.*
quelque chose , il faut au preala-
ble en auoir eu besoin, or Dieu n'a
besoin d'aucune chose , comme a
fort bien remarqué le Prophete
Royal, *Dixi Domino Deus meus es tu,*
quoniam bonorum meorum non eges.
Tiercement , parce que c'est afin
que ce qui appartient à vn chacun
luy soit rendu.

Dites moy ie vous prie , com-
bien loueriez vous vn Roy , qui se-
roit si prudent, & si vertueux, qu'il
donnast les dignitez à vn chacun

selon ses merites sans acception de personne, & qui puniroit quant & quant tous les meschans selon leur forfait, sans qu'ils peussent opprimer les bons.

Dieu est le Roy des Roys, qui gouuerne tout le monde, & qui donne à vn chacun le lieu, la recompense, ou la peine qu'il a meritée; il faut donc le louer grandement, & nous resjouyr d'auoir vn Roy, vn Pere, vn maistre, vn Createur si puissant, si sage, & si bon.

Il a recours à vne mere, mais on sçait trop que les meres perdent le plus souuent leurs enfans manque de les chastier; & puis quelle mere est toute puissante, & tres-iuste pour punir ses enfans, (bien que tres mauuais) d'un supplice infiny? sçauiez vous pas que Dieu n'a point mis ce supplice en la puis-

sance des hommes ? Et quoy, si nous voulons parangonner la bonté, & la charité de Dieu enuers nous, à l'amour d'une mere enuers ses enfans, qui ne void que l'amour que Dieu nous porte, est infiniment plus grand, soit que nous regardions à la creation, ou à la recreation, & à la Redemption ? Si vous consideriez quel doit estre l'amour bien ordonné, vous ne diriez pas que Dieu deust aymer vn meschant autant qu'un bon, & confesseriez que le mal est si indigne de tout amour, qu'il est impossible de l'aymer, lors qu'on le cognoist tel qu'il est : comment voulez vous donc que Dieu ayme le mal, qui est dedans le pecheur, & qui le rend mauuais ? Que vostre Poëte propose ses paralogismes à d'autres, car ses finesse sont des-

*Amour
de Dieu
enuers
nous plus
grand
que celuy
d'une
mere en-
uers son
enfant.*

couuertes, & sa malice esuentee, si bien que vous pouuez maintenant apporter les autres quatrains, & vous ressouuenir que si vne mere estoit infiniment bonne, & iuste, qu'elle chastieroit le peché de son enfant d'un supplice eternal, supposé qu'il ne voulust se recognoistre.

LE DEISTE.

VII.

Puis que le bigot ne voudroit, ny ne pourroit voir ses pires ennemis au milieu d'un extrême supplice durant vn mois, comment est-il possible qu'il vueille que Dieu repaïsse sa iustice chastiant l'œuvre de ses mains d'un supplice infiny.

LE THEOL. Voicy encore vne plus sotte comparaison que ce detestable Poëte fait d'un bigot avec Dieu ; ie vous proteste que vous deuriez rougir de honte, de pren-

dre ce poëme pour pilotis de vostre Deïsme; mais quoy, i'en attribué plustost la faute à ce fat, qui a basty ces rimes, que non pas à vous: lequel monstre qu'il n'a aucun respect de Dieu.

Toutesfois prenons son bigot, quel qu'il soit, ie luy demande s'il est infiniment iuste, & bon, ou non: s'il dict qu'il est infiniment iuste, ce qui ne se peut, ie dis qu'il peut voir souffrir son ennemy non seulement vn mois, mais vne eternité; s'il ne l'est pas, cela est fort inepte de tirer des raisons de son bigotisme pour combattre la verité de la religion Catholique. Qu'il sçache donc que ce seroit plustost merueille, si le supplice du meschant, qui ne veut se recognoistre en ceste vie, estoit finy, que ce n'est de ce qu'il est eternal, puis que la

recompense des bons est eternelle à cause de la bonté de Dieu , qui veut que le supplice deu à ses ennemis , ne dure pas moins que la recompense deuë à ses amis.

Certainement il ne se peut faire que Dieu n'ayme autant sa iustice, comme sa bonté , & sa iustice vindicative, & punissante, autāt que sa iustice recompensante , puis que ce n'est qu'une mesme chose en Dieu , duquel les attributs sont tous vne mesme essence diuine , si incomprehensible , que nonobstant que nous vsions de mille , & mille conceptions , & industries , nous ne sçaurions l'entendre que fort imparfaitement, ce pendant que nous sommes en ce monde. Il faut donc que la iustice punitiue, & suppliciente ait vn pareil effect enuers les damnez, pour ce qui est

de la duree, qu'à la recompensante enuers les bien-heureux, c'est à dire eternal, puis que toutes deux elles sont egales.

Dites moy, de grace, pensez vous que la gloire de Dieu paroisse moins, quand nous recognoissons qu'il reprouue autant le vice, comme il approuue la vertu, que si nous ne voyions que son amour enuers les iustes, sans nous appercevoir de la haine, qu'il porte au mal, & aux impies, à cause de leur malice? Or les flammes eternelles, qui bruslent les damnez, vous font voir qu'il hait autant le mal, côme il ayme le bien. Prenez garde que vous, qui prisez tant l'experience des choses pour en auoir la science, n'experimentiez la rigueur de ces peines deuës à vostre infidelité, & irreligion.

Helas ! pleust à Dieu que vous peussiez seulement vne fois le iour les apprehender, comme il faut, & que vous meditassiez serieusement où vous irez, & comme vous serez traicté apres cette vie ; assurez vous que vostre incredulité ne vient que faute de ne considerer point l'aduenir, & du peu de soing que vous auez de viure vertueusement. Retenez donc de ce discours, qu'il n'y à personne , s'il estoit aussi iuste que Dieu , qui ne fist souffrir vn supplice eternal aux meschans , qui ne veulent quitter leur impieté ; & qu'il est raisonnable , & tres-iuste que Dieu donne vn lieu à vn chacun , tel qu'il le merite , or le meschant merite le lieu de l'enfer , ne vous formalisez donc plus , s'il a, ce qui luy est deu.

LE DEISTE.

*Nostre infirmité peut elle trouuer vn appuy
autre part, où elle se repose mieux que sur la iu-
stice diuine, puis qu'elle est vne mesme chose
auec sa volonté, & son diuin amour?*

VIII.

LE THEOL. Il est certain que
ces deux attributs sont vne mesme
chose, comme nous auons dict au-
parauant, car il ny à aucune diuer-
sité en l'essence diuine; & que no-
stre infirmité à son recours à ceste
bonté, comme au centre dedans
lequel elle doit trouuer sa perfe-
ction. Mais tout cela n'empesche
pas, que Dieu ne chastie les per-
uers, qui au lieu de chercher leur
repos en la volonté, & l'amour de
Dieu, l'ont tellement mandié des
creatures, qu'ils les ont preferees
au createur. Certainement la iusti-

ce diuine est vn grand repos d'esprit aux gens de bien, car ils croyent fermement qu'apres auoir seruy Dieu de tout leur cœur ; il leur donnera la iuste recôpense de leur traualx ; & au contraire elle apporte vn grand trouble, & vne perpetuelle inquietude d'esprit aux meschans, d'autant qu'ils doiuent estre ramenez, & soubmis à l'ordre de la prouidence diuine (de laquelle ils s'estoient voulus soubstraire) par ceste iustice qu'ils redoutent si fort qu'ils voudroient qu'elle ne fust point, & qu'on ne leur en parlast iamais , parce qu'elle condamne leurs crimes. Or il faut que vous remarquiez que c'est vne foiblesse d'esprit de penser pouuoir comprédre les attributs, ou les actes diuins avec nos entendement finis, & que ce que

nous faisons avec plusieurs actiós,
& proprieté, Dieu le faict par vn
seul acte, mais avec vne perfection
infiniment plus grande, que s'il le
faisoit avec plusieurs actions,
comme nous. De là vient que bien
que sa iustice, & sa bonté soient
vne mesme chose, & qu'il con-
damne les impies par le mesme
acte, par lequel il récompense les
bons, ils n'en sont pas moins con-
damnez, & chastiez, ou couron-
nez, & recompensez: ne plus ne
moins que le Ciel ne laisse pas d'e-
stre distingué de la terre, encore
que Dieu ait faict, & créé l'un &
l'autre par vn mesme acte. Mais
c'est trop dict sur ce quatrain, le-
quel ne semble rien conclurre
contre nous, par ainsi il vaut
mieux passer outre.

CHAPITRE XIV.

Auquel est prouvé que Dieu fait du bien aux damnez, que nous pouvons hayr les meschans, & que Dieu les punist iustement sans cruauté : & les quatrains du Deistes depuis le 9. iusques au 19. sont renuersez.


LE DEISTE.

IX. *Si nous pensons qu'il ne faut rien attendre de la bonté diuine, comment nous en pouuons nous seruir d'exemple pour rendre le bien pour le mal à nos ennemis.*

X. *Dieu pourroit-il nous inspirer de donner secours à tout le monde, s'il estoit plus cruel qu'aucun.*

LE TH.

LE THEOLOGIEN.

 I vous voulez apperce-
voir la nullité de l'obie-
ction, qu'il faict au neu-
fiesme quatrain, il faut remarquer
que la bonté de Dieu nous est vn
modelle, & vn archetipe, sur lequel
nous deuons regler nos bontez,
& duquel depend tout ce que
nous auons : mais la façon par la-
quelle nous deuons l'imiter, est
celle qui luy plaist, & qu'il nous
prescrit, & non celle que nous
nous imaginons : Or ceste bonté
diuine veut que nous aymions
nos ennemis, & que nous leurs
rendions le bien pour le mal, ce-
pendant qu'ils sont en estat de se
pouoir amender : c'est vne pu-
re calomnie de dire que Dieu ne
fasse nul bien à ceux qui se sont

rendus ses ennemis par leur péché; car ne voyez vous pas à chaque moment, que Dieu fait pleuvoir aussi bien sur les plus méchans que sur les plus gens de bien? Est-ce pas de ceste bonté éternelle que nous vient l'air, lequel nous respirons, l'eau que nous beuons, & tout ce qui est pour nostre nécessité, & pour nostre contentement?

Auez vous iamais veu que pour tât d'impietez, qui se commettent tous les iours par tout le monde, il ait retiré sa main des autheurs coupables de ce mal? bien qu'il chastie par fois quelques vns de ce monde icy pour servir de tesmoignage à sa prouidence, & à sa iustice, & d'exemple aux autres. Il est donc certain que Dieu fait plus de bien à ses ennemis en vn seul mo-

*Dieu fait
du bien à
ses enne-
mis, &
mesmes
aux dam-
nez.*

ment, que nous ne leur en sçaurions faire en toute nostre vie. Je ne veux pas icy employer la redemption de tous les hommes par la mort de nostre Sauueur pour preuue de cecy, car la nature nous fait assez paroistre combien la bonté diuine s'estend sur toutes sortes de personnes. Et par ainsi cette bonté nous est vn parfaict exemplaire à ce que nous fassions bié à nos ennemis; mais parce que vostre Poëte tasche d'oster l'enfer, ie dy que Dieu fait plus de bien aux damnez, que tous les hommes du monde ne sçauroient faire tous ensemble à leurs enfans, ou à qui que ce soit; car tout ce que nous pouuons communiquer, n'est en rien comparable à l'estre, ny aux proprietéz de l'estre que Dieu conserue à tous les damnez.

Et ne sert rien de dire qu'on aymeroit mieux n'estre point que d'estre avec vn tel supplice , car Dieu ne regarde pas nostre perverse volonté en ordonnant ce qu'il fait, mais il regarde ce qui est bon, iuste, & conuenable: ie sçay assez que ceux de vostre secte aymeroiẽt bien mieux n'estre point, que d'estre miserables, & tourmentez à iamais: mais hélas! leur desir ne peut faire qu'ils eschappent ce qu'ils ont mérité par leurs impietez, dedans lesquelles ils se plongent volontairement, & opiniastrement, raschans à se persuader que Dieu n'a aucun supplice pour eux.

Au reste cet amour que Dieu veut que nous portions à nos ennemis, n'est que durant cette vie, pendant qu'ils sont encore cap-

bles de la beatitude eternelle, *Cōment,*
comme nous; car si tost qu'ils sont *& quād*
decedez, fils sont bien-heureux, *il faut*
ce qui arriue toutes & quantes fois *aymer*
qu'ils se repentent de leurs mes- *nos enne-*
faits, & meurent en la grace de *mis.*
Dieu, ils ne sont plus nos ennemis,
au contraire nous n'eusmes iamais
de meilleurs amis: fils sont dam-
nez manque d'auoir voulu quit-
ter leur malice, Dieu ne nous obli-
ge plus de les aymer, ou de leur
faire aucun bien, ains veut que
nous les ayons en horreur, & que
nous les hayssions, comme il fait:
si bien que le Sophisme de vostre
rimeur est par terre de quel costé
qu'il se puisse tourner.

Je sçay bien que tout ce qui est,
est aymable, & que Dieu ne hayt
pas l'estre des damnez: aussi ne le
hayssons nous pas, ains nous ay-

mons leur estre, & la nature des diables, entant qu'ils portent l'image de Dieu, & entant que l'estre, & la bonté s'entresuiuent nécessairement: mais cela nempesche pas que nous ne detestions, & hayssions parfaictement leurs meschancetez; c'est pourquoy ie veux bien que vostre Poëte, & que tous les Deïstes, & les Athees sçachent que ie leur porte vne hayne mortelle, entant qu'ils sont impies, & qu'ils rauissent l'honneur deu à mon Dieu, mon createur, & mon redempteur, aussi bien que le Prophete Royal faisoit enuers les meschans de son temps, *Perfe-*

psal. 138. Eto odio oderam illos, & inimici facti sunt mihi.

Mais pour ce qui est de leur nature, de leurs proprietéz, & des perfections du corps, ou de l'en-

tendement que Dieu leur a départy, ie les ayme, ie les careffe, ie les honore, & les prise grandement comme œuures de Dieu, estant marry qu'ils emploient la subtilité, & la force de leur esprit, & l'elegance de leurs paroles à se bander contre celuy de qui ils ont receu tout ce qu'ils ont: & ne desire rien dauantage que leur amendement, prest à subir toutes sortes de travaux pour ce suieçt, si ie sçauois la façon de les pouuoir ramener à la verité de la religion Catholique, car ie suis obligé de procurer leur salut, cependant qu'ils sont en vie, mais personne n'est tenu d'auoir ce desir enuers les damnez, d'autant qu'ils sont hors de toute esperance.

Par où vous voyez ce qu'il faut respondre au 10 quatrain, puis que

Dieu ne nous inspire pas d'estre
secourables enuers les damnez, &
ne veut pas que nous soyôs moins
cruels enuers eux, qu'il est; si tou-
tesfois cela se pouuoit appeller
cruauté, ce qui est faux, car il n'y a
point de cruauté à punir vn crimi-
nel selon ses delits, veu que iamais
il n'y a cruauté, que lors quele sup-
plice excède le m'éfait; or au lieu
d'exceder, quand Dieu punit, il
est beaucoup moindre, que celuy,
qu'il pourroit iustemét exiger: de
là vient que les Theologiës disent
fort bien que *punit citra condignum*,
aussi bien que *remunerat ultra condi-
gnum*: c'est pourquoy la punition
diuine doit plustost estre nom-
mee misericorde, ou douceur, que
cruauté; c'est ainsi que nous di-
sons que les Iuges font misericor-
de aux criminels, lors qu'au lieu

qu'ils auoiét merit   d'estre ro  ez,
ou bruslez, ils les condamnent seu-
lement    finir leurs iours en prison
au pain, &    l'eau, ou d'auoir le
fo  et par les carrefours.

LE D. le suis fort satisfait sur
ces deux quatrains, Dieu vueille
qu'il m'arriue le mesme sur ce qui
suit.

LE DEISTE.

*Pcut-il nous commander d'aymer nos enne-
mis, s'il les hayt luy mesme veu qu'il est tout iu-
ste, & tout bon; quelle apparence que nous les
puissions ayder en leur misere, s'il les voit souf-
frir vne peine immortelle?*

XI.

LE THEOL. Ce que nous auons
dit cy deuant, monstre assez que
ce quatrain ne conclud rien, car
vous auez veu que Dieu ayme
mieux ses ennemis, que nous ne

faisons pas : & quoy ? si il ne vous eust aymé, vous eust-il conserué iusques à present, vous eust-il fait ceste grace que d'estre instruiet de la verité de nostre religion, & desabusé des erreurs compris dans ce poëme, afin qu'au lieu d'estre puny eternellement, si vous eussiez persisté en ceste malheureuse opinion, vous iouyssiez de la gloire eternelle, si vous viuez desormais constamment dans l'Eglise Catholique, & si vous gardez soigneusement les commandemens de Dieu.

*Il faut
estre bien
aise de la
punition
des dam-
nez, &
des mes-
chans*

De plus vous voyez qu'il compare l'amitié que nous deuons porter à nos ennemis en ce monde, avec la haine que Dieu leur porte apres qu'ils sont morts opiniaîtres en leur peché : & par ainsi il ne conclud rien, car nous tom-

mes contens, & nous nous refiouif-
sons selon la saincte volonté de
Dieu, de ce que ceux qui l'ont icy
deshonoré, entant qu'ils ont peu,
mesprisans ses commandemens,
sont maintenant chastiez de leurs
meschancetez. En quoy nous
monstrons l'amour que nous por-
rons à Dieu, estans bien aises que
ses ennemis soient punis. Et croy
qu'il ny a personne de bon iuge-
ment qui ne pensast que celuy là
haïroit le Roy, qui seroit marry,
que ces ennemis, & ceux qui l'au-
roient offensé, fussent punis selon
leur demerite: & qu'au contraire il
aymeroit son Prince, se refiouys-
sant de ce que ceux qui luy au-
roient esté rebelles, seroient cha-
stiez, soit que cela seruist d'exem-
ple, ou non.

C'est en ceste façon que nous

*Qu'on
peut hayr
les pe-
cheurs.*

aymons la gloire, & la bonté de Dieu, en nous resiouyssans de ce que les criminels de leze Majesté diuine sont punis. Pour ceux qui sont hors de la grace de Dieu, si nous les cognoissions assurement, nous pourrions les hayr comme ennemis de Dieu, cependant qu'ils seroient en cét estat. Je dy bien plus, car nous nous pouuons, & deuons hayr nous mesmes, lors que nous sommes tombez en peché, bien qu'il ne soit que veniel; ce que les meilleurs Chrestiens font assez paroistre, lors qu'ils ieusnēt, ou s'affligent en quelque façon que ce soit, afin de punir leurs mesfaits: punition volontaire, laquelle tesmoigne l'amour que nous portons à Dieu, & la hayne du peché, ce qui fait que les penitences volontaires sont

fort agreables à la diuine majesté,
& ont vne grande force pour effa-
cer le peché.

LE D. Vous auez touché vn
point de ces punitions corporel-
les, contre lesquelles vous verrez
tantost qu'une grande partie de
ce Poëme combat, mais i'apper-
çoydesia par ce que vous venez de
dire, que le tout sera bien ayse à re-
futer: cependant ie poursuy.

LE DEISTE.

*On ne peut pas conceuoir vn tourment in-
finy pour contenter l'ire de Dieu, si ce n'est qu'on
die qu'il est infiniment cruel, & qu'il nous trai-
te plus mal que le plus grand tyran du monde.* XII.

*Si le bigot se contentoit de l'estimer tel com-
me luy, c'est à dire, qu'il assouuist sa vengeance
de quelque supplice limité, on pourroit excuser
vne telle ignorance.* XIII.

XIV.

Mais de dire que Dieu punit l'homme d'une peine infinie pour ses deffauts sur peine d'injustice, c'est accuser la bonté divine d'une malice immortelle.

LE THEOL. Ouy, il se peut concevoir vn tourment infiny, lequel plaïse eternellement à Dieu, puis qu'il est eternellement iuste, & qu'il hayt le peché eternellement. Ouy, le bien peut plaïre infiniment à Dieu, & par consequent la punition des meschans, laquelle est vn grand bien, & fort digne des damnez luy peut estre agreable.

L'ire de Dieu n'est autre chose que l'auerfion qu'il a du mal, comme d'un déreglement, & d'une abolition de l'ordre, qu'il a estably. Dequoy vous pouuez vous plaindre, si les meschans n'ayans pas voulu eslire le costé droict, où estoit la courone, & la gloire, ont

mieux aymé choisir la fenestre, à laquelle estoit la confusion, & le supplice ? Mais vous ne pouuez conclure de là que Dieu soit cruel: Le Roy seroit il cruel, s'il donnoit le choix d'estre recompensé de quelque excellente dignité, si on le seruoit fidelement, ou d'estre chastié, si on luy estoit traistre, lors que le criminel endureroit le supplice ? nullement, car ce seroit sa faute, & non celle du Roy. Ostez donc cete cruauté de vostre esprit, car Dieu ne peut estre cruel, comme vous pouuez conclure de ce que i'ay dit cy dessus.

Mais ie vous prie, vn tyran est-ce pas celuy, qui fait endurer les innocens tres-iniustement ? qui opprime ceux, sur lesquels il n'a aucun droit, & qui se bande contre toute sorte de iustice ? Où est-ce

*Pourquoy
Dieu pu-
nist eter-
nellement,
& neant-
moins
n'est pas
cruel.*

que ce miserable Deïste a étudié vne si mauuaise leçon, qui luy ait appris que Dieu soit tyran : Dieu, qui ne peut commettre aucune iniustice, & qui a tous les droicts du monde de faire, & ordonner tout ce qu'il fait ? C'est donc à d'autres qu'il faut que ce Sophiste vende ses coquilles, car Dieu a tres-iuste raison de chastier eternellement ceux qui en mourant, & refusant de recognoistre leur Createur, l'ont eternellement mesprisé, testmoignans cette eternelle opiniastreté par le dernier acte de leur vie, dans laquelle ils demeurent tousiours.

*Responce
au 13.
quatrain.*

Je vous proteste qu'il est bien
aueuglé au treiziesme quatrain,
dans lequel il veut que Dieu imi-
te vn bigot, lors qu'il chastie le pe-
ché: voicy bien le monde renuersé,
que

que le Createur prenne l'oy de sa creature. Il seroit volontiers d'adu-
uis que Dieu se rendit finy, & que
la haine qu'il porte au peché, ne
durast pas tousiours; mais c'est en
vain, car cete haine durera tout au-
tant comme Dieu sera Dieu. Il ne
faut point de l'imitation à vn sup-
plice, qui est destiné pour vn cri-
me, qui n'a point de fin. Il faut que
l'œuure par lequel la grandeur de
la iustice diuine est tesmoignee, &
apperceue par les hommes, soit
eternel, il faut que la peine d'une
vengeance infinie soit infinie; or
la vengeance diuine estant vn acte
de la iustice eternelle, doit aussi
estre eternelle: Dequoy est ce
donc que vous vous pouuez plain-
dre, si Dieu chastie eternellement.
L'homme quel qu'il soit n'a garde
de prendre vne vengeance infinie,

*Raisons
qui preu-
uent que
la peine
des dam-
nez doit
estre eter-
nelle.*

estant finy, comme il est, bien qu'il s'en trouue assez, qui ont cette ferme volonté de se venger eternellement, s'ils pouuoient, comme ils tesmoignent faisant du pis qu'ils peuuent à leurs ennemis, non seulement quand ils sont viuans, mais encore apres leur mort, par leurs mediances, ou en nuisant aux heritiers.

Vous voyez donc par ce discours que ce n'est pas nostre ignorance qu'il faut excuser, mais celle de vostre Dialecticien, qui ne conclud rien qui vaille, & qui est si ignorant, qu'il ne sçait pas qu'il faut qu'il y ait de la proportion entre le iuge, & sa iustice, entre le crime, & le supplice; ie croy neantmoins que c'est plustost vne malice affectee, que l'ignorance, qui luy a mis la main à la plume, & la conception dans l'esprit pour nous e-

staler ces quatrains farcis d'erreurs, d'impollures, d'ignorances, & de calomnies.

Voicy encore vn paralogisme dedans son quatorziesme quatrain, où il veut faire à croire que nous accusons Dieu d'estre meschant, quand nous disons qu'il exerce la iustice, lors qu'il punit les meschans; car nous n'vsons pas de ces termes, qu'il apporte, sçavoir est que Dieu seroit iniuste, si ne punissoit les meschans, bien qu'estant entendus sainement, comme il faut, on pourroit vrayement dire que la iustice ne seroit pas renduë à celuy qui meurt en son peché, si n'estoit puny, d'autant que comme la iustice veut que celuy qui meurt en la grace de Dieu, soit recompensé de la felicité eternelle, la mesme

*Responſe
au 14.
quatrain.*

*La peine
des dam-
nez est
tres-juſte.*

veut aussi que le supplice des re-
prouvez soit eternal.

Et ne sçay pas ce qu'un homme
de bon iugement pourroit repren-
dre en cecy, car la lumiere de la
raison nous fait toucher au doigt
cette verité.

*Dieu peut
sauver
tous les
damnez.*

Neantmoins comme toutes
choses sont tousiours en l'absolu
pouuoir de Dieu, bien qu'il ne
chastiaist le meschant, il ne seroit
pourtant pas iniuste, d'autant qu'il
peut tousiours le retirer de ce pe-
ché, luy donnant vne force sur-
naturelle pour se repentir, & pour-
roit par ce pouuoir infiny, qu'il a
par tout, & sur tout, retirer tous
les damnez de l'enfer; mais nous
ne sommes pas sur ce poinct, &
suffit maintenant que vous apper-
uiez la meschanceté de vostre Poë-
te, qui vouloit persuader au mon-

de, que nous accusons la bonté diuine d'une eternelle malice, ou au contraire nous l'adorons en toute humilité, & confessons haut, & clair que sa bonté ne paroist pas moins en la punition des mechans, qu'en la recompense des bons, mais seulement en diuerse maniere, car l'un, & l'autre, comme i'ay desia dit, est vn œuvre signalé, & eternel de la iustice diuine.

Or il faut icy remarquer que Dieu ne laisseroit pas à estre iuste infiniment, bien qu'il ne punist, ou ne recompensast personne, d'autant que ces attributs ne dependent pas des effects, qui nous paroissent, car ils sont d'eux-mesmes sans aucune dependance; ce n'est qu'à nostre respect, qu'il est necessaire d'en voir les effects pour les recognoistre, parce que

nous ne voyons point les perfections diuines, que par ce qui nous paroist, & par ce que nous pouuôs conceuoir. De là vient que pour côclure vne iustice infinie en Dieu, la peine eternelle des damnez ne nous sert pas de peu, bien que sans icelle nous la peussions croire, & conceuoir en quelque façon, veu que les effets ne sont pas de l'essence de la cause: mais c'est assez dit, à mon aduis, sur ce quatrain, passez aux autres.

L E D E I S T E.

XV. Je sçay qu'il respondra pour s'excuser, que Dieu ne peut quitter son eternelle iustice, & qu'il faut qu'il assouuisse sa fureur d'une peine immortelle, puis qu'il est infiny.

XVI. Mais il ne s'ensuit pas qu'un méfait limité doine estre puny d'une peine infinie, bien que sa diuine Maiesté ait un estre infiny, & invariable.

*Response
au 15.
quatrain.*

LE THEOL. Cela est certain que Dieu ne peut quitter sa iustice immortelle, si ne se quittoit soy-mesme, car la iustice luy est aussi essentielle, comme la raison l'est à l'homme! mais il parle de Dieu avec tant de passion, d'irreuerence, & de manie, qu'il ne peut, ce semble, s'abstenir de ces mots de cruauté, vengeance, fureur, assouuissement, &c. Je veux traiter plus doucement avec vous, qu'il ne fait avec Dieu, & vous faire ressouuenir que si quelque effect, soit de peine, soit de recompense, a quelque rapport, & proportion avec les perfections diuines, c'est particulièrement lors qu'il est eternal. Donc si la haine que Dieu porte au mal de coulpe, est immortelle, (comme elle est vraiment, & ne peut qu'elle ne soit telle, & par

*La haine
de Dieu
contre le
peché im-
mortelle.*

consequent nous ne disons pas cela pour couvrir aucune erreur, mais parce qu'il est si veritable, qu'il ne peut autrement arriuer) il est euident que la peine deuë à certe coulpe, & qui doit estre proportionné à la haine, que Dieu luy porte, doit estre infinie, & immortelle. Mais c'est mal parlé de rendre Dieu furieux, comme ce Poëte fait, non pas qu'on ne puisse attribuer à Dieu le courroux, la vengeance, & la fureur, à cause des effects de sa iustice, qu'il fait paroistre sur les meschans, car la sainte Escriture en parle ainsi pour s'accommoder à nostre façon d'entendre les choses, mais parce qu'il vse de ces termes par vn mespris des choses diuines, & comme estant luy mesme remply d'un furieux, Enthousiasmes, ou plustost

d'une rage perpetuelle contre l'Eglise Catholique, & contre tous les Chrestiens. Mais passons à l'autre quatrain, car c'est là qu'il reserve sa pretenduë raison contre le châtiment du peché, disant que puis que le peché est finy, qu'il ne doit pas estre puny d'un infiny supplice.

Je desirerois fort sçauoir de luy si du moins il pense que les pechez doiuent estre punis de quelque supplice temporel, & finy, & qu'il me dist par quelle penitence il punist les siens, ie croy que les marques en seroient inuisibles. Or bien qu'en quelque façon le peché soit finy, comme à cause qu'il est la priuation d'une vertu, où d'une rectitude finie, neantmoins il est assez infiny pour estre chastié d'un infiny tourment; pre-

Response
au 16.
quatrain.

Raisons
pourquoy
le peché
est infiny.

mierement en ce qu'il est contre le respect, que nous deuons à l'estre infiny, qui nous defend le peché (les actes ou priuations prenant leur estre, ou leur denomination de leurs objets.) Secondement parce qu'il nous détourne d'un bié infini, qui est la iouïssance de Dieu, car au lieu que nos actions deuroient butter à la gloire du Createur, le peché les fait butter à la gloire des creatures, puis qu'il est vne auersion, & vn détour de la fin dernière, qui est Dieu seul, & vne conuersion vers les creatures; & ainsi faisant nous mesprisons Dieu pour priser la creature, car il est impossible d'offenser Dieu mortellement, sans le mespriser, & le postposer aux creatures.

Pourquoy est-ce donc que celuy là ne sera pas puny éternelle-

ment, qui a mesprisé l'estre eternal, & qui a continué ce mespris vne eternité, en tant qu'il a esté en luy, car la derniere resolution, qu'un homme a en mourant, peut estre dite eternelle, puis qu'il l'eternise en tout ce qu'il peut.

Il faut donc que le supplice de celui, qui meurt en mesprisant Dieu, soit eternal, puis que sa volunté demeure peruertie, & mesprisante pour tout iamaïs, si tost qu'elle a finy la carriere de ceste vie en ceste maudite resolution de ne se point repentir, & de continuer son peché.

Enfin bien que le peché fust limité en toutes façons, Dieu le pourroit neantmoins punir tres-iustement d'un supplice eternal, car son commandement est vne ordonnance eternelle, & le crime

doit estre puny d'autant plus grièvement que la personne, contre laquelle il se commet, est releuee.

Mais ie vous prie, Dieu n'a-il pas peu deffendre le peché mortel sous peine d'un supplice eternal, & par consequent a-il pas peu chastier de ce supplice tous ceux qui tombent en ce peché? qu'il le peut nier sans vn horrible blaspheme? puis que nous confessons ingenuëment que celuy qui transgresse l'ordonnance des Roys, merite le chastiement, lequel est porté par la loy, telle qu'est la mort que celuy-là à merité, qui a tué quelqu'un iniustement.

Bon dieu! pourroit-on nier que celuy-là ne merite d'estre priué pour iamais de la gloire eternelle, & de vostre sainte face, lequel a étably sa derniere fin, & sa beati-

tude dans vne chetive creature, au lieu qu'il pouuoit, & qu'il deuoit la chercher en vous tout seul? Sera-il dit que vous n'aurez pas vn iuste pouuoir de chastier eternellement celuy qui a méprisé vostre infinie Majesté, & qui n'a tenu nul conte de vos saintes ordonnances?

Mais le deiste voudroit peutestre que dieu sauuaſt les hommes malgré qu'ils'en euſſent; ce n'est pas à luy à donner la loy à son Createur, lequel a voulu que nous cooperassions à nostre salut, & que nous obtinssions la beatitude eternelle en qualité de recompense, ce qui nous releue beaucoup dauantage, que si nous la deuions auoir par vne autre voye. Qu'il prenne seulement garde qu'il ne tiendra qu'à luy s'il n'acquiert cet-

te beatitude, car s'il veut quitter ses desbauches, & sa miserable façon de viure, & qu'il demande seulement pardon à dieu en suivant desormais ses saincts commandemens, il aura cette beatitude eternelle, à laquelle tous les hommes doiuent viser.

Et quoy? veut-il que dieu luy donne le Paradis, & luy ne voudra pas demander pardon, ny pas mesme conceuoir vn regret en son cœur d'auoir vescu si mal iusques à present! O dieu quel auetuglement, & quel endurcissement! Vrayement cette sentence de S. Gregoire le Grand luy conuiene fort bien, *peccator vellet sine fine viuere, vt sine fine peccaret.*

4. dialog.
f. 4.

Difons encore que celuy-là merite d'estre banny eternellement du Paradis, & d'estre priué pour

toufiours de la vie, & de la lumiere
eternelle, lequel s'est luy-mefme
ietté dans le peché mortel; auffi
bien que celuy-là merite d'estre
toufiours aueugle, ou priué de vie,
lequel s'est arraché les yeux, ou
s'est luy-mefme tué; car ne plus ne
moins que personne ne fçauroit se
refufciter, ou se rendre la veüe, auf-
fi personne ne peut se releuer de
fon peché, ny recouurer la lumie-
re de la foy par fes propres forces,
c'est pourquoy celuy qui quitte
volontairement le feruice diuin, &
le refpect qu'il doit à Dieu, & à la
Religion, par laquelle il veut estre
feruy, & adoré, il se rend indigne
de la beatitude eternelle, & digne
d'une perpetuelle mifere.

Il ne faut point icy penfer que
dieu foit cruel, nenny, mais c'est
toy deifte malheureux, qui t'es

cruel à toy-mesme, puis que pour ie ne sçay quel plaisir brutal, ou ie ne sçay quel enragé contentement, que tu prends, ou du moins que tu t'efforce de prendre à tes fantasies, & à croire, & dire que tu es fort en repos, quand tu oste la iustice à Dieu, & que tu t'imagines qu'il n'y a point de peine pour les damnez apres cette vie; puis que, dis je, pour ce plaisir imaginaire, & ce vain contentement tu te iette en toutes sortes de pechez, & te rends indigne que Dieu te fasse iamais aucune grace.

Voy, ie te prie, si tu trouuas iamais ce plaisir, & ce repos dans tes delices, & dans tes opinions fantasques, lequel tu t'estois imaginé; es-tu pas pire que les diables, lors que tu vas disant à l'oreille de tes confidens, que tu leur veux apporter le

ter le vray repos, & la vraye beatitude, fils veulent espouser tes bizarreries? Combien de fois t'ont-ils repris de tes sottises, & de tes blasphemes, te remettans ton repos, & ton contentement phantastique deuant les yeux en se moquant de toy, lors que la faim pressante, ou la perte que tu faisois en iouant avec eux, te rédoit misérable, & te tiroit des paroles de la bouche, & des soupirs du cœur, qui tesmoignoient que le repos, & le contentement de l'ame, duquel tu fais si grande estime au temps de la bonne chere, est aussi éloigné de ton esprit, comme il est proche de tes lèvres.

Montrez luy le danger où il est, quand vous le verrez, & luy dites ce mot veritable du grand S. duquel ie vous parlois tantost: *Id-*

Au lieu *Stum est quod qui in suo aeterno, i. in sua*
cité chap. *vita peccauit contra Deum, puniatur in*
 44. *aeterno Dei.* Il est encore viuant, il
 peut quitter sa malice, & ne la rendre pas
 eternelle; qu'il ne s'amuse plus à considérer le plaisir du pe-
 ché lequel ne dure qu'un mo-
 ment, car bien que le plaisir du
 larron, ou de l'homicide n'ait du-
 ré qu'un instant, il ne laisse pas d'e-
 stre mis en vne prison perpetuel-
 le, ou d'estre mis à mort, sans que
 iamais on luy rende la vie, bien
 qu'il eust deu viure mille ans, voi-
 re mesme vne eternité: les iuges
 temporels y sent de ses chastimens,
 personne ny treuue à redire, quād
 on a l'esprit bien fait; au contraire
 on louë la iustice, & les iuges qui
 l'ont renduë; & nonobstant tout
 cela il se treuue des hommes si
 étourdis, & si despourueus de iu-

gement qu'ils appelleront Dieu cruel, sil chastie ceux qui l'ont méprisé, d'un supplice infiny. O Dieu où sommes nous ! Quant à moy ie dirois plustost, & croirois fermement que le supplicé infiny duquel les damnez sont chastiez, seroit trop leger, que ie ne penserois qu'il fut trop grand ; & croy qu'un chacun fera de mon aduis, qui pensera serieusement quelle est la Majesté diuine, quel honneur, & quel seruice elle merite, & quelle est la remerité, la presumption, & la malice du pecheur.

C'est vne chose estrange qu'on croye facilement que Dieu donnera la gloire eternelle à ceux qui auront bien fait, & qui l'auront aimé de tout leur cœur en luy sacifiant leur corps, & leur ame, & en gardant ses commandemens, &

qu'on ne vueille pas croire qu'il punira les meschans qui l'ont mesprisé, d'un supplice eternal. Mais cette creance imaginaire qu'ils ont, qu'il n'y a point d'enfer, n'empeschera pas la sentence du Iuge tout puissant, laquelle il fulminera contre les damnez au iour du iugement general, & qu'il prononce par le iugement particulier à leur mort; laquelle est aussi expresse en ses paroles, *Ite maledicti in ignem eternum*, comme celle, par laquelle il appellera les bons à la beatitude des saints, *Venite benedicti Patris mei*, si bien qu'il ne faut point que personne se flatte sous pretexte de la bonté, & de la misericorde de Dieu: ny qu'on pense que la sentence des damnez n'est que comminatoire pour détourner ceux-là du peché, lesquels n'ont pas l'es-

Le sup-
plice des
damnez
aussi ve-
ritable
que la
gloire des
bien heu-
reux.

prit assez bien fait pour fuyr le vice, & pour se porter à la vertu par le seul motif de sa beauté, ou de la l'aideur du peché, & pour le seul amour de dieu.

Car ne plus ne moins que la promesse que dieu fait aux bons de la recompense eternelle, n'est pas seulement pour nous enflammer à la vertu, & pour nous faire suiure ses commandemens, mais est tres veritable, & sera accomplie de poinct en poinct: ainsi le supplice duquel il menace les damnez, n'est pas seulement pour faire peur aux meschans, mais il est tres veritable, lequel ils endureront aussi vrayement, & reellement, comme le bon-heur des iustes sera vray, & reel.

Et quoy? est-il pas tres-raisonnable que les damnez lesquels

meritent d'estre chastiez eternel-
lement, n'endurent pas seulement
en nos pensées , & par imagina-
tion , mais reellement, & en effect,
puis que ce n'a pas esté par nostre
seule pensée , & en imagination
qu'ils ont mal-fait , & qu'ils ont
commis leurs meschancetez, mais
reellement, & de fait. Vous ne vou-
driez pas que la recompense que
Dieu nous promet, ne fut qu'ima-
ginaire , si vous sçauiez deuoir
estre des bien-heureux , comme
vous serez assurement , si vous
quittez vos impietez pour tout ia-
mais , & si vous obeyssiez à Dieu le
reste de vostre vie: pourquoy est-
ce donc que vous voudriez que la
recompense des meschans, laquel-
le est la punition que merite leurs
pechez, ne fust que phantastique,
& imaginaire?

Concluez donc , si le supplice doit estre borné, par lequel celuy-là est puny , qui a mesprisé l'infinie bonté de Dieu , & qui est mort en cette impieté:& si vous me voulez croire, detestez autant la peruerse doctrine de vostre Poëte , que vous l'avez chérie cy-deuant , à fin que Dieu vous fasse pardon , & misericorde, c'est ce que i'espere de vous.

LE D. Monsieur, vous ne serez pas frustré de vostre esperance, avec l'ayde de la diuine Majesté; mais ie vous prie ne vous ennuyez pas de respondre à ce qui suit , afin que ie puisse de plus en plus concevoir la verité, que nostre Poëte auoit tasché de faire *oclypser* ; voycy donc ce qui suit.

LE DEÏSTE.

XVII.

Ils font icy vne obiection, ſçauoir eſt que le bon-heur des vns ne peut eſtre ſans la miſere des autres, & que Dieu ſeroit vn pere iniuſte, s'il aymoit tous ſes enfans.

XVIII.

Mais cela ne ſe peut dire ſans faire Dieu cruel, afin qu'il ſoit iuſte; & puis c'eſt luy preſcrire la façon de gouverner le monde.

Reſponſe

au 17.

quatrième.

LE THEOL. Il apporte vne obiection de ſon creu, car nous ne diſons pas que le bon-heur des bien-heureux dépende de la miſere des damnez; au contraire cela eſt certain que quand il n'y auroit aucun damné, & que tous ſeroient bien-heureux, que la gloire n'en ſeroit moins grande, ny moins agreable, car comme elle eſt infiniment infinie, elle ne ſe diminue par aucune multitude de ceux qui en

iouyſſent. C'eſt pareillement vne
impoſture de nous faire dire que
Dieu ne ſçauroit aymer tous ſes
enfants ſans iniuſtice, car nous di-
ſons que Dieu les ayme tous, de
ſorte que ſon amour s'étend iuf-
ques aux enfers, car c'eſt par a-
mour, qu'il conſerue l'eſtre des
damnez; ſoit donc tenu ce qua-
train pour pure calomnie, afin d'e-
xaminer le ſuiuant.

Certainement il n'eſt pas moins *Reſponſe*
faux que l'autre, car comme il *au 18.*
l'inſere du precedent, il ne peut *quatrain.*
qu'il ne ſuiue ſa nature, ſi la conſe-
quence eſt bien tirée, car d'un
principe faux, on ne ſçauroit
rien legitiment inferer qu'une
fauſſe conſequence. Mais prenez
garde qu'il prend touſiours la iu-
ſtice de Dieu, & ſon effect pour
cruauté: c'eſt eſtre trop cruel en-

uers la iustice de Dieu que d'en parler si impertinemment , & si cruëment.

Or sçachez que nous sommes merueilleusement éloignez de ces opinions phantasques, aussi bien comme de vouloir reduire la volonté de Dieu à nos iugemens : & vous assurez que nos iugemēs en matiere de religiō n'ont autre brāle que la volonté de Dieu , & la lumiere qu'il nous a donnée par la foy. Son Empire ne peut dépendre d'autre que de luy , ny la façon qu'il se comporte avec toutes les creatures : ce nous est beaucoup d'adorer par vne profonde meditation, & contemplation le saint ordre de sa volonté, & d'admirer la profondeur de ses iugemens, & de ses voyes , esperans qu'apres cette vie nous verrons la claire

verité de tout ce que nous auons icy creu, & seulement considéré par la foy, comme par vn miroir, & par vn Enigme.

Voilà ce que i'auois briefuemēt à respôdre aux quatrains de vostre poëme, car le chemin ne me permet pas de m'estêdre plus au long sur ce sujet. Tant y a que i'estime vous auoir donné assez de lumie-
re pour quitter ceste folle opinion que vous auiez d'un Dieu, duquel vous ne desiriez que les douceurs, la bonté & la miséricorde: & ne croy pas que vueilliez plus long temps tréper en cet erreur, si vous confiderez que Dieu a toutes sortes de perfections, & qu'elles sont toutes infinies, & qu'il a voulu que chacune parust en telle façon que nous peussions apprehender leur infinité: & puis qu'il ne tiét qu'aux

damnez qui ne soient sauuez (lors qu'ils sont en estat de meriter, & de se conuertir, qui est en ceste vie) lesquels ayment mieux suiure leur abominables desirs; & leurs sales concupiscences, encore que Dieu le defende expressément, que d'embrasser sa loy. Vous n'appellez pas le Roy cruel, lors qu'il fait mourir quelqu'un pour auoir contreuenu à ses Ordonnances, pourquoy est-ce donc que vous vous imaginez que Dieu est cruel de punir ceux qui luy desobeissent. De plus vn pere n'est pas tenu de s'abstenir de la generation, bien qu'il sceust que son fils deust miserablement perir, supposé principalement qu'il ne doie perir, que par sa propre faute; pourquoy voulez-vous donc que Dieu ne produise pas celui, duquel il preuoit la cheute,

& le peché; puisque ce n'est que la faute quand il offense la diuine Majesté; voulez vous point que nostre meschanceté surpasse la bonté? ce ne sera pas iamais; contentez-vous donc l'esprit en admirant les œuvres de Dieu, & rentrez dans la creance de l'Eglise.

LE D. Si vous m'auiez donné autant de satisfaction sur les autres quatrains, i'aduiferois ce que i'aurois à faire, mais cela seroit bien long, & craindrois vous donner trop de peine.

LE THEOL. Il n'y a rien qui me puisse donner de la peine sinon tres-agreable, en ce qui est de vous desabuser de ce libertinage d'opinions, & d'erreurs, que vous appelez Deïsme: neantmoins auant que vous proposiez le reste, ie suis d'adujs que nous disnions à ce passage,

& par apres vous pourſuiurez vos quatrains, cependant vous pourrez penſer à ce que ie vous ay dit.

CHAPITRE XV.

Que l'amour de Dieu eſt immuable, quels ſont ſes objets: comment il nous a peu racheter, veu que nous luy appartenions: comment il peut ſ'aſſeruir à l'homme, & comment nous luy pouuons faire reſiſtance, avec la reſutation des quatrains du Deiſte, depuis le 19 iuſques au 29.

LE DEISTE.



O I C Y des obiections encores plus fortes que les precedentes, auxquelles vous vous trouuerez peut-eſtre bien empesché,

quelque subtilité d'esprit que vous puissiez auoir, ou du moins confesserez que ce n'a pas esté sans raison, que j'ay suiuy cette opinion: prestez donc s'il vous plaist attention aux quatrains qui suivent.

LE DEISTE.

D'abondant puis que l'amour de Dieu est une action, de laquelle il est le seul object, & la cause invariable, est-ce pas s'embrouiller d'une contradiction de croire que cet amour diuin puisse cesser enuers nous?

XIX.

Et quoy, si cet amour ne peut en aucune façon se diuiser de l'essence diuine, pourquoy est-ce que le bigot la corporalise, la rendant sujette à l'inconstance humaine?

XX.

N'est-il pas insensé lors qu'il croit que Dieu est capable d'offense, puis que tout pouuoir depend de luy? & qu'il ait peu nous mettre les armes en main contre luy, & qu'il se soit donné

XXI.

de la peine, & de la souffrance pour nous, veñ
qu'il est tout sage?

xxii.

Pourroit-il donner son assistance pour estre
surmonté, & afin qu'on luy rauist son ouvrage,
& puis endurer qu'on executast toute sorte de
rage contre sa volonté pour racheter le susdit
ouvrage?

Responce
au 19
quatrain.

Quel est
l'objet de
l'amour
divin.

LE THEOL. C'est assez, demeurez là, afin que ie vous fasse paroistre les impostures, & les menfonges impudens de vostre Poëte, lequel a remply ses quatrains de blasphemes, car au premier il dit que l'amour de Dieu a vne cause, ce qui est faux, puis que c'est Dieu mesme: il se coupe de son propre glaive, car si Dieu seul est l'objet de son amour, il ne nous ayme donc pas, autrement nous serions aussi l'objet de ce mesme amour: mais pour vous desembarasser l'es-

bonnes

prit de ce Sophiste, il faut que vous supposiez que Dieu ayme les choses telles qu'elles sont: si elles sont bonnes eternellement, il les ayme eternellement, si elles ne sont bonnes que quelque temps, il ne les ayme que ce temps là, de façon neantmoins que cet amour, en tant qu'il est en Dieu, ne s'altere en aucune façon, mais demeure tousiours, & ne tient qu'aux choses aimables, si elles ne sont aymeées eternellement de Dieu, lequel ne les a plus pour objet de son amour, lors qu'elles cessent d'estre aimables; ce qui paroist en l'homme, quand cōmet le peché mortel. Si vous vous estōnez de ce que Dieu n'ayme plus le meschant entant qu'il est pecheur, estonnez vous si les corps opaques, & tenebreux ne donnent point de lumiere, & si la

nuict ne luit pas comme leiour; & pour dire en vn mot l'amour que Dieu nous porte, n'est point perissable, mais nous sommes mortels, & perissables, & vrayement nous perissons, & mourons spirituellement, lors que nous perdons la vie de la grace.

Je veux vous donner vn exemple dans la nature, lequel vous fera voir tres-clairement qu'il n'est pas besoin que Dieu se change, ou que son amour soit variable, encore que tantost il aime l'homme, lors qu'il est en sa grace, & tantost il le haïsse, quād il est en peché mortel. Est-il pas vray que quand la Lune est entre nous, & le Soleil, qu'il se faict eclypse de Soleil, & que nous sommes priuez de sa lumiere? sans doute: & neantmoins il illumine ceux qui n'ont point la Lune entre

*Comme
l'eclypse
du Soleil
se fait.*

eux, & le Soleil.

Or ce n'est pas le Soleil qui se change, car il est en mesme lieu, auquel ie suis content que vous l'imaginiez arresté avec les Coperniceens, afin que vous entendiez mieux l'exemple. C'est donc le changement de la Lune, qui en est cause, ou le mouuement de l'homme, qui se met vis à vis de ce corps lunaire, quand il luy plaist, & qui est cause de ce qu'il est priué de lumiere; ce qui est fort à nostre propos, car nous sçauons que le fol, tel qu'est l'homme pecheur, est muable comme la Lune, *Stultus ut*

Luna mutatur.

Il faut donc que le meschant L'amour de Dieu immuable. s'en prenne à soy-mesme, lors que Dieu le hayt, & qu'il luy soustrait les rayons de sa grace: c'est luy qui oppose son crime au Soleil de lu-

stice, comme vne Lune grossiere,
& opaque ; qu'il oste son peché,
Dieu luy rendra sa grace : car
comme le Soleil illumine inces-
samment, ainsi Dieu départ touf-
jours les rayons de ses faueurs, &
ne desire autre chose que nostre
salut : ce qui se fait sans que l'a-
mour de Dieu perisse , non plus
que la lumiere du Soleil ne perit
point, mais demeure immuable,
particulierement si nous suppo-
sons que le Soleil soit immobile,
& que la terre se meuue tout au
tour, afin que l'exemple vous satis-
fasse avec plus de contentement.
N'importe que l'hypothese ne
soit pas veritable, c'est à dire que
la terre ne soit pas mobile, ny le
Soleil fixe, car c'est assez que cela
se puisse faire, si l'on plaist à Dieu.
D'où nous pouuons conclurre en

passant, qu'il est necessaire que le Soleil, & la terre ayent esté faits, & qu'ils ayent receu la vertu de se mouuoir, ou de s'affermir, puis qu'ils estoient indifferents à l'un, & à l'autre: or cette determination a se mouuoir, ou ne bouger d'un lieu, n'a peu venir que d'un estre eternal qui est Dieu.

Que vostre Poëte sçache donc que l'amour de Dieu ne se diuise non plus de son essence, que la lumiere, du Soleil; & qu'il faille pourmener avec son bigot, & sa corporalization, car ie ne cognois point de Chrestien, qui fasse l'amour de Dieu suiet à aucune inconstance, au contraire il n'y en a pas vn qui ne confesse haut, & clair, que l'amour de Dieu est exempt de tout changement, puis qu'il est Dieu mesme selon ce

*Responſe
au 20.
quatrain.*

beau verset de l'Apostre, *Deus* *charitas est.*

Response.

au 21.

quatrain.

Le troisieme quatrain semble supposer que Dieu soit offensé, & lezé comme les hommes, mais nous sommes bien loin de cette creance, car Dieu ne peut recevoir aucun mal, lequel est seulement offensé entant qu'on ne luy rend pas le service, qui luy appartient, & qu'on fait le contraire de ce qu'il nous a déclaré vouloir; non qui ne l'empeschast facilement s'il vouloit, mais il nous laisse en nostre liberté: ie dy donc que Dieu est capable de permettre qu'on ne suive pas ses commandemens, parce qu'il n'en est pas moins heureux, & moins Dieu, que si on les pratiquoit, & cette permission n'est pas nous armer contre luy, veu qu'il ne nous a donné la liber-

té que pour en bien vser.

Nous pouuons encore nous ser-
uir du susdit exemple, afin de con-
ceuoir comment Dieu est offensé
sans qu'il en reçoie aucun dom-
mage, car si le Soleil departoit vo-
lontairement ses rayons en quali-
té de graces, & qu'il n'aymât que
ceux-là qui reçoient sa lumiere
s'exposans à ses rayons; & au con-
traire qu'il hayt tous ceux lesquels
y mettroient quelque empelche-
ment, & qui se soultrairoient de
ses faueurs, il seroit vray que le So-
leil ne se changeroit pas, & qu'il ne
seroit pas offensé en son corps,
mais tout au plus en sa lumiere,
qu'on empescheroit.

C'est ainsi que le Roy est offen-
sé lors qu'on traite mal quelqu'un
de ses Ambassadeurs, sans neant-
moins que le coup porte sur sa per-

sonne : or les graces diuines , & les rayons par lesquels Dieu nous illumine, sont comme des Ambassadeurs , par lesquels il nous persuade de nous tourner de son costé, & de nous vnir avec sa bonté : ses preceptes sont des rays de la lumiere eternelle , par lesquels il nous conduit en ce monde , & nous attire à sa gloire.

Aduisez si celuy qu'on passe la riuiera avec vn bac, coupoit le chable, ou la corde, s'il n'offenseroit pas le battelier, & s'il meritoit qu'on le passast : le pecheur fait-il pas le mesme, lors qu'il refuse la grace de Dieu, & qu'il la retranche ? il estoit attiré par les cordes de l'amour de Dieu, & par les liens d'une charité paternelle, *In funiculis Adam traham eos, in vinculis carnis* : il coupe, il rompt, il

reiette les cordes, & les doux liens des preceptes diuins, n'est-il pas digne de toutes sortes de supplices?

Pour la peine qu'il a voulu subir pour nous, elle a fait paroistre vne merueilleuse sagesse, & bonté tout ensemble, & doit fermer la bouche au detestable Deiste pour tout iamais, puis qu'il confesse luy-mesme qu'il ne peut comprendre comment Dieu a voulu endurer pour nous, apres s'estre reuestu de nostre nature, mais Dieu ne peut rien vouloir, n'y rien faire qui ne soit tres-sage, & tres-bon, or entre toutes les œuvres de sagesse, & de bonté cét auguste mystere de l'incarnation, contre lequel il agit, est vn des plus grands. Il me faudroit des anneés entieres pour parler de son excellence, & la seule

meditation que vous en ferez, servira de bride à vos libertinages.

Dites moy, ie vous prie, est-ce pas vn grand creue-cœur de voir que les hommes sont si meschans qu'ils ne craignent point de se servir du secours, que Dieu leur donne à chaque moment, pour faire ce qu'il a defendu ? ô miserables que vous estes, vous ne le croyez pas, d'autant que cela comprend vne trop grande misericorde, indulgence, & bonté, & neantmoins vous voulez que son amour soit infiny; voyez de grace, si celuy qui abuse d'une si grande misericorde, ne merite pas d'estre tourmenté à iamais. Certainement ie m'ennuie grandement d'entendre ses quatrains si mal digerez, & n'estoit que i'espere que vous quitterez vostre erreur, ie ne voudrois pour

rien du monde m'amuser à refuter toutes ces sornettes, qui sont tirees tant des anciennes, que des nouvelles heresies, lesquelles sont causes de toutes ces impietez.

LE D. Je voudrois bien ne vous donner pas ceste peine, mais puisque nous auons commencé, & que vous m'avez satisfait à ce que j'ay apporté, ie croy que vous seriez marry, si ie demeurois dans les difficultez, qui sont contenuës es quatrains suiuians : or afin que la chose soit plus claire & plus briefue, ie me contenteray de proposer quatrain à quatrain, si ce n'est que quelques-vns soient attachez par ensemble à cause du sens, ou de l'identité de la matiere, ce que ie feray sans y ioindre autre chose, car j'ay apperceu que vous sçauiez fort bien où ils buttent, que si

vous me satisfaiçtes, ie ne repartiray point, mais i'apporteray simplement le quatrain suiuant.

LE THEOL. Ie le veux bien, mais ie vous prie de vous rendre attentif, & vous ressouuenir de ce que nous aurons dict auparauant, afin que si vos quatrains repetent la mesme impieté que les precedens, nous les passions comme chose de neant, à laquelle nous aurons desia respondu.

LE D. I'accepte ces conditions comme fort raisonnables, voicy donc ce qui suit en ce 23 quatrain.

LE DEISTE.

XXIII.

Si Dieu auoit ceste ambition de monstrier sa force, & sa puissance contre nous, son desir ne seroit-il pas vne grande imperfection, & vne pure indigence?

LE THEOL. C'est fort mal parlé d'appeller ambition le desir que Dieu à que ses perfections nous paroissent, telle qu'est sa force, & sa iustice, ce desir n'est pas vne imperfection, si vous n'appellez imperfection l'amour qu'on porte à la vertu; ceste affection tres-loüable, & tres-saincte n'est pas vne indigence, mais vn grand thresor: & l'execution de sa iustice eternelle est tres-excellente puis qu'elle monstre combien; c'est vn grand mal que le peché, & combien Dieu est grand, puisque l'action, ou l'omission par laquelle nous contreuenons à ses ordonnances, merite vn tel chastiment, auquel il ne doit rien y auoir icy de comparable en grandeur, ny en duree, puisque c'est le supplice du peché, qui leue les cornes contre

celuy à qui rien n'est comparable
ny en grandeur n'y en duree.

Mais ie vous prie si le Roy faisoit seuerement punir celuy qui l'auroit mesprisé, & qui se seroit moqué de ses ordonnances, diriez vous qu'il seroit espris d'ambition ? nullement ; au contraire tout homme de bon iugement seroit bien aise de ce chastiment, par lequel la iustice est renduë, & l'autorité du Roy est maintenue. Et quiconque seroit marry de ceste punition, pourroit à bon droit estre estimé traistre à son Roy, car il feroit paroistre qu'il ne feroit cas de la volonté du Roy, estant marry que ceux qui s'y opposent, soient punis selon leur demerite. Que s'il faut accorder cela touchant les loix d'un Prince, que sera ce lors qu'il est question du

Roy des Roys, & qu'on parlera de
deffendre l'honneur de Dieu?

Souuenez-vous donc que tout
homme qui ayme vrayement
Dieu, doit estre bien aise que ceux
qui le mesprisent, & qui transgres-
sent ses commandemens, soient
punis: ce que Dieu execute par sa
force, & par sa puissance, & non par
ambition (laquelle ne peut tóber
en Dieu) mais à cause de l'amour
qu'il porte à la iustice, & afin qu'il
n'y ait rien sous la diuine proui-
dence, qui ne soit réglé par la iu-
stice, laquelle faiçt vne admirable
harmonie de tous les discordans
accords, qui se treuuent au mon-
de. Dites donc à vostre Poëte, si ia-
mais vous le voyez, qu'il prenne
mieux garde deormais comme il
parlera de Dieu.

LE DEÏSTE.

XXIII.

Peut-il estre croyable qu'il ait peu faire quelques ennemis, lesquels ayent esté capables d'empescher ses desseins immuables, puis qu'il a soumis toutes choses à sa volonté?

LE TH. Ce quatrain peut avoir deux sens, s'il entend de la soubmission de dependance necessaire, il est vray, si de la soubmission volontaire, il est faux, car les meschans ne veulent pas se soumettre à Dieu, ny ne veulent suiure ses commandemens. Il est aussi tres-faux que Dieu fasse des ennemis, mais les pecheurs se rendent ennemis de Dieu par leur malice, lesquels bien qu'ils se bandent contre sa sainte volonté, neantmoins jamais n'empescheront les desseins immuables qui consistent à
donner

donner le Paradis à ceux qui suivront la regle de viure, qu'il nous a donnée, & de punir eternellement ceux qui la transgresseront.

Or afin que vous entendiez mieux ceste responce, il faut que vous sçachiez que toutes choses sont tellement en la puissance de dieu, de laquelle elles releuent comme de leur souuerain Seigneur & de leur Createur, qu'il ne se peut qu'elles ne luy soient sujettes, non plus qu'il ne se peut faire qu'elles ne soient dependantes: aussi le Verbe eternal ne s'est pas incarné, & fait homme pour faire que nous nous assuiettissions à dieu de cette naturelle subjection, sans laquelle il est impossible qu'elles soient, & par laquelle dieu peut faire dedans chaque creatu-

re, & de chaque chose tout ce qui luy plaist, c'est ce qu'appellent les Theologiens *puissance obedientielle*, laquelle est tellement empreinte en chaque indiuidu, qu'ils en ont tiré cét axiome, que Dieu peut faire *ex quolibet quodlibet*, de chaque chose tout ce qu'il voudra, car l'air n'obeyt pas si promptement au traict décoché, au boulet du canon, ou à la foudre, ny la cire au cachet, ny l'eau aux poissons, comme font toutes choses à Dieu par cette obeissance naturelle, & inseparable: comme il se voit lors que Dieu commande aux maladies de s'en fuyr, aux vents, & à la mer de s'appaiser, au Solcil de ne bouger, & à toutes les autres creatures d'excuter ce qui luy plaist leur commander.

Mais outre cette obeissance

aveugle, & nécessaire, il a voulu rendre les hommes capables de luy obeyr d'une obeissance clairvoyante, laquelle dépendist de nostre liberté, afin qu'il eust des creatures qui le servissent, non par contrainte, ou nécessité, ce qui est commun à toutes, mais franchement, & de leur bon gré; service que Dieu prise beaucoup plus que le naturel, d'autant qu'il est plus relevé, & approchant de plus pres de la diuinité.

C'est donc par cette volonté, & par cette liberté, que les hommes se rendent ennemis de Dieu: ils n'empeschent pas pourtant ses desseins immuables, lesquels ne dépendent aucunement de nostre liberté, car il fait tout ce qui luy plaist, & ce en quelque façon qui luy plaist, sans qu'aucun le puisse

empescher ; & entre tout ce qui
• luy plaist, c'est de nous laisser en
nostre liberté, de luy obeyr, ou
non, afin que nostre obeissance ne
soit point contrainte, & qu'il nous
ait plustost pour bons enfans, qui
luy seruent librement, que pour
esclaues, qui ne fassent rien que
par menace, ou pour crainte du
supplice ; ou pour seruiteurs, qui
n'obeissent que pour la recom-
pense ; car il faut qu'un bon Chre-
stien prenne vn tel plaisir à servir,
honorer, & adorer Dieu, qu'il ne
laissast à faire tout cela, bien qu'il
n'y eust ny Paradis, ny enfer.

*Belle hi-
stoire prise
de loin-
sille.*

Ce qui me fait souuenir d'une
belle histoire, qui est en la vie de
sainct Louys Roy de France, d'une
femme qui portant vn réchaut
plein de charbons ardans dans
vne main, & vn vase plein d'eau en

l'autre , interrogée qu'elle fut pourquoy elle portoit ces deux choses si contraires, respondit que le feu estoit pour bruller le Paradis, & l'eau pour esteindre l'enfer, d'autant qu'il faut seruir Dieu avec tant de liberalité, & d'affection, & d'un amour si filial, que nous l'aymions tousiours de tout nostre cœur par dessus toutes choses, bien que nous ne nous propositions deuant les yeux, ny peine, ny recompense.

Voila ce que ie vous ay voulu dire, afin que vous scachiez ce qui est de nostre creance, & de la façon que nous seruons, & adorons la Majesté diuine : poursuidez maintenant.

LE DEISTE.

*Si Dieu gouverne toutes choses d'un pou-
 xxv. voir absolu, qui soit égal, & reciproque à son in-
 telligence, qui est-ce qui pourroit empêcher l'ef-
 fect de sa volonté malgré qu'il en eust, il n'y au-
 roit pas moyen de luy résister.*

LE THEOL. Cela n'est pas que dieu employe son pouuoir absolu à gouverner ce monde, mais comme vn tres-bô, & tres-sage ouurier il s'acomode à son ouurage, & le maintient doucement, & puissamment selon que la nature de la chose le requiert; or on ne peut pas comparer son pouuoir à la science en toute chose, particulièrement en ce qu'il entend beaucoup de choses, qu'il ne peut pas faire comme sont les personnes qui ne sont pas faisables, car il y en a seu-

lement 2 produisibles, & l'autre, sçauoir est le Pere, qui ne peut estre produite: puis il entend tous les contradictoires, lesquels ne sont pas faisables; si bien que l'obiet de sa science, & de son intelligence s'estend plus au large, que celuy de son pouuoir. Que si sa volonté estoit absoluë, par laquelle il desire que personne ne soit dâné, elle ne pourroit pas estre empeschée; mais elle n'est que conditionnée, car elle suppose qu'on ne contreuienne point aux commandemens, qu'il met és mains de nostre franche volonté, si bien que si nous ne les gardons, nous ne faisons contre son decret absolu, infailible, & eternal, veu qu'il n'en a iamais eu vn tel pour nostre salut, mais seulement à condition, que nous ferions ce qu'il ordonneroit

pour y paruenir, & par ainſi nous ne faiſons pas le peché malgré luy, en la façon qu'il le prend en ce quatrain, puis que dieu ne veut pas abſolument empescher que nous ne le faiſions, car il le permet ne voulant pas deſtruire la liberté, qu'il nous a donnée.

LE DEISTE.

XXVI. Y a-il que'que pouuoir qui puiſſe ſeruir contre celuy auquel tout pouuoir fait hommage; Dieu meſme ſe pourroit-il aſſeruir aux hommes, & prendre leur arbitrage pour regle de ſon vouloir?

LE THEOL. Nenny, il n'y a aucun pouuoir, qui puiſſe empescher le pouuoir de Dieu; on peut neantmoins reſiſter à ſes commandemens, puis qu'il ne veut point nous contraindre, nous laiſſent li-

bres de les faire, ou ne les faire pas:
& certainement ce n'est pas le
pouuoir de l'homme, qui le rend
criminel, mais s'est de n'vsr pas de
ce pouuoir à faire ce bien, & de
s'en seruir à faire le mal; or Dieu la
donné pour faire le bien, & non
pour faire le mal. Si vous appelez
l'asseruir aux hommes, lors qu'on
les gouerne, & qu'on a soing
d'eux de peur qu'il ne leur arriue
quelque mal, ie dy que Dieu se
peut asseruir aux hommes, & re-
gler son vouloir selon qu'ils au-
ront besoing de son assistance;
c'est ainsi qu'un bon Roy, s'assuie-
tit à ses subjects, quand il veille pour
leur bien, & pour leur repos: & par
ce qu'il leur a donné vne nature li-
bre, il se gouerne avec eux com-
me avec des creatures libres, leur
aydant de son concours general

en tout ce qu'elles font, car il ne veut pas détruire l'ordre qu'il a mis dans la nature pour l'impieté de quelques-vns, autrement la malice des hommes sembleroit surpasser sa prouidence, & sa bonté: veritablement c'est vne chose admirable, que personne ne peut eschapper l'estenduë de sa prouidence, car s'il n'embrace les vns par sa misericorde, & par la recompense, il les reduit par le supplice, & par la iustice, bien que ce ne soit que leur faute, lors qu'il les chastie. Je dy donc que Dieu se peut non seulement asseruir, mais vraiment qu'il s'asseruit à l'homme, entant que toutes & quantes-fois que l'homme veut agir, Dieu agit avec luy, & luy donne la force de faire ses actions.

Or il faut bien entendre cecy,

car on seroit grandement deceu, si on pensoit que Dieu se rabaisfast, lors que nous disons qu'il nous donne tout ce qui nous est necessaire, & nous sert à point nommé tout ce qui est requis pour la manutention de nostre estre. Regardez si le Soleil s'abaisse en quelque chose, quand il darde ses rayons sur nous: nullement, Dieu qui est tousiours immuable aussi bien apres la creation du monde, comme auparauant, s'abaisse encore moins que le Soleil, lequel se meut, & tantost descend plus pres de nous de 81 semidiambre terrestre, tantost s'en esloigne autant, afin que l'ordre des saisons, & des generations soit conserué en son entier.

Mais la difficulté consiste en ce que Dieu s'accommode à nostre

arbitrage, ce que vostre Poète ne peut digerer, ou du moins feint ne pouuoir entendre. Qu'il sçache donc que Dieu peut s'accommoder avec chaque chose, comme il luy plaist; & non seulement qu'il le peut, mais qu'il le fait, car c'est luy qui ayde au feu à brulser, & à l'eau à refroidir: & côme il nous a donné vne nature libre en ses actions, & laquelle il a tellement créée, qu'il a voulu qu'elle peust élire cecy, ou cela, ou le refuser; choisir le feu, ou l'eau, le bien, ou le mal: il a pareillement voulu cooperer avec cette nature toutes & quantesfois qu'elle voudroit agir, à ce que nous ne peussions dire que nostre liberté fust liée, & empeschée, manque du concours diuin.

*Comme
on peut
dire que
Dieu re-
gle son
vouloir
selon no-
stre arbi-
tre.*

Voila donc en quoy on peut di-

re que Dieu a réglé son vouloir selon nostre liberté, entant qu'il nous ayde tout autant de fois que nous voulons agir, & faire quelque chose; ce qui n'empesche en nulle façon qu'il ne nous puisse dénier ce concours, & cet ayde, car il nous ayde qu'entant qu'il luy plaist. De là vient qu'il dissipe souvent les pernicieux desseins des meschans, bien qu'il ne vueille empescher leur mauuaise volonté, afin que l'homme apperçoie combien ses pretentions, & ses desirs sont inutiles, si Dieu ne les fait reüssir.

Je ne veux pas icy disputer, comment Dieu nous ayde, mesme es actions, par lesquelles nous nous opposons à ces commandemens, sans neantmoins qu'il soit cause de nostre peché, tant par ce que

j'ay traitté cela fort au long en respondant à la 4, 6, 7, & 8 obiection des Atheistes, dans la 1 question sur la Genese, que parce que vostre Poëte ne touche pas cette difficulté.

*Double
pouvoir,
& dou-
ble obeis-
sance de
l'homme.*

Retenez donc que Dieu ne s'asservit point à nostre liberté sinon qu'entât qu'il nous preste son concours, & ayde toutes nos actions; & que le pouvoir que nous auons est double, l'un est naturel, qui fait necessairement hommage à Dieu, comme l'ombre à la lumiere, comme l'effect à sa cause, & la creature à son Createur: L'autre est libre, & volontaire, qui ne peut rien oster à Dieu, ny diminuer, ou ternir tant soit peu le lustre de son infiny pouvoir.

Comment est-ce donc, me direz vous, que par cette liberté

nous nous opposons à Dieu? c'est parce que sçachans ce qu'il desire de nous, nous ne le faisons pas: c'est par ce que nous mes-vfons du liberal arbitre, qu'il nous a donné pour le seruir librement, & rendre vne hommage volontaire à son pouuoir, & à sa liberté infinie: c'est enfin par ce que le peché est tel, que si la puissance diuine pouuoit estre diminuee, où abolie, ce seroit par iceluy, car puis que le meschant ne veut pas faire ce que Dieu a ordonné, il hait donc cet ordre, donc il voudroit qu'il ne fust pas, donc il le destruiroit s'il pouuoit; donc le peché est contre la puissance, & l'ordonnance diuine, & tasche de la destruire, entant qu'il peut. Pursuiuez.

LE DEÏSTE.

XXVII. *Si on ne peut rien oster, ny soustraire du reste
sort de la toute puissance de l'estre infiny, com-
ment peut-il auoir perdu, & puis racheté ce qui
n'a iamais esté à d'autre qu'à son essence diuine?*

LE THEOL. le respond à ceste
question fondee sur l'ignorance,
que la creature a deux rapports à
l'estre infiny, qui est Dieu seul; le
premier est comme à son Crea-
teur, de qui elle depend, & en ceste
façon elle ne luy peut estre sou-
straite, ny s'esloigner tant soit peu
de sa toute puissance, car il la peut
reduire au neant, quand il luy vou-
dra luy denier la conseruation de
son estre, qui est comme vne per-
petuelle creation: Le second rap-
port que la creature peut auoir a-
uec Dieu est entant que fille adop-
tiue

adoptiue par la grace, que Dieu nous dōne pour nous faire coheritiers avec son fils en la gloire eternelle, si bien qu'il est nostre Pere, à l'heritage duquel nous participerons, si nous nous maintenōs en ce priuilege, & si nous cooperons à ceste grace par nos bonnes œuvres; mais par ce qu'il veut que nous soyons libres en ceste cooperation, & que nous venions à cet heritage librement, & non par necessité, ou par contrainte, nous pouuons le refuser, & ne cooperer pas avec sa grace, & en ceste maniere il peut nous perdre, puis que nous ne sommes plus de ses enfans, lors que nous auons repudié la grace d'adoption par nostre faute; & comme il nous peut redonner ceste mesme grace, veu qu'il en est la fontaine, fil le fait en se

reuestant de quelque nature, qui luy appartienne en propriété, & qu'il endure, ou donne quelque chose à ce que l'homme, qui estoit déchu de l'esperance du Paradis, rentre dans ce droit, pour lors il aura racheté ce droit, & aura mesme racheté l'homme puis que de captif qu'il estoit par le peché, & de banny qu'il estoit du Paradis, il l'aura deliuré, remis en grace avec Dieu, & l'aura fait rentrer au droit, qu'il auoit auparauant à la gloire eternelle; or Dieu le Pere a enuoyé son fils en ce monde, afin qu'il executast ce dessein, lequel il a accompli, si bien qu'il est nostre sauueur & redempteur.

Quand quelqu'un a offensé le Roy, il luy peut donner sa grace, mais s'il veut garder les formes de la iustice, il faut qu'il paye sa ran-

çon, ou qu'il rachete ce criminel de la mort, qu'il a meritée selon la rigueur de la iustice; ce qu'il peut faire ou par argent; ou enuoyant son fils; ou quelque autre, qui paffisse pour le criminel; Dieu le Pere Roy de tout le monde a enuoyé son fils, qui nous a rachetés par son precieux sang, & par sa mort, que demandez vous donc dauantage?

LE DEISTE.

Bien que le Bigot n'ose pas dire clairement qu'il est plus charitable enuers ses ennemis, que Dieu n'est enuers nous, neantmoins cette consequence execrable se tire manifestement de ses opinions.

XXVIII.

LE THEOL. Le Chrestien (tres-elloigné du Bigotisme) n'a iamais pensé à ceste folie, qu'il soit plus charitable enuers qui que ce soit,

que Dieu ne l'est enuers nous, car qui peut iamais auoir esté si charitable qu'il ait employé vne personne diuine pour sauuer son ennemy, & le deliurer de la mort? treuuez vous quelqu'un qui ait endured la mort pour son ennemy? Pleust à Dieu que vous considérassiez les benefices, que Dieu a fait à l'homme, ô que vous seriez esloigné de ceste impieté diabolique!

Quand vous ne regarderiez que l'estre, & la conseruation que nous auons de Dieu, seroit-ce pas vn plus grand amour, qu'il nous porteroit, que ce que nous sçaurions iamais receuoir d'aucun amy? si vn ennemy estoit aussi puissant que Dieu, il vous auroit bien tost reduit au neant, mais Dieu tres-bon conserue tousiours sa creature; conseruation, à laquelle il n'y a

renuersee & refutee. 405

aucun acte d'amitié, ou de charité
créée, qui soit comparable; par où
vous iugerez sil vous plaist de l'i-
gnorance de vostre Poëte.

CHAPITRE XVI.

*Dans lequel il est monstré que la science,
ou la volonté diuine n'est point cause
de nos pechez: & quelle distinction,
ou identité il y a entre les perfections
diuines, avec beaucoup d'autres cho-
ses, par lesquelles les quatrains du
Deïste sont refutez, depuis le vingt-
neufiesme, iusques au 36.*

LE DEÏSTE.

*Je luy veux demonstrier par les propres
fondemens de son escole, que toute punition ces- XXIX.
se apres le trespas, & qu'elle repugne à l'equité
suprême.*

xxx.

Qu'il me responde à cet argument, par lequel ie luy donne le choix entre ces deux questions: tous mouuemens suiuent la cognoissance de Dieu, ou les actions de nostre Volonté suiuent son ordonnance.

S'il choisit le premier, accordant que tous mouuemens suiuent le sçauoir diuin, est-il pas impudent d'opposer le vouloir diuin aux obiects de sa cognoissance, & rendre le vouloir, & le sçauoir de Dieu contradictoires?

LE THEOLOGIEN.

DEMEUREZ -- là, & voyons vn peu ceste belle demonstration deïstique, aduifons si ce dialecticien quadragenaire entend bien les fondemens de l'escole de Theologie, & s'il en tirera sa pretenduë doctrine.

Il nous donne le choix de deux questions, qu'il embrouille assez

finement, de peur qu'on y voye clair, mais *frustra iacitur rete ante oculos pennatorum* : car tous les mouuemens ne suiuent pas la cognoissance en qualité d'effets, puis que la science, par laquelle Dieu cognoist tous les mouuemens, n'est pas actiue, & cause des effets, mais elle est speculatiue; & est necessaire que tous nos mouuemens soient premierement futurs, auant que Dieu sçache qu'ils doiuent arriuer, si bien que le sçauoir diuin suit plustost (s'il faut ainsi parler) les susdits mouuemens, qu'il ne les deuance; c'est pourquoy ie nie ceste premiere proposition.

Pour l'autre question, à sçauoir si les actions de nostre volonté suiuent l'ordonnance de Dieu ie responds qu'il n'y a que les bonnes actions conformes aux conseils,

ou aux commandemens de Dieu, qui suivent son ordonnance, car les mauuaises sont contraires à ces mesmes ordonnances; aussi bien que les duels sont contraires aux ordonnances, & edits du Roy. Voyla donc vostre Sophisme par terre, & vostre quatrain qui commence, *s'il du en premier lieu*, mis à neant.

Or c'est fort mal à propos de comparer le vouloir de Dieu avec les obiects de son sçauoir, car s'il estoit question d'oposer quelque chose au vouloir, qui est vn acte diuin, il falloit prendre quelque autre acte, ou quelque priuation d'acte, & non pas les obiects: mais poursuuez car vos autres quatrains pourront nous faire voir plus clairement la ruse de ce gaillard, & nous donneront occasion

d'expliquer cecy plus au long.

LE DEISTE.

Car si quelques obiects de la science de Dieu sont repugnans à sa volonté, faudra-il pas confesser que la cognoissance, & la volonté diuine seront diuerses, comme sont nostre cognoissance, & nostre volonté? XXXII.

LE THOL. Nenny, cela ne s'enfuiura nullement, car il n'est pas nécessaire que les actes par lesquels Dieu veut, & cognoist, soient reellement differents, comme les nostres, à ce que les obiects de l'acte de cognoissance soient oposez, & repugnans à la volonté; c'est assez que le mesme acte, par lequel Dieu veut, & cognoist, tout ce qu'il veut, & cognoist, ait vne si grande vertu, qu'il responde aux actes diuers de nostre volonté, & de nostre entendement, à ce que les obiects de cet acte diuin, en-

tant qu'ils sont cognoissables, ou cogneus soient opposez à ce mesme acte, entant qu'il est considéré comme acte de volonté, ou que les susdits objets soient repugnans aux objets de ceste volonté. Ne voyez vous pas que les objets d'une mesme science sont opposez, aussi bien que ceux d'une mesme volonté? n'est il pas plus clair que le Soleil, que Dieu cognoist toute sorte de mal, & de non estre? ce mal est-il pas opposé à sa volonté, & à ce qu'il veut? puis que c'est la nature de la volonté bien reglée de ne se porter, ny pouvoir iamais se porter au mal en l'approuvant, & en l'ayant: la volonté diuine est bonne, & le mal que Dieu sçait, est mauuais; quelle merueille y a-il donc que l'objet de son sçauoir

soit opposé à son vouloir, si ce n'est que vous trouuiez merueilleux que le mal soit opposé au bien.

De là vous pouuez facilement conclurre que le cognoistre, & le vouloir de Dieu ne sont pas choses differentes, comme ils sont en nous, encore que leurs obiects extérieurs soient differéts, & separez, d'autant que l'acte de l'entendement, & de la volonté diuine ne dépend pas de ces obiects extérieurs, puis qu'ils sont creez, & dépendans, & l'acte diuin increé, & independant.

Pour entendre cecy, il faut vous souuenir de ce que nous auons dit cy deuant, sçauoir est que l'acte diuin vnique, & tres simple est si parfait, qu'il peut infiniment d'auantage, & respond à vne plus grande quantité, & diuersité d'ob-

*L'infini-
té & l'in-
dité,
de l'acte
diuin ex-
pliquee,
par le
centre,
& par le
point.*

jects, que toutes nos puissances, & toutes nos actions, de sorte qu'il fait, qu'il gouuerne, & qu'il remuë tout, bien qu'il soit immuable. Imaginez vous que le poinct du cētre lequel est vn cercle, produise toutes les lignes, qui en sont tirées, en telle façon que ces lignes soient diuerses, & contraires, (comme elles sont en effect) direz vous que ce poinct soit contraire à soy-mesme? rien moins, car il demeure tousiours le mesme, nonobstant les differents effects qu'il produit.

Est-il pas vray qu'un poinct de lumiere rayonne dedans tout l'emisphere? tous les rayons sont differents: & si on luy oppose quelques corps opaques de tous costez, il produira des ombres contraires, les vnes en bas, les autres en haut, les vnes à droict, & les au-

tres à gauche; ou si vous luy opposez vn corps opaque d'un seul costé, & qu'il soit libre de l'autre, il sera empesché de son operation d'un costé, laquelle il fera de l'autre: par consequent les obiects ou les effects differents ne concluent pas que l'acte qui leur respond, soit different, mais tout au plus que l'acte est assez parfait pour se porter vers des obiects, ou des effects distincts.

Simplification de l'acte divin expliquée par la lumiere, & par les ombres.

Or personne ne doute de la suprême perfection de l'acte divin, lequel peut tout; autrement s'il ne pouvoit tout, il en faudroit mettre plusieurs, & nous en pourrions concevoir vn plus parfait, car supposons que Dieu ait besoin de deux actes, ie vous demande si nous ne pouuons pas concevoir quelque acte, lequel soit si parfait

Pourquoy il est impossible qu'il y ait deux actes diuers en Dieu.

qu'il ait tout seul la vertu, & la perfection de tous les deux, sans doute: il faut donc que cet acte, qui contient la perfection des deux soit en Dieu, si vous n'aymez mieux dire que ce qui est en la seule imagination, soit meilleur; que ce qui est en nature; & en estre, & que ce qui est imaginaire, soit plus excellent que ce qui est réellement, & de fait, ce qui est impossible: partant il faut nécessairement qu'il n'y ait qu'un seul acte en Dieu, lequel contienne toutes les perfections possibles; ce qui est aussi véritable, comme il est nécessaire que Dieu soit.

*Miroir
paraboli-
que. &
ses effets.*

Ce que ie vous pourrois encore expliquer par l'exemple d'un miroir parabolique, auquel on considere un point, qui contient toutes les perfections du miroir, bien

qu'il soit indiuisible, ce que quelques Mathematiciens appellent *focus*, d'autant que tous les rayons paralleles du Soleil qui tombent sur la surface concaue du miroir se réfléchissent en ce poinct, lequel se retreuve dans l'axe au point qui est éloigné du sommet du miroir par la quatriesme partie du costé droict de la parabole, suiuant laquelle le miroir a esté fait, comme demonstre Ghetaldus dans la 6 proposition du traicté qu'il a composé sur ceste matiere.

Or imaginez vous maintenant que la glace du miroir soit infinimēt grāde, le susdit poinct aura en soy vne infinité de rayōs, & par conséquent sera infiniment ardent, & luisant; c'est en cette façon que Dieu comprend tous les actes, & toutes les perfections possibles.

dans son acte tres-simple, tres-indivisible, & tres-pur, mais avec cette difference que le point lumineux du miroir dépenderoit de la surface, & des rayons qui tombent paralleles à l'axe dudit miroir : mais l'acte diuin ne depend d'aucune chose, car il est de soy-même, & contient toutes les perfections qu'on se peut imaginer, & au delà infiniment.

LE D. Ces exemples sont merveilleusement beaux, mais ie vous confesse qu'ils sont trop releuez pour moy, c'est pourquoy ie desirerois grandement qu'il vous pleust me les expliquer plus au long.

LE TH. Monsieur, il n'est pas maintenant à propos que nous quitions la suite de ce poëme pour nous amuser à cela, il vaut mieux

mieux que vous attendiez iusques à ce que ie vous aye satisfait sur tous vos quatrains , ie vous promets vne iournee entiere pour l'esclaircissement des doutes que vous aurez sur les exemples desquels ie me seray seruy en tout nostre discours, ou sur quelque autre matiere que ce soit.

Or ie veux vous apporter vn exemple plus facile pour vous monstrier que Dieu fait tout par vn mesme acte, lequel comprend toutes les perfections possibles sans aucune contrariété.

Lettez donc les yeux sur l'vnité, car elle vous fera toucher au doigt tout ce qui appartient à l'acte tres-simple, & infiny de Dieu, d'autant qu'elle peut, dauantage que tous les nombres pris ensemble; Premièrement, elle contient tous

*Dix com-
paraisons
de l'uni-
té avec
l'acte di-
uin.*

1.

les nombres en eminence, comme l'acte diuin tous les actes creéz, & toutes les creatures.

2. Elle est sa racine, son quarré, son cube, son cubicube, & toute sorte de nombre coslique, comme l'acte diuin est sa vie, son immensité, sa bonté, sa puissance, sa iustice, & toutes ses perfections.

3. L'vnité est infiniment éloignée des nombres, comme Dieu l'est des creatures, bien qu'elles prennent leur origine de Dieu, comme les nombres de l'vnité.

4. L'vnité n'a en soy ny parité, ny imparité, ny composition, bien qu'elle produise les nombres pairs, impairs, & composez; ainsi l'acte diuin estant tres-simple, & tres-vn, produit les creatures corporelles, les simples comme les

Anges, & les composées, comme les hommes.

5. Tous les nombres sont nombres par la participation de la seule vnté, de laquelle ils dépendent, tellement qu'il est impossible qu'ils soient sans elle : c'est ainsi que toutes les creatures n'ont point d'estre que par la participation de l'acte diuin, duquel elles dépendent eternellement: ce qu'à fort bien recognu le Roy Prophe-
te, quand il a dit : *Dante te illis colli-* *psal. 103.*
gent; aperiente te manum tuam omnia
implebuntur bonitate: Auertente autem
te faciem, turbabuntur, auferes spiritum
eorum, & deficient, & in puluerem
suum reuertentur: ce que paraphrase excellemment le grand du Per-
ron.

420 *Impieté des Deïstes,*

*Lors que de tes thresors l'abondance tu verses,
Pour combler le desir tour à tour renaissant,
Et que ta dextre s'ouure à leurs plaintes diuer-*

*ses,
En leurs stiles diuers ils te vont benissant.*

Destournes-tu, Seigneur, tant soit peu ton vi-

sage,

*Leurs forces tout à coup se sentent decliner:
L'ame les abandonne, & sans vne autre image
En leur premiere poudre on les voit retourner.*

Par où vous voyez que nous dépendons plus de l'acte diuin que les rameaux ne dépendent de leur tronc, ny le tronc de sa racine, ny les ruisseaux de leur fontaine, ny les rayons du corps lumineux, car nous sommes comme les membres, lesquels ne sont rien sans l'vnité, nos estres estans vn pur neant sans l'estre diuin.

6. 6. Tous les nombres tant grands que petits portent l'image de l'vnité, dans laquelle ils se retreuent

toufiours ; & toutes les creatures ont l'image , ou le veftige de la diuinité empreinte dans leur eſtre.

7. La vertu de l'vnité eſt ſi grande qu'elle ne peut eſtre ny finie, ny égalee par les nombres , car donnez quelque nombre que vous voudrez , l'vnité le peut toujours augmenter à l'infiny ; la puiſſance de l'acte diuin eſt ſi grande qu'elle ne peut eſtre bornée par les creatures , car bien que Dieu euſt produit vne infinité de terres, de Soleils, d'eſtoilles, & de mondes, comme a penſé Iordan Brun, ce que pluſieurs Philoſophes, & Theologiens ſouſtiennent eſtre poſſible , ſi Dieu le vouloit: Neantmoins Dieu pourroit encore produire d'autres mondes à l'infiny , & les pourroit mettre dans le meſme lieu , auquel ſe-

roient les autres, par penetration de leurs dimensions.

3.

8. Tout est immuable en l'vninité: & tout est tres-parfait en l'acte diuin, mais si tost que les creatures sont produites, & considerees hors des idees de l'vnité archetype, elles sont sujettes au changement que la dualité, ou le binaire sortant de l'vnité Arithmetique nous represente. C'est ainsi que vostre Poëte considere la iustice, & la bonté de Dieu, lesquelles ne sont qu'une mesme chose, & un mesme acte diuin, bien qu'elles nous paroissent dissemblables par les effects: si l'on se fust souuenu que les parallaxes, ou diuersitez d'aspects nous font paroistre le Soleil en un lieu, où il n'est pas, & qu'elles nous rabaisissent les objects, lesquels sont rehaussez par les refractions, en-

core qu'ils demeurent immobiles en vn mesme lieu; s'il se fust souuenu qu'une colomne peut tantost estre à la main droicte, tantost à la gauche, tantost dessus, ou dessous, tantost derriere, ou deuant, il n'eust pas cōclu que la iustice, la bonté, & les autres attributs diuins ayent diuerses subsistences, bien que Dieu produise diuers effects par iceux, mais ramassant ses esprits, & ses pensées en l'vnité, il eust confessé que tout cela n'est qu'une mesme chose en Dieu.

9. Adiouſtons pour le neuſiesme 9. parallele de l'vnité avec Dieu, que comme elle est la cause, & la fin de tous les nombres, puis qu'elle les produit, se retreuuant tousiours au commencement, & à la fin; & qu'elle est aussi parfaite auant qu'il y ait aucun nombre, comme

apres qu'elle a produit tout ce que vous voudrez: aussi Dieu est la cause, & la fin de toutes les creatures, & est infiniment parfait avant la creation, toutes les creatures ne luy apportant autre perfection que celle que les nombres apportent à l'vnité, à laquelle ils n'adioustant rien de nouveau.

10. Enfin comme il n'y a nul nombre deuant, ny apres l'vnité, & qu'elle a toutes les perfections sans l'ayde des nombres, lesquels n'ont aucune perfection, & ne meritent aucune louange qu'entant que l'vnité est parfaite, & qu'elle leur donne ce qu'ils ont; de mesme il n'y a nulle creature deuant, ou apres Dieu, qui est l'Alpha, & l'Omega de toutes choses: & tout ce qu'elles ont de bon, de beau, de grand, & d'excellent, n'est qu'une

participation de la bonté, de la beauté, grandeur, & excellence de l'acte diuin; d'où nous deuons conclure que si nous sommes sages, ou forts, ſçauans, ou bons, c'eſt parce que Dieu eſt tres ſage, tout puiffant, tres-ſçauant, & tresbon.

Iamais ie n'aurois fait, ſi ie voulois vous rapporter toutes les reſemblances que l'vnité a avec l'acte diuin, car à peine treuuez vous vne choſe en celuy-cy, qui ne ſoit en celle-là; par exemple ſi vous voulez comparer toutes les diuerſes eſpeces aux diuers nombres, leſquels ſe conſeruent par l'indiuifible de leurs differences, comme l'eſſence des choſes, (d'où eſt venu la maxime, *eſſentia ſunt ſicut numeri*) vous verrez que l'vnité produit les diuerſes eſpeces: & que comme vn meſme eſprit donne la

1. aux
Corinth.
chap. 12.

sageſſe à l'un, à l'autre la Prophetie, ou le don des langues, *quæ omnia operatur unus, & idem ſpiritus*, dit ſainct Paul, de meſme l'vnité influë, & enuoye les diuerſes proprietéz, qui ſe retreuuent au binaire, ou ternaire, & dans tous les autres nombres, ſi bien que toutes les loüanges qu'on donne à quelque nombre que ce ſoit, ſont deües, & retournent à la loüange de l'vnité.

Pleuſt à Dieu que voſtre Poëte vouluſt faire le meſme en toutes ſes œuvres, & qu'il prit occaſion de toutes les creatures de louer ſon Createur, puis que toute la loüange qu'on leur attribüe, eſt deüe à Dieu; car elles n'ont rien qui ne vienne de ſa main liberale. Mais qu'il le faſſe, ou non, Dieu tirera de la gloire de toutes ſes œu-

ures mal-gré les impies, qui treuvent à redire en ses œuvres: & fera paroître au grand iour du iugement que les Deistes ont repris mal à propos la iustice diuine, par laquelle les meschâs seront punis eternellement, s'ils meurent opiniastres dans leur iniquité. Vous pouuez voir plusieurs choses de cette vnité dans nostre 6 question sur la Genese.

LE D. Je vous suis grandement redevable de m'auoir enseigné cet exemple, par lequel i'ay mieux, ce me semble, conceu les perfections diuines, & leur vnité en Dieu, que ie n'auois iamais fait; ie voy maintenant tres claiement que ce Poëte Deiste est aussi mauuais Dialecticien, comme il est mauuais Poëte, & mal-heureux homme.

Je poursuis neantmoins les maudits quatrains, à ce qu'il ne me reste aucune difficulté, esperant que vous accomplirez vostre promesse à la fin du poëme, m'expliquant ce que ie n'auray pas entendu en vos responses, telles que sont les parallaxes, & leurs refractions, desquelles vous avez parlé cy deuant. Voicy donc toute la substance de son 33 quatrain.

LE DEISTE.

XXXIII.

De plus, si tout ce qui est en l'essence diuine est essence & si ces attributs y gardent leur difference, ne serons nous pas contraints de confesser autant de subsistances dans l'essence diuine, comme il y aura d'attributs, ce qui est vne grande absurdité.

LE THEOL. Ce Dialecticien monstre qu'il n'a pas passé le com-

pendium de la Logique , & qu'il n'entend rien en la Metaphysique, & moins encore en la Theologie, car bien que les attributs diuins soient vne mesme chose avec l'essence de Dieu , neantmoins nous pouuons les distinguer en telle façon que les actions de l'un ne seront pas les actions de l'autre, formellement parlant; non qu'un attribut puisse estre sans l'autre, ou qu'il ait quelque chose de reel, & d'essentiel que n'ait pas l'autre, car tous ne sont qu'une mesme chose, mais parce que nous conceuons Dieu d'une autre façon, quád il punit, que lors qu'il recompense, & nous le considerons sous autre raison formelle, quand il produit la nature de chaque chose, que quand il la cognoist, ou la destine à quelque fin.

*Comment
tout ce
qui est en
Dieu n'est
qu'un
pur acte.*

Or à ce que vous entendiez bien cette matiere, il faut que vous sçachiez que Dieu n'a qu'un seul acte diuin, lequel est la mesme essence, & qui est si grand, & si immense qu'il contient eminentment toutes les puissances, facultez, qualitez, & effects, qu'on se peut imaginer, ou qui sont possibles: de là vient que iamais nul effect, fust il infiny, ne respond à l'acte diuin, & ne le peut égaler en aucune façon.

Or comme cet acte respond à plus de perfections, qu'il n'y en a de possibles en toute l'estendue des creatures, quelles quelles soient, il s'ensuit que nous ne pouvons concevoir la perfection de cet acte par vne seule pensée, & sous vne seule raison, autrement il faudroit que cette pensée fust infinie, & par consequent qu'elle fust

Dieu ; c'est pourquoy nous tâchons d'en comprendre ce que nous pouuons par nos diuerſes conceptions, & pour ce faire nous choiſiſſons pluſieurs raiſons formelles, par leſquelles nous traçons les idées, que nous auons des perfections diuines, ſelon les diuers effets que nous voyons paroître icy bas par la force des ſens, de la raiſon, ou de la foy, leſquels nous ſçauons eſtre produits, & conſeruez par cet acte diuin.

*Façon de
compre-
dre l'acte
diuin.*

Mais toutes ces diuerſes penſées ne font pas qu'il y ait aucune multiplicité de ſubſiſtences en cet acte, lequel eſt tres-vn, & tres-ſimple, & par conſequent c'eſt vn abus inſupportable de penſer que les attributs diuins ayent diuerſité d'eſſence, ou de ſubſiſtance, comme voſtre Poëte conſeillait contre

nous : car c'est assez que nous ayons des raisons suffisantes de nostre costé, afin de distinguer plusieurs attributs en Dieu, bien qu'ils ne soient que ce mesme acte, duquel nous auons parlé iusques à present.

Que les attributs diuins n'ont point de différentes natures ou subsistances.

Je pourrois vous apporter plusieurs exemples pris de la nature, pour vous faire voir qu'une mesme chose peut auoir diuerses proprieté, bien qu'elle soit simple, & vnique, comme nous voyons dans le mesme point d'un miroir, lequel reflechit les especes, & les rayons du Soleil en diuerses parties, & represente plusieurs objets, quoy que diuersement esloignez, & d'une differente grandeur; ce qui fait qu'on luy peut attribuer autant de proprieté, comme il peut représenter d'objectes diuers,

ou

ou reietter de rayons en diuerſes parties. Le point de l'œil, dans lequel ſ'accomplit la viſion, termine vne infinité de pyramides, leſquelles ont leurs baſes, & leurs cones diſtinguez; donnez luy autant de noms, & de proprietéz, comme il receura de rayons viſuels, & de cones radieux, cela ne fera pas, qu'il ait aucune diuerſité de ſubſiſtences en ſoy-meſme, mais nous fera ſeulement conce-
Simplicité de Dieu expliquee par l'œil.
uoir, que ſa vertu eſt ſi grande, qu'il fait autant, comme feroit vne grande multitude de vertus eſpandues en diuerſes parties de l'œil.

Or vous pouuez appeller ce point du chriſtallin, maiſon de la lumiere, entant qu'il reçoit le rayon du Soleil. maiſon de la quantité, puis qu'il reçoit les eſpe-

ces, qui la representent; maison des tenebres, qu'il apperçoit par l'absence de la lumiere: bref maison de tout ce qu'il reçoit; pourquoy ne pourrons nous donc pas donner vne varieté d'attributs à Dieu, puis qu'il est infiny en toutes sortes de vertus, sans que ces perfections soient differentes de son essence, & sans qu'elles ayent autre subsistence que l'essence diuine.

Il n'est pas besoin que ie m'estende icy dauantage, car vostre Poëte ne le merite pas, lequel si il se fust souuenu de la distinction que nous mettons entre les attributs diuins, qui n'est que de raison raisonnee, *rationis ratiocinata*, il n'eust eu garde d'inferer la diuersité de subsistences entre les attributs diuins; & quoy? si l'entende-

ment, & la volonté n'ont point en nous, ny en l'Ange d'autres subsistances que celle de nostre ame; si l'appetit sensitif, la faculté nutritive, la digestiue, & les autres, qui sont és bestes, n'ont point d'autre subsistence que celle de tout le composé, comment le Deïste veut-il que les attributs diuins ayent autre subsistence que celle de Dieu tres-simple, & tres-vne?

Ce qui n'empesche pas qu'en la diuinité il ne se retreuve trois subsistances relatives dans les 3 Personnes diuines, qui sont reellemēt distinctes entr'elles, mais elles sont vne mesme chose avec l'essence diuine; ce qui s'accorde fort bien avec vne tres-simple subsistence absoluë, & commune aux 3 Personnes, laquelle n'est rien autre chose que l'essence diuine, Voi-

3. *subsi-
stences di-
uines.*

*Simplicité de Dieu
expliquée
par le
point, &
par le
cercle.*

la ce que j'ay pensé estre necessaire de rapporter icy, à ce que vostre Poëte ne vous abuse plus désormais, vous proposant ce qui n'est nullement. A quoy vous pouuez adiouster que le centre du cercle, bien qu'indiuifible, reçoit, & termine toutes les lignes, qui se peuvent tirer de la circonference, quoy qu'infinies; ce qui est vn fondement suffisant, à ce que nous formions vne infinité de conceptions sur ce point, lesquelles seront toutes veritables, & neantmoins pas vne n'égallera la vertu d'eminnence, qu'à la simplicité de ce centre. A cōbien plus forte raison cét acte diuin, qui est le centre de tout ce qui est intelligible, nous donnera il sujet de conceuoir son infinie perfectiō par diuers attributs, & par vne infinité de conceptions?

Et puis le cercle estant tres-vniforme, & égal en soy-mesme comprend neantmoins vne infinité d'angles, ce qui est cause qu'on peut dire qu'il a des differences infinies, à raison que sa perfection d'uniformité, & d'égalité respond à tout autant d'angles diuers, comme on s'en pourroit imaginer; d'où vient que c'est par ses arcs, que nous trouuons, iugeons, & mesurons tous les angles, quels qu'ils soient; que sera-ce donc de cet acte diuin, qui contiét par vne si parfaite eminence toutes les perfections des creatures futures, presentes, & possibles? cela ne doit-il pas suffire, à ce que nous conceuions vne infinité de perfections avec des idees, & des intelligences de nostre esprit aussi parfaitement distinctes, comme s'il y auoit des

distinctions , & diuersitez en cet acte? sans doute.

*Infiniré
des perfe-
ctions di-
uines re-
presentee
par le cer-
cle.*

Passons donc outre , & disons que cet acte est la vraye mesure de nos perfections, duquel tant plus nous approcherons , & plus nous serons parfaits , comme tant plus qu'un polygone approche de l'égalité, & de la grandeur du cercle , & plus il deuiant parfait, & capable : mais bien qu'il s'en approche de plus en plus à l'infiny , iamais neantmoins il ne peut se rendre si parfait; de mesme que la creature s'approche tant qu'elle voudra , ou qu'elle pourra de Dieu, iamais elle n'atteindra la perfection diuine, à laquelle nos perfections estans parangonnées, ne sont que des ombres en presence de cette infinie lumiere, & par consequent toutes nos perfections prises en-

ſemble ne peuuent non plus égal-
ler la perfection de l'acte diuin,
que toutes les ombres la perfe-
ctiō de la lumiere, ou le polygone
inſcript la grandeur de ſon cercle.

~ C'eſt pourquoy quelques ſub-
tils, & ſçauans que ſ'eſtiment les
Deiſtes, c'eſt folie à eux, ſils
pensent pouuoir comprendre les
perfections diuines, & vne manie-
re de ſe rire de ce que nous diſons
qu'elles ne peuuent eſtre compri-
ſes par la foibleſſe de nos entende-
mens. Adiouſtons encore vn
exemple, afin que vous entendiez
plus parfaitement cette difficulté.
Nous voyons qu'une chandelle
fait trois effets differents en pro-
duiſant les ombres du corps, qui
luy eſt oppoſé, car ſi elle rencon-
tre vn corps plus grand que n'eſt
ſa flamme, elle produit vne ombre

*Vniformité de
Dieu ex-
pliquee
par trois
ſortes
d'ombres,
ou plu-
ſtoſt par la
lumiere.*

laquelle a son cone vers elle, & sa base luy est opposée, on l'appelle *calathoides*; si le corps est moindre que la chandelle, l'ombre est conique, & contraire à l'autre; & si l'est égal, l'ombre aura la figure d'une colonne sans s'estressir, ou s'élargir, les deux lignes qui bornent sa largeur, estans paralleles.

Le Soleil nous montre l'ombre conique, lors qu'il enuoye l'ombre de la terre dans la Lune durant l'eclipse; mais il ne fait point les deux autres especes d'ombre icy bas, d'autant que tous les corps sublunaires qu'il illumine, sont moindres que luy. La chandelle nous fait paroistre toutes les trois, comme vous pourrez experimenter à ce soir, si vous luy opposez trois corps differents, vn plus grand, vn égal, & vn moindre,

lesquels produiront vn' ombre en forme de cone renuersé laquelle ira s'esslargissant de plus en plus à l'infiny, vne cylindrique, & l'autre conique. C'est assez pour suiuez maintenant.

LE D. le vous prierois volontiers auant que passer outre, de me dire en quel lieu l'ombre de la terre se termine, sçauoir mon si elle va par delà la Lune, ou non : & me donner encore quelque exemple afin de m'esclaircir dauantage sur ce que vous auez dit, & fort bien preuue, sçauoir est que Dieu peut faire choses differentes, & contraires par vn seul acte, lequel n'aura point de diuerses subsistances.

LE THEOL. Il est fort facile de vous satisfaire sur ces deux points; car pour ce qui est de l'ombre de la terre, elle a quelquefois

*Grandeur
de l'om-
bre de la
terre.*

en sa longueur 264 semidiametres,
pareils à son semidiametre, & par
consequent elle surpasse la Lune
de 196 semidiametres, d'autant
que la Lune n'est iamais plus esloi-
gnée de la terre que de 68 semidia-
metres: mais elle ne peut atteindre
Venus, ou Mercure, parce qu'ils
font esloignez de mille cent qua-
rante & deux semidiametres. Je
vous pourrois demonstrier tout ce
que ie viens de dire, mais nous se-
rions trop long temps; ie passe
donc au second poinct, en vous
produisant vn exemple sans sortir
de nostre sujet, car la Lune vous
contentera, laquelle est diuerse-
ment illuminée par le Soleil, bien
que le Soleil se tienne en vn mes-
me lieu, car tantost elle est pleine,
tantost nouvelle, d'autrefois en
croissant, & puis en decours; bref

elles peut changer de toutes ces faces encore que le Soleil fust immobile, tel que ie le suppose maintenant, afin que vous perceuiez la force, & la naïfueté de l'exemple.

Supposons donc que le Soleil soit immobile au centre du monde (selon la figure que i'en ay apportee dans la 9 question sur la Genese) & que la terre soit au lieu, où est maintenant le Soleil, sçauoir est au 4 ciel; ie dy que nonobstant l'immobilité du Soleil, nous pourrons voir toutes les diuerses faces, ou apparences de la Lune d'un mesme point de la terre, car quand elle sera opposee au Soleil, elle nous paroistra plaine : quand elle sera vis à vis, elle ne paroistra point : bref autant de diuers lieux qu'elle changera, elle nous paroitra diuersement autant de fois, en-

*Immuta-
bilité de
Dieu
comparee
au Soleil.*

core que le Soleil soit en vn mesme lieu. Disons maintenant que l'acte diuin est comme vn infiny Soleil immobile, lequel produit diuers effects sans se changer, ou falterer en nulle façon. Or Dieu nous a donné nostre liberal arbitre, par lequel nous pouuons approcher de luy en gardant ses saincts commandemens, ou nous en esloigner en les mesprisant; le Soleil n'est pas plus prest d'illuminer la Lune, quand elle s'expose à ses rayons sans empeschement, que Dieu est de nous remplir de ses graces, & de nous donner la gloire eternelle, pourueu que nous n'opposions point la terre de nos impefections, & de nos pechez à sa lumiere.

Il faut que vous reteniez de ce discours que Dieu ne se change

pas, & que son acte n'a point de di-
uerfes subsistences, bien qu'il pro-
duise tout ce qui se voit icy bas, &
que vous m'aduoüiez que vous
vous estes trop facilement laissé
deceuoir à cet imposteur, lequel
n'a remply ses quatrains que de
mensonges, & de calomnies.

LE D. Iamais ie ne fus plus con-
tent, & iamais verité n'entra mieux
dans mon esprit que celle-cy, c'est
pourquoy ie poursuis, afin que
vous me fassiez recognoistre les
faussetez des autres quatrains; voi-
cy ce que contiennent le 34, & 35.

LE DEISTE.

*Puis que Dieu est vn pur acte lequel precede
les choses temporelles de toute eternité, celuy là
ne nie-il pas sa tres-simple vnité, qui dit que les
choses temporelles sont auant les eternelles?*

XXXIV

XXXV.

Si son ſçauoir ſuit nos effets contingens, & que ces effets ayent pris leur eſtre, & leur naiſſance en temps, la ſcience de Dieu ne ſera elle pas temporelle, & finie auſſi bien que ſes objets, & par conſequent Dieu ne ſera-il pas de meſme eſſence?

LE THEOL. Ie ne voy pas que la conſequence vaille rien, car celuy-là ne nieroit pas l'vnité diuine, qui diroit que les choſes temporelles feroient auant les eternelles; toutefois il diroit choſes impoſſibles, car c'eſt vne manifeſte contradiction de dire que ce qui eſt temporel, ſoit deuant ce qui eſt eternel. Mais ie voy bien où il en veut venir, c'eſt qu'il veut deſtruire la ſolution que nous auons apportée au 30, & 31 quatrain, où i'ay dit que nos actions futures ſont pluſtoſt cauſes de ce qu'il les ſçait, que n'eſt la ſcience cauſe de ce que les effets

contingents sont futurs, bien qu'à proprement parler ne l'un, ne l'autre ne soit cause, ny effect.

Pour entendre cecy, eleuez vostre esprit à la consideration de la science de Dieu, & à la façon qu'il se comporte de toute eternité envers chaque chose, & pour lors vous recognoistrez le bel ordre, qui se treuve entre la cognoissance de Dieu, & tout ce qui doit iamais arriuer, ou ce qui a desia esté fait: mais il faut premierement supposer que la science de Dieu est Dieu mesme, lequel bien que tres-simple, & tres-vn, ne peut estre conceu des hommes, que par diuerses actions de l'entendement: encore ne scaurions nous l'entendre parfaitement avec toute la multitude de nos cognoissances; or, (afin que nous ne nous iet-

*Science de
simple
intelligē
ce, & de
vision
expliquee*

tions point dans l'abyfme de fon
essence) pour ce qui est de la fciē-
ce, bien qu'elle ne soit pas moins
simple que son essence, puis que
c'est vne mefme chose, nous la di-
uifons en 2 confiderations pour
ayder nostre esprit, car nous l'ap-
pellons science de simple intelli-
gence, & science de vision: par la 1,
Dieu cognoift tout ce qui est pos-
fible, soit qu'il y ait, ou qu'il n'y ait
aucune chose créée: c'est par elle
qu'il voit vne infinité de mondes
qu'il pourroit faire en vne infinité
de diuerfes manieres, quelques
conditions que vous puiſſiez ſup-
poſer; & cefte science est premie-
rement entenduë, que la ſeconde,
d'autant qu'elle ne ſuppoſe aucun
acte de la volonté diuine, ſans le-
quel il eſt impoſſible qu'aucune
choſe

chose soit passée, presente, ou future.

La seconde science de vision suppose cet acte de la volonté, par lequel Dieu veut, ou permet que tel, ou tel mouuement arriue en vn telle, ou tel temps, & sans cet acte Dieu ne peut sçauoir les choses futures, puis que vraiment elles ne seroient futures, si Dieu n'auoit premierement déterminé de les faire, ou de permettre qu'elles fussent faites; mais aussi tost qu'il a eu ce decret, il est assuré qu'elles arriueront, & par consequent necessaire que Dieu le sçache par ceste science de vision, laquelle n'eust iamais esté, si ces choses n'eussent esté futures par la force de cet acte precedent de la volonté de Dieu; par où vous voyez que ceste science n'est point cause

de ce que nous offensois Dieu ;
n'y mesme de ce que nous faisons
de bonnes œuvres , car s'il estoit
possible que Dieu ne cogneust
point ces mouuemens futurs, ils
ne laisseroient pas d'arriuer, puis
qu'il a voulu les faire, ou les per-
mettre, & qu'il a sceu qu'ils arriue-
roient, supposé le decret diuin.
C'est maintenant icy ou il faut
que vous preniez garde, que la
science de vision n'est pas tempo-
relle comme les effects, qui ne pa-
roissent qu'en temps, mais elle est
eternelle, aussi bien que Dieu mes-
me, avec lequel elle est vne mes-
me chose, car bien que les effects
ne paroissent qu'en vn certain
temps, neantmoins il est vray
qu'ils sont futurs de toute eterni-
té, ce qui a esté cause à mon aduis
que plusieurs Philosophes n'en-

tendans pas bien ces myſteres, ont creu que le monde auoit eſté faiçt de toute eternité: il ſemble qu'ils veiſſent ce que nous diſons maintenant, ſçauoir eſt que le decret de Dieu, par lequel le monde a eſté fait, eſt eternal, & que la ſcience par laquelle il cognoiſt ce monde, qui n'a eſté fait que depuis cinq, ou ſix mil ans, eſt pareillement eternalle.

Cela n'empesche point que nous ne puiſſions conceuoir quelque ordre és choſes eternalles, car ſi tout eſt icy ſi bien ordonné, il ne faut pas douter que tout ne ſoit en vn plus bel ordre és idées eternalles, leſquelles on prend ordinairement pour le mode archetype, duquel dependent toutes les creatures; c'eſt pourquoy nous mettons cet ordre, duquel nous parlons

*Quel eſt
l'ordre
des idées
eternalles
en Dieu.*

maintenant, lequel est fondé sur ce que s'il estoit possible qu'il y eust quelque suite de temps, ou de causes, & d'effets en Dieu, il faudroit dire en premier lieu, qu'il entenderoit tout ce qui est possible: secondement qu'il proposeroit de produire tout cela, ou quelque partie qui luy plairoit: tiercement, qu'au mesme instant qu'il auroit pris ceste resolution, il scauroit asseurement, que tout ce qu'il auroit ordonné, arriueroit.

C'est en ceste façon que nous disons que les choses, entant que futures, sont plustost causes de la science que Dieu en a, que non pas ceste science des choses futures, bien que ce soit plustost l'acte de la volonté diuine, qui est cause de ceste science; i'ay dit *plustost*, par où i'entends, que s'il se retreuuoit

des causes en cecy, il en faudroit ainsi parler: mais comme tout cela est eternal, ce n'est qu'un ordre de raison, par lequel nous apprehendons du mieux qu'il nous est possible, les choses eternelles, n'y ayant icy autre cause que l'acte de la volonté de Dieu, par lequel il est la vraie cause de ce que les choses sont futures, car du moins il les permet, & determine par ce mesme acte de sa volonté qu'il ne les empeschera pas.

Or pour respondre *κατα πείρα* à vos quatrains, ie dy que la science de vision n'ensuit pas nos contingents effects, entant qu'il sont produits en temps, mais seulement entant qu'ils sont futurs, ce qui est au mesme moment de l'eternité qu'est l'acte de la volonté diuine, par lequel Dieu veut, ou

permet que cecy, ou cela se fasse au temps, & au lieu qu'il a choisi : & par ainsi ceste science n'est pas temporelle, mais eternelle, aussi bien que l'essence de dieu, avec laquelle elle est vne mesme chose.

LE D. Veritablement vous m'avez grandement contenté de ceste responce, & où ie pensois que nous eussions plus de raison, ie voy maintenant que ce ne sont que caioleries : aussi n'auons nous garde de nous abboucher, ou contester avec de tels personnages que vous ; ie vous proteste, que ie quitteray ceste opinion pour tout iamais, si vous me donnez vne aussi entiere satisfaction sur le reste des quatrains ; voicy la substance du 36.

CHAPITRE XVII.

Auquel les quatrains du Deïste depuis le trente sixiesme iusques au quarante troisiésme sont refutéz: & est monsté quel ordre Dieu tient en ses actions, & en ses pensées, comment il cognoist tout, comment sa prescience, & son decret s'accordent avec nostre liberté, &c.

LE DEÏSTE.

Si Dieu pouuoit estre deceu, & qu'il arriuaſt contre ce qu'il auoit proposé, son propos, & son vouloir seroient infirmes, & accompagnéz de doute, d'erreurs, & d'ignorance.

XXXVI.

LE THEOLOGIEN.

NON, Dieu ne peut estre deceu, & iamais rien n'arriuera qu'il ne le sçache auparauant de toute eternité, puis que sa science est infinie sans aucun erreur, sans doute, sans ignorance, estant aussi impossible que Dieu ignore quelque chose, comme il est impossible que Dieu ne soit pas Dieu, ce que vous pouuez sçauoir de ce que ie viens de dire contre le quatrain precedent.

Prenez donc garde que tout ce que Dieu a desseigné, arriue tousiours selon qu'il a resolu, mais ce qui vous deçoit icy est que vous vous imaginez qu'il a resolu que toutes choses arriuaissent absolu-

ment, & necessairement, ce qui est
tres faux, car il a tellement propo-
sé, & arresté que telle, ou telle cho-
se se feroit, ou ne se feroit pas, qu'il
a tousiours conserué la nature, &
la façon d'agir de chaque chose, si
bien qu'il n'a pas voulu que nous
fissions aucune chose bonne, ou
mauuaise, si premierement nous
n'y consentions avec vne pleine
liberté, faisant en cela comme vn
bon Roy, ou vn bon Pere, qui or-
donne, & veut que son fils estude,
mais il ne le veut pas, si l'enfant ne
s'y porte gaillardement, & libre-
ment.

*Quel est
le vouloir
de Dieu
enuers
toutes
choses.*

Or ceste resolution consideree
en Dieu n'est iamais que pour le
bien, il n'ordonne point, & ne
veut iamais que nous nous por-
tions au mal, estant impossible
que la souueraine bonté ait aucu-

Accord
du libe-
ral arbi-
tre avec
la pres-
cience de
Dieu.

ne inclination au mal; neantmoins
Dieu permet que le mal se fasse, &
quand quelqu'un offense, il est
certain que Dieu a voulu permet-
tre que cet homme use de sa mau-
uaise volôté, de sorte que quelque
chose que nous fassions, bien, ou
mal, Dieu ne peut rien ignorer, ou
douter de ce que nous ferôs; & tel-
les qu'il voit nos actiôs auât qu'el-
les soient faites, telles arriueront-
elles, non par ce qu'il les sçait, a-
uant qu'elles arriuent, mais par ce
que sa science est infinie, & em-
brasse aussi bien le futur, que le
present, ou le passé; Or comme
Dieu a voulu créer les hommes
dans le monde, il a veu leur por-
tee, & tout ce qu'ils feroient à tout
iamais, & par ainsi immediate-
ment apres sa resolution de les
créer, il a cognu par ceste science,

que nous auons appellee de *Vision*, routes les actions, paroles, & pensees, que tous les hommes, & les Anges auroient; la science pourtant n'estant pas cause de tout cela, veu qu'elle en seroit plustost l'effect, sil pouuoit se retreuer quelque dependance en Dieu, de sorte qu'on pourroit appeller les choses futures, ou la *futurition* des choses la cause virtuelle de la science de vision; c'est à dire que si ceste science pouuoit estre produite par quelque obiect, ce seroit par ceste *futurition*, mais comme cet obiect n'est au plus que corelatif à la science de *Vision*, il ne peut en estre cause, qu'à la maniere des obiects, lesquels ne sont que termes, ou terminans, & non pas causes motiues; car Dieu n'a autre motif de sa cognoissance que son essence di-

Comme
Dieu
sait les
mouue-
mens
futurs de
nos volon-
tez.

uine, bien que pour cognoistre les choses futures il faille qu'elle soit comme modifiée du decret diuin de faire, ou permettre ce qui arriuera: mais ceste modification n'adiouste rien de nouveau à l'essence de Dieu, quoy qu'il semble à nostre trop courte imagination, laquelle ne peut apprehender tout ce que Dieu fait par vn seul acte, si ce n'est par plusieurs pensees, & discours: c'est en quoy nostre Dieu est grandement admirable, de ce que quelque bel esprit que nous pensions auoir, il faut qu'il employe mille, & mille sortes de pensees pour atteindre tant soit peu à la pensee diuine.

LE D. Pleust à Dieu que nostre Poëte fust icy, certainement ie ne pense pas qu'il ait iamais ouy traiter ceste matiere si dignement; si

ie puis vn iour l'aboucher, qui ne peut estre que lors que ie me transporteray à Paris, car on ma asseuré qu'il y demeure, ie luy communiqueray ceste excellente response, laquelle ie pense estre capable de luy faire quitter ses opinions, lesquelles on m'auoit embarqué sous pretexte de quelque discours enfilez selon la doctrine de ce poëme; ie poursuis s'il vous plaist, afin de me degager des autres erreurs.

LE DEISTE.

Il n'y a point d'apparence que Dieu depende de nous, & des lieux, & du temps pour nous faire bien ou mal, & qu'on se puisse distraire de de son vouloir.

XXXVII.

*Autrement ce seroit le rendre à l'estat de ce-
luy qui pensant paruenir à ce qu'il eseroit, se
trouue mesconté, & malheureux.*

XXXVIII.

*L'esten-
due de la
science de
Dieu.*

LE THOL. Voicy vne impostu-
re bien signalee de vouloir faire à
croire au monde que les Catholi-
ques dient que Dieu est en sus-
pend sur ce qui arriuera, & que
nous pensions le pouuoir distraire
de son vouloir ; il faut auoir la re-
ste bien grotesque à ce qu'une o-
pinion si bigearre y puisse entrer.
Sçachez donc que nous croyons
fermement que Dieu ne peut e-
stre en suspend, & comme aux at-
tentes, & aux escoutes pour sça-
uoir ce qui arriuera, d'autant que
toutes les choses futures, & toutes
les pensees des Anges, & des hom-
mes qui serót iusques à l'eternité,
luy sont plus cognues, que ne nous
est cognu le Soleil en plein Midy,
car puis qu'il est infiny en tous ses
attributs, ne plus ne moins qu'il
est tout puissant, il est aussi tout

ſçauant : duquel la puiffance, & la ſcience n'eſt autre choſe que ſon eſſence, & le ſçauoir duquel em-
braſſe parfaitement tout ce qui eſt paſſé, preſent, & futur.

Or comme la ſcience ne de-
pend point de nous, puis qu'il l'a-
uoit auant que nous fuſſions, auſſi
la puiffance eſt abſoluë, & inde-
pendante de tout eſtre créé, ſi
bien qu'il peut faire de nous ce
qui luy plaiſt, car il a vn domaine,
& vne ſeigneurie tres-parfaite ſur
nos corps, & ſur nos ames, de ſorte
que quoy qu'il faſſe, ou vueille fai-
re de nous, il n'y a perſonne qui le
puiſſe reprendre : non plus que le
pot ne peut reprendre ſon po-
tier, ſoit qu'il le rompe, ſoit qu'il le
conſerue, & l'employe à cecy, ou à
cela; il ne faut point que la creatu-
re cherche d'autre raiſon des

*Dieu eſt
irrepre-
henſible.*

actiõs de son createur, que sa pure volõté, & qu'elle ne die autre chose que *sit pro ratione voluntas*. Nous sommes donc bien esloignez de reduire nostre createur à quelque imbecilité, & de penser qu'il se mesconte, car il ne peut iamaïs estre deceu, non plus qu'il ne peut decevoir: mais ie voy bien ce qui vous blesse le sens, & l'imagination, c'est que vous ne pouuez, ou plustost vous ne voulez concevoir comment Dieu se comporte envers nous pour nous sauuer, & comment sa prouidence, & sa predestination se peut accorder avec la puissance que nous auons de nostre costé de nous perdre, ou de nous sauuer.

Escoutez donc bien attentiuement ce que ie m'en vais vous enseigner. Comme Dieu est tout puissant,

puissant, il se peut comporter en- *La façon*
uers nous comme il luy plaist, si *par la-*
bien que sil veut, il nous rendra *quelle*
bien-heureux sans que nous y coo- *Dieu*
perions; mais sil ne veut que nous *veut que*
soyons sauuez sans nostre coope- *nous*
ration, cela ne peut se faire autre- *soyons*
ment: or ie soustiens, & vous asseu- *sauez.*
re avec tous les Catholiques, que
Dieu a tellement disposé de no-
stre salut, que iamais il ne nous
donnera la gloire eternelle qu'au-
prealable nous ne la meritions; (ie
parle de ceux qui ont l'usage de
la raison) lequel s'est obligé
de nous ayder à la meriter toutes
& quantefois que nous sùirions
les bons mouuemens du saint
Esprit.

Voyla d'où vient qu'il depend
maintenant de nous mesmes à ce
qu'il no⁹ punisse, ou qu'il nous re-

compense, sans toutefois qu'il soit en suspend si nous ferons cecy, ou cela, & si nous ferons damnez, où sauuez, car auant que nous fus-
sions nez, il le sçauoit aussi bien comme si cela fust desia arriué; or bien qu'il le sçache, il attend à nous chastier, ou à nous recom-
penser, lors que nous auons ac-
comply ses commandemens, ou que nous luy auons desobey: & en ceste façon le supplice, ou la re-
compense depend de nous, des lieux, & du temps, desquels Dieu ne dépend point, car il est absolu en toutes façons, & ne peut auoir aucune dépendance.

Responce

aux 28.

quatrain.

Voyons l'autre point, lequel ap-
partient au vouloir diuin, auquel il
vous semble que de côtrarier, c'est
reduire Dieu à l'imbecilité; mais
ceste pësee ne prouiët que d'igno-

rance, ou de malice: d'ignorance, si vous ne sçauiez qu'il faut confiderer la volonté de Dieu en deux façons, Premièrement entant qu'elle est volonté absolue, & de bon plaisir, *voluntas beneplaciti*, Secondement entant qu'elle est, *voluntas signi*, c'est à dire entant qu'il nous commande, ou nous defend quelque chose: c'est ceste volonté qui n'est pas absolue, mais conditionnee; il ne veut pas que nous la suiuiions, ou que nous luy obeyssions par contrainte, & nécessairement, mais librement; il veut que nous puissions ne la suiure pas, si tant est que nous soyons si malheureux, que de ne la vouloir pas executer: c'est donc à ceste volôté, à laquelle nous pouuons nous opposer, ce que faisans, Dieu n'en reçoit aucune incommodité, n'y ne se treu-

2. Sortes
de volon-
tez en
Dieu.

ue mesconté, car il treuve son conte tres-iuste, aussi bien lors que nous luy desobeyssons, comme quád nous luy obceyssons; veu qu'il sçauoit asseurement, auant que le monde fust, ceux qui luy desobeyroient, ou qui suyuroient ses commandemens, & nonobstant ceste science il n'a pas voulu absolument empescher que nos volontez, & nos autres puissances ne le portassent au mal, mais il nous a donné puissance de faire, ou ne faire pas ce qu'il auroit commandé, monstrant en cela qu'il vouloit auoir des seruiteurs libres, & non contraints.

LE DEISTE.

xxxix. *C'est dire que Dieu soit indigent comme l'homme, & qu'il a besoin de quelque objet pour venir à la fin de son intelligence.*

C'est l'assubjectir à l'homme comme le pot au potier, qui se diuertit souuent de son but, & de l'usage, auquel il auoit esté predestiné.

XL.

LE THEOL. Nenny, celuy qui dit que l'homme peut se rebequer, & rebeller contre la diuine volonté, à la façon que ie l'ay expliqué, ne mesure pas le souuerain agent à la puissance de l'homme, laquelle est finie en toutes façons, & celle de Dieu infinie; l'homme est bien loing de pouuoir faire tout ce qu'il veut, il ne fait pas seulement tout ce qu'il doit, & son pouuoir est si court, qu'il n'y a si petit animal, qui ne le surmonte en quelque chose; mais Dieu fait à tout moment, tout ce qu'il veut.

C'est aussi parlé fort mal à propos, & en ignorant à 24 carats, de conclure que Dieu ait besoing de

*Dieu est
indépendant.*

quelque creature pour venir à la fin de son intelligence, laquelle ne depend en nulle façon, ny ne peut dependre de nous, ou de quelque autre chose que ce soit, estant elle mesme sa fin, & son bonheur, car bien qu'il n'y eust aucune creatu- ny en acte, ny en puissance, c'est à dire, bien qu'il n'y eust aucune creature possible, Dieu seroit autant heureux comme il est, puis que ce n'est pas la possibilité, non plus que l'existence, ou l'actualité des creatures, qui constituent la felicité diuine, mais la seule contemplation de la diuine essence, des trois personnes, & de tous les attributs qui sont en icelle.

Neantmoins nous pouuons dire en quelque façon, que Dieu s'assuiettit à l'homme par vne certaine condescendence, & anthro-

*Commet
Dieu s'a-
commode
à l'homme.*

popatie, en ce qu'il accommode son concours, & son ayde à nostre volonté, de sorte que quand nous voulons bien faire, il ayde cet acte de volonté, & quand nous voulons faire mal, il ayde encor la mesme volonté, autrement elle ne pourroit exercer aucun acte, car elle depend du concours diuin tant en son operation, & en ses actions, qu'en son estre.

Or la raison pourquoy il nous ayde a exercer toutes nos actions exterieures, & interieures, est, parce que sçachât que nous ne pourriôs rié sans son secours, il a voulu nous aider en tout ce qui seroit necessaire pour agir, de sorte que no⁹ pouuons en quelque façon appeller son concours general, qu'il preste à toutes les creatures, l'accomplissement de la nature, parce que

sans cétayde elle est imparfaite, & boiteuse.

*Quelle
différen-
ce il y a
entre le
pot, & la
creature,
& Dieu,
& le po-
tier.*

Mais cette subiection n'est pas s'assuiettir, c'est plustost maistriser la creature que de s'assuiettir à elle, car c'est monstrier la dependance qu'elle à de Dieu, sans lequel il seroit impossible qu'elle fust. Or bien que Sainct Paul cōpare Dieu à vn potier, & l'homme à vn pot, ce neantmoins il y a bien de la difference, car Dieu n'a que faire de l'homme, mais le potier à besoing de son pot: le pot estant faict ne depend plus actuellement des mains du potier, mais l'homme depend de la puissance de Dieu; le pot n'a iamais dependu, n'y ne dependra du potier quand a sa forme, ou à sa matiere, ny quant à la quantité, mais tout ce qui est en l'homme tant substantiel, qu'acci-

dentel dépend de Dieu en toutes façons ; bref il y a plus grande difference du rapport que le pot a à son potier avec le rapport que l'homme , & toutes les creatures ont à Dieu, qu'il n'y a de difference entre le Ciel , & la terre , entre le noir , & le blanc , entre les tenebres, & la lumiere.

Toutefois si le pot, duquel le potier se vouloit servir à faire parade sur vn buffet, vient à se rompre entre ses mains faute de la matiere, qui n'est pas bien obeissante, ou à servir à quelqu'autre chose de plus vil , l'homme que Dieu auoit créé pour estre bien-heureux , peut aussi se diuertir de la beatitude par sa mauuaise vie, mais avec cette difference , que l'homme se diuertit volontairement, & librement, & le pot, ou sa

matiere se diuertit necessairement. Mais c'est assez dit touchant cette difficulté, car vostre principal dessein estoit de prouuer que Dieu est sujet à l'homme, supposant la verité de ce que nous auions dit auparauant, c'est pourquoy ayant respondu à cela, nous n'auons pas besoin d'un plus long discours, passez aux autres quatrains.

LE DEISTE.

XLII. Si Dieu voit tout ce qui est futur, quelle apparence y a-il qu'il ait deffendu ce qu'il sçait nous estre inéuitable par son vouloir?

XLIII. Quelle apparence y a-il qu'il nous commande ce qu'il sçait que nous ne ferons point, ou que par insuffisance il retienne sa volonté sur le bien, ou le mal qui vient de nostre choix?

LE THEOL. le laisse maintenant

la façon par laquelle Dieu cognoist les choses futures, parce que cela importe fort peu icy, & dy qu'il est tres faux que Dieu nous ait deffendu ce qu'il scait nous estre inéuitable, car il repugne à la bonté diuine; voyla pour le quarante-vniesme quatrain: Pour l'autre, ie dy qu'il nous peut commander vne chose, bien qu'il sçache que nous ne la ferons pas; c'est assez que nous la puissions faire, il n'a pas seulement le domaine de nos actions, mais aussi de nostre pouuoir; il est aussi bien maistre du fond, & de la racine, comme de l'usufruit, & des fleurs, ou des fructs: il peut donc obliger l'homme à faire tout ce qui luy est possible, puis que tout ce qui peut sortir de la puissance de l'homme, appar-

*Responce
au 42.
quatrain.*

Pour le reste du quarante deuxiesme quatrain, ie ne sçay ce que vous voulez dire, car qu'est-ce que retenir son vouloir par insuffisance sur le bien, ou le mal, qui nous est libre ? si cette insuffisance se prend du costé de Dieu, cela est impossible, car c'est le *Sadai*, le Dieu tres-suffisant, & tres-puissant, pour faire, entendre, & vouloir tout ce qui luy plaist ; or si vous n'entendez pas vostre Poëte, non plus que moy, passez outre iusques à ce qu'il vous ait expliqué ses phantaisies, & ses pensees qui sont aussi obscures, comme elles sont niaises, & brutales.

LE D. Il me semble qu'il veut dire par cette retention de volonté sur ce qui vient de nostre choix, que Dieu ne peut qu'il n'ordonne, & ne

vueille le bien, & le mal que nous faisons, autrement il se feroit quelque chose sans son vouloir.

LE THEOL. S'il le prend en ceste façon, il faut que vous sçachiez la doctrine des Theologiens sur ce suieût, lesquels enseignent qu'il ne se peut rien faire en ce monde que Dieu n'ait voulu de toute eternité par vn acte positif, & reel de sa volonté, sans lequel rien ne peut estre : si bien que quand nous faisons quelque chose, Dieu ne retient pas son vouloir là dessus, comme si sa volonté estoit oyseuse, & en suspend, car auant que nous fassions ce qui depend de nostre choix, la volonté de Dieu s'est portee vers l'œuure, ou l'action future, mais en diuerse façon lors qu'elle a esté bonne, & lors qu'elle est mauuaise, car l'acte

*Rien ne
peut ar-
riuer sans
vn acte
positif de
la volon-
té de
Dieu.*

positif de la volonté diuine s'est porté vers celle cy en la reprouuant, & vers celle-là en l'approuuant, vers celle-cy en la hayssant, & vers celle-là par amour.

Γ Pour bien entendre cecy, apprenez que la volonté de Dieu estant infinie, & immuable, pénétre tout, & qu'il n'y a rien qui la puisse eiter, ou surmonter: laquelle mesme est cause de ce qu'il n'y a point d'autres mondes que cestuy-cy, & de l'absence de toutes les creatures, qui ne sont point, & pourroient estre, d'autant qu'elle a voulu aussi expressement qu'il n'y eust point d'autres creatures, comme elle a voulu que celles-là fussent, qui composent tout ce grand Vniuers. D'où vient qu'en ceste façon nous pourrions dire que Dieu seroit aussi bien la cause

*Puissance
infinie de
la volon-
té de
Dieu, ins-
ques où
elle s'é-
tend.*

de tout ce qui n'a point esté créé, comme de ce qui a esté créé, d'autant que l'acte positif par lequel il a voulu que rien ne fust que ce qu'il a voulu faire, est si puissant, que si par impossibilité les creatures qui ne sont point, eussent peu estre d'ailleurs, que de la puissance, & de la volonté de Dieu, cet acte positif, par lequel il a voulu qu'elles ne fussent pas, eust empêché qu'elles ne fussent sorties d'ailleurs; & eust fait qu'elles fussent demeurees dans leur neant sans pouuoir sortir dehors le non estre; ou si elles eussent desia esté, il les eust reduites au neant.

Vous voyez donc comment Dieu ne retient pas sa volonté par insuffisance sur le bien, ou le mal fait, qui depend de nostre liberté, & pure contingence: mais il faut

*Commẽe
Dieu est
porté con-
tre les pe-
chez par
un acte
positif.*

d'un autre costé que vous preniez garde de ne vous pas ietter en l'autre extremité, qui est de pëser que Dieu soit cause de nos pechez, ou qu'il les vueille, car cela est tres-faux, & tres-impossible, nonobstant que sa volonté soit portee vers iceux par vn acte positif, mais acte de reprobation, & de hayne, qui est le mesme acte en substance, par lequel il s'ayme soy-mesme, car la raison pourquoy il hait le peché, est parce qu'il est opposé à sa bonté, & que sa malice nous priver de la beauté, & de la grace, laquelle nous rendoit amis de Dieu, & nous vnissoit à luy par amour: par où vous voyez que Dieu ne se peut aimer que quand & quand il ne haysse le peché.

LE D. Si Dieu se porte vers le bien & le mal-fait, qui depend de nostre

nostre liberté, par vn acte positif, il est donc, ce semble la cause de nos pechez, aussi bien que de nos bonnes œuures; ou s'il n'est cause de nos mesfaits, il ne peut sçauoir s'ils arriueront, ou non.

LE THEOL. le vous prie de vous rendre attentif à ce que ie diray, & vous serez content: Dieu n'est point cause de nos mesfaits, & neantmoins il sçait asseurement, si nous les commettrons, & combien de pechez nous ferons en toute nostre vie, voire combien en feroient tous les hommes, s'ils viuoient vne eternité avec vne pareille liberté, qu'ils ont, & avec toutes les occasions, & circonstances, lesquelles seroient possibles en ceste eternité.

Mais voyez comment, pourquoy, & par quoy il le sçait; & ia-

Hh

*l'arbitre
de la pre-
voyance
divine.*

mais vous ne vous imaginerez que Dieu puisse estre cause du mal, ou qu'il puisse ignorer aucune chose. Donc auant que Dieu se fust resolu de faire ce monde avec tout ce qui y est, il sçauoit qu'il le pouuoit faire en vn milion d'autres façons, qu'il ne la pas fait, & preuoyoit que s'il le creoit comme il est, & qu'il donnast la liberté aux hommes de faire, & de choisir le bien, ou le mal, que tous ceux qui font maintenant de bonnes œuvres, & de mauuaises, les feroient vrayment, comme il les preuoyoit.

Or vous voyez qu'en cet instant d'éternité Dieu n'est pas cause du mal, & neantmoins qu'il sçait desia par l'infinité de sa science (laquelle penetre toutes les choses possibles, en supposant quelques

conditions, & circonstances que vous voudrez) que si l'on fait un monde tel que cestuy-cy, que les hommes commettront les pechez, que vraiment ils font maintenant, par ce qu'ils esliront le mal, bien qu'ils peussent eslire le bien. Voila pour ce qui est de la science infal-
 lible de Dieu touchant le mal; car il n'est pas icy besoing que ie vous die qu'elle est la raison précise, & formelle, par laquelle Dieu sçait tous les pechez futurs, ce que nous ferons peut estre contraincts de dire par apres.

Voyons donc maintenant pourquoy il n'est pas cause de nos pechez; c'est par ce que le peché est vne auersion, & vni esloignement de Dieu, & vn desordre, qui empesche que nos actions ne regardent, & ne tendent à Dieu, com-

*Raison
pourquoy
Dieu
n'est pas
cause de
nos pe-
chez bien
qu'il no
aide à
faire l'a-
ction du
peché.*

me à leur dernière fin, or Dieu ne peut estre cause que nous nous esloignons de luy, puis qu'il desire estre aymé, & honoré de tout le monde. Et bien qu'il nous ayde à faire l'action, & à produire l'action de la volonté, par laquelle nous commettons le peché, neantmoins la diuerse façon par laquelle Dieu, & l'homme font vne mesme action quand à son estre reel, est tres-suffisante à ce que l'homme tout seul, & non Dieu, soit cause du mal; or ceste diuersité d'agir est en ce que l'homme faisant ceste action ne garde pas l'ordre, & la subodination, par laquelle il deuroit rapporter son action à Dieu, au contraire il peruertit cet ordre, & se soustrait de l'obeissance, qu'il doit à son createur; & par ainsi il manque à son deuoir, d'où vient

que la cause du peché est dite *deficiens*, ce qui ne peut estre attribué au souuerain agent, & au createur de toutes choses.

Mais le concours de Dieu, par lequel il fait la mesme action que nous faisons, est bien ordonné, & suyuant le decret eternal de sa sainte volonté, car Dieu preste son ayde au pecheur pour l'amour qu'il se porte, veu que ce concours diuin avec nostre liberal arbitre se rapporte à la gloire de Dieu, comme à la derniere fin de tous les estres : est-ce pas vne chose qui reüssit à la gloire de Dieu de voir que nous ne scaurions mesme nous vanter, ou nous glorifier de l'auoir offensé, si premierement il ne nous a donné la force, & la liberté de ce faire ? est-ce pas vne chose qui fait paroistre la puissan-

*L'action
par la-
quelle.
Dieu cõ-
court avec
le pecheur,
butte à sa
gloire.*

ce de Dieu, de ce que nonobstant qu'on abuse de sa puissance, il en sçait tirer de l'honneur, & de la gloire, & qu'il n'y a malice aucune, laquelle puisse surmonter sa bonté, & sa iustice.

Ce que ie vous dy touchant le concours diuin, il faut aussi l'entendre du decret eternal, par lequel Dieu a voulu permettre que l'homme choisit le mal, de sorte neantmoins qu'il luy donne la force, & l'adresse de suiure plustost le bien que le mal, s'il vouloit. Mais gardez vous bien de penser que cette permission soit semblable à celle que les Legislateurs donnent de faire quelque chose, & qui rend l'action legitime, & louable : ce n'est pas ainsi qu'il la faut entendre, car ce n'est rien autre chose, sinon qu'il ne nous veut

*La volonté de Dieu permet-
tante, ne fait pas
que le pe-
ché soit
permis.*

pas absoluëment empêcher de faire ce que nous voudrons, mais veut que nous vsions pleinement de nostre liberté, laquelle bien qu'il n'ait pas ordonnée, ou peu ordonner, & rapporter au mal, neantmoins il n'a pas voulu empêcher qu'elle s'y rapportast, & qu'elle l'esleust, si tant est qu'elle se vueille rendre esclau du peché.

Cette puissance qu'elle a de pou-
voir pecher, vient de la part de son
non estre, entant qu'elle n'est pas
de soy-mesme, car Dieu ne nous
a pas donné cette puissance pour
offenser, ny mesme entant qu'elle
regarde le peché, ce que saint
Augustin a fort bien penetré, lors
qu'il a dit au quatorziesme de la
Cité de Dieu, chap. 13, *ut natura sit
ex Deo, habet, quod à Deo facta sit, ut
autem ab eo, à quo facta est, deficiat, ex*

*D'où vient
la puis-
sance de
pecher.*

S. Aug.

*Que c'est
que le pe-
ché.*

Or puis que Dieu nous donne
vne force suffisante pour resister
à toutes sortes de pechez, & qu'il
ne tient qu'à nous, lors que nous
suiuons cette puissance, ou plu-
stost cette impuissance que nous
auons au peché, laquelle procede
de ce que nous sommes tirez du
neant, il n'y a personne qui puisse
iustement reietter le blasme sur
Dieu, c'est à nous tous seuls qu'il
en faut rapporter la cause, & le
desordre qui suit de là, car le peché
est vn éloignement volontaire,
par lequel nous nous retirons de
l'ordre que Dieu a estably, c'est
pourquoy il ne peut auoir aucun
rapport à Dieu, comme les autres
deffauts naturels, qui procedent
du non estre des creatures, lesquels
peuent auoir quelque habitude,

& rapport à la gloire de Dieu, veu qu'ils ne sont pas cause qu'aucune chose soit soustraite de l'obeyssance, que nous deuons au createur; il n'y a que le seul defaut moral, & volontaire, lequel nous deuons e- uiter plus diligemment que la peste, ou que quelque autre malheur que ce soit, fust-ce la peine eternelle de l'enfer, laquelle il faudroit plustost endurer, si cela estoit en nostre choix, que de consentir à aucun peché, d'autant que ceste peine eternelle se peut reduire, & rapporter à la gloire de Dieu, ce qui ne peut conuenir au peché.

Faut plustost endurer la peine d'enfer, que d'offenser Dieu.

LE D. Monsieur, il n'y a plus qu'un doute, qui me traueille sur ce sujet, c'est que ie ne peux comprendre comment Dieu a sçeu de toute eternité, que, par exemple, ie

*Objection
des Liber-
tins con-
tre la li-
berté.*

tomberois en ceste folle opinion du Deïsme, & en tous les autres pechez que j'ay faits, si quand & quand ie ne m' imagine qu'il m'a esté impossible d'euter tout ce que Dieu à preueu de moy, autrement si cela fust auenu au contraire, dieu eust esté deceu, ce qui ne se peut.

Responfc. LE THEOL. S'il n'y a que cela qui vous fasse de la peine, nous aurons bien tost fait; pourueu que vous puissiez, & vucilliez suppoler, & conceuoir ce qui est tres veritable; c'est que la prescience de Dieu n'est point passée, mais elle est tres-presente, ce qu'estant presupposé, & estant necessairement veritable, puis qu'en Dieu il ne peut y auoir rien de passé, & que tout est present dans le point immense de son eternité, ie dy que l'acte

de la prescience diuine ne nous est pas plustost present, entant qu'il cognoist nos pechez presens, que nos pechez mesmes, lesquels n'ont point de dependance de ceste preuision, non plus que si elle n'estoit point.

Imaginez vous donc que dieu n'ait point sçeu le mal que vous feriez, ny l'opinion des peistes que vous embrasseriez, afin de mieux conceuoir ce qui est de la verité. Si cela estoit, ne m'accorderiez vous pas que vous pourriez euit

*Que la
prescience
de Dieu
n'est
point
cause de
ce qui
arriue.*

le peché, & l'opinion susdite? puis qu'il n'y a que l'infalibilité de la science diuine, qui vous fasse de la peine là dessus, & qui semble vous poser vne loy d'infalibilité, ou de necessité, encores que cela ne soit pas. Or il est tres-assuré que la precognoissance de dieu ne vous

impose non plus d'infalibilité, ou de nécessité de pecher, que si Dieu ne sçauoit point vostre peché, qu'apres qu'il seroit fait.

Imaginez vous encore que vous n'ayez point besoing du concours diuin, & que vous ne dependiez point de lui en aucune façon, mais que vous ayez ceste puissance, & ceste liberté de faire le mal, & le peché ou d'un autre que de Dieu, ou de vous mesme (si par impossible cela pouuoit estre) vous m'aduoürez que pour lors ceste prescience diuine ne vous imposeroit non plus de nécessité, ou d'infalibilité, que la cognoissance qu'un homme auroit de ce que vous ferez d'icy à vne heure, laquelle n'empescheroit pas vostre liberté, ny la puissance que vous auez de ne faire pas ce qu'il sçait que vous

ferez. Or asseurez vous que la prescience de dieu ne vous impose rien autre chose, qui preiudicie à vostre liberté, que ce que vous impose la cognoissance que cet homme auroit.

LE D. Je voy bien maintenant que le 41 quatrain de ce maudit Poëte est tres-faux, par lequel il m'auoit persuadé que ce que dieu nous deffendoit, nous estoit ineuitable; mais vous m'avez fort bien fait concevoir qu'il ne nous estoit non plus ineuitable, que si dieu ne le sçauoit point, puis que sa prescience n'en est point cause en aucune façon: d'où il est facile à conclure que dieu nous à peu iustement prescrire des loix, bien qu'il sceut que nous ne les garderions pas, ne tenant qu'à nous & à nostre malice, si nous ne les gardons; vraye-

*Prescience
de Dieu
bouclier
des liber-
tins.*

ment ie confesse que ç'a esté le libertinage, qui nous a iettez en ces opinions, car pensans que ceste prescience sembloit fauoriser à nòs vices, nous en auons fait vn bouclier, & vn rempart pour nous ietter en toutes sortes d'impietez sans nul remords de conscience, comme si dieu en eust esté l'auteur, & nous eust aussi bien commandé, & prescrit toutes sortes de vices, comme la vertu.

Mais ie deteste maintenant cet erreur, & embrasse la verité Catholique de tout mon cœur, prest à mourir pour icelle, si besoin est. Je poursuiuray donc ce qui suit, puis que ie n'ay plus aucune difficulté sur cecy, afin qu'en quittant mon erreur, ie puisse apprendre la façon de renuerfer les impietez que ce detestable Poëte à renfer-

mé en tous les quatrains: i'espere avec l'ayde de dieu que cela me seruira pour ramener beaucoup de mes compagnons à la verité de la religion Catholique.

CHAPITRE XVIII

Dans lequel le quarante troisiésme quatrain du Deiste est refuté, & est monstré que Dieu n'est point la cause de nos pechez, & que l'homme est inexcusable en son peché: & que Dieu est iuste, bien qu'il nous ait donné des loix qu'il sçauoit que plusieurs n'obserueroient pas.

LE DEISTE.

S'il sçait tout, comment peut-il auoir donné vne loy laquelle est contre les effects de sa prece nce?

LE THEOLOGIEN.



ACCORDE que Dieu
ſçait tout en ſoy-mef-
me, & par ſoy-mefme,
car il ne mandie pas ſa
cognoiſſance des ob-
jects extérieurs, comme nous fai-
ſons, mais ie ne voy point que la
loy, que nous diſons eſtre emanee
de Dieu, démente les effets de ſa
precognoiſſance, ou de ſa pre-
ſcience; car, ie vous prie, qui ſont
les effets de la preſcience eternal-
le? n'eſt-ce pas principalement
l'infallibilité, & la certitude? or
tout ce que Dieu a preueu, ou preſ-
ceu, ou tout ce qu'il a veu futur,
arriuera certainement, & infalli-
blement, non ſeulement quant à
la ſubſtance, mais auſſi ſelon tous
les

les accidens, toutes les façons, modalitez, & circonstances, qu'il a presceu, & preueu, tant est infallible, & asseuree sa precognoissance.

Ceste certitude ne dement la loy de Dieu en aucune façon, n'y ne repugne à tout ce que nous croyons en la religion Catholique, Apostolique, & Romaine, mais elle sy accorde parfaicte-ment. Si vous sçauiez quelque autre effect de la prescience, ou de la prouidence de Dieu, lequel vous pensiez ne s'accorder pas avec la loy Euangelique, & avec la creance des Catholiques, obiectez le moy, & vous verrez comme ie vous contenteray ; autrement poursuiuez vos vers.

LE D. Il me semble que vous ne touchez pas l'intention de no-

stre Poëte, lequel veut dire que la loy, par laquelle dieu nous defend de nous abstenir, ou nous commande de faire cecy, ou cela, est contraire à sa prescience, car puis qu'il a preueu que nous ne ferions pas ce qu'il a commandé, & que nous nous porterions au contraire de ce qu'il a ordonné, pourquoy nous l'a-il commandé, que n'ordonnoit-il plustost ce qu'il

*obiectiō
des A-
theistes,
& des li-
bertins.*

preuoyoit que nous ferions ? est ce pas dire que Dieu nous a rendu des pieges, & des embuscades pour nous attraper, puis qu'il sçauoit tres-bien que nous ne ferions pas ce qu'il nous commandoit: car puis que les effects decoulans de sa precognoissance, sont la certitude, & l'infalibilité, comme vous auez dit, il estoit certain, & infallible que nous ne ferions pas ce

que Dieu nous commanderoit, & neantmoins si c'est vne loy qui vienne d'un tresbon, & tres-sage Legislatteur, telle que doit estre la loy diuine, elle doit tellement estre conceüe, & imposee, qu'on ne puisse pas manquer à l'accomplir, autrement le Legislatteur nous donneroit occasion de iuger qu'il seroit impuissant, ou qu'il manqueroit de sagesse, & de bonté: de sagesse, n'ayant sceu treuuer, & prescrire vne loy, qui fust inuiolablement obseruee; de bonté, n'ayant voulu commander ce qu'on feroit, mais ce qu'on ne feroit pas, ce qui ne se peut dire en nulle façon, veu que Dieu est tres-sage, tres bon, & tres-puissant.

De là il veut conclure que la loy qui defend l'adultere, l'yronnerie, & tous les autres pechez, &

*La plus
forte cōsi-
deration
du Deïste.*

qui cōmande de faire bien à tout le monde, de sanctifier les festes, & tout ce que vous maintenez estre commandé, ou defendu par l'Ecriture sainte, ou par l'Eglise illuminee par le S.Esprit, que ceste loy dis je ne peut venir de Dieu, puis qu'on ne la garde pas. Je vous confesse ingenüment que c'est là vne des plus puissantes considerations, qui m'ayt arraché la creance de l'esprit, & fait embrasser le parti des Deïstes, lequel à plus d'apparence de verité que nulle autre sorte de religion, car ils ne se seruent ny de menaces, ny de promesses, afin que nous agissions pour la seule bonté de la vertu, & pour l'amour que nous portons au souuerain estre, & à la bonté infinie du createur.

LE THEOL. Je suis fort ayse que

vous m'avez arresté sur ce quatri-
rain, car ie vous feray voir si clai-
rement la folie, la malice, & l'igno-
rance de vostre rimeur, que vous
vous estonnerez comment vous
auez embrassé ces erreurs. Nous a-
uons desia monstté que nos a-
ctions tant bonnes, que mauuai-
ses ne sont pas l'effect de la pre-
science diuine, car elles ne sont pas
futures à cause que Dieu les sçait,
mais plustost il les sçait, par ce
qu'elles sont futures, ce qui a esté
fort amplement expliqué cy des-
sus.

A quoy i'adiouste que la loy la-
quelle Dieu nous a donnée, ou
qu'il a inspirée à son Eglise pour
nous prescrire, n'est pas vn effect
de sa precognoissance, puis que ce-
ste loy ne nous sera pas donnée
par ce que Dieu la sçait, la loy n'e-

*Response,
Et satis-
factio au
Desse.*

stant pas l'effect d'une science, telle particulièrement qu'est la prescience de Dieu, laquelle n'est pas active, ou operante, mais seulement contemplative, supposant desjà par un instant de raison raisonnante, ou raisonnée, que tous les effets, & toutes les loix sont futures, quand il les cognoist.

*Ce qui est
nécessaire
pour faire
une loy.*

Il faut pour establir une loy que la volonté opere, & que le Legislatteur fasse tellement ses ordonnances, qu'il vueille, & ait intention qu'elles obligent, autrement elles ne passent point en loy; surquoy vous pretendez que Dieu n'a peu, ou deu ordonner ce qu'il sçauoit que nous ne ferions pas, mais vos raisons n'ont aucune force, autrement il ne faudroit iamais faire aucune loy, car les Legislatteurs sçauent fort bien qu'elle ne sera

pas gardee par tout le monde, c'est pourquoy ils ordonnent des supplices pour chastier les transgresseurs, & les meschans.

Vous ne pouuez pourtant pas dire qu'ils tendent des embuches à ceux qui ne les obserueront pas, moins encore qu'ils soient causes de ce qu'on ne garde pas la loy, car le Legislatteur à intentio qu'un chacun l'obserue. Mais quoy, vous repartirez peut estre que le Legislatteur ne peut pas, & ne sçait pas tout come Dieu, autrement qu'il ne commanderait rien que ce qu'il sçaueroit qu'on feroit ; c'est donc icy qu'il faut estre attentif, puis que vous accusez Dieu d'impuissance, de folie, & de malice, si les loix de la religion Chrestienne ont esté faites par sa volonté.

En vn mot vous pensez que

Dieu ne peut rien ordonner qu'il n'arriue infalliblement, & necessairement : & moy ie maintiens avec tous les Catholiques, que Dieu peut ordonner, & a ordonné tout ce qu'il nous commande en l'Escripture saincte, ou par l'Eglise. Je le preuue par les grands miracles, qu'il a faits en tout temps, & en tout lieu, en faueur de ceste creance, & pour la confirmation de nostre foy, lesquels vous pouuez voir tant en l'Euangile, & au viel testament, que dans les auteurs de l'histoire Ecclesiastique.

De plus, ie maintiens que Dieu a peu faire ces loix sans preiudice de sa toute puisſance, de sa sagesse, & de sa bôté, car ces attributs ne dependent en aucune façon de ce qui est icy bas, ny de tout ce qui peut estre

crée, veu que si nous supposiôs que chaque estre finy, & crée fust impossible (ce qui ne peut estre) Dieu seroit encore tel qu'il est, avec tous ses attributs. Il ne faut donc pas mesurer les perfections diuines par ce qui nous paroist icy, si vous ne pensez mesurer l'infiny par le finy, la perfection par l'imperfection, la lumiere par les tenebres, le tout, & le souverain estre par le rien, & par le non estre.

Difons donc que nos loix nous ont esté donnees de Dieu, lequel à voulu que nous fussions libres de les obseruer, ou de les obmettre, & que cela n'infere aucune impuissance en Dieu; au contraire il faut necessairement qu'il soit tout puissant, puis qu'il a peu faire des creatures libres, & franches de toute contrainte, & necessité:

*Que Dieu
est tout
puissant.*

voyez si ce n'est pas par impuissance que nos artisans ne sçau-
roient faire aucun instrument, ou
chef d'œuvre qui soit libre; tout
ce qu'ils font, en quelque maniere
qu'ils s'en puissent servir, suit la
pante, & l'inclination de sa nature
sans pouuoir se retenir; il n'y a rien
de visible au monde, le seul hom-
me excepté, qui n'agisse necessai-
rement, & n'y a que le seul estre
infiny, qui puisse donner ce de-
gré de liberté au chef d'œuvre de
sa puissance: concluez donc qu'il
est necessairement tout puissant.

Passons à la sagesse, laquelle reluit
merueilleusement dans la liberté,
qu'il nous a donnée, & d'as les loix
qu'il nous a prescrites. Je croy que
vous m'accorderez fort volontiers
que vous ressentez dans vous mes-
mes vne loy, laquelle vous dicte

qu'il ne faut faire mal à personne,
alteri ne feceris, quod tibi nolles fieri; Loix de la nature
qu'il faut aymer celuy qui vous a dans
fait; qu'il faut aymer le bien, & l'homme,
hayr le mal.

De grace qui a mis ceste
loy au fond de vostre cœur, à ce
esté vostre pere, ou vostre mere?
rien moins, car ils n'y pensoient
seulement pas; il faut donc que
Dieu vous l'ait enpreinte dans
l'ame, car vous ne la luy avez pas
mise, autrement vous l'en pour-
riez oster quand bon vous semble-
roit. Or vous pouuez transgresser
ceste loy, & plusieurs font tous les
iours le contraire de ce qu'elle di-
ète, comme tesmoignent les ho-
micides, les trahisons, & les autres
crimes, qui ne se font que trop
souuent. Si vous ne pouuiez faire
contre ces loix, que j'ay rappor-

rees, ne vous plaindriez-vous pas de ce que vous n'auriez point de liberté?

*Grand
aveugle-
ment des
Deïstes.*

Bon Dieu quel aveuglement, & quelle malice des hommes! de vouloir accuser Dieu, & treuver à redire en ce qu'il nous a donné la liberté, laquelle est vne perfection si releuee, qu'il n'y a que Dieu, & les Anges qui l'ayent: si les malheureux Deïstes ne l'auoient pas, & qu'ils recogneussent ce deffaut en eux, il n'y auroit rien qu'ils desirassent plus ardemment; & maintenant qu'ils l'ont, ils en abusent, & s'efforcent pour controoller les œuvres, les loix, la science, la volonté, la bonté, la sagesse. & la puissance de Dieu; certainement ce desordre est espouuantable.

Voyez si vous pouuez démentir ces loix que vous ressentez en

vous mesme, & me dites si vous voudriez ne les auoir pas, assurement vous seriez marry qu'elles fussent effacees de vostre esprit, car il faudroit perdre l'humanité, & la raison, & cesser d'estre capable de iouyr de la felicité eternelle, apres laquelle il semble que vous aspiriez avec tous les Deistes, bien qu'ils s'en éloignent dauantage, que le firmament n'est éloigné de la terre.

Vous avez donc des loix en vostre esprit, que Dieu y a grauees, desquelles vous estes bien aise, & *utilité des Loix.* lesquelles sont les fontaines, & la source des bons mouuemens, & des bonnes resolutions que vous avez tous les iours, & le frain des passions desordonnees, lesquelles estans suiuiues, nous rauallent iusques à la nature des bestes: il faut

donc aduoüer que la bonté, & la sagesse de Dieu paroist en ces loix, puis qu'elles sont causes de nos bonnes actions, qu'elles sont grandement conformes à nostre nature, & qu'elles perfectionnent la raison. Je ne voy plus que vous puissiez vous plaindre de ce que Dieu nous a donné des loix, puis qu'elles sont le plus riche ornement de nostre nature.

Vous me direz, peut-estre, que vous demeurez d'accord avec nous touchant les loix que Dieu nous a prescrites en nous donnât l'ame, la raison, l'esprit, & la nature, lesquelles nous appellons loix naturelles, & que ce sont celles-là que vous suiuez, mais qu'il y en a d'autres, que vous ne sçauriez approuver, telles que sont celles que l'Ecriture sainte nous propose, ou que

fait l'Eglise. A quoy ie respons
 que toutes les loix diuines, & Ec-
 clefïaftiques ne font rien que con-
 clusions de celles que nous auons
 rapportees, & maintiens que Dieu
 les a peu tres-iustement instituer:
 car si nous regardons les loix qui
 concernent son honneur: ô Dieu!
 qu'elles sont iustes, bonnes, & rai-
 sonnables, puis que nous n'auons
 rien qui n'appartienne à ce souue-
 rain estre: c'est pourquoy nous ne
 nous pouuons plaindre, quelque
 loy qu'il nous impose.

*Loix de
 Dieu, &
 del'Egli-
 se, tirees
 des loix
 naturel-
 les.*

Celles qui sont pour nous con-
 duire enuers nostre prochain, sor-
 tent de ce principe, *fais aux autres,*
*ou ne fais pas ce que tu voudrois rai-
 sonnablement qui te fissent, ou ne te fissent*
pas; il faut donc que vous les ap-
 prouuez, car elles ne sont pas
 moins conuenables à nostre natu-

*Excellen-
ce des
loix de la
Religion
Catholi-
que.*

re, que leur racine. Bref les loix que Dieu nous a donnees pour nostre gouuernement particulier sont grandement honnestes, bonnes, & parfaites. Je suis prest de les deffendre, si vous y trouuez quelque difficulté, & de vous monstrier en gros, & en detail, que tout ce qu'enseigne la religion Catholique, est loüable, honneste, vertueux, sainct, & digne de Dieu.

Pourquoy est ce donc que vous dites que nos loix dementent les effets de la prescience diuine? Apprenez aujourd'huy que nous n'auons aucune loy, qui s'oppose aux perfections diuines, ny a pas vn effect decoulant de la prescience, predestination, volonté, puissance, sagesse, & bonté de Dieu; & que vostre Poëte vous a abusé par ces rimes, car quand Dieu nous com-
mande

mande quelque chose que ce soit, il sçait fort bien qu'il est en nostre liberté de le faire, ou ne le faire pas; mais il sçait par l'infinité de sa science si nous le ferons, ou non; de plus, il est prest de nous ayder à quelque heure que ce soit, si bien qu'il ne tiendra qu'à nous, si nous ne faisons ce qu'il veut; il ne veut pourtant pas que nous obseruions la loy par contrainte, ou par nécessité, mais volontairement, & si librement, que s'il ne nous plaist, nous n'en ferons rien; admirez cependant avec moy la merueilleuse puissance de Dieu, lequel a fait vne creature si libre, & si indifférente.

A qui attribuerez vous maintenant la transgression de la loy diuine? sera-ce à l'homme, ou à Dieu; ce sera à l'homme assurément,

*L'homme
inexcusable
en son
péchè.*

puis qu'il ne tient qu'à luy qu'il n'observe la loy, & que Dieu la luy auoit prescrite pour cet effect, & estoit prest de luy ayder en tout ce qui estoit necessaire : & Dieu cependant demeurera tres-iuste, tres-bon, & tres-puissant, sans pouuoir estre accusé de transgression ; tres-iuste, lors qu'il punira rigoureusement cette transgression volontaire, de laquelle l'homme a esté la cause totale : tres-iuste parce qu'en cette transgression il n'y a nulle apparence d'iniustice en Dieu, & neantmoins il y a vne tres-grande iniustice en l'homme, puis qu'il a denié l'honneur, qu'il deuoit rendre à Dieu par toute rigueur de iustice : tres-bon, puis qu'il nous a donné la force de meriter le Paradis, & de nous ioindre à sa souueraine bonté par l'obser-

Dieu in-
justifié en
tout.

uance de ses commandemens;
 tres-bon, puis qu'il est prest de
 nous pardonner toutes nos offen-
 ses au moindre soupir, & à la
 moindre larme que nous iette-
 rons parce que nous luy auons
 desobey; tres-puissant, en ce que
 nous ne luy scaurions rien oster,
 ny luy faire aucun tort en ses
 biens, ou en ses perfectiós, car tout
 ce qu'il a, est infiny, & exempt de
 toutes sortes d'alterations: tres-
 puissant, en ce qu'il a tellement
 peu nous creer libres, & nous don-
 ner de telles loix, & vn tel secours,
 que nous pouuons nous vanter
 par dessus toutes sortes de nations,
 que nous auons la force de mon-
 ter au Ciel, & d'acquérir à force
 d'armes, que Dieu nous a don-
 nees, le Royaume du Ciel.

*Que tous
 les princí-
 paux as-
 tributs
 diuins
 paroissent
 en la fa-
 çon par
 laquelle
 Dieu se
 comporte
 avec nous*

Tres-sage, car il a tellement dis-

posé nostre nature, que bien qu'elle soit libre de faire, ou ne faire pas tout ce qu'elle voudra, neantmoins il sçait ce qui en sera devant que le monde fust fait; & bien que Dieu sçache dès l'éternité à quoy nostre volonté se determinera, elle est toutefois aussi libre de se determiner, comme si Dieu ne l'auoit pas sceu. O merueilleux accord de la prescience diuine avec nostre liberté! vrayement c'est icy où il faut confesser, que la sagesse de Dieu surpasse nos entendemens, & destruit la sagesse humaine; tres sage encore, puis qu'il ne nous a pas donné cette liberté, & n'a pas sceu le mal à quoy elle se determineroit, qu'il n'ait sceu, & ordonné quant & quant que le bien qu'il tireroit de nos mauuaises volontez.

Or sus, Monsieur, asseurez vous donc maintenant, que vostre Poëte est vn imposteur, & que nos actions, & les loix ne sont pas les effects de la precognoissance diuine: que la volonté de Dieu n'est point cause de nos pechez, mais nous tous seuls: que la prescience, & la volonté, aussi bien que ses loix, & toutes ses œuures ne preiudicient en rien à nostre liberté; & que tout ce qu'enseigne la vraye Religion, qu'il a tasché à rendre ridicule, & odieuse, est tres-sainct, tres bon, & tres agreable à l'Autheur de la nature, de la grace, & de la gloire.

Je ne sçache plus aucune difficulté que vous puissiez auoir sur ce sujet, si ce n'est que vous fussiez fasché de la façon que Dieu a fait le monde, & que vous desirassiez

*Pourquoy
Dieu fait
le monde
autrement
qu'il n'est*

qu'il l'eust fait autrement , par exemple, qu'il n'eust point permis les pechez : qu'il eust confirmé tous les hommes en grace , afin que chacun eust esté sauué, & qu'il eust empesché toutes sortes de maux, & d'afflictions : car s'il y a gens au monde qui treuuent à redire, & à reprendre és œuures, & en la volonté de Dieu, ce sont les Deïstes, qui voudroient auoir leur Paradis en ce monde.

Ie m'estendrois icy, & respondrois fort au long à cette demande, & à ce desir, n'estoit que i'ay traitté cette matiere fort ample-ment en la question contre les Athees, lors que i'ay respondu à leur 16, 17, 18, & 21, obiection, là où vous treuuez dequoy vous satisfaire; ie diray seulement icy que c'est manque d'esprit, & de iuge-

ment de demander pourquoy Dieu a fait le monde avec l'ordre que nous y obseruons à chaque moment, d'autant qu'il a vne volonté infinie, laquelle est la regle souveraine de tout ce qui est, & de tout ce qui peut estre de bon, & de beau.

C'est pourquoy il faut croire qu'il a eu raison d'eslire ce monde icy, tel qu'il est, entre vne infinité de millions qu'il eust peu faire au lieu de cestuy cy, bien que nous ne scachions pourquoy ; cette question que proposent vos gens, va bien plus loin, car ils demanderoient encore apres que tous les hommes seroient confirmez en grace, pourquoy il n'y auroit qu'un tel nombre d'hommes, & non plus: pourquoy il n'y auroit qu'une terre, qu'un firmament,

*Questions
curieuses.*

ou qu'un Soleil: pourquoy Dieu ne nous auroit-il creéz aussi parfaits que les Anges, & aussi incorruptibles que les Cieux, & mille autres choses, que ie laisse pour l'occupation des cerueaux creux, qui perdent le temps, & leur esprit à faire quantité de questions badines, lesquelles ne meritent pas qu'on s'y arreste.

Quiconque aura bon esprit, il se resoudra bien tost luy-mesme sur telles pensées, car lors qu'il meditera pourquoy Dieu ne fait pas vne infinité de choses qu'il pourroit faire, il aura incontinent son recours à la volonté de Dieu, avec le Prophete Royal, *omnia quacumque voluit, fecit*, & n'a point fait tout ce qu'il n'a pas voulu; c'est là le rendez vous d'un iugement bien fait, lequel adorera tousiours

avec vne profonde humilité l'ordre, & la façon, avec laquelle Dieu se comporte en toutes ses œuvres.

Pleust à Dieu que ces curieux se iettassent sur d'autres questions qui leur seroient beaucoup plus vtilles, telles que sont les suivantes; comment il est possible qu'ils offensent Dieu, & qu'ils menent vne vie si scandaleuse, & si meschante comme ils font, apres auoir receu tant de graces, & de si viues inspirations de Dieu, par lesquelles la bonté diuine frappe à toute heure à leur cœur, en les inuitant à quitter leur impieté: comment il est possible qu'ils laissent échapper tant d'aduertissemens intérieurs qui les portent à faire penitence; car ie deffie les plus meschans d'entr'eux de me pou-

*Questions
vtilles
pour les
Deistes.*

voir remarquer vne sepmaine, voire vn iour en toute leur vie, depuis qu'ils ont quitté la vraye Religion, dans lequel ils n'ayent resenty quelque remords de cōscience, ou quelque bon mouuement, par lequel ils ayent esté conuiez de quitter leurs foles opinions & leurs débauches : comment est il possible qu'ils prisent dauantage les voluptez du corps, que celles de l'esprit, veu que celuy là est fait pour cestuy-cy, & que les plaisirs sensuels nous rauallent iusques à nature des bestes, & nous font perdre ceux de l'entendement, & du Ciel.

Ce sont là des graces preuenantes, & suffisantes par lesquelles Dieu les rappelle à foy, & pour lesquelles il leur faudra rendre conte au grand iour du iugement ; ce

sont là les douces chaisnes, avec lesquelles il les veut attirer à la repentance, & les retirer de leur impieté; bref ce sont les rayons de ce diuin Soleil, lequel esclaire, & eschauffe tous les hommes, tantost d'une façon, tantost d'une autre; de sorte qu'il n'y a personne au monde qui puisse dire, ou se plaindre que Dieu ne luy a pas fait la grace de se recognoistre, & de quitter le peché, car les graces, & les inspirations diuines sont en si grande abondance, que les plus meschans en reçoient mille fois dauantage qu'il n'est necessaire à ce qu'ils abandonnent leurs impietez, & embrassent la vraye Religion, hors de laquelle il n'y a ny salut, ny veritable contentement. Voyez s'il vous reste quelque difficulté sur ce quatrain, autrement

524 *Impieté des Deïstes,*
proposez ce qui suit dans le quarante-quatriesme.

CHAPITRE XIX.

Dans lequel les quatrains du Deïste sont refusez, depuis le quarante quatriesme, iusques au cinquante quatriesme; & est monstre qu'il n'y a qu'un chemin pour estre sauué; que Dieu peut faire la mesme chose avec nous sans pouuoir estre accusé de peché; que vrayment il y a vn enfer: & que le lieu, ny la naissance ne nous donnent pas la religion, avec plusieurs autres choses.

LE DEÏSTE.

XLIV. Si Dieu se veut seruir de loix pour nous guider selon sa prouidence, pourquoy voulez vous nous assuiettir à vostre religion?

LE THEOLOGIEN.



IL faut icy distinguer entre les loix du monde, car lors qu'il y a quelque loy dans vn Royaume, dás vn Empire, Republique, Prouince, Cité, Famille, ou mesme dás l'entendement d'un particulier, laquelle est contre la raison, l'equité, la iustice, ou les bonnes meurs, ou contre l'honneur, & la volonté de Dieu, ceste loy n'est pas celle, de laquelle Dieu veut que nous nous seruions, car il la deffend expressement, & commande qu'on aille prescher sa loy à toutes sortes de nations par ces paroles, *pradicate*

Euangelium omni creaturæ; & par plusieurs autres, que nous lisons dans l'Euangile; c'est là la raison pourquoy le vray Chrestien desire grâdemment que tous les Payens, les Turcs, les & autres infideles se conuertissent à Dieu, & qu'en quittant leurs mauuaises coustumes, & leurs erreurs, ils embrassent la loy Euangelique remplie de bonnes nouuelles, puis qu'elle promet vne gloire eternelle au lieu d'un enfer perpetuel, dans lequel seront tourmentez tous ceux qui ne suiuront pas ceste loy Royale de nostre Sauueur, & Redempteur Iesus-Christ.

De là vient que ceux qui travaillent à la conuersion des Infidelles à perte d'haleine, & de leur sang, n'ostent point les loix de la police, n'y ne deracinent aucune

creance, lors que ces loix, & ceste creance ne sont point contre la raison, ou contre la lumiere de la foy, mais ils condescendent à tout ce qu'ils peuuent pour gagner les ames de ces infidelles à Dieu, & pour les rendre bien heureuses. Voyla donc la raison pourquoy nous desirons, qu'on quitte les mauuaises loix, parce que Dieu pere commun des hommes, & des Anges, à voulu qu'il n'y eust qu'un chemin, par lequel on peust se sauuer, estant bien conuenable, & tres-raisonnable, que tous ceux, qui tendent à vn mesme bien intelligible, y arriuent par vne mesme voye, afin que nous recognoissions d'autant plus combien Dieu tres-vn se plaist en l'vnité, & en la simplicité.

C'est pourquoy il a tousiours

conduit son peuple bien aymé par de mesmes loys fondamentales depuis le commencement du monde iusques à present, qui ont esté; *qu'il ne falloit faire à personne, que ce que nous voudrions raisonnablement nous estre fait; qu'il falloit porter une grande reuerence à Dieu, & à tout ce qui luy appartient, qu'il falloit l'adorer, & beaucoup d'autres choses, que ie laisse pour maintenant: & bien que quelques loix ayent esté adioustées dans la loy escrite, & puis en l'Euāgelique, toutefois elles ne sont point repugnantes aux precedentes, elles les accomplissent plustost, & leur donnent vn esclat de beauté, & le sommet de la perfection; ce que ie pourrois monstrier fort facilement, n'estoit que ie crains vous ennuyer par de plus longues*

longues responses, & que le temps nous manque.

Il faut donc bien retenir qu'il n'y a point de diuers chemins dans ce monde sensible pour paruenir au Ciel, si ce n'est que vous l'entendiez des diuers ordres, qui embellissent l'Eglise de Dieu; mais tous les Ordres des Religieux Catholiques, qui ont esté, sont, & seront, n'ont qu'une mesme foy, & vn mesme Dieu, bien qu'ils portent diuers habits, & ayent quelques particulieres façons, & ceremonies, desquelles ils vsent en seruant Dieu; mais pour ce qui est du fond, ils cheminent par la mesme voye de l'Euangile, par laquelle vont tous les autres Chrestiens.

Certainement nous pouuons dire que la loy de Dieu n'est pas de *ce monde sensible*, suiuaunt ce mot,

*s. Jean,
chap. 1.*

mundus eum non cognouit, car comme elle ne suit pas le contentement des sens, mais celuy de l'esprit, elle doit plustost estre appelée intellectuelle, & diuine, que sensible. Que vostre rimeur se pourmene donc tant qu'il voudra par les loix de son *monde sensible*, car pour nous autres Catholiques nous auons beaucoup plus de soing de suiure les rayons, & les attraits spirituels du monde Archetype, que les appas sensuels de ce monde corporel.

L E D E I S T E.

XLVI.

Ce que nous appellons distinction, est dit deception en bonne Logique, parce que le mesme effect qui est loüable en Dieu, peut estre iniqué en nous.

XLVII.

Car si les causes produisent des effects dif-

ferents, il faut en fuir l'identité, afin que l'injustice consequence soit preuenue.

Par consequent les differents effects condamnés dans leur cause prochaine, seruent au bien de l'Vniuers selon la volonté de Dieu. XLVIII.

LE THEOL. Il semble que vostre Poëte ne butte à autre chose par ces trois quatrains, qu'à nous vouloir persuader que ce que nous appellons mal, & peché, n'est pas vice simplement parlant, mais au plus, & au pis aller, seulement entant qu'il est mal en nous, & non en Dieu; comme lors qu'un voleur tue le marchand, il veut, ce me semble, dire que Dieu le tue aussi, sans neantmoins encourir aucun peché.

Or en ce sens il est vray que Dieu peut vouloir, & faire plusieurs choses, sans aucun peché, ce

*Pourquoy
Dieu peut
faire sans
peché ce
que nous
ne scau-
rions fai-
re sans
l'offen-
ser.*

que nous ne scaurions n'y faire, n'y vouloir sans l'offenser; le mesme arriue souuent parmy nous, car vn pere, ou vn maistre peut donner dix, ou vingt escus de son bien, & peut iustement punir son enfant, & son seruiteur, sans aucun peché, voire avec merite; ou le fils, & le seruiteur ne peuuent donner vn denier de ce bien, ou frapper aucun sans offenser Dieu: la raison de cecy est bien claire, car le pere, & le maistre ont puissance de distribuer leur bien, & en faire ce qu'il leur plaist, & de chastier leurs enfans, & leurs sujets, lesquels n'ont point ce pouuoir les vns sur les autres, si ce n'est que le pere, ou le maistre le leur donne.

Dieu a bien vne puissance plus absoluë de faire ce qu'il luy plaist de toutes les creatures, que n'a pas

le pere sur son enfant, ou le Roy sur son sujet; il a le pouuoir de nous mettre tous à mort, & de destruire tout ce qui est au monde sans estre suiet à aucune reprehension; & neantmoins ie croy qu'il n'y a Atheiste, ny Deiste qui voulust aduoüer qu'il fust permis à quelqu'un de tuer tous ceux qu'il voudroit, & qui ne iugeast digne de mort celuy, qui auroit entrepris de faire vne quantité de meurtres; si bien qu'il faut regarder quel est celuy qui opere, auant que iuger de son action, afin que si il a droit de faire ce qu'il entreprend, on croye, que son action est bonne, ou du moins qu'elle est permise; ou mauuaise, & illicite, si il n'a droit, & pouuoir de faire ce dont il est question.

Voyla donc comme vn mesme

effect peut estre bon estant produit par la vertu diuine, lequel seroit mauuais executé par vn homme, d'autant que Dieu a le souuerain domaine sur toutes choses, de sorte qu'il ne peut abuser d'aucune, quand mesme il reduiroit tout à neant; or puis qu'il à ce pouuoir souuerain sur tout ce qui est, qui vit, & qui respire, il peut nous obliger à tout ce qu'il voudra sous quelque peine qu'il lui plaira, sans que nous puissions treuuer suiect, ou couleur d'aucune iuste plainte, ou d'aucun murmure.

Responce
au 47,
et 48
quatrain.

Pour le quatrain 47 il ne dit presque que la mesme chanson, non plus que le 48; car on fuit l'indentité de l'effet quant à ce qui est de la moralité, & de la bonté, ou malice, du merite, ou, du demerite, lors que c'est Dieu qui opere cōme mai-

stre de toute la nature ; & par ainsi nous euitons la mauuaise consequence, que feroit celuy qui diroit que Dieu feroit mal en faisant ce qu'il nous defend, comme quand il feroit mourir qu'iqu'un, ce qui ne nous est pas permis, si ce n'est que Dieu nous le commandast.

Or si vostre Poëte se formalise de ce que Dieu peut faire, & vouloir tres-iustement, ce qu'il nous defend, & ce qu'il ne veut pas que nous fassions; ie veux qu'il m'aduouë que son seruiteur (s'il en a) peut prendre l'argent de son cabinet, & en aller iouer, ou faire bonne chere tant qu'il luy plaira; ie veux qu'il concède que son seruiteur luy peut bailler vn bon soufflet, ou vne couple de bastonnades, lors qu'il fera quelque chose, qui deplaira audit seruiteur:

bref si le seruiteur se rend maistre de la maison, & qu'il mette son maistre en estat de seruiteur, le maistre deuenu seruiteur ne doit pas se plaindre, si le valet ne fait point mal d'asservir son maistre; si l'on treuve ceste propositiō ridicule, & temeraire, comme elle est, qu'il croye que celle à laquelle il semble viser, l'est infiniment dauantage, puis que Dieu est infiniment plus grand maistre sur tout le monde, que n'est aucun Roy, Prince, ou Empereur sur ses esclaves, & ses seruiteurs.

Delà s'ensuit que le 48 quatrain ne conclud rien que ce que tous les Chrestiens aduoient, & enseignent, sçauoir est que la prouidence de Dieu est si admirable, qu'elle sçait tirer du bien pour l'ornement de l'Vniuers, & pour la gloire

des bien-heureux des plus grands maux que la malice de l'homme puisse inuenter, concevoir, & produire.

LE D. Monsieur, vous m'avez fort satisfait sur ces derniers quatrains, car il est veritable, que le maistre, & par cōsequent que Dieu peut faire beaucoup de choses iustement, que le seruiteur ne sçauroit faire, ou vouloir qu'auec iniustice, neantmoins ie vous diray la consequence que ce Poëte tiroit de ces quatrains, lequel m'a merueilleusement abusé, afin que beaucoup d'autres se rendent sages à mon exemple.

LE DEISTE.

De toutes ces raisons il conclud qu'il n'y a point d'enfer, ny aucun chastiment apres ceste vie, & que tout cela n'est que fantasie, & foiblesse d'esprit.

XLIX.

LE THEOL. Voila iustement ou ce malheureux desiroit vous faire tomber, car c'est là que buttent tous les quatrains que vous avez apportez, & particulièrement ceux qui suivent depuis le 28 iusques à ce 49, ou le maudit imposteur, & caio leur vomit son impieté. Or ie ne veux point d'autre arbitre que vous mesme pour iuger si ce quatrain a quelque raison; & si les principes desquels il le tire, ont quelque verité, ie m'asseure que vous confesserez ingenüment que ce ne sont que surprises, déguisemens, & mengeries, par lesquels les Libertins taschent détouffer la crainte de Dieu, & de ses iugemens, & bannir la pieté de l'esprit des Chrestiens.

Certainement si la peur de l'enfer, & les peines que les damnez, &

les diables endurent , n'estoient qu'une phantasie, & foiblesse d'esprit, il faudroit conclure que Dieu ne seroit qu'une resverie, & une illusion ; non que Dieu ne fust, bien qu'il n'y eust point d'enfer, car il ne dépend d'aucun estre, mais parce qu'il faudroit aduoüer qu'il seroit menteur, puis que c'est luy qui nous a reuelé ces peines eternelles, comme il se voit souvent dans l'Eseriture sainte.

Pour moy ie croy que cet homme a esté Calviniste, & que pour faire le bon valet, ne se contentant pas de nier le Purgatoire, il veut encore franchir l'enfer, à ce qu'il puisse commettre toutes sortes d'impietez sans nulle peur, & sans remords de conscience, car c'est là le desir de tous les Libertins. Le vous proteste que ie ne

Les Diables tombent en leur irreligion, après avoir trempé dans l'heresie.

ſçay comment ils ſont ſi effrontez que de confeſſer qu'il y a vn Dieu, veu qu'ils luy oſtent la prouidence, & le ſoing qu'il a que le mal ſoit puny, & le bien recompensé; & croy qu'ils ne parlent de Dieu que du bout des levres, le niant ce pendant en leur eſprit; pires en cela que les diables, leſquels ſçachans qu'il y a vn vray Dieu, le craignent, & le redoutent, & malgré qu'ils en ayent, confeſſent cela haut, & clair, comme vous pouuez voir dans l'Eſcriture ſaincte.

Or ſus, Monſieur, quittez donc cet erreur, & croyez aſſeurément que c'eſt vne foibleſſe d'eſprit, & vne imagination tres-fauſſe de croire que les meſchans ne feront pas ſuppliciés, & tourmentez apres cette vie; car ſi vn iuge ne laiſſe point les forfaits impunis, ſ'il eſt

iuste, Dieu qui est le Iuge des iuges, & qui penetre iusques au plus secret de nos pensees, laissera-il regner les meschans, qui font, & roullent tant d'iniquitez dans leur esprit, sans leur donner aucun chastiment?

Et quoy, pesse-mellera il les bons avec les mauuais, & la pieté avec la perfidie? Sera-ce donc ainsi que les bons seront foulez, ruinez de biens, & d'honneur, meurtris, tuez, & assassinez sans aucun répit, & sans esperance de voir vn iour leur innocence declaree, leur bonté, & leur cause iustifiee, & leur esperance comblee de recompense, & de s'eslouyr avec leur iuste Iuge nostre Dieu, nostre Sauueur, & Redempteur Iesus-Christ, en la decouverte de toutes les impietez les plus couuertes, & cachees des

542 *Impietè des Deistes,*
traistres, & perfides, des flateurs,
menteurs, pariures, impudiques, &
autres meschans, qui se sont mo-
quez de Dieu, & de la religion?

Viue Dieu il ne sera pas ainsi
que le malheureux Deïste se l'est
imaginé, car au grand iour du iu-
gement les iustes, & les gens de
bien se leueront contre les mes-
chans, de qui ils recoiuent tant
d'afflictions, & de desplaisirs en ce
monde; & pour lors ces perfides
verront la verité de ce que nous
croyons maintenant, & que nous
lisons dás la parole de Dieu. *Viden-*
tes turbabuntur timore horribili, & mi-
rabuntur in subitatione insperata salu-
tis, dicentes intra se, & præ angustia spi-
ritus gementes: Hi sunt quos aliquando
habuimus in derisum, & in similitudi-
nem improprij. Nos insensati vitam il-
lorum aestimabamus insaniam & finem

En la Sa-
pient. ch.
5.

illorum sine honore: ecce quando computati sunt inter filios Dei, & inter sanctos fors illorum est. Ergo errauimus à via veritatis, & iustitia lumen non luxit nobis. Voyla les paroles des meschans, qui pensoient avec vostre Poëte, que ce fussent fables que la gloire des bien-heureux, & le supplice des damnez. Pleust à Dieu que ce passage fust leu des libertins avec attention, lequel ils trouueront plus au long au 5 chapitre de la Sapience, ie croy que leurs frenetiques opinions seroient bien eschauffees, si ceste pensee, & ce chapitre ne les refroidissoit.

Il faut donc croire tres-as-seurement que Dieu ne laissera iamais aucune meschanceté impunie soit icy, soit apres la mort, c'est pourquoy vous voyez que les grands

Saincts, & les plus sçauans, qui furent iamais dás l'Eglise Catholique, demandent à Dieu qu'il les chastie en ce monde, afin d'euites les effroyables supplices de l'enfer; c'est ainsi que saint Augustin le disoit avec ardeur, *Domine híc ure, híc seca, vt in æternũ parcas*: car ne plus ne moins qu'il y a plus de plaisir mille fois en Paradis, qu'il n'y a és plus grands plaisirs de ce monde *melior est dies vna in atrijs tuis super millia*, aussi y a-il des peines. pour les damnez plus grandes mille fois, que tous les tourmens que nous voyons icy bas.

LE D. Monsieur, ie ne sçauois vous exprimer la ioye, que i'ay d'auoir esté si bien esclarcy de vous sur toutes ces impietez, mais le regret que i'ay d'auoir trempé en ceste impieté, depuis que ce traistre
me

me bailla ce poëme, & me caiola par diuerſes rencontres, n'est pas moins grand; ie voudrois qu'il m'eust couſté la moitié de mon ſang, & que iamais ie ne l'eusse veu. Je vous proteſte que ſi iamais ie retourne à Paris, ie feray tout ce qu'il me ſera poſſible pour le faire prendre, & le faire mourir, ſ'il ne veut quitter ſon erreur, ce que ie crains qu'il ne faſſe, car il eſt merueilleuſement teſtu, & opiniaſtre, & croit ſçauoir beaucoup ſous pretexte qu'il ſçait vn peu rimail-ler, & diſcourir. Je ne ſçay ſi ie dois pourſuiure dauantage, car le reſte eſt encore fort long, & ne contient quaſi autre choſe que ce que nous auons dit, & neantmoins il reſte encore 58 quatrains.

LE THEOL. Je vous aſſeure
que ie ſuis ſi ennuyé de reſpondre

M m

aux refueries de ce Poëte, qu'il m'e
deplait de pourfuiure dauantage,
& puis ie voy qu'il est temps que
nous pensions à nostre giste, car si
nous attendons plus long-temps,
ie crains les voleurs, qui ont cou-
stume de courir vers ces lieux icy;
neantmoins si vous pensez qu'il y
ait quelque chose en ce qui suit,
qui vous fasse de la peine, j'auray
la patience de vous escouter, de
vous respondre, & de fortifier vo-
stre esprit contre les sottises de ce
baueur.

LE D. Veritablement ie serois
tres aise qu'il vous pleust réuerfer
ce qui suit, car bien que ie ne sois
que trop satisfait de ce que vous
m'avez dit iusques à present, cela
me seruiroit pour tascher à reduire
quelques vns de mes camarades à
la Religion Catholique.

LE THEOL. Pourſuiuez donc,
& ie reſponderay à ce que vous me
propoferez, car bien que vous ne
ſembliez plus douter d'aucune
choſe, neantmoins cela ſeruira
pour vous confirmer de plus en
plus dans la créance de l'Eglife Ca-
tholique, & vous fera voir que
nous ne craignons rien les poin-
ctes de l'impieté de voſtre Poète,
bien qu'il les croye fort acérées.

LE DEISTE.

*Le Bigot ſuit la religion qu'il a ſuccee à la
mammelle.*

L.

*Et le vulgaire ignorant croit que ce que ſes
deuanciers luy ont dit, aoir eſté receu de Dieu.*

Ll.

LE THEOL. A ce que ie voy vo-
ſtre Poète prend le Bigot pour tou-
tes ſortes de perſonnes, qui ſui-

uent (lors qu'ils sont grands) la religion que leur pere, leur mere, & leur nourrice, leurs ont fait succer avec le laiçt: en cette façon il le faudra dire *Bigot*, s'il a rencontré vne si malheureuse mere, qui luy ait appris ce Deisme dès la mammelle: mais afin d'euter toutes sortes d'illusions sur ce mot, ie confesse que nous sucçons la religion dès nos premieres anneés, voire mesme nous l'auons empreinte auant la mammelle, lors que nous sommes baptisez, & consacrez au nom du Pere, du Fils, & du saint Esprit; mais c'est parler avec vne impieté intolerable que d'appeller cela *Bigotisme*.

Or bien qu'il soit vray que nous soyons Chrestiens par le Baptisme auant que de le sçauoir, ou de cōsentir à nostre salut, & à la vraye

religion nous ne naissons pourtāt pas Chrestieñs, mais enfans sans aucune teinture de religion soit virtuelle, soit habituelle, destituez de toutes sortes de graces gratifiātes, estant vn grand benefice, & vne signalee faueur de Dieu, quand nous receuons ce grand Sacrement, lequel est cōme la clef, & la porte de tous les autres, & qui nous laue, & nettoye l'ame de toutes sortes de pechez. C'est pourquoy nous deuons rendre graces à Dieu tous les iours de nostre vie, de ce qu'il nous a deliurez de la masse de perdition, dans laquelle nous estions enfermez par le peché originel, & detester l'ingratitude, & l'impudence de vostre Poëte, & de tous ces semblables, lesquels veulent qu'on croye qu'ils ont d'excellents esprits, lors

Dequoy
il faut
rendre
graces à
Dieu.

qu'ils reniét leur religion, & appellent toute sorte de pieté, & de vertu, imagination, foiblesse d'esprit, & folie, & neantmoins c'est lors qu'ils sont le plus abbrutis, se rauallans avec les bestes, qui n'ont aucun sentiment de pieté, ny de religion.

Il faut donc recognoistre la grace que Dieu nous donne, quand il nous fait naistre dās vn pays Chretien, & de parens Catholiques; ce que nous pouuons appeller vn commencement, ou plustost vn des premiers effects de la predestination, car nous pouuons vrayement dire que *non fecit taliter omninationi*, comme il paroist és infidelles. Pour les heritiques, ie pense que plusieurs d'entr'eux reçoient le Baptisme dès leur ieunesse, mais au lieu de cooperer avec la grace

Baptismale, quand ils sont grands, ils quittent le grand chemin de l'Eglise Catholique, & embrassent diuerses chimeres selon qu'ils sont instruits par diuers Huguenots; car si c'est vn Lutherien, il apprendra le Lutheranisme à ses enfans, & à ses disciples; si c'est vn Anabaptiste, ou vn Calviniste; chacun luy fera entrer l'impieté dans l'ame, & en bannira la foy receuë par le Baptisme. Je ne suis pas icy maintenant pour resoudre comment ces ieunes Heretiques sont excusables, & comment, ou quand ils sont inexcusables deuant Dieu, car vous ne m'interrogez pas de cela, c'est assez que nous ayons decouvert l'effrontee ingratitude du 50 quatrain de vostre Poëte.

Le 51 est encore plus impie, car il essaye de persuader que nos de-

*Responſe
au 51 qua-
train.*

uanciers nous ont fait à croire que ce qu'ils racontotent de la religion, & de Dieu estoit vray, bien que le tout ne fust qu'une pure invention de leur imagination pour passer le temps, & pour amuser les petits enfans: assurement voila la conception du rimailleur; il est fort facile de parler comme un perroquet, mais de prouver son impieté, il est impossible.

Or afin de sçavoir ce qu'il faut croire, remarquez avec moy qu'il se peut faire que quelque vieille, ou quelque autre personne se mette de faire plusieurs contes aussi bien de la religion que d'autres choses, tels qu'on en voit dans l'Alcoran, & chez quelques Rabins: en ceste façon on pourroit bien faire à croire à de petits enfans, voire mesme à de grands, que Dieu

auroit fait, ou reuelé quelque chose, laquelle neantmoins seroit fausse; il n'y a que trop de fols, & d'hypocondriaques dans le monde pour s'en imaginer des plus belles, lesquels croyent estre Roys, Papes, & Dieux; mais ce n'est pas de ces fourbes, ny de ces contes que vostre Poëte veut parler, c'est de la vraye creance approuuée, & receuë non seulement des enfans & de la populace, non seulement des idiots, & des foibles d'esprit, mais des plus vieux, des plus riches, des plus doctes, & des plus iudicieux, qui furent iamais au monde, lesquels ont receu la religion Chrestienne nō pas à la legere, nō pas induits par presens, & par faueurs, nō plus que par force, ou par illusion, mais poussez à cela par de viues raisons, auxquelles on ne sçauoit

*Qu'on ne
peut a-
voir esté
abusé en
ce qui
est de
la creance
de la
vraye re-
ligion.*

treuverà redire, & par de si grands prodiges, & miracles, qu'il est impossible qu'ils ayent esté faits, que par la premiere cause de l'Vniuers, laquelle a tousiours tesmoigné tant en la loy de nature, & la loy escrite, qu'en celle de la grace, que la vraye religion luy estoit fort agreable.

Iamais il ne fut, & iamais ne sera, que Dieu n'approuue la vertu, & qu'il ne luy fauorise; non plus qu'il ne se peut faire, qu'il fauorise le peché. Or pour acheuer ce quatrain, ie dy que si quelques-vns auoient esté abusez en la creance dès leur ieunesse (côme il arriue à tous les infideles, & aux heretiques) s'ils viuoient selon la lumiere, que Dieu a imprimee dans leur esprit, & qu'ils suiussent les bons mouuemens, qu'il leur enuoye,

fans doute Dieu leur feroit faire rencontre de quelques vns, qui les desabuseroient, & leur enseigneroient la vraye, la pure, & la sincere doctrine de l'Eglise Catholique, qui n'est qu'une, en quelque part qu'elle soit estenduë; & par ainsi les erreurs, qu'ils auroient succez en leur bas aage, ne nuiroient pas à leur salut.

Je ne doute point que Dieu n'enuoye plusieurs lumieres, & diuers mouuemens à tous les Heretiques, lors qu'ils sont en aage de recognoistre le vray d'auec le faux, & ce plus souuent, & plus viuement que non pas à ceux qui ne sont point baptisez, la grace du Baptisme requerant vn particulier secours de Dieu pour operer; Je desirerois fort que tous les Heretiques paruenus à l'vsage de rai-

son s'esprouuassent eux-mesmes,
& fissent reflexion sur ce temps,
afin de voir si Dieu ne les auroit
point touchez, & fait douter, si
nostre creance n'estoit point meil-
leure que la leur ; si leurs parés, ou
leurs precepteurs, & ministres ne
les auroient point trompez ou par
malice, & *ce pour le bien de la cause,*
comme ils parlent, ou par igno-
rance. Le me tromperois fort, si ces
atteintes, ou semblables pensees
ne leur auoient frappé l'esprit, &
qu'ayans fait la sourde oreille, &
suffoqué ceste bonne semence en
qualité de grace preuenante, cela
n'auoit esté cause que Dieu les au-
roit abandonnez à leurs imagina-
tions, iusques à deuenir Deïstes, &
Athees, comme vostre Poëte fait
assez paroistre.

Or nous sommes si certains que

nos deuanciers ne nous ont pas trompez, ny fait croire à fausses enseignes que Dieu auoit reuelé ce qui est contenu dans la sainte Bible, & que la doctrine de l'Eglise est tres-veritable, que nous pouuons hardiment chanter avec le Prophete Royal. *Testimonia tua credibilia facta sunt nimis*, & dire des Apostres, desquels nous suyons la doctrine, *Nimis confortatus est principatus eorum*, car tant de merueilles ce sont faites en tesmoignage de ceste verité, que quand ie les considere serieusement, il me semble qu'il est impossible d'en douter.

LE D. Monsieur, ie vous proteste que vous me raiussez, & me tirez les larmes de ioye, de voir que la religion Catholique, que i'auois eüe en horreur, & que i'embrasse maintenant de tout mon

cœur, est si vraye, si claire, si sainte, & si admirable : neantmoins i'acheueray d'apporter les quatrains, qui suiuent, puis que vous vous estes engagé de respondre iusques à la fin, & tout incontinent que ce sera fait, nous prendrons giste, car ie voy defia la fumee de nostre hostellerie ; voicy donc ce qui suit en vers,

LE DEISTE.

- Vtile inuention pour brider les esprits*
- II. *Des hommes insolens qui peruers de nature
Mettent les Magistrats, & leurs loix à mespris
Pour viure à l'abandon sans regle, ny mesure.*
- IIII. *A quoy semblent aussi viscer finalement
Les merueilleux effects qu'on voit au monde
naistre
Dont les pipeniais ombragent finement
Leurs contes fabuleux pour les simples repaistre.*

LE THEOL. Pour moy ie croy

que vostre Poëte a ramassé toutes les impietez de Lucian , de Machiauel , & de tous les Libertins, & Atheistes qui furent iamais , & qu'il a souuent fueilleté le maudit libelle, dás lequel ie ne sçay quels esprits endiablez se sont efforcez de persuader que ce n'estoit qu'imposture que la loy diuine ; il semble que ce soit le dernier stratage-
me de sathá, qui tasche de nous arracher la religiõ de l'esprit, voyant qu'il ne peut venir à bout de se faire reconnoistre pour Dieu; ie croy que l'Antechrist se seruira de quelque pareille fourbe pour s'insinuer ; car puis qu'il voudra se faire reconnoistre pour Dieu, ou pour le vray Messie, il faudra par consequent qu'il fasse perdre la vraye religion à ses sectaires ; ce qu'il ne pourra faire plus puissamment,

*Ruse de
sathan.*

qu'en accusant nostre Sauueur d'imposture, c'est pourquoy il faut bien prendre garde aux impietez, que nos libertins veulent faire courir, & qui semblent estre les precurseurs de l'Antechrist, lequel adiousterá des signes, & des prodiges si grands pour enyurer les hommes de son erreur que si Dieu tout puissant n'y mettoit la main, & que permettant à cet inique d'establiir si puissamment son impieté, il ne secouroit les fideles d'une particuliere assistance, à peine se pourroit-il treuuer aucun qu'il n'abusast.

Or que la religion Chrestienne ne soit pas vne inuention pour brider les insolens (bien qu'elle serue grandement à cela, à raison de sa pureté, & de sa saincteté) il est euident, en ce que les Princes, les
Roys,

Roy, les Empereurs, & les Legislaturs la croyent aussi bien emanee de la parole de Dieu, comme le simple peuple : & puis il y a beaucoup de choses dans la vraye religion, que les hommes ne sçau- roient auoir inuenté, & qu'il a fail- lu receuoir de Dieu, ce que vous recognoistrez facilement par la lecture des saincts liures, & de l'hi- stoire Ecclesiastique.

Mais sur tout ie voudrois que ce Poëte, & tous ses complices me montrassent comment c'est que les Legislaturs ont peu tous les grands miracles que nous li- sons dans la sainte Escriture pour confirmation de la religion ; s'ils nous monstroient que quelques autres magistrats, & Legislaturs eussent fait, ou fissent de sembla- bles miracles en nos temps pour

*Les mira-
cles res-
moins de
la vraye
religion.*

confirmation des loix , & des ordonnances qu'ils establissent tous les iours, ie les escouterois; mais ils parlent comme yurongnes sans sçauoir comment, ny pourquoy, ayans seulement ce dessein , & cette intention , de se dépestrer de toutes sortes de loix, de crainte, & de respect, afin de se veautrer dans toutes sortes de voluptez tant soient-elles vilaines , & de faire tout ce qu'il leur plaist impunément, & sans scrupule, ou remords de conscience.

L'estime neantmoins que fils considerent les miracles , qui se font encor tous les iours en témoignage de nostre religion és diuers lieux de deuotion , qui sont en France, en Espagne, & en Italie, & ce sans aucun fard , ou deception , (puis qu'on en voit le fidelle

rapport fait par les Medecins, & par vne armee de tesmoins oculaires) qu'ils reuiendront à leur bon sens, & confesseront qu'il est impossible que cette religion, pour la verité de laquelle se font tant de miracles, soit fausse, controuuee, ou inuentee par les hommes.

Si ie voulois rapporter tous les vrayz miracles que dieu a fait en faueur de la religion , il me faudroit du moins autant de volumes, comme il y a de siecles, depuis qu'elle est ; ie voudrois que vous vous fussiez treuue à celui qu'o m'a depuis peu rescrit estre arriué à la descente des Reliques de sainte Fare à Farmoutier , ie m'asseure que iamais vous ne croiriez rien plus ferment, que la verité des miracles , & par consequent que

*Grand
miracle
arriué
nouuelle-
ment,
d'une
Religieu-
se recou-
urant la
vue, &
qu'elle
auoit per-
due.*

la vraye religion, dans laquelle ils se font, en voicy l'abbregé. Y ayant desia long temps qu'une des Religieuses auoit perdu la veüe, iusques à là, qu'on luy auoit bruslé la prunelle avec eaux fortes, & caustiques, pour la faire mourir, de peur qu'elle ne gastast les parties voisines, estant prosternée dās l'Eglise, & priant instamment ladite sainte, à l'attouchement de son Reliquaire elle recouura la veüe, & les yeux, & commença soudain à s'escrier qu'elle voyoit, ce qui fut tellement admiré de tous ceux qui l'auoient cogneüe, qu'un chacun s'achemina pour voir cette merueille, car elle voit maintenant tres clair.

Les Medecins mesmes qui l'auoient veüe auégle dans Farmontier, ou qui luy auoient

brulé l'œil, se sont transportez sur le lieu pour estre tesmoins irrefragables de ce miracle, lesquels démentiront cet impudent Deiste, qui nous voudroit bien faire passer pour vne chose certaine que nous ne voyons pas ce que nous voyons, & que nous ignorons ce que nous sçauons tres-bien; & ce souz l'ombre d'un quatrain, dans lequel ce luy est assez pour toute raison d'appeller non seulement les Chrestiens, mais les Apostres, & Iesus-Christ mesme, des *pipenians*; blaspheme prodigieux qui ne se peut expier que par le feu, encore faudroit il qu'il fust eternal.

Or les vrayz Catholiques sont si esloignez de feindre des miracles, ou d'eluder par quelques finesses la creance d'aucun, tant ru-

*Sincerité
des Ca-
tholiques.*

Il faut, & simple soit-il, qu'ils ayme-
roient mieux mourir que de per-
suader la foy diuine sous pretexte
de quelque subtilité, la proposant
comme vray miracle : pour
mon particulier ie proteste au
nôm de tous les vrayes fidelles, que
nous endurerions plustost mille
tourmens, & mille roües, que
d'imposer la moindre chose à qui
que ce soit, bien que par là nous
pensassions sauuer tout le monde.

*J'ay traité
au lōg
ceste ma-
tiere dās
la respōce
à la 25.
obiection
des A-
thees ch.
42, page
642.*

La foy est genereuse, elle ne
veut pas estre plantee, ny prendre
vigueur par les ruses, & par les
subtilitez, elle veut vn esprit
ferme, vigoureux, genereux,
& resolu, qui ne se laisse point pi-
per à personne, & qui croye sim-
plement ce qu'il croit, non à cause
de quelque homme, ou de quel-

que raison, mais à cause de l'autorité diuine de celuy qui a fait le Ciel, & la terre : asseurez vous que ceux là se trompent fort, qui pensent qu'il faille auoir vn esprit raffiné, masle, & subtil pour ne croire point de religion, si ce n'est qu'ils estiment que les pecores ayent de fort beaux esprits, aussi subtils que la pointe d'une esguille; ie serois d'auis qu'on seruist telles gens de mesme viande que les pourceaux, & les autres bestes, puis qu'ils s'accordent si bien en religion, & en creance avec eux, car ils n'en ont les vns n'y les autres.

Il faut donc croire que les miracles qui ont seruy de motifs pour embrasser la religion Catholique, ont esté tres-veritables, & que ceux qui se sont conuertis à leur occasion, pour doctes & sub-

tils qu'ils ayent esté, n'ont peu y recognoistre aucun defaut; certainement la continuation des miracles qui se retreuue dans l'estenduë du Christianisme, est si asseuree, & si merueilleuse, qu'il faudroit estre priué du sens commun pour se desuoyer de ce grand chemin de la foy, qui a esté plantee par tant de miracles, par la sainteté de vie, & par le sang de tant, & tant de Martyrs.

Mais ie vous prie, pensons à nostre logis, & à soupper, & demain vous proposerez le reste de vos quatrains, si bon vous semble, auxquels i'acheueray de respondre, avec l'ayde de Dieu. Si vous desirez voir à vostre loisir quantité de raisons pour lesquelles les miracles, qui ont aydé à establir la vraye religion des Chrestiens,

n'ont peu estre faits par la nature,
ou par l'industrie des hommes, il
vous sera facile, car i'ay traité cela
fort amplement dans quarante &
six chapitres, par lesquels i'ay ren-
uerfé la vingt-cinquierme obie-
des Athees, laquelle ils pensoient
estre la plus forte.

Or auant que d'entrer dans
l'hostellerie, ie veux vous donner
des quatrains contraires aux deux
que vous auez rapportez, afin que
l'impieté ne puisse auoir le dessus
non plus en rimes qu'en prose.

*Si nostre foy n'estoit rien qu'une inuention
Vtile aux Magistrats pour retenir en bride
Ceux qui mépriseroient leur iurisdiction
Ils ne l'auroient choisie eux-mesmes pour leur
guide.*

*Verroit-on cōme on fait les Princes, & les Rois
Obliger à la foy leurs Sceptres, & Couronnes
Ou soumettre à l'Eglise, & à ses saintes loix
Auec si grand respect leurs Royales personnes ?*

Le Pape le vray chef de tous les vrais Chre-
stiens

Regle ses actions par la mesme creance,
Il y vit, il y meurt aussi bien que les siens;
La mort ne luy fait point changer de conscience.

Qui sont ceux que tu prens pour des pipeniais?
Iesus-Christ pouuoit-il à ton aduis tel estre?

Les Apostres ont-ils cheminé de biais?

Ayans suiuy de près les pistes de leur maistre.

Sont-ce ceux-là lesquels ont vſé finement
Des effects merueilleux qu'on voit au
monde naistre?

Voulans (comme tu dis calomnieusement)
De contes fabuleux les plus simples repaistre.

Helas si Iesus-Christ eust cherché ses plaisirs
S'il se fust efforcé de regner sur la terre,
Et si pour obtenir la fin de ses desirs
Ileust aux Empereurs, & aux Roys fait la guerre;

S'il n'eust finy sa vie en vn infame bois
Comme premier témoin des choses reuelees,
On eust peu soupçonner qu'il faisoit du matois,
Et que ses actions estoient dissimulees.

Si les Apostres, les SS. & les Martyrs seruens
Après diuers travaux, après diuerses peines,
De leur maistre Iesus les desseins poursuinans
N'eussent versé leur sang contenu dans leurs
Veines.

On eust dit qu'ils preschoient pour leur propre interest,

Pour l'amour seulement des choses temporelles;
Mais leur vie, & leur mort monstre que cela n'est,

Et qu'ils ne travailloient que pour les eternelles.

Ils vivoient pauvrement avec simplicité,
Méprisoient les honneurs de ce monde sensible,
Confessans Iesus-Christ, & sa diuinité,
Sans craindre la rigueur du tourment plus horrible.

Ces gens eussent-ils peu par des miracles faux
Piper le simple peuple, & des fables luy dire?

Puis souffrir en mourant mille penibles maux
Qu'ils pouuoient eiter n'ayans qu'à se dédire.

En voudrois-tu souffrir, pour ton Deïsme, autant?

Pourrois-tu l'ombrager d'une seule merueille?

Non; pourquoy vas-tu donc ces contes obiectant,
Puis que tu ne sçauois faire chose pareille.

CHAPITRE XX.

*Auquel est monstre que nos actions ne
suivent pas l'absolu vouloir de Dieu;
que Dieu ne reçoit pas de l'offense de
ce qu'il veut : que son essence n'est
point enrichie de nostre misere : que
nous ne croyons pas que Dieu soit agi-
té de vengeance ; & dans lequel les
quatrains du Deïste sont refutez de-
puis le cinquante-quatriesme iusques
au soixante-quatriesme.*

LE DEÏSTE.



ALLONS, Monsieur, il
est temps de partir ;
sus voicy le cinquante
quatriesme quatrain,
ie vous prie de m'esclarcir sur les

points, qui y seront deduits, afin que ie m'affermisse tousiours de plus en plus dans la vraye religion; voicy donc ce qui suit.

LE DEISTE.

Secondement, si les euenemens suiuent la LIV.
volonté de Dieu, il faut donc qu'on nous mon-
stre qu'il peut receuoir de l'offense de ce qu'il
veut.

Car se seroit le faire hypocrite & contraire LV.
à sa volonté, si on disoit qu'il determine en se-
cret, ce qu'il deffend par ses loix.

LE THEOL. Or sus parlons au
nō de Dieu, pour sa gloire, & pour
son honneur: il me souuient que
ce 54 quatrain prend vne des pro-
positions, que le Poëte traistre à
Dieu, & à la religion, auoit faite
dans le 30 quatrain, car la premie-
re estoit, que toutes nos actions

suiuent la cognoissance de Dieu: maintenant il poursuit supposant ceste seconde, sçauoir est que tout ce qui se fait, suit l'ordonnance, ou le vouloir absolu de Dieu. I'ay desja assez respondu à ce dilemme, car ne plus ne moins que les actions de Dieu ne suiuent pas sa science en qualité d'effect, de mesme nos actions ne la suiuent pas en ceste qualité; veu que si par hypothese impossible (qu'on fait souuent pour entendre plus formellement, & plus radicalement ce que l'on propose, & ce qu'on veut conclurre) Dieu n'auoit pas la cognoissance de nos actions, pourueu qu'au reste il se comportast comme auparauant, elles ne laisseroient pas de se faire comme maintenant, c'est pourquoy tout le discours, que ce Poëte a tissu ius-

*Que nos
actions ne
suiuent
pas l'ab-
solu vou-
loir de
Dieu.*

ques à présent, estant assis sur vne supposition, laquelle est fausse, il est necessaire que tout le discours s'en aille par terre, & soit de mesme qualité que son fondement.

Voyons maintenant la seconde partie, sur laquelle il fait rouler le reste de ses quatrains remplis d'impieté; il veut donc nous reietter sur l'absolu vouloir de Dieu, afin qu'il tasche de persuader que toutes nos actions dependent de ce vouloir absolu en qualité d'effect necessaire, ce qui est tres-faux, car bien que Dieu vueille, par exemple, que nous obseruions ses cōmandemens, que nous croyons en luy, & que nous aymions nostre prochain comme nous mesmes, neantmoins ce n'est pas vn effect, qui parte necessairement de sa volonté, non plus que de la

nostre, à laquelle il donne vne pleine liberté de faire, & de vouloir, ou de laisser, & de ne vouloir ce qu'il nous commande, sans toutefois qu'il soit en suspend de ce que nous ferons, car il cognoist tres-parfaitement toutes les determinations futures, & possibles de nos volontez aussi clairement comme il se cognoist soy-mesme.

Nous ne disons donc pas que tout euenement suiue l'absolu vouloir de Dieu, mais seulement le vouloir qu'il accommode au nostre, lors qu'il est question de nos actions libres; car pour les autres effects, qui dependent seulement de Dieu, comme le mouuement de la mer, & des cieux, il suit l'absolu vouloir de Dieu; mais nos actions de liberté vont plustost
avec

avec, qu'elles ne suivent apres : car Dieu ne commence pas plustost que l'homme, à faire vne action de liberté humaine ; non plus que l'homme ne commence pas plustost que Dieu, mais tous deux ils commencent ensemble, l'un déterminant l'action quand à l'espece, & l'autre quand à l'indiuidu.

D'où il s'ensuit que Dieu ne reçoit pas de l'offense de ce qu'il veut, au contraire il n'en reçoit que de ce qu'il hayt, & par conséquent que de ce qu'il ne veut pas ; qui est le peché, qu'il deffend expressément, & tesmoigne en mille lieux de l'Escripture sainte qu'il l'a en horreur, estant impossible qu'il l'ayme, car cela est contre son inclination naturelle, par laquelle il ayme toute sorte de bien, & hayt toute sorte de mal. C'est donc

*Dieu ne
reçoit pas
de l'offen-
se de ce
qu'il
veut.*

fort mal raisonné d'inferer au quatrain suiuant, que nous disions que Dieu determine en secret, & veut le contraire de ce qu'il nous commande; car comme il ne nous peut commander que le bien, & le bon, anssi ne peut-il se faire, qu'il vueille, & ayme le mal, qu'il nous defend.

Je pense que ce Poëte a estudié à l'escole de Calvin, & de ses sectateurs, & qu'il butte contr'eux en ce quatrain, car ils ont inuenté cette distinction de vouloir *arcané*, ou *secret* de Dieu, pour faire à croire aux ignorans, que Dieu veut aussi bien les pechez, que nous faisons, comme les bonnes œuures; d'où ils tirent meschamment cette impie consequence, que Dieu predestine aussi bien les damnez à estre damnez, que les saincts à estre

*Heresie de
Calvin.*

bien-heureux. Mais quittons ces perfides heretiques, qui ont esté, & sont encore tous les iours cause de ce que nous voyons tant d'Athees, & de Deistes, ie dy que cette consequence d'accuser Dieu d'hypocrisie, & d'antinomie en sa volonté, ne peut estre faite contre les Catholiques, lesquels tous seuls gardent la vraye religion, & accomplissent la volonté de Dieu, & qui preschent par tout le monde que Dieu n'a point de volonté secrète, par laquelle il vueille, ce qu'il nous deffend par ses loix, & soustiennent au peril de leur vie, & de leur sang que c'est vne heresie de dire, ou de croire cela.

Renuoyons donc ce rimailleur à l'escole de Calvin, afin qu'il dispute contre son maistre, & voye ce qu'il respondera suiuant cette pro-

580 *Impieté des Deïstes,*
fane, & maudite doctrine: pour-
suiuez ces malheureux quatrains,
afin que nous preparions vn me-
dicament à vos playes pris du
mesme scorpion, qui vous a pi-
qué si fort.

LE DEISTE.

*LVI. C'est vne grande impieté de vouloir que
Dieu punisse ceux s'niuent sa Volonté, afin
qu'il monstre sa iustice.*

*LVII. Dieu ne sçauroit condamner ceux qu'il con-
duit en tous leurs mouuemens, autrement il se-
roit iniuste, & malicieux.*

LE THEOL. Vous voyez mani-
festement que ce Poëte Caluino-
deïste pourluit son impieté selon
les fondemens qu'il a iettez, si
bien que c'est assez de nier toutes
ces consequences, car le Catholi-
que, qu'il appelle Bigot, croit, &

proteste que Dieu ne punira jamais personne de tous ceux qui suiuent sa volonté, & que tous ceux qui la suiuent, seront recompensez de la gloire eternelle, & que ceux qui transgressent ses commandemens, seront punis d'une peine infinie.

Voila comme Dieu ne condamne personne de ceux qui se laissent doucement conduire par luy en tous leurs mouuemens, auxquels il donne de si grands contentemens dès ce monde icy, que la langue n'est pas capable de les exprimer. Ils sont donc bien loing de concevoir quelque iniustice en Dieu, lequel est souverainement iuste, & bon : par où vous voyez quelles sortes consequences attire apres soy l'erreur que vostre Poëte s'est imaginé au com-

mencement ; c'est pourquoy ie pense qu'il n'est pas besoin de discourir dauantage sur ce sujet, car c'est assez que vous detestiez deormais cet erreur, & que vous vous mocquiez d'une fuite si niaise: poursuiuez.

LE DEISTE.

LVIII. Dieu pourroit-il exalter sa iustice, & enrichir son essence de nos maux, & de nostre misere? est-ce pas le pis qu'on puisse faire que de luy adapter l'office de bourreau enuers nous.

LIX. Vaudroit-il pas mieux nier Dieu que de croire qu'il tire de l'heur, & prend plaisir à nous punir d'une peine immortelle.

LE THEOL. Voila vne plaissante cajollement de vouloir conclurre par forme de question, & d'interrogation, que Dieu a besoin de nos maux pour accroistre sa justice, &

pour enrichir son essence de nos malheurs : croyez que cet homme a grand besoin d'Ellebore ; ie vous donne à penser si la justice de Dieu, laquelle est vn attribut infiny, dépend de l'homme , & de ses actions, & si sa justice, ou son essence , qui sont infiniment immuables, se peuuent accroistre. Non, non, que vostre rimeur ne se perde point en ces caprices ; la justice, & l'essence de Dieu n'en seroient pas moindres, quand il n'y auroit ny pecheur, ny peché, ny aucune chose au monde ; ce qui luy appartient est eternal, & independant. Mais puis que tout ce qu'il fait, est bon, & qu'il veut que tout ce qui est icy bas, se fasse en nombre, en poids, & en mesure, lors que quelqu'un a quitté l'ordre que Dieu auoit estably, & commandé, il tire

le bien de ce mal, reduisant le méchant en l'ordre, non de la récompense, & de la grace, mais de la peine, à laquelle il le destine, après qu'il a offensé : laquelle il luy fait souffrir en ce monde icy, ou en l'autre.

Mais j'entends le Deiste qui dit qu'il ne faut pas faire Dieu bourreau ; il faudroit que le bourreau fust rentrer cette parole impie dans la gorge de cet auorton, puis qu'il a parlé de Dieu si indignement, lequel a des bourreaux par tout pour executer les supplices ordonnez sur les pecheurs, sans qu'il soit necessaire de luy donner cette qualité : bien que parlant avec plus de reuerence, & de respect, nous puissions dire que Dieu est le luge criminel, qui decrete en dernier ressort la peine deüe à nos

demerites, & à nos offenses? & bien qu'il ne se seruiſt d'aucun diable, ou d'aucune autre creature pour nous chaſtier, mais que luy-meſme nous affligeaſt ſelon nos demerites, il n'y auroit nul ſujet raifonnable de ſ'en plaindre, car il a droict de ce faire, puis qu'il eſt le ſouuerain Iuge independant, qui ne doit rendre conte à perſonne de ſes actions, ou de ſes conſeils: par conſequent on pourroit bien faire pis que de dire que c'eſt luy qui chaſtie, qui condamne, & qui punit les meſchans, puis que cela ne met aucune imperfection en Dieu, au contraire cela nous monſtre combien il a le peché en horreur, puis qu'il le punit ſi ſeuere-ment.

Le quatrain ſuiuant ſuppoſe auſſi vne choſe tres-fauſſe, car

Dieu ne tire, ny ne peut tirer aucun heur du supplice des meschans, non plus que de la recompense des bons, estant nécessairement heureux de soy-mesme, & par soy-mesme. & bien qu'il chastie les meschans, & qu'il recompense les bons, ce n'est pas pour en tirer vne nouvelle felicité, ou vn contentement particulier, mais c'est afin que le vice, & la vertu soient estimez tels qu'ils sont, & que ses attributs nous paroissent en leur grandeur; c'est donc pour nostre instruction, & pour nostre contentement qu'il fait tout cela, & non pour le sien; c'est afin qu'il n'y ait rien au monde en desordre, & à ce que tout le monde en son tout, & en ses parties responde, & ressemble en quelque façon à son prototype, qui est Dieu: par où vous

voyez que ce quatrain est plein
d'impostures : poursuiuez mainte-
nant.

LE DEISTE.

Le Bigot aymeroit mieux estre nié des siens LX.
par leur ingratitude, que d'en estre aduoué fu-
rieux, cruel, impitoyable, & plein de trouble,

Si Dieu est exempt de passion, comme LXI.
croient tous les bons esprits, n'est-ce pas estre
ignorant, & superstitieux, de penser qu'il soit
agité de colere, & de vengeance.

LE THEOL. Ce 60 quatrain sup-
pose que nous depeignons Dieu
furieux, cruel, & plein de trouble,
ce qui est aussi faux, comme qui di-
roit que le blanc est noir, ou que
le Ciel n'est pas le Ciel; ie m'eston-
ne de l'impudence de ce Poëte, il
faut qu'il ait l'esprit forcené, &
furieux pour deduire des supposi-

tions si furieuses : croyez donc fermement que les Catholiques n'ont jamais dit, ou pensé que Dieu fust sujet à ces inquietudes, & perturbations d'esprit, qui nous rendent farouches, & cruels ; mais ils croient, & preschent qu'il ne peut y avoir aucune passion en Dieu, étant exempt de toute sorte de changemens, d'alterations, & de vicissitudes. Et luy-mesme recognoissant cette verité, & comme forcé par la raison naturelle confesse, ou du moins presuppose au soixante-vniesme quatrain, que Dieu est éloigné de toute sorte de passion, afin qu'il tire cette consequence, que le Bigot est ignorant, & superstitieux, lequel croit que Dieu est agité de colere.

Vrayement s'il y avoit quelque Bigot au monde, qui tint les sottes

propositions, qu'il veut que les Catholiques tiennent, celuy-là ne seroit pas seulement superstitieux, & ignorant, mais Atheiste, car il feroit vn Dieu sujet à changement, & par consequent qui ne seroit pas Dieu, puis que Dieu est vn estre immuable, *apud quem non est transmutatio, nec vicissitudinis obumbratio*. Tenez donc pour assuré, Monsieur, que c'est vne pure imposture de dire que les Catholiques croient Dieu agité de quelque passion; car cela est impossible, autrement Dieu ne seroit pas Dieu.

Que si la sainte Esriture le décrit quelquefois tout en colere, & armé de vengeance, c'est pour nous faire paroistre ses effects, lesquels se changent de moment en moment, mais Dieu ne se change,

ny ne s'altere point ; Or comme nous n'arriuons point à la cognoissance des attributs diuins que par les diuers effets, qui paroissent icy bas, la saincte Escriture a coustume de nous parler de dieu selon nostre portee, bien qu'elle ait diuerses sortes d'explications, & de gousts pour la diuersité de ceux qui la lisent, & qui la meditent.

Mais renuerfons le quatrain, & disons que ce deiste est sot, ignorant, & superstitieux, si outre son ignorance, il a eu si grande crainte, & scrupule iusques à present qu'il n'ait osé voir quelque sçauant Catholique, afin de se faire instruire de nostre creance sur l'immutabilité de dieu : auoit-il point peur que s'il eust fait cela, le Catholique luy eust fait quitter sa religion pretenduë de Caluini-

ste, ou de Deïste ? Sus, sus, qu'il s'adresse deormais à quelque duple, qui n'ait pas vn carrat de ceruelle, s'il veut persuader ses impostures; poursuïuez s'il vous plaist, afin de voir s'il n'a rien de meilleur que cela.

LE DEÏSTE.

Si vous dites que Dieu est furieux, quand on n'observe pas les commandemens de Moïse, vous le faites malheureux, puis que les hommes les violent sans cesse. LXII.

Mais s'il n'est iamais en colere, & si la beste communique à nos maux, le superstitieux est-il pas insensé de flatter sa volonté d'un châtiment inique? LXIII.

LE THEOL. Nenny, il ne faut pas le croire furieux, quand on n'accompliroit iamais aucune loy, soit de Moïse, soit de Dieu, soit de

nature, puis qu'il n'est point susceptible de passion, si bien que c'est folie de s'imaginer que Dieu puisse estre malheureux. Mais voicy le refrain de la cadence du Deïste, lequel apres avoir pris la vraye superstition estant bien entendue, (car Dieu n'a iamais aucune passion de colere, estant vne repugnance manifeste, que de se l'imaginer passionné) il prend vne autre supposition dans le mesme soixante-troisième quatrain, qui est tres-fausse, car la beste ne communique point aux maux, pour lesquels Dieu nous punit, puis que le chastiment n'est que pour les actions morales, auxquelles nous dénions la fin, ou les circonstances, qu'elles deuroient avoir, desquelles la beste n'est pas capable; & neantmoins si ce Poëte Huguenot

not n'entend les maux qui nous font libres, & qui nous rendent coupables, il ne conclud rien, parce que les maux de peine, & les maux purement naturels, & necessaires ne nous mettent point en la disgrâce de Dieu, & ne meritent aucun chastiment.

Est-il pas trop effronté lors qu'il conclud cette derniere rime, disant que le superstitieux flatte la volonté de Dieu d'un chastiment inique? comme si nous croyions que Dieu peut estre flatté, & qu'on luy en puisse faire à croire. Le Catholique ne flatte ny Dieu, ny soy-mesme d'aucun chastiment, mais il croit assurement que la justice sera faite des meschans, des Deistes, & des Athees, tel qu'est ce Poëte: & que le chastiment n'est pas inique, mais plein de justice, &

594 *Impieté des Deïstes,*
d'équité, & est plustost moindre,
que trop grand. Je pense que cela
est assez clair, c'est pourquoy vous
pouvez passer outre.

CHAPITRE XXI.

*Dans lequel les raisons pretenduës des
Deïstes sont renuersees, depuis le soi-
xante-quatriesme quatrain iusques
au septante deuxiesme; & où il est
monstré que Dieu est exempt de co-
lere, quand il punit les meschans: que
le pechè merite un supplice eternal, &
que Dieu use d'une plus grande dou-
ceur enuers nous que nous ne faisons
enuers nos semblables, &c.*

LE DEÏSTE.

*LXIV. Il ne sert rien de dire que ces attributs ne
sont enoncez de Dieu que pour figurer nos cri-*

mes, & que par iceux on entend quelques vertus infinies en exprimant leurs effects.

Car puis que ces effects se rapportent necessairement à leur cause, Dieu est sujet à perturbation, ou cette doctrine est vne fable.

LXV.

LE THEOLOGIEN.

VOIC le Deiste, qui veut faire le Docteur en Theologie, prenant ce luy semble la solution qu'on apporte pour expliquer ce qui se dit de la colere de Dieu; voyons vn peu s'il y entend finesse. Il nie premierement que les Catholiques gazouillent ce qu'il aduance dans le soixante-quatriesme quatrain, car nos crimes n'ont que faire d'estre figurez, puis qu'ils sont reels sans fiction, & trop bien grauez, & figurez

d'eux-mesmes, & ce d'une figure merueilleusement affreuse, puis qu'ils sont opposez, & repugnans à la beauté eternelle. Il est vray qu'il faut estre bien testu, si supposant que Dieu fust capable de colere, & qu'il n'y eust rien qui le peut fascher que les pechez, on ne concludoit de là l'horreur, & l'enormité du peché; en ceste façon on pourroit dire que quand l'Ecriture exprime la colere de Dieu, son but est de faire apprehender, & paroistre la laideur du vice, & la peine qu'il merite.

Il est vray pareillement que quand on dit que Dieu est courroucé contre les pecheurs, ou qu'on luy attribue quelque passion, qu'on veut exprimer cet acte eternel de la volonté diuine, par lequel il hayt le peché de toute

eternité; car par le mesme acte de volonté, par lequel il a créé le monde, par le mesme il le conserue iusques à present; par le mesme il hayt toute sorte de vice, & par le mesme il veut punir les meschans; bref ce seul acte estant infiny, c'est par luy que Dieu veut tout ce qu'il veut. En cette façon il est certain que les discours que nous faisons de Dieu, soit par anthropopatie, ou autrement, ne sont que pour entendre, & pour expliquer les perfections diuines, lesquelles nous ne pourrons iamais icy entendre parfaitement, estant infinies, & nous limitez, & bornez.

*Façons
desquelles
on se sert
en parlant
de Dieu.*

Si le deiste ne se contente de ces façons de parler, ie suis d'auis qu'il prenne des ailles pour s'en-uoler au Ciel, afin d'apprendre le langage des Anges, & de redef-

cendre pour nous instruire, car pour nostre égard nous confessons qu'il nous faut maintenant vser de paroles corporelles pour exprimer ce qui est spirituel, & diuin. Ce qui n'empesche pas neantmoins que nous ne croyions, & protestions que dieu est vn acte spirituel tres-pur, infiny, & libre de toute passion, de tout mouuement, & de tout changement.

*Responce
au 65
quatrain.*

Passons au soixante-cinquieme quatrain, lequel ne conclud rien, non plus que le precedent, car bien que les effets se rapportent à leurs causes, il ne s'ensuit pas que dieu soit sujet à perturbation, ou que la doctrine Catholique soit vne fable, car ce n'est pas estre sujet à perturbation que punir les meschans, & recompenser les bons; ce sont actes de vertu; qui a

iamais dit que la vertu fust vn trouble, ou cause de perturbation, veu que c'est elle qui dissipe l'orage des émotions, & qui apporte le calme & la tranquillité de l'ame? Iamais on n'exerça tant de vertus au monde, depuis qu'il a esté créé iusques à présent, comme on en pratique au Ciel à chaque momēt, est-ce à dire qu'il y ait de la perturbation? nullement: puis que c'est le lieu de repos, & de perfection.

Je sçay bien qu'il se treuve du trouble dans nos appetits sensitifs, & dans l'imagination, lors qu'il faut exercer quelque acte de force, de justice, ou de quelqu'autre vertu, particulièrement si l'acte est exterieur; mais en dieu il n'y a ny phantaisie, ny sentiment corporel, il est vn pur esprit, & le pere de toutes les intelligences; ô! que le

Prophete Royal a fort bien dit,
non accedet ad te malum, ne pouuant
rien arriuer de nouueau à l'estre
eternel, qui est exempt de toute
imperfection, quelque petite
qu'elle puisse estre, & qui a toutes
les perfections conceuables, non
seulement par l'esprit Angelique,
mais par l'increé.

*Pourquoy
les iuges
entrent
en colere
en punis-
sant.*

Or parce que la justice de la-
quelle nous nous seruons en pu-
nissant les criminels, s'arme de la
pointe de l'appetit sensitif, nous
disons qu'un homme est en cole-
re, lors qu'il punit quelqu'un, ce
qui n'arriue neantmoins pas tous-
jours, comme il paroist lors qu'on
chastie quelqu'un par le seul zele
de la justice; de là vient que le Ju-
ge des-interessé qui n'a autre pre-
tension que la justice, condamne
un criminel sans aucune passion,

& le bourreau l'execute sans aucune émotion, ou perturbation. Si nous auions vne parfaite habitude à la vertu, nous ne sentirions aucune perturbation en l'exerçant: que fera-ce donc de Dieu, quand il punit, luy qui n'a pas seulement l'habitude de la vertu, mais qui est la pure, & l'essentielle vertu, au regard de laquelle à peine nos vertus meritent-elles d'estre appellees ombres de vertu. Vous me demanderez peut-estre pourquoy nous disons donc que Dieu se fache contre les pecheurs, s'il ne peut auoir de colere. A quoy ie vous respons, qu'on parle ainsi pour plusieurs raisons, ie me contenteray d'en apporter icy deux, lesquelles vous feront aduoüer que la doctrine Catholique n'est pas vne fable, mais vne tres-gran-

de, & tres-certaine verité.

La premiere est afin que nous puissions concevoir combien le peché que nous faisons, est grand, puis qu'il merite vne punition, non telle quelle, mais digne de Dieu, & de sa grandeur, & perpetuelle, comme luy mesme il est perpetuel, & le suiect qu'il punit, perpetuel; c'est pourquoy nous disons que Dieu se colere contre le pecheur, parce qu'il le punit si rigoureusement, qu'il est impossible qu'une telle punition soit faite par l'homme, ou par l'Ange.

Or si parvne supposition d'impossible Dieu se pouuoit cholerer, il ne chatiroit pas le mal de coulpe avec vne plus grande rigueur, ny avec vn plus grand mal de peine, qu'il le chastie maintenant, C'est ainsi qu'on exprime sa force

par vn Lyon de la tribu du Iuda,
quand on parle du Verbe incarné,
afin que ce qu'on pense icy estre
de plus fort, nous serue comme
d'echelon pour monter à la co-
gnoissance de Dieu; ce que font
paroistre les doctes, lors qu'ils en-
tament les propos, & les discours
sublimes des perfections diuines,
& des façons d'agir, desquelles
Dieu se sert, car estans eleuez plus
haut, *loquuntur sapientiam inter perfe-*
ctos, & disent (ce qui nous fournira
la seconde raison) que tout ce que
nous pouuons faire par tous les
actes de nostre volonté, & de tou-
tes nos puissances, est fait par vn
seul acte de la volonté diuine, la-
quelle est comme vn centre infi-
ny, lequel estant ramassé, & vny en
foy-mesme indiuisiblement, est éd
sa vertu sur toute la circonference.

Mais Dieu fait tellement tout par cet acte eternal, & infiny, que de toutes les imperfections, qui accompagnent nos actes, il n'y en peut auoir aucune dans cet acte diuin.

Or comme nous sommes finis, & corporels, apperceuans qu'il nous faut autant de diuerfes actions que nous produisons de diuers effects, nous taschons de paruenir à la cognoissance des actions diuines en nous seruant des nostres, parce que nous n'en experimentons point d'autres, iusques à ce que nous nous eleuions par la foy, & par la Theologie à ce qui est de diuin, & d'incree. D'où ie conclu ce que ie vous disois, sçauoir est que nostre doctrine est tres-vraye, & que Dieu n'est point suiect à perturbation, bien qu'il

chastie les damnez d'un infiny
tourment, & qu'il recompense les
Saincts d'une couronne immor-
telles : si cela vous suffit vous pou-
uez apporter ce qui suit.

LE DEISTE.

*Bien que nous dißions que Dieu fust irrité
contre les meschans, il ne s'ensuit pas qu'il les
doive punir d'un supplice eternal.* LXVI.

*Le bigot est infiniment cruel, de desirer
qu'un mesfait limité soit puny d'un infiny tour-
ment, car c'est égaler l'instant de nostre vie au
tousiours* LXVII.

LE THEOL. Ouy, il sensuit que
si Dieu est irrité contre les mes-
chans, qu'il faut que leur chasti-
ment dure autant comme leur
meschanceté, car comme il n'y a
nulle mutation du costé de Dieu,
mais seulement du costé du pe-

cheur, si on peut dire que Dieu soit irrité, autant que durera la raison pour laquelle il est irrité, autant durera son ire, laquelle cessera le peché cessant; or puis que l'obiect de la iustice vindicative est le chastiment des meschans, il faut que ceste punition dure autant que le peché; mais quand l'impie meurt dans son peché ne voulant pas le quitter (sçachant qu'il n'ya que le temps de ceste vie pour le pardon des offenses, & que par apres il est impossible de l'impetrer) il fait assez paroistre qu'il veut offenser Dieu eternellement, il faut donc que ceste volonté eternellement meschante, recoiue vn chastiment qui dure aussi long temps que son mauuais propos, & que le pecheur demeurant dans vne opiniastrété eternelle d'offenser

Dieu, & de luy déplaire, ſoit puny d'un ſupplice eternal, car il faut que le ſupplice ſoit égal au forfait, ſi nous voulons que toutes les œuvres de Dieu tant de grace, que de nature, gardent le poids, le nombre, & la meſure; à ce que Dieu mettant tout en ordre, monſtre qu'il eſt le maïſtre de tout l'Univers, & qu'il ne ſe peut rien faire qu'il ne ſçache le ranger comme il luy plaïſt.

Mais voicy voſtre rimeur, qui crie dans ſon 67 quatrain, au meurtre, au carnage, & à la cruauté, afin que ſ'il manque ſon coup du coſté de Dieu, & qu'il ne puiſſe l'accuſer de cruauté, qu'il iette ceſte calomnie ſur le Chreſtien, qu'il appelle touſiours bigot à ce que ce mot de *ſuperſticeux*, ou de *bigot* aſſaiſonne ſes rimes, com-

me les blasphemes les paroles des soldats perdus, qui n'ôt plus aucun respect de Dieu. Or ce n'est pas le Catholique, qui fait que le supplice des pechez soit eternal, cela ne dependant que de Dieu seul ; mais estant bien instruit dans l'école de la foy, il ratifie, & approuve la volonté de son Dieu en ce supplice ; Mais de peur qu'il ne fasse à croire à quelque idiot que Dieu n'a pas raison de punir le peché eternellement, confiderez ie vous prie, contre qui se fait le peché, voyez quelle est sa malice, laquelle l'oppose à la volonté de Dieu, & contreuient aux ordonnances, qu'il nous a prescrites, non afin de retirer quelque nouveau contentement de nous, car sa beatitude, & sa ioye ne depend que de soy-mesme, mais à ce que nous soyons participans ; de
cette

ceste ioye eternelle, qu'il a preparee de toute eternité pour ceux qui feroient estat de ses commandemens, & qui le seruiroient avec toute sorte de respect, & de fidelité.

Disons donc, pour acheuer, que le peché est infiny en deux façons tres-suffisantes à ce qu'il soit puny eternellement; La premiere est, que i'ay n'aguères touchée, que quand le meschant vient à mourir, il demeure volontairement, & librement dans ces pechez, lesquels il sçait ne pouuoir estre pardonnez qu'en ce monde, & par ainsi il les rends eternels, & infinis: la seconde est parce que comme l'amour surnaturel de Dieu est d'un prix infiny, que nous aquerons par la vertu, assistee de sa grace, de mesme la hayne qu'on

*Comment
le peché
est infiny.*

porte à Dieu, ou à ce qui luy appartient, tels que sont ses commandemens, merite vn mespris infiny, qui s'aquierit par le peché; laquelle hayne, puis qu'elle est opposée à l'amour de Dieu, & que cet amour merite, & aura vne recompense eternelle, merite, & souffre vn supplice eternel, car en bonne Logique *contrariorum eadem est disciplina.*

Ce qui est d'autant plus veritable, qu'il est vray que l'auersion que nous auons des ordonnances diuines, & la hayne que nous leur portons, nous fait perdre la grace diuine, laquelle nous rendoit amis, & enfans de Dieu, & coheritiers de la gloire eternelle. Ce n'est que nostre faute de ce que nous n'auons plus ceste grace, sans la-

quelle il est impossible d'estre sau-
uez, & par laquelle nous eussions
eternellement iouy d'un bonheur
inexplicable sans le peché lequel
est si malitieux, que si nous auions
vne grace infinie, il nous en priue-
roit, & nous renderoit dignes d'une
peine eternelle.

Passons outre, & disons que
celuy qu'on offense, à vne infinie
dignité, & que par suite necessaire
on le doit honorer infiniment
d'un honneur infiny, si faire se
pouuoit, & que quiconque le des-
honore par le peché, commet vne
infinie irreuerence, qui ne peut
estre expiée, que par vne peine in-
finie, apres que nous sommes hors
de ce monde, car ce pendant que
nous viuons icy, nous pouuons sa-
tisfaire pour nos pechez par des
actions, lesquelles sont finies,

quand à ce qui est de leur nature, & de leur duree, mais elles sont renduës infinies par l'vnion qu'elles ont avec le merite, le sang, & la passion de nostre Sauueur, & Redempteur Iesus-Christ : c'est de là qu'elles ont la force de satisfaire, de mesme que les couleurs prennent la force de se faire voir, de la lumiere ; mais force laquelle n'est pas infinie, comme celle de la grace, qui estend sa vertu iusques à la gloire eternelle.

De là vient que nous pouuons dire que les actes de penitence par lesquels nous satisfaisons pour nos pechez, sont infinis eu esgard à la vertu qu'ils reçoient de la grace de Dieu, & des merites de nostre Seigneur ; sans lesquels nous ne pourrions satisfaire pour aucun peché, ny ne pourrions re-

couurer la grace, & l'amour de Dieu, quand nous endurerions tous les tourmens du monde.

N'importe que l'action de nostre peché soit finie, & qu'il ne se retreuue rien dans le peché qui ne soit finy, c'est assez afin que Dieu le punisse iustement d'un eternal supplice, que celuy qui la commis, se soit despoüillé de la grace, par laquelle il fust arriué à vne recompense infinie; & que l'affection qu'il a au peché soit infinie, en tant qu'il est en luy. Je die infinie quand à la duree, car sçachant qu'il ne la peut quitter, que ce pendant qu'il vit icy bas, & qu'il n'y a plus de grace apres ceste vie, sans laquelle neantmoins on ne peut quitter le peché, lors qu'il meurt avec ceste mauuaise affection, il la rend infinie, puis que sa volonté,

dans laquelle est le peché, durera toujours avec la mesme affection, & avec le mesme peché.

Veritablement il n'y a nul sujet de se plaindre de ce que les supplices des damnez sont eternels, car il n'a tenu qu'à eux qu'ils n'ayent demandé pardon à Dieu. Considérez ie vous prie quelle meschanceté, qu'elle opiniatreté, & quelle negligence, de ne s'estre pas seulement voulu repentir d'auoir offensé Dieu ; si les damnez eussent conceu vn regret d'auoir peché cependant qu'ils estoient en vie, Dieu leur eust pardonné ; ils n'ont pas voulu, ils sont demeurez opiniastres avec leur volonté peruerse, & en ceste façon se sont eux mesmes iettez dans le supplice eternal, dans lequel ils tremperont autant comme durera ceste

maudite affection, qu'ils ont à leurs pechez.

Or il faut que vous preniez garde que quand nous appellons le supplice, infiny, cela ne s'entend que de sa duree, car il ne finira iamais, & non de la grandeur, & de l'intension du supplice, lequel pourroit estre beaucoup plus grand, si Dieu le vouloit renforcer; c'est de ceste intention que vient la diuersité des supplices eternels, comme la diuersité de la gloire eternelle, procede des diuers degrez de felicité que Dieu depart selon la diuersité des merites, & des graces qu'on a eues en ce monde, car quand à l'infinité de la duree, les peines des damnez, & les recompenses du Ciel sont infinies.

Croyez donc fermement

Qq iiij

que le supplice est tel que nous le croyons, à ce que les malheureux damnez, qui n'ont pas voulu obeir à Dieu, & n'ont daigné faire paroistre l'infinité de sa gloire, ny en porter le caractere gravé sur toutes leurs puissances, monstrent par leurs supplices eternels, qu'il meritoit vn service, vne obeissance, & vn respect eternel. C'est donc ainsi que la prouidence de Dieu embrasse tout, que d'un grand mal elle tire un plus grand bien, & qu'elle sçait, & peut renger au supplice, ceux qui ont mesprisé la recompense.

LE D. Beny soit nostre Seigneur, qui m'a fait la grace d'estre aujourd'huy si bien instruit, vraiment ce Poëte n'auroit maintenant qu'à me venir caïoler, & tâcher de me faire quitter la crain-

te de Dieu, ie le renuoyerois bien loin avec ses impietez, & ses paralogismes: or ie voy maintenāt clairremēt pourquoy les instans de nostre vie peuuent à bon droit estre égaletz à l'éternité, car ces actions momentanees regardent vn object, qui dure tousiours, & puis appartiennent à vne ame immortelle, laquelle elles souillent pour tousiours, si ce n'est qu'elle impetrequer pardon de la diuine bonté, i'entens quand les actions sont mauuaises, car si elles sont bonnes, elles l'enrichissent d'une beauté immortelle, si elle ne vient à la perdre par sa faute. Voicy ce qui suit.

LE DEISTE.

*Dieu puniroit vainement, l'impunité des LXXVIII.
dumnez n'estant point dommageable; & puis*

quelle apparence y a-il qu'il nous soit loisible de fuivre la douceur, si c'est iniustice à Dieu de faire le semblable.

Ceste punition eternelle ne seroit-elle pas inutile apres le trespas? car quel bien Dieu en peut-il tirer, si les damnez ne se corrigent point?

LXIX.

LE THEOL. Il me semble que ce n'est pas estre vainement punisseur, lors qu'on punit, afin qu'il n'y ait rien de tellement dereglé au monde, qu'il ne soit reduit à quelque ordre; or i'ay desia monstté cy-dessus que quand Dieu chastie les impies, il les fait tomber sous sa prouidence, de laquelle ils vouloient se soultraire, & monstre par là que *attingit à fine v/que ad finem fortiter* : Dieu n'est donc pas vainement punisseur, puis qu'il fait vn acte tres-vertueux, & qu'il nous enseigne par là, que le peché

luy est desagréable ; c'est pourquoy cet acte n'est non plus vain, que l'acte par lequel il recompense les saints.

Mais voyons quelles raisons il apporte pour establir son impiété, & pour oster toute sorte de peine deüë aux pechez. Il veut que l'impunité ne soit point domageable, ce qui est tres-faux, car combien y en auroit-il qui ne se soucierioient pas de bien faire, & feroient le pis qu'ils pourroient, s'ils croyoient que le mal ne deutoit point estre puny ? De plus, Dieu ne recompenseroit pas les demerites, de la peine qu'ils meritent, comme il recompense les merites par la gloire éternelle, s'il laissoit les meschancetez impunies, & ne verrions pas l'esclat de sa justice pareil a celuy de sa bonté ; or qu'il

ait designé ce supplice eternal, outre que les saintes Escritures nous l'enseignent tres-clairement, nous le cõcluons de l'infinité de sa iustice, laquelle n'estant pas moindre que sa bonté, a sans doute vn effect pareil en duree, lors qu'il punit, & quand il recompense; car il n'appartient pas moins à vn Iuge de condamner les criminels, que de recompenser les bons; lequel tant plus il sera iuste, & clairvoyant, & plus iuste sera le supplice qu'il ordonnera pour le crime.

Dites moy de grace, si vn Iuge estoit tres iuste, & qu'il y eust vn meschant qui fist continuellement des actes dignes de mort, & neantmoins que le criminel ne peust mourir, ce Iuge ne luy feroit-il pas endurer des tourmens continuels, qu'il feroit durer eter-

nellement, s'il demeueroit eternal-
ment en son office de iudicature;
or Dieu est tre-iuste, & eternal, &
celuy qui meurt en son peché, de-
meure tousiours en sa malice, la-
quelle n'aura iamais de fin, il faut
donc conclurre que le supplice est
tres-iuste, que Dieu ordonne pour
les damnez; bref il ne feroit pas
paroistre qu'il fust tout bon, ou
ne nous enseigneroit pas l'horreur
du peché, s'il ne monstroit par vn
iuste chatiment quel il est, & en
quelle estime nous le deuons
auoir.

Il appelle à la douceur des hom-
mes, i'en suis content, mais il faut
qu'il considere que Dieu est cent
fois plus doux, plus benin, & plus
misericordieux, que iamais hom-
me ne fut, ny ne sera, car quelques
pechez que nous ayons faits, quād

nous serions tombez vn milion de fois en sa disgrâce , il nous tend les bras , & est si prompt à nous faire misericorde que nous n'auons pas plustost demandé pardon, & ietté vn soupir , qu'il nous redonne toutes sortes de graces, & de droitz à la vie eternelle, bien que nous eussions perdu tout cela par le péché. Mais il n'y a que le temps auquel nous sommes en ce monde qui soit propre pour cet effect. Si le Deiste veut entrer en raison avec Dieu pourquoy il la ainsi voulu, ie luy demanderay pourquoy Dieu a ainsi créé ce monde, comme il est; pourquoy il n'a pas mis le Soleil au Pole Arctique; pourquoy sa declinaison de l'equateur n'est de plus de 23 degrez & ; pourquoy il est eccentricque à la terre; pourquoy il y a vn tel nom-

bre d'estoilles, & de planettes;
pourquoy la terre n'est pas plus
grande, pourquoy il n'y a que
14000 semidiametres de la terre
iusques au firmament. Pourquoy
parut vne nouuelle estoille l'an
1572 dans la Cassiopee, lors que la
nouuelle Lune fut apperceuë vers
le 5 de Nouembre: pourquoy l'au-
tre fut veuë dans le Serpenteire
l'an mil six cens quatre, lors que la
triplicité des signes ignees recom-
mença pour la huitiesme fois:
pourquoy la grande conionction
de Saturne, de Iupiter, & de Mars,
se fist au mesme temps dans le Sa-
gitaire: pourquoy ceste conion-
ction ne se fait que de huit cens
en huit cens ans: pourquoy les
estoilles proches de l'equateur
font l'espace d'une heure 4 mi-
lions 529 mille 538 lieuës, & dans

2. Estoil-
les nou-
uelles.

vne seconde minute (ou dans l'espace que l'artere du bras, ou que le cœur bat vne fois, car l'artere bat 4 mille fois dans vne heure, dans laquelle il y a presque autant de secondes, sçauoir est 3600; par ou vous pouuez mesurer vne minute de temps quand il vous plaira, car le poux bat 66 fois dans vne minute, quand il est naturel) 1258 lieues, supposé que les estoilles se meuuent. Vous pouuez voir le mouuement, & la grandeur de chaque ciel, & de chaque planete dans la 33 raison que i'ay apportee sur la Genese contre les Athees, qui vous feront aussi empesché que ce que ie vous ay rapporté du firmament. I'ay dit supposé que les estoilles se meuuent, car bien que la terre roulast, ce pendant que le firmament se reposeroit,

neant-

neantmoins ie defierois auffi bien
tous les Deïstes de pouuoir don-
ner raison pourquoy la terre fe-
roit 225 lieuës ce pendant qu'une
heure se paffe ; & pourquoy pres-
que 4 lieuës dans vne minute,
comme i'ay remarqué dans la 9
question sur la Genefe article 4, &
5. ce qui est vn mouuement si rapi-
de qu'il faudroit que les parties de
la terre qui sont sous l'equateur,
allassent du moins 5 fois aussi viste
côme le boulet d'une artillerie, qui
demeurerait vne minute entiere
fil voloit l'espace d'une lieuë auffi
promptement, comme il va dans
sa plus grande force, & par conse-
quent 120 heures à faire tout le cir-
cuit de la terre, lesquelles contien-
nent 7200 minutes, autant com-
me elle a de lieuës Françoises en
son tour, (desquelles chacune con-

*Vitesse
du mou-
uement
de la ter-
re.*

*Vitesse
du boulet
d'artille-
rie.*

tient 3 mille pas, & chaque pas 5 pieds de Roy) & par ainsi le boulet feroit seulement en cinq iours qui comprennent iustement 120 heures, ou 7200 minutes, ce que la terre feroit dans vn iour.

Il y a mille autres choses desquelles ils ne me sçauroient non plus rendre raison, que de ce que ie viens de dire; comme pourquoy la terre pese

65923634426652872385072000 li-

Poids de
la terre
combien
grand.

ures: (qui est vn nombre que les Imprimeurs ont oublié de mettre dans la 9 question que i'ay desia citée, article 6 à la dernière ligne de la 906 colonne, ce qui n'a point esté marqué *inter errata Typographi*) Car ce n'est pas assez qui me dient que le bien de l'Vniuers desire ces mouuemens, ces grandeurs, & ce poids; & que la disposition de la

matiere des cieux a esté cause que ces nouuelles estoilles ont plu-
stost paru és susdites anneés, qu'és
autres suyuanes: il faudroit qu'ils
me donnassent la raison pour-
quoy le monde a esté disposé de
ceste façon, veu qu'il eust peu re-
cevoir vne infinité d'autres for-
mes, d'autres espaces, & d'autres
mouuemens, ce qu'ils ne sçauroiét
faire.

Qu'ils ayent dont honte desor-
mais de demander pourquoy
Dieu fait cecy, ou cela, & de ne
vouloir croire que ce qu'ils peu-
uent comprendre dans leur petit
esprit, puis qu'ils ne sçauroient
comprendre la moindre chose du
monde. Ce que ie leur prouueray
tres-facilement en leur proposant
ce qui se voit deuant nos yeux, &
sans auoir mon recours à ce qui se

fait au ciel, car ie les defie tous de me dire la vraye, & la naiue signification de ce peu de lignes, qui suiuent, lesquelles ne contiennent rien qu'une verité tres-claire, & palpable.

Qua in matre pater generat quatuor filias inuicem homogeneas, sed virisque parentibus heterogeneas, & fœtu gravidas quâsque auo tantum homogeneo, matribus, & auia heterogeneo; cuius binorum utlibet complexu generetur una, eademque filia, omnibus præterquam quatuor auis suis heterogenea; quæ si eisdem iungatur, omnium quinque sit unus, idemque umbilicus; quanquam ex eisdem quinque uni sit umbilicus, & umbilicus ante, & duabus differenter conformibus umbilicus ante, & retro.

Rursus harum quinque singula singulares motu perfecto procreant quinque filias etiam inuicem homogeneas, matri-

bus heterogeneous quæ uni, eidemque viro heterogeneo maritata fiunt ipsis homogeneæ, & splendida maritali veste ornata virum celant solæ omnibus conspicuæ, & obuiæ. Cuncta auide appetentes, & quasi amplexari visæ, attamen superbè cuncta respuunt. Nec est qui, quæ, quodue illis bene, aut malè egerit absque talione.

Omnes bisfrontes sunt. Unica est omnibus æqualiter æqualis ante, & retro; reliquæ quatuor inæqualiter æqualiter inæquales ante, & retro. Et earum debilior est quæ plus appetit. Ex eisdem una est quæ magni Regis filios hospitio exceptos liberos remittat. Tres sunt quæ eisdem nullo licet cogente vinculo, in arctum tamen, & arctius cogant.

Est unica quæ in arctissimum. Sunt ex eisdem, quæ elumbes. & eneruatos disijciant; unica est quæ dissidentes in concordiam, & amplexus tandem ituris ob-

uiam facta eosdem breui conciliet, & citius in amplexus cogat coram ipso patre. Sed que illa?

Voyla ce qu'un de mes amis à proposé, qui ne contient rien que de tres-certain: quand vostre Poëte m'aura expliqué cela, nous verrons s'il luy faut permettre de s'enquêter des raisons pourquoy Dieu fait cecy, ou cela; bien que cecy soit tres-facile à dechiffrer au pris des autres choses que j'ay rapportees cy dessus, desquelles il ne sçauroit rendre raison, quand il y penseroit vn milion d'annees.

Par où vous voyez que c'est vne grande presumption, & vne folie intolerable de vouloir sçauoir pourquoy Dieu a fait cecy, ou cela, de façon qu'on ne le vueille pas croire, si on n'en comprend la raison.

Ne croyons nous pas ce que le Roy fait, ou commande, auoir esté fait, & commandé, bien que nous n'en sçachions pas la raison ? pourquoy est-ce donc que vous ne voulez pas croire ce que Dieu a ordonné, encore que vous ne sçachiez le pourquoy ? l'adjouste neantmoins que quand Dieu n'auroit pas voulu punir le peché, il ne seroit pas injuste, mais il ne manque d'une infinité de raisons, pour lesquelles il l'a voulu punir.

Vous voyez donc que ce Poëte a apporté la douceur des hommes fort mal à propos pour la contre-poincter à la justice diuine, puis que Dieu vse d'une plus grande clemence en pardonnant vn peché mortel, que tous les hommes du monde ne firent iamais en par-

donnant les injures qui leur ont esté faites.

Et puis ce n'est pas d'un Juge qu'il faut attendre la douceur, mais l'équité, & la justice, laquelle il rend à un chacun, & le traite selon ses merites, ou ses demerites sans excepter personne, s'il est très-juste, tel qu'est le Juge souverain, & tout puissant, duquel vous ne devez, ny ne pouvez iustement attendre autre chose qu'une parfaite justice, car on ne scauroit le tromper, ny luy déguiser aucune chose, puis qu'il sçait tout : c'est pourquoy ie vous conseille de vous mettre en bon estat, & vous repentir de toutes les offenses que vous avez faites, à ce que vous puissiez employer le reste de vos iours à servir Dieu, & que vous recompensiez vos mauvais deportemens

par vne bonne vie ; ce que faisant, ie vous assure que vous euiterez ces supplices , & aurez la gloire eternelle pour recompense.

Ie passe à l'autre quatrain , & dy que cette punition n'est ny vaine, ny inutile ; elle n'est pas vaine, puis qu'elle est vraye & réelle ; elle n'est pas vaine , puis que c'est le juste loyer du peché ; elle ne peut estre vaine , puis que celuy qui punit ne peut estre sujet à vanité ; bref elle n'est pas vaine , puis qu'elle sert pour remettre dás l'ordre de la justice vindicative , celuy qui s'est soustrait de l'ordre de la justice premiatiue , ou recompensante. Elle n'est pas aussi inutile , car elle sert à tout ce que nous auons dit, & à beaucoup d'autres choses , lesquelles nous cognoistrons apres cette vie ; Dieu vueille que cette

cognoissance des peines eternelles ne soit point pratiquée dans nous, mais seulement speculative, telle qu'elle sera és bien heureux.

Quant à ce qui est de la correction, qu'il nie s'en ensuiure, il faut icy distinguer deux, ou trois sortes de corrections, l'une desquelles est afin que celuy qui est corrigé s'amende, & que quittant son vice il embrasse la vertu, & deuienne meilleur; en cette façon les damnez ne sont pas corrigez: l'autre est pour seruir d'exemple à la posterité, à ce que les autres fuyent le mal, pour lequel on punit le malfaicteur; mais la troisieme est simplement pour le zele de la justice, afin qu'on rende à vn chacun ce qui luy appartient; or le supplice eternel appartient aux damnez, ausquels si on pouuoit faire tort,

se seroit en ne les punissant pas; c'est cette correction qui doit estre faite, soit qu'on espere amendement, ou non, soit que cela serue d'exemple, ou qu'il n'en serue pas.

Il ne faut donc plus que les Deistes s'estonnent de ce que dieu chastie les damnez, bien qu'il n'en vueille tirer ny exemple, ny amendement, car ces choses icy estans relatives, dieu qui est juste d'une justice absolüe, n'a que faire de ces considerations. De plus, ie dy qu'un Iuge peut, & doit faire mourir vn Deiste, vn Athee, &c. bien qu'il n'en esperast ny amendement, ny exemple. Est-ce pas assez qu'il venge la querelle de Dieu? est-ce pas assez qu'il le punisse selon les loix? est-ce pas assez qu'il ne commette point d'iniustice en cet acte remply d'equité.

LE D. Monsieur, ie suis merueilleusement content de vôtre responce, mais il faut que ie vous auoüe que ie brusle du desir que i'ay de sçauoir l'explication de cet Enigme lequel vous avez rapporté, car ie ne pense pas qu'il n'y ait des merueilles comprises sous iceluy.

LE THEOL. Vous sçavez desia que ie me suis excusé sur choses beaucoup plus faciles, de peur d'interrompre le fil de nostre discours touchant la malheureuse doctrine laquelle vous a peruertey; c'est pourquoy ie vous prie de rechef que nous remettions cecy à la fin du poëme, car ie vous promets de vous faire part de l'explication que deux habiles personnages ont donné sur ce suiet: vous verrez si elles vous aggreront.

LE D. le crains fort que la commodité ne vous permette pas d'estre si long-temps avec moy que vous me puissiez expliquer tout cecy, neantmoins ie vis en ceste esperance, c'est pourquoy ie vous diray le 70, & le 71 quatrain.

LE DEISTE.

*C'est cruauté, & vanité que de se plaire,
& de chercher de la gloire en punissant les
meschans, or Dieu n'est sujet ny à cruauté, ny
à vanité.* LXX.

*On se mocqueroit d'un Monarque, si on
faisoit estat de la victoire qu'il auroit emportee
sur un goujat, donc le Bigot est phrenetique
quand il dit que Dieu treuve de la gloire à perdre
les hommes.* LXXI.

LE THEOL. le vous ay desia dit
que Dieu n'a que faire de mandier
de la gloire, ny du contentement

de ses creatures, puis que de foy-
mesme il est infiniment glorieux,
& content, c'est pourquoy tous
ces deux quatrains donnent du
riez en terre. Nous auons aussi mō-
stré que dieu n'estoit point cruel,
car qu'est-ce que cruauté? est-ce
pas chastier outre mesure? or Dieu
ne chastie iamais que selon la me-
sure des iniquitez; *quantum fuit in
delicijs, tantum & date illis tormentum.*
Ie diray neantmoins que la gloire
de Dieu à nostre respect est mani-
festee par le supplice des meschās,
parce que ceux qui faisoient les
rodomôts, & les galans, ne se sou-
ciaient pas de Dieu, & crachant blas-
phemes, & iniures contre sa Maje-
sté, comme fil n'eust point esté,
ou fil n'eust esté assez sçauant
pour les treuuer, & assez puissant
pour les punir, sont attrapez, &

supplieiez selon leurs demerites. Ce Poëte voudroit bien que les bons, & les mauuais fussent mis en mesme rang, & en mesme balance, c'est dommage qu'on ne l'establit chef de quelque Republique, car il donneroit aussi tost les premieres dignitez aux meurtriers, qu'à ceux qui ont sué sang, & eau pour le salut de la Republique. Non, non, il faut que les meschans soient punis. S'il veut euitier la peine deuë à ses impietez, qu'il recoure de bonne heure à Dieu, qui l'attend les bras ouuers, à ce qu'il se repente de ses vices enormes; & qu'il se garde bien desormais d'vser des mots de *Goujat*, de *Bigot*, ou d'autres iniures, quand il sera question de parler de Dieu, car la diuinité estant la saincteté mesme, il n'en faut iamais parler, ny appro-

cher qu'avec vn tres-grand respect. Dieu vueille l'esclairer, & luy oster le *Bigotisme* de là teste, i'ay bien peur qu'il ne deuienne frenetique, s'il ne l'est desia, en se peinant de persuader que nous sommes frenetiques; poursuidez.

CHAPITRE XXII.

Dans lequel les quatrains de l'impie sont renuersez depuis le 72 iusqu'au 84; & est monstré que Dieu punit iustement les meschans d'un supplice eternal, avec plusieurs calomnies, & mensonges refutez.

LE DEÏSTE.

Si le chastiment ne sert que pour l'exemple
LXXII. *qu'on entire, qu'est-ce que l'enfer qu'un tourment suppose, par lequel les religions s'entre-
 tiennent?*

Dieu ne

Dieu ne nous a-il pas tous formez pour
quelque fin dernière, puis que le but d'un sage
entendement est la premierere intention de ses
desseins? LXXIII.

Dieu pourroit-il auoir vise pour nous à
quelque fin d'immortelle misere, puis que le Bi-
got mesme ne se peut proposer que de bien faire
à ses enfans? LXXIV.

LE THEOLOGIEN.



OYLA iustement où
ce Deiste vouloit tom-
ber, fil eust treuue
quelque duppe, à qui
vendre ses coquilles rimees, car
pourueu que ces gens-là estei-
gnent la lumiere de la foy, & qu'ils
l'abbrutissent tellement qu'ils
n'ayent plus ny Dieu, ny diable, ny
enfer deuant les yeux, mais la seule
volupté, afin d'en prendre par tous
les bouts, & par toutes les façons

desquelles ils s'auisent, ce leur est assez; mais la dance finira bien tost avec tous leurs passe-temps, & tous leurs plaisirs : croyez que ces galans ne riront pas tousiours, & qu'il viendra vn iour, qu'il leur faudra rendre conte de toutes leurs risées, paroles, & pensees.

*Raison
pourquoy
Dieu pu-
nit les
damnez.*

Disons donc encore vn coup, que ce n'est pas pour l'exemple, ou pour la correction, que toute punition se fait, le but final du supplice des meschans est celuy, que i'ay declaré cy deuant, si bien que l'enfer demeure en son entier, nonobstant le desir, & le quatrain de ce rimailleur. Assurement le Philosophe a fort bien dit que *indicat vnusquisque prout affectus est*, car ce qui a mis la plume à la main de cet Athee, est qu'il desireroit grandement qu'il n'y eust point

d'enfer, à ce qu'il n'eust aucun remords de conscience, quand il embrasse toute sorte d'impieeté.

Je m'asseure qu'il nieroit aussi bien le Paradis, n'estoit qu'il veut flatter son humeur, & iouer la fourbe entiere, pour mieux persuader son impieeté. Vous voyez aussi clairement qu'il fait passer toutes sortes de religions dans vne mesme categorie, ne se souciant non plus de l'une, que de l'autre, & les estimant toutes fabuleuses, & mensongeres; voylà ce braue docteur, qui veut mettre tout le monde en repos. Scachez donc que la vraye religion, ne peut se maintenir par la seule peur d'un enfer, il faut d'autres ressorts, pour faire quelle subsiste parmy tant de larmes, & d'alarmes; c'est la grace de Dieu, la foy, l'esperance,

& tous les Sacremens, les Martyrs, les propheties, les miracles, & tous les saincts, qui la conseruent, & non la seule crainte d'un enfer.

Il sera bon de remarquer icy que le Deiste est contraint de recognoistre l'utilité de la creance du supplice eternal, qu'il disoit cy devant estre inutile, puis qu'il confesse que les religions se conseruent par la peur de l'enfer; & par consequent que ceste peur est cause, du moins en partie, & suivant l'opinion du Deiste, de tous les biens qu'apporte la religion, tant à l'esprit d'un chacun, qu'aux Royaumes, & aux autres Estats.

*Utilité de
la creance
de l'enfer.*

A quoy j'adiouste, laissant se Deiste à part, que bien que la seule peur de l'enfer ne maintienne pas la religion Catholique, neantmoins elle ayde aux Chrestiens à

se maintenir en leur deuoir ; car si quelques-vns ne sont pas assez épris de l'amour de Dieu pour garder les commandemens en consideration de ce qu'il est souuerainement bon, ils peuuent adiouster la peine de l'enfer, à ce qu'ils embrassent les ordonnances diuines avec plus de diligence, & d'affection, puis que l'observation des preceptes diuins, nous garantit de ces supplices eternels : c'est là le moyen de paruenir à l'amour de Dieu par la crainte, laquelle nous fait pleurer nostre mauuaise vie passée, & nous fait embrasser la penitence pour retourner en grace avec Dieu.

Ostez donc de vostre imagination ce que ce miserable Poëte vous auoit mis dans l'esprit, car il est aussi certain qu'il y a vn enfer

pour les damnez, comme il est certain qu'il y a vn Paradis pour les bien-heureux; & l'un & l'autre est aussi veritable; comme il est vray que Dieu est iuste; ie croy que cela suffit à ce que l'impieté de vostre Poëte s'euanouisse, & que vous croyiez la verité des supplices eternels, lesquels le Deiste vouloit oster, pour mieux establir son libertinage, & son Deïsme: vous voyez donc maintenant que c'est que de s'imaginer vn Dieu qui soit tresbon, & qui ne soit pas tres-iuste, & qu'il est tres-veritable que *paruus error in principio fit maximus in fine.*

Refuta-
tion du
73 qua-
train.

Voyons son 73 quatrain, lequel ne fait rien contre nous, puis que nous auoions franchement que l'intention laquelle Dieu a eüe en creant le monde, a esté de faire

paroistre sa gloire, & faire reluire les diuines perfections en tous les estages de l'Vniuers, dans lequel il n'y a pas vne creature depuis la plus grande iusques à la plus petite, laquelle ne declare la sagesse, la puissance, & la bonté du souverain Architecte. Voyla donc la premiere intention de Dieu, qui a voulu se manifester en ces façons; il a fait comme vn grand Prince, lequel venant à la couronne, offre ses faueurs à tout le monde, promet des recompenses, & des dignitez à vn chacun, & declare que son intention est que tous ses subjects fassent bien, & viuent en bonne intelligence.

*Quelle a
esté l'in-
tention
de Dieu
en creant
le monde.*

Pour cet effect il leur donne des loix qu'il veut estre obseruees, de façon qu'il destine des peines à ceux qui les violeront, desirant

qu'on le recognoisse tres-iuste Prince, & grand amateur de la iustice; dites moy s'il vous plaist, quand il chastira les transgresseurs de ses ordonnances, cela fera-il qu'il n'ait pas eu intention de faire bien à vn chacun? nullement; mais ce sera la seule faute des rebelles, qui n'auront pas voulu correspondre, & cooperer avec l'intention de leur Prince, lequel sera autant louable en la iustice qu'il rendra en les punissant, comme en la recompense qu'il donnera à ses fideles seruiteurs. C'est ainsi que Dieu a eu intention qu'un chacun fust sauué, car il nous en a donné les moyens tres-faciles, & nous y ayde a chaque moment, c'est pourquoy ceux qui se damment parmy tant de graces, ne peu-

uent se plaindre que d'eux-mesmes.

Prenez garde neantmoins qu'il ne nous a pas fait tellement determinez à la gloire eternelle, qu'il ne nous ait laissé nostre liberal arbitre, afin qu'il eust des seruiteurs libres, & non contrainsts, & que nous possedassions le Paradis par tiltre de recompense; il ne tiendra qu'à nous, si nous ne l'aqueurons par nos trauaux. Mais bon Dieu quel trauail, veu qu'il n'est question d'autre chose que de vous obeyr: & quoy, si nous obeissons au Roy avec tant de facilité, & d'affection, avec quel ardeur de uons nous marcher quand il est question d'obeyr à Dieu? C'est à quoy ie vous conuie, & vous coniure entant qu'il est en moy; assurez vous que vous aurez plus de

contentement dans vne heure ob-
beissant à Dieu, & vous compor-
tant selon sa sainte volonté, la-
quelle il nous a declaree en l'Es-
criture sainte, & par son Eglise,
que vous n'avez eu en toute vo-
stre vie, depuis que vous avez em-
brassé ce malheureux party.

Responſe

au 74.

quatrain.

Mais passons à l'autre quatrain,
dans lequel il change de batterie,
& fait cet enthymene icy ; le pere
parmy nous ne voudroit pas mal faire à
ses enfans, ou du moins les punir eternel-
lement, donc Dieu ne le peut vouloir fai-
re, puis qu'il est pere de ce tout. S'il nous
estoit permis de comparer Dieu
à l'homme, nous nous bastirions
vn beau Dieu, car il faudroit que
nous transportassions toutes nos
imperfections dans la diuinité, ce
qui est impossible : neantmoins
il procede le plus finement qu'il

peut, car comme il voit que la douleur est grandement prisee entre nous, particulièrement celle d'un pere enuers ses enfans, il veut nous persuader que Dieu ne peut non plus chastier les meschans eternellement, que le pere ses enfans.

Or outre que nous voyons de bons peres, qui punissent pour tout jamais leurs enfans en les desheritant, & les desaduouant, & d'autres qui les font executer par la justice, se conformant en cela aux loix diuines, & humaines, (ce qui seroit suffisant pour decrediter le 74 quatrain de ce Poëte,) ie dy que quand nul pere ne pourroit vouloir chastier son enfant, non pas mesme d'une peine temporelle, d'un simple coup de verge, ou d'une simple parole de re-

prehension , que Dieu auroit neantmoins vn droit souuerain, & vne tres juste raison de punir les damnez eternellement, car l'homme dépend dauantage de Dieu, & luy est beaucoup plus redevable, qu'il n'est à quelqu'autre homme que ce soit, fust-ce son pere, ou sa mere, lesquels ne donnent rien que le corps à l'enfant, lequel ils ne peuuent engendrer, qu'au prealable ils n'ayent receu cette puissance generatiue de Dieu, de façon qu'ils luy en sont entierement obligez.

Voyez donc comme tout ce qui est dans la nature a vne souveraine obligation à Dieu, qui ne peut iamais estre assez loué par toutes les creatures, encore qu'elles se conuertissent toutes en voix, en langues, en pensees, & en louan-

ges, & neantmoins afin que cette louange fust eternelle, & que le contentement des hommes ne finist iamais, Dieu leur a preparé vn lieu, où ils puissent faire cela avec vne felicité, laquelle ne se peut exprimer, pourueu seulement qu'ils recognoissent en ce monde icy l'obligation qu'ils ont à la Majesté souueraine, & qu'ils obeissent à sa volonté signifiée par ses commandemens.

Et quoy? si au lieu de se mettre en estat d'acquérir cette gloire par vn travail si court, si plaisant, si leger, si iuste, & si raisonnable (telle qu'est l'observation des loix diuines) quelqu'un est si meschant, ou si oublieux de son deuoir, qu'il dédaigne de faire ce que Dieu demande de luy, & qu'au lieu de le seruir de tout son cœur, il se bande

contre ses ordonnances, ne merite-il pas d'estre puny eternellement ? il le merite assurement, puis qu'il a mesprisé la bonté, & la beatitude eternelle; & ne croy pas que personne voulut estre Aduocat d'une si mauuaise cause.

Or ce qu'il apporte touchant le pere plus clement vers son enfant, n'est icy à propos, car premierement le pere n'est pas offensé par son fils en qualité de souuerain, comme il appert de ce que nous auons dit; Secondement, il ne cognoist pas la qualité de la faute, comme Dieu la cognoist, & par ainsi il n'en peut pas iuger assurement. Troisiësmement l'offense entant qu'elle est infinie, n'est pas faite contre le pere, qui est limité, mais contre Dieu, puis que le peché est vne auersion du

souuerain bien, & du createur, & vn retour à la creature; c'est ce retour au plus, que le pere chastie; mais Dieu estât aussi iuste, qu'il est misericordieux, ce seroit merueille le fil ne punissoit tres-iustement. Dieu n'est pas comme l'homme, lequel remply de compassion ne veut, ou ne peut pas souuent rendre telle iustice qu'il faudroit, car exempt de passion il punit, ou recompense comme il faut selon l'equité, & la raison sans consideration des personnes, des grandeurs, & des dignitez de ceux qui ne luy ont obey.

Pleust à Dieu que nous peussions voir clairement l'horreur du peché, la grande iustice, & la raison que Dieu a de le punir eternellement, nous nous estonnerons comment l'enfer n'englou-

tit celuy qui a offensé, si tost que le peché est commis ; mais aueugles que nous sommes, nous nous figurons les chastimens diuins, comme les temporels, & l'eternel comme le finy. Il ne faut pas icy que le Deiste me reparte que puis que l'estime que nous faisons de ces peines, & de ces façons d'agir, dont Dieu se sert, est humaine, & passagere, que la peine du peché doit aussi estre temporelle, & finie, car nous auons la lumiere de la foy, & la raison naturelle, laquelle nous enseigne que Dieu merite vn honneur souuerain, & que le deshonnorer, ou ne luy rendre ce qu'il requiert de nous, merite vn tourment aussi grand comme le delinquant s'en trouuera capable, puis que tout ce qu'il est, comme il estoit hypothequé à ce deuoir, est
aussi

aussi obligé à la reparation, ce que
monstre pareillement la raison na-
turelle, cōme vous auez veu cy de-
uāt: si bien qu'il n'y a aucun sophis-
me, ny aucune excuse, qui nous
puisse garātir de ce supplice. Veri-
tablement il est bien raisonnable
que si la gloire de ceux qui font
bien, & honorent Dieu, est infinie;
que la peine de ceux qui font le
contraire, soit infinie. Faites donc
(ô mon Dieu) que vostre honneur,
& vostre iustice soit garantie de la
dent du meschant Deiste, & que
personne ne vous attaque iamais,
*ut iustificeris in sermonibus tuis, & vin-
cas cum iudicaris.*

Le deiste voudroit bien estre
sauué pour ses beaux yeux, & pour
sa mine, & ne sçay sil ne pense
point que dieu mesme luy soit re-
deuable des bonnes cheres qu'il

fait, & des caresses qu'il donne à son propre corps. Il verra à la mort, pour le plus tard, si Dieu ne le chastie plustost exemplairement en permettant, & faisant que la iustice le decouvre, & le fasse brusler à petit feu, comme il le merite, il verra dis-ie que c'est que de se moquer de la religion, & des Chrestiens, & maudira le temps qu'il aura employé à cela, mais ce sera trop tard, car s'il attend le point, auquel son ame sortira de son corps, & auquel le temps de meriter sera finy, il n'y a plus de pardon pour luy, ny de misericorde.

Scachez donc, Monsieur, que Dieu ne vise point à la perdition d'aucun, & que ce n'est que nostre faute, lors que Dieu nous punit, puis que nous pouuons nous sau-

tier. Au reste, prenez garde que ceste comparaison trop niaise du pere enuers son enfant, ne vous esloigne de ce que ces discours v'dus ont mis dans l'esprit, car ils sont tres-veritables, & suis prest de mourir pour leur deffence.

LE D. le ne doute plus en aucune façon de la fourbe, & de l'ignorance de nostre Poëte; qui à voulu nous persuader ses caprices mensongères, & trompeuses, au lieu de la pure verité; acheuons vistement, il m'ennuye fort que ce n'est fait, car ie suis lassé d'entendre tant d'impietez sorties de la bouche, & de l'esprit d'un si meschant homme; voicy ce qui suit.

LE DEISTE.

*D'où ie conclus que puis que Dieu ne nous a
peu faire naistre pour vn malheur sans fin, que*

LXXV.

*nous parviendrons tous au repos que l'amour
diuin nous a l'imité pour nostre meilleur estre.*

LXXVI. *En fin pourroit-il nous quitter, puis que
nous sommes son principal ouurage? pourrions
nous paruenir qu'au but où sa bonté a visé de-
uant tout age.*

LE THEOL. Je respons que ce
qu'il veut inferer, de ce que Dieu
ne nous a pas fait naistre pour no-
stre malheur, sçauoir est, *que nous
serons tous sauuez*, est aussi faux
comme la parole diuine est ve-
ritable, laquelle nous assure du
contraire, de sorte qu'il faut aussi
bien croire que ceux qui meurent
sans repentance de leurs iniquitez,
seront damnez, comme nous
croyons que les justes seront sau-
uez. Car c'est vn mesme Dieu, &
vne mesme foy, qui nous enseigne
l'vn, & l'autre.

Il est vray que nous paruiendrons tous à la gloire eternelle, si ne tient à nous ; mais voulez vous que Dieu sauue vne personne malgré qu'elle en ait ? il n'y a nulle apparence : il faut donc que nous y apportions du nostre , & que nous vsions de nostre liberté en élisant le bien, & le moyen, que dieu a voulu qu'on tienne pour aller en Paradis. Mais ce qui a fait tóber vostre Poëte dans cet erreur, est qu'il a pensé, ou qu'il a voulu faire à croire aux ignorans , que Dieu auoit tellement créé les hommes dans cet Vniuers, que de toute eternité il auoit absolüement voulu que tous fussent sauuez, quelque chose qui en peut arriuer, ou quelque vie qu'ils menassent, sans les astringre , ou les obliger à faire cecy, ou cela ; or ce

fondement s'en allant par terre, & estant tres-faux, tout ce qu'il pense conclurre est ridicule, & contre toute sorte de verité.

L'ordre que Dieu a voulu observer dans l'Vniuers, a esté, & est (pour ce qui touche les Anges, & les hommes) qu'ils se comportassent en ce qui est de leur liberté, comme il leur plairoit, de sorte qu'il a promis assistance à vn chacun pour vouloir, ou ne vouloir pas tout ce qui luy semblera bon, mais à condition, & avec vne promesse infallible que s'ils vouloient garder ce qu'il leur prescriroit, qu'il leur donneroit vn eternal contentement, par lequel ils auroient tout ce qui se pourroit souhaitter; au contraire s'ils mesusoient de leur liberté, & qu'ils ne voulussent pas suiure le chemin

Royal de ses ordonnances, qu'il les puniroit eternellement, *malos malè perdre.*

Je respons au 76 quatrain, que *Response au 76 quatrain.*
 Dieu ne se des vnit pas des mes-
 chans, bien qu'il les punisse, car il
 leur est aussi present, quand à ce
 qui est de son essence, & de sa puis-
 sance, comme il est en Paradis,
 mais il s'en des-vnit seulement en
 ce qu'il ne leur donne pas la re-
 compense des iustes, & leur denie
 sa grace, par ce qu'ils l'ont mespri-
 fee.

Difons donc que Dieu n'est pas
 moins bon, quand il punit les mes-
 chans, au contraire, s'il se pouuoit
 faire que Dieu fust meilleur dans
 vne action, que dans vne autre, il
 faudroit dire qu'il seroit meilleur
 en punissant les mauuais, qu'en les

espargnant, ou ne voulant pas les chastier.

Le Deiste pense que Dieu se chage, s'il punit ceux qu'il vouloit estre sauuez, mais il se trompe lourdement, car par la mesme volonté, par laquelle il a déterminé la recompense pour les bons, par la mesme il a déterminé le supplice pour les meschans; il n'est nō plus vray de dire que Dieu abandonne son ouurage, lors qu'il chastie les damnez, au contraire il monstre qu'il en a grand soing, leur donnant ce qu'ils ont merité.

Dieu par sa misericorde nous vueille preseruer de ceste misere, & nous fasse la grace de nous esloigner l'esprit de ces impietez. Il est vray que Dieu a visé de toute eternité à nostre salut, mais ç'a esté en y comprenant nostre liberté, &

son bon vſage. Que ce Poëte voye,
& qu'il ſe tâte le poux, & la con-
ſcience, il treuuera qu'il a ſouuent
meſ-vſé de ſa liberté, & qu'il ne
tient qu'à luy, qu'il ne quitte ſes
erreurs, & ſes phantaſies. Pour-
ſuiuez.

LE DEISTE.

*Bien que Dieu nous vouluſt reduire dans l'an-
cien chaos, eſt-ce pas blaſphemer de le taxer de* LXXVII.
*nous mettre au repos où nous eſtions, auant que
d'eſtre, en ce principe meſme.*

*Je ſçay qu'on nous fera icy des contes fabu-
leux pour nous faire quitter les maximes les* LXXVIII.
plus euidentes.

Et qu'on nous dira que les effets diuins LXXIX.
nous ſont impenetrables, & que nos ſens, &
nos raiſons nous trompent ſouuent, comme s'il
n'y auoit rien de certain que leurs ſonges, &
leurs fables.

LXXX.

De plus, ils vomiront des injures contre nous, comme faisoit Vlespiegle contre ceux qui découvroient ses couleurs, & ses peintures.

LXXXI.

Car ils veulent que nous soyons des fouches insensibles pour nous ranger à leurs opinions.

LXXXIII.

Et nous espouuanter comme Vne nourrice laquelle effraye ses petits pour regler leurs ieunes appetits, à ce qu'ils nous puissent ranger sous leur diadème.

LXXXIII.

Mais tout ce qu'ils nous scauroient dire n'est que pour effrayer les fots, qui se laissent deceuoir à l'ignorance, laquelle les embeguine d'une fausse creance.

LE THEOL. J'ay voulu vous laisser rapporter ces 7 quatrains tout d'un coup, par ce qu'ils appartiennent à vne mesme impieté; & bien que vous voyez assez par ce qui a esté dit cy dessus, que tout ce qu'il rapporte ne sont que pures sottises, ie vous diray encore quelque

chose sur ce suiet. Son 77 qua-
train me semble fort obscur, ne-
antmoins ie pense qu'il veut com-
parer ces deux punitions icy, sça-
uoir est ou *d'estre damné*, ou *d'estre*
reduit au neant, & crois qu'il pense
que ceste derniere peine du neant
est moindre que celle du dam, ce
que supposant, il veut accuser Dieu
d'iniustice, s'il nous reduisoit en
l'ancien chaos à cause de nos of-
fenses. Or soit que ceste reduction
au neant doieue estre estimee vn
plus grand supplice que celuy de
l'enfer, comme la pluspart des
Theologiens disent, à cause que la
damnation suppose l'estre en son
entier, que l'aneantissement de-
struit tout à fait; soit que la peine
du dam soit plus grande, comme
d'autres pensent à raison de ces
paroles que nostre Seigneur pro-

Responſe
au 77
quatrain.

nonça en parlant de la trahison de Judas en son endroit, *bonum erat ei*,
Math. 26 *si natus non fuisset homo ille*, il est tres-assuré que si Dieu reduisoit tous les hommes, non seulement qui sont meschans, & reprouvez, mais tous les bien-heureux, & tout le monde au neant, qu'il ne pourroit estre accusé d'iniustice, que tres-iniustement, & sans raison : mais c'est assez que Dieu ne fasse pas ceste reduction, à ce que ce quatrain soit sans fondement ; par où il appert que ce Poëte n'a qu'une chetive rime sans raison.

Response
 au 78.
 quatrain.

Pour le 78 quatrain, vous voyez combien cet homme est sot, & ridicule avec ses boufonneries, qui tasche de rendre fabuleux tout ce qui appartient à la Theologie, & à la religion ; vous avez apporté d'as les quatrains precedens ce qu'il

appelle fables, où ie vous ay mon-
stré la fausseté, & l'erreur de son di-
re, ce qui n'est pas besoing de repe-
ter; or au lieu de faire quitter les
maximes claires, & euidentes,
nous les establissons plus fort, n'y
ayant aucune verité, que les Chre-
stiens n'embrassent de bon cœur,
comme procedante de Dieu pere
de la verité.

Voyons le 79^e quatrain, par le-
quel il se moque de ce que nous
disons, que les œuvres de Dieu sur-
montent nostre capacité, & qu'il
n'y a rien de certain que ce que
Dieu a reuelé, & nous a appris, car
c'est cela qu'il appelle songes, &
fables: si bien que si nous voulons
croire à ce rimailleur, la puissance
diuine sera merueilleusement pe-
tite, puis qu'il ne veut pas que Dieu
puisse rien faire, que nous ne puis-

*Reponse**au 79**quatrain.*

sions comprendre, ce qui nous rend égaux à Dieu, car si nous pénétrons tout ce qu'il peut faire, nous en sçaurons autant que luy; nostre science sera donc infinie, donc nous serons des Dieux, ce qui est vne chose tres-ridicule, & impossible.

Je suis fort esbay, comme il s'est tant oublié dans ce quatrain, veu qu'il fait le grand Dialecticien, & le Philosophe; s'il estoit tel, il eust incontinent aperçeu qu'il faut que les obiects respondent à la puissance, or les obiects de la puissance de Dieu sont infinis, & ne se peuvent penetrer qu'en penetrant la mesme puissance; nostre entendement est finy, & limité, & par consequent il ne peut comprendre ny la puissance diuine, ny toutes ses œuvres: qu'il me die si

ce sont fables que cela.

Or que nos sens, & nos raisons nous deçoient, ie n'en veux que mille, & mille experiences, qui se voyent tous les iours, ce que la Perspective, la Catoptrique, & la Dioptrique enseignent assez en ce qui est des objets, & des rayons de la veüe: si nos raisons ne nous trompoient, d'où viendrait qu'à peine peut-on proposer aucune question de Philosophie, qu'il ne se treuve diuerses opinions toutes contraires sur le mesme sujet, lesquelles ont toutes leurs raisons, & neantmoins il n'y en a qu'une véritable. Voyez ie vous prie, lors qu'on propose vn affaire au conseil des Roys, ou mesme dans les plus petites Communautés, combien il se rencontre de diuerses opinions, & de raisons contraires,

il faut donc que quelques-uns soient deceus , & que celuy , par exemple, qui conclud la guerre, se trompe, lors qu'elle apporte plus de mal que la paix, & tout le contraire de ce qu'il se promettoit par ses raisons.

Les Medecins font ils pas le mesme, lors que nonobstant toutes leurs raisons, & leurs consultations, il arriue souuent tout le contraire de ce qu'ils pensoient, & font souuent mourir avec leurs medecines, & leurs seignees ceux lesquels eussent encore vescu plusieurs anneés.

Judith 8. Ozias nous a monsté par son exemple combien nous sommes sujets à estre deceus, lors qu'il ordonna qu'on liüreroit la ville de Bethulie dans cinq iours s'il ne venoit du secours, se fiant par trop
au

au conseil humain, & ne se confiant pas assez en la misericorde de Dieu, c'est pourquoy Iudith reprit ce conseil là fort aigrement. Il ne faut donc pas que le Deïste treuve estrange, si nous disons que nostre raison se trompe souuent, puis que cela est tres-vray, & que nous ne pouuons comprendre les mysteres diuins; cela ne vient pas de ce que la raison repugne à la foy, mais de nostre foiblesse, car il n'y a point de raison qui soit contraire à la foy, puis que Dieu est aussi bien autheur de l'vne que de l'autre. Je défie tous les Deïstes, & tous les Logiciens du monde de pouuoir apporter vne raison qui s'oppose tellement à la foy, qu'on ne puisse les accorder, & monstrier que cette contrarieté est pretendue, & non veritable.

Je croy que vous avez assez veu par ce que nous auons dit cy deuant , que les raisons qu'ils nous oppoſoient , comme forterefſes inébranſlables , ne ſont que Chimeres, & conceptions, ou conſuſions errantes dans quantité de teſtes malſaites , & de cerueaux mal timbrez. Vous voyez donc que c'eſt fort mal à propos qu'il nous reproche l'honneur que nous rendons à Dieu , lors que nous confeſſons ingenuëment que ſes œuvres ſont ſi excellentes, que nous ne pouuons les entendre , ou les penetrer , & que nous proteſtons que noſtre raiſon, pour eſtre trop foible, ou mal deduite, ne peut arriuer à la verité des operations diuines; ce que nous experimentons tous les iours; mais paſſons au 80 quatrain, dans lequel il

monstre qu'il est vn second Espie-
gle, & vn homme sans iugement
de comparer les Chrestiens à ce
belistre: & ne se trompe pas moins
quand il dit que nous vomissons
des iniures contre luy, car bien
que nous eussions toutes les rai-
sons du monde de le faire à cause
de son impieté, neantmoins vous
pouuez voir à nostre façon de pro-
ceder, si on luy vomit des iniures;
nonobstant celles qu'il dit contre
l'Eglise Catholique, que dieu ven-
gera vn iour; ce qu'il auroit desia
fait, n'estoit qu'il attend ce misera-
ble Poëte à resipiscence.

Responſe
au 80.
& 81
quatrieme.

Mais voyons en quoy il nous
compare à cet Vlespiegle; outre
les susdites iniures il veut persua-
der par sa rime, que la religion
Chrestienne n'est point, non plus
que les tableaux de cet homme

feint à plaisir , c'est pourquoy il
taïsche à déraciner la creance de
la religion de l'esprit de ceux qui
ont embrassé la foy de Iesus Christ
nostre Sauueur. Or c'est vne iniure
intollerable, & vn blasphemé exe-
crable de comparer la religion
Chrestienne à des brides à veaux,
car elle est la regle seule, vnique, &
tres-parfaite de tous ceux, qui veu-
lent imiter la vie des Anges, & qui
veulent se rendre semblables par
leurs saintes actiōs au prototype,
d'où ils ont pris leur origine : la re-
ligion est à l'ame ce qu'est l'ame
au corps, c'est elle qui ne nous peut
tromper, & nous empesche d'estre
seduits par les diuerses caprices, &
par les fourbes des Athees, & des
Deïstes.

Prenez garde à l'impieté qu'il
veut faire couler par les sophis-

mes, lors qu'il dit que les Catholiques desirent des personnes qui soient des fouches insensibles pour leur faire embrasser la religion; ce qui est la plus grande imposture qui fut iamais, car les plus beaux esprits, & les plus iudicieux sont ceux qui se captiuent à croire ce qu'il a pleu à Dieu nous reueler, voyans tresbien que leurs sentimens sont trop bas, & trop rauuallez pour les suiure, & se laisser conduire par eux en leurs actions: aussi est-ce vne chose beaucoup plus excellente d'assuiettir son esprit à Dieu, & à ses inspirations, que de le sous-mettre aux sens, & aux obiects exterieurs.

Je sçay qu'une legere cognoissance de la Philosophie peut porter l'inclination à l'irreligion, mais yne plus forte teinture de la mes-

me science la peut aussi ramener, & la reduire à la religion, si on penetre plus auant; c'est en quoy ce rimeur s'est fouruoyé, car sous pretexte qu'il sçait faire quelque enthymeme, ou syllogisme, bien qu'assez mal, & hors de propos, il s'est efforcé de renuerfer le Christianisme, mais s'il eust esté plus sçauant, il eust fait tout le contraire, & se moqueroit de soy-mesme detestant son ignorance, & sa bestise: car son but est de ne suiure rien que ses sentimens, croyant qu'il à plus de lumiere de ce costé là, que du costé de Dieu, & de la religion.

Je vous proteste que j'ay grande compassiõ de ce pauvre estourdy, ie voudrois auoir donné vne partie de mon sang, & qu'il quittât son erreur; ie ne doute point

qu'il n'ayt commis quelques grands pechez, pour lesquels Dieu la puny, & la laissé aller après ses concupiscences.

Pleust à Dieu qu'il r'entraist vn peu en soy-mesme, ie vous conjure de la part de Dieu, si vous retournez à Paris, où vous m'avez dit qu'il demeure, que vous luy representiez le hazard qu'il court d'estre damné avec tous les diables, & que vous taschiez de desabuser tous ceux que vous pourrez decouvrir auoir esté perdus par ses malheureuses opinions, & par ses quatrains, qui contiennent autant d'impietez que de vers, ou peu s'en faut.

Or vous voyez clairement que nous ne desirons pas des buches insensibles, ny des veaux pour estre Catholiques, au contraire les

plus beaux esprits qui embrassent la raison, nous sont les meilleurs, car ils aduoient incontinent que la religion, & ce qu'elle enseigne, est si releué, si saint, & si prisable, qu'il surpasse la raison, non en la destruisant, mais en la perfectionnant: Et puis vous voyez si ie vous ay traicté comme vne fouché insensible, ie vous en fais vous mesme le luge.

LE D. Monsieur, ie ne scaurois que dire la dessus, car vous m'avez fermé la bouche à toutes sortes d'obiections, ie suis parfaitement content; & vous respons que ie n'en demeureray pas là, car si tost que ie seray à Paris, ou ie veux si l'plait à Dieu retourner dans trois ou quatre mois, ie m'en iray le treuver, & si l'ne veut quitter son impieté, ie sçay le moyen

de le faire prendre par la justice, de laquelle il ne peut esperer que le feu pour iuste recompense de son impieté: l'en sçay encore quelques-vns de ce malheureux party, lesquels ie tascheray à ramener à ce qui est de la verité selon qu'il me sera possible.

LE THEOL. Le 82 quatrain ap-
porte vne autre comparaison d'une
nourrice, mais qui est aussi niaise
que les precedentes, & qui meriteroit
que ce rimailleur fust remis au rang
des enfans, pour estre effrayé par le
foüet, puis que la raison ne luy sert
de rien: or bien que les Predicateurs
donnent de la terreur aux meschans
en leur proposant les peines de l'enfer
deuës aux pechez, neantmoins ce n'est
pas pour les effrayer vainement, mais
pour leur faire quitter leurs mau-

*Responſe
au 82
quatrain.*

uaises coustumes, & leur faire embrasser la vertu: ce ne sont pas tant les Predicateurs, que Dieu mesme, qui plante la crainte par sa sainte parole dans nos ames, pour nous faire quitter le mal.

Mais ce rimeur treuve mauuais que Dieu nous vueille ranger sous son diademe, car lors qu'il attribue cela aux Catholiques, c'est afin que son impieté se glisse plus finement, ne s'osant attaquer à Dieu, de peur de se rendre trop ridicule. Les Catholiques n'ont autre diademe que l'honneur de Dieu, lequel est leur couronne, & leur gloire; & lequel ils procurent en tout ce qu'ils peuuent. C'est là leur but & leur intention; c'est leur estude, & leur traual, s'ils sont tels qu'ils doiuent estre.

Que ce Poëte voye donc quel

tort nous luy faisons, & si nous for-
lignons de la droite raison, quand
nous taschons d'amener toutes
sortes de nations au seruice de
Dieu. S'il y a du mal dans vn bon
Chrestien, c'est celuy là; il n'en faut
point chercher d'autre. Si l'impie-
té ne luy silloit les yeux de l'esprit,
il confesseroit ingenuëment que
l'Eglise Catholique est vne vraye
mere nourrice, laquelle nous al-
laiçte de la vraye doctrine qu'elle
a en depost, & ne tourneroit iamais
vne si grande verité en rifee; mais
Dieu le sçaura bien treuuer, & luy
fera ressentir tost, ou tard les pei-
nes deuës à son impieté, par la-
quelle il conclud au dernier qua-
train, que toutes les raisons que
fournit la Theologie en faueur de
la foy Catholique, ne peuuent fai-

re peur qu'aux fots, & aux ignorans.

Response
an 83.
quatrain.

Je vous assure que celuy-la seroit bien sot, & bien ignorant, qui se laisseroit persuader par ce rimailleur, & meriteroit qu'on l'emprisonnast au fond de l'Arcadie, s'il auoit les oreilles si longues, & si grandes que ces blasphemes, & ces impietez, aiguës en subtilité comme vne boule, luy peussent entrer dans l'esprit.

Il faut aussi que vous remarquiez l'impudence de cet homme, qui s'estime tout seul plus capable, que tous les Apostres, que tous les Saints, que tous les Docteurs, que tous les Chrestiens, que tous les Patriarches, & Prophetes, qui ont esté depuis le commencement du monde iusques à present, & qui ont tousiours pro-

uigné la foy, & la religion qu'ils auoient receuë de Dieu; bref il ſe fait plus ſage, & plus clair voyant que Ieſus Chriſt meſme, lequel il accuſe de nous auoir embeguinez d'une fauſſe creance, car c'eſt vrayement de luy que nous tenons la religion, c'eſt par luy, que nous eſperons d'eſtre ſauuez, bref c'eſt celuy là par qui le monde a eſté fait, *verbo domini cœli firmati ſunt; ſine ipſo factum eſt nihil*, & par qui le malheureux Deitte ſubſiſte en ſon eſtre, & en ſes actions.

O Dieu! eſt-il poſſible que vous permettiés qu'un ſi meſchât hôte viue ſur la terre, & qu'il donne ſujet d'un tel ſcandale à vos enfans! iuſques à quand attendez vous à le punir? ſa meſure eſt-elle pas encore pleine? n'a il pas encore aſſez fait de mal-faites luy ſ'il vous plait

la grace de se conuertir à vous, & de quitter tout à fait son erreur, afin qu'il desabuse ceux qu'il a peruertis, & de l'embeguinement qui l'emprisonne emmy si grandes impietez, transportez-le à vne viue foy, & à vne clarté d'esprit, qui luy fasse sentir, aduoüer, recognoistre, & publier à tout le monde, qu'il a esté grandement deceu iusques à present, ou plustost tres-pernicieux, & tres-meschant.

CHAPITRE XXIII.

Dans lequel les penitences, que font les Chrestiens en se chastiant, par diuerses austeritez du corps, sont deffendües contre les obiections des Deistes: & auquel est prouué qu'elles sont fort agreables à Dieu, & leurs quatrains sont refutez depuis le 84, iusques au 89.

LE THEOLOGIEN.

VOYEZ fil y a encore quelque chose dans ce poëme, qui vous fasse de la peine, afin que nous acheuions promptement, car sa longueur commence à m'ennuyer.

LE D. Il reste encore vingt trois

quatrains , auxquels ie desirerois fort que vous eussiez respondu, car ils ont esté cause que iusques à present ie me suis addonné à toutes sortes de plaisirs , quand i'ay peu les prendre sans crainte de chastiment ; si bien que vous redoubleriez l'obligation que ie vous ay desia (si toutesfois vne infinie obligation se peut redoubler) quand vous aurez monstré l'erreur des quatrains suiuaus.

LE THEOL. Ie ne veux pas vous refuser , puis que nous sommes si pres de la fin , & que ie voy que cela vous affermira dauantage dans la religion Catholique, laquelle ce maudit Deiste, & Libertin malheureux s'est efforcé de ruiner par son poëme ; poursuuez donc s'il vous plaist.

LE D.

LE DEISTE.

Quant à ceux que l'on voit se battre & tour-
menter,

Afin de se punir des deffauts de leur vie,
Où treuvent-ils que Dieu se puisse delecter
En l'agitation d'une telle folie.

Si par deuant vn Iuge vn voleur ne scauroit
Se purger de son crime en punissant soy-mesme,
Pourquoy veut le Bigot que Dieu en cet endroit
Donne ce privilege à la sottise humaine?

Se mocqueroit-on pas de voir vn malfaieteur
De Iuge, & de partie entreprenant la charge,
De sa propre sentence estre l'executeur,
Et en représenter l'acte, & le personnage?

Auons nous pas assez de naturels malheurs
Sans nous en inuenter? est-il rien plus inique
Que de nous procurer de nouvelles douleurs,
Ny qui ressent plus vne ame frenetique?

Si Dieu veut enuers nous vser de chastiment
Par des esprits malins bourreaux de sa justice,
Pourquoy veulent ceux-cy vsurper follement
De Dieu l'autorité, & de ceux-là l'office?

LE D. l'ay voulu rapporter ces
s quatrains tous ensemble, parce
qu'ils buttent à mesme fin, com-
me vous voyez, afin que vous
n'eussiez point la peine de rebat-
tre plusieurs fois vne mesme ma-
tiere.

LE THEOL. Vous avez bien
fait; mais commençons vn peu à
taster le poux à ce Deïste, lequel
n'en diroit pas dauantage, s'il auoit
esté gagé pour plaider la cause de
ceux qui ont la peau trop delicate,
le courage trop mol, & qui font
vn Paradis des delices de ce mon-
de: croyez que les penitēces ne luy
ont pas fait beaucoup de mal, car
il s'en esloigne merueilleusement,
& afin qu'vn chacun les fuye, les
haysse, & les ait en horreur, il taf-
che de conuaincre l'esprit, ou plu-
stost le sens par ses raisons. Voyons

les vn peu : La premiere est qu'on ne treuve point que Dieu se dele-
 cte en cette agitation, qui se fait
 en se frappant, & en se macerant,
 lors qu'on veut appaiser l'ire de
 Dieu par penitence : La seconde,
 que ce n'est pas à faire à vn crimi-
 nel de se punir soy-mesme; & qu'il
 ne peut estre juge, partie, & bour-
 reau tout ensemble: La troisieme,
 que nous n'auons que trop de
 malheurs sans nous en procurer
 de nouveaux, autrement que c'est
 estre frenetique, & meschant: la
 derniere, que c'est vsurper l'autho-
 rité de Dieu, & l'office des diables;
 c'est donc à ces raisonnementes qu'il
 faut respondre.

Quand à la premiere il est bien
 ayse de monstrier que Dieu se
 plaist à la peine, & aux douleurs,
 que nous endurons pour luy, ou

4. obie-
 ctions du
 Deiste
 contre les
 peniten-
 ces.

Respon-
 se à la
 1. obiection,
 & au
 84. qua-
 train.

pour ce qui luy appartient, car en cela nous nous esprouuons nous mesmes, afin de voir si nous l'aymons comme il faut; & nous nous preparons en quelque façon au martyre, les penitences que nous faisons pour cet effet de nos propres mouuemens, estant comme les peludes du martyre, si iamais il se presente.

Or sus ie vous veux faire paroître que l'affliction du corps qu'on endure volontairement, est fort agreable à Dieu, de sorte neantmoins que ie ne veux pas rapporter tous les passages de l'Escripture sainte, qui montrent cela euidentement. Je me contenteray de l'exemple de Daniel, lequel pour se rendre agreable à Dieu, se mit à ieusner, & à coucher sur la cendre, & se couurit d'un cilice, ce qui

luy reüssit si heureusement que Dieu luy enuoya vn Ange pour l'asseurer que tout le peuple seroit deliuré; si vous en voulez voir tout le narré, vous aurez vn grand plaisir de lire le neuuesme chapitre de Daniel.

Ceux de Ninie ont fait assez paroistre combien les peines du corps, & les afflictions volontaires sont agreables à la diuine Majesté, car si tost qu'ils eurent affligé leurs corps par ieusnes, & par cilices, Dieu leur pardonna, notwithstanding que Ionas en fust mescontent, pensant que sa prophetie auoit manqué. Saint Paul nous fournit vn passage parlant de soy-mesme dans la premiere Epist. aux Corinthiens, chapitre 4. qui peut fermer la bouche à vostre Poëte, & à tous les Libertins, lors qu'il dit,

ad Cor. 4.

castigo corpus meum, & in servitutem redigo, ce que le texte Grec explique encore avec plus d'emphase, *ὑποτάζω μὲ τὸ σῶμα καὶ δελαγῶμαι*, c'est à di-

re, *ie meurtris mon corps, & le traite comme un esclave*. Il n'est pas besoin de s'arrester beaucoup sur chaque passage, car tout le nouveau Testament enseigne cette verité, & nostre Seigneur en saint Mathieu chapitre 16 nous y con-

Math. 16.

vie, si nous voulons le suiure, *si quis vult venire post me, abneget semetipsum, & tollat crucem suam, & sequatur me*; or il n'y a point de doute que les peines, & les douleurs, qu'il a endurees tant en sa flagellation, que quand on le couronna d'espi- nes, & ailleurs, ont esté la Croix; & par consequent si on veut le sui- ure, il est certain qu'on fait fort bien de l'imiter en ce qu'il a endu-

ré pour nous ; ce qui a fait dire à *ad Galas.*
 l'Apostre escriuant aux Galates 2. & 5.
 chapitre 5. *Qui sunt Christi, carnem
 suam crucifixerunt cum vitijs, & con-
 cupiscentijs* : ce qu'il tesmoignoît de
 soy mesme au Chapitre 2. *Christo
 confixus sum cruci* : c'est pourquoy
 celuy-là qui sera couuert de meur-
 trisseures pour l'amour qu'il porte
 à Iesus-Christ, pourra bien dire
 avec saint Paul : *viuo autem iam non
 ego, vivit verò in me Christus* : car les
 peines que nous endurons, & que
 nous nous donnons volontaire-
 mēt pour imiter Iesus Christen ses
 tourmens, font que nous nous
 marquons de sa liuree, selon l'ad-
 uertissement de saint Pierre en sa
 premiere Epistre chapitre 4. *Christo
 igitur passo in carne, & vos eadem cogi-
 tatione armamini*. Voyla les armes de
 la passion que saint Pierre veut

1. Petri,
 4. & 2.

que nous ayons dans la penſee, & par conſequent à la main, puis que la penſee doit ſervir pour venir à la pratique. Ce qui eſt encore plus exprez au deuxieſme chapitre, lors qu'il dit, *Chriſtus paſſus eſt pro nobis, vobis relinquens exemplum, ut ſequamini veſtigia eius.*

Pleuſt à Dieu que cette verité fuſt entree ſi avant dans l'eſprit de voſtre Poëte, que de railleur qu'il eſt, il devint ſi bon penitent, qu'il ne ſe paſſaſt iour en ſa vie, qu'il ne fiſt vne rude penitence pour l'expiation de ſes péchez, ie vous aſſeure que cela luy ſeroit fort neceſſaire, & luy conſeillerois volontiers, que ſ'il n'a aſſez de courage, de force, ou de reſolution pour ſe punir ſoy-mesme ſelon la grandeur de ſes offenſes, qu'il prenne avec luy quelque bon ſerviteur,

Il a moyen de le nourrir, ou quelque amy qui luy puisse faire ce bon office, le traittant en criminel de leze Majesté diuine sans l'espargner en aucune façon.

Mais apres l'Escripture saincte, il faut apporter quelques raisons, puis que ceux de vostre secte s'efforcent de persuader que c'est sans raison, que les Chrestiens s'affligent le corps, & crucifient leurs membres pour les rendre conformes au corps de Iesus-Christ. La premiere sera donc prise de ce qu'il n'y a rien plus honorable à vn soldat, que d'imiter les proüesses de son Capitaine, or les Catholiques ont Iesus Christ pour leur chef, sous lequel, & par la conduite duquel ils bataillēt, ils ne peuuent donc rien faire de plus genereux que de se couvrir de douleurs, d'af-

*Raisons
pour les-
quelles
les peni-
tences vo-
lontaires
sont loüa-
bles.*

flictions, & de pauvreté pour l'amour de celuy, qui a tant enduré pour eux.

La seconde est parce qu'un homme soigneux de la vertu doit prendre garde que la partie inferieure, sçavoir est le corps avec ses inclinations, & ses appetits, ne surmonte la partie superieure, & fasse la loy à la raison; qui est la plus grande confusion, qui puisse arriuer au Microcosme; or la peine qu'on donne au corps pour rabattre ses mouuemens, & le tenir en bride comme un cheual fort en bouche, sert pour empescher qu'il n'abatte l'esprit, & ne se rende le maistre de l'homme, au lieu qu'il doit estre le seruiteur.

La troisieme est qu'il est bien raisonnable que ceux qui ont offensé Dieu par la volupté du

corps, fassent faire amande honorable à ce corps mesme, afin que *per quæ quis peccauerit, per hoc & puniatur, & quantum fuit in delitijs, tantum & ei tormentum inferatur*: c'est ainsi que Dieu, que la nature, & la raison l'ont ordonné. C'est en ceste façon qu'on satisfait à la iustice diuine à beaucoup meilleur prix, & plus viste que quand on est en Purgatoire, à cause que les peines qui sont icy libres, & volontaires, ont beaucoup plus de pouuoir, que les autres qui sont necessaires, & contraintes.

La quatriesme est par ce que pour vne legere peine que nous nous donnons icy pour l'amour de Dieu, & pour nous rendre conformes à son fils nostre Sauueur, nous receurons vne recompense eternelle en Paradis. Je laisse plu-

siieurs autres raisons, telles que
sôt celles cy; que par ce moyénous
venons facilement au mespris des
delices, & delicateſſes du monde;
que nous supportons plus facile-
ment les peines, & aduerſitez, qui
nous arriuent apres : que nous
pouuons ayder les âmes detenuës
en Purgatoire par ce ſainct exer-
cice de penitence : que nous aug-
mentons le threſor des peniten-
ces, & des ſatisfactions, lesquelles
ſe retreuuent dedans l'Egliſe Ca-
tholique.

Il faut maintenant reſpondre
aux obiections de voſtre Poëte,
car c'eſt par icelles qu'il veut per-
ſuader ſes erreurs, Pour la premie-
re nous l'auons deſia refutee en
monſtrant que Dieu a pour agrea-
ble telles punitions, & penitences
volontaires; i'adioulteray neant-

moins qu'il ne peut est desagrea-
ble à l'auteur de la nature de voir
que ses creatures s'employent à
des exercices, par lesquels elles de-
sireroient de tout leur pouuoit
luy rendre actions de graces, & luy
offrir cliose, qui recompensast le
présent de l'estre, & de tout ce que
nous sommes: de sorte que tout ce
que feront les creatures raisonna-
bles pour cet effect, sera estimé
partir d'une bienueillance, & de
l'action de graces, que nous tas-
chons de rendre à l'Eternel; or les
peines que nous endurons volon-
tairement, & dont il est question,
sont tesmoignages de nostre sou-
mission, & bienueillance enuers
Dieu, car nous voulons monstrier
par là, que nous luy appartenons
tant en ce qui est du corps, qu'en
ce qui est de l'ame; voicy com-

*Tesmoi-
gnage de
nostre
soub-
mission à
Dieu par
l'afflictio
du corps.*

ment : lors que nous auons commis quelque peché, duquel la conscience, & la lumiere de la raison nous reprend, nous voyons incontinent que la mauuaise inclination de la nature corporelle a emporté le dessus sur la raison, & que le commandement de Dieu a esté enfraint par ceste action, & pour monstrier le desplaisir que nous auons de nos offenses, parce qu'elles s'opposent au vouloir de Dieu, nous affligeons nos miserables corps, particulièrement lors que le peché s'est fait par la volupté d'iceluy, afin que nous luy apprenions par experience, puis qu'il n'a point de raison, combien c'est vne chose abominable, & meschante de quitter les commandement du createur pour vne cheti-

ue volupté, qu'on prend en l'offensant.

Et en ceste façon nous reparons tant que nous pouuons l'honneur deu à Dieu; du moins nous tesmoignons que l'action mauuaise nous a esté fort desagreable, puis que nous nous chastions nous-mesmes; & que le corps doit s'employer à recognoistre son createur; les marques de recognoissance sont les peines, & les tourmens que nous luy faisons souffrir pour l'assuietir à la raison, & le soumettre à Dieu: ce qui est tres-iuste, puis qu'il ne depend pas moins de Dieu, que nos ames.

Si ce n'est que vous pensiez qu'il soit iniuste qu'un maistre chastie son seruiteur, lors qu'il luy a desobey; si ce n'est qu'un pere ne fasse pas bien en corrigeant

son fils quand il a manqué à son deuoir; ou que le Capitaine doit estre blasmé, lors qu'il fait subir au soldat, qui a desrobé, la peine deue à vn tel delit; car la raison

Responce est la Maistresse, le Pere, le Capitaine, & le Chef au regard de son
au 85
86 propre corps; mais cela est trop clair, passons à la seconde raison, par laquelle il nie qu'on puisse estre son Iuge, sa partie, & le bourreau de soy-mesme.

Pourquoy non? les Payens mesmes n'ont-ils pas pratiqué cela, lors qu'ils ont fait rendre conte tres-exact à leur ame de ce qu'ils auoient fait toute la iournee? voyez Seneque le Philosophe, & Epicte-te, vous m'aduoirés que beaucoup de grands personnages, qui n'auoient que la lumiere de la raison pour leur guide, & leur fanat, se
 font

sont donné beaucoup de peine tant par leurs abstinences, que par d'autres priuations de volupté, telles que sont les veilles, & le coucher sur la dure, afin de domter les vicieuses inclinations de leur naturel, & d'acquérir la vertu.

La raison pourquoy vne mesme personne peut estre Iuge, & partie, accusateur, tesmoing, & bourreau est par ce qu'il nous appartient de s'indiquer nos propres actions, puis que nous deuons auoir soing de nous-mesmes, & que nous sommes composez de deux parties, sçauoir est de l'ame, & du corps, de l'appetit superieur, & de l'inferieur, de l'homme interieur, & de l'exterieur, de la partie raisonnable, & de la brutale; or puis que la loy naturelle, & la diuine nous obligent de rendre l'appetit

inferieur sujet à la raison, c'est à nous d'auiſer, & de pratiquer les moyens, qui nous peuuent ſeruir à cela, entre leſquels, ſans doute, ſont ceux là, qui domtent la rebellion de la chair, & de ſes concupiſcences, & appetits dereglez, & qui luy ſont viuement reſſentir que ce n'eſt pas en la volupté du corps que conſiſte noſtre ſouuerain bien.

De là vient que nous honorons Dieu par ceſte conſideration, d'autant que nous recognoiſſons par les peines, deſquelles nous chaſtions noſtre corps, & par toutes les autres voluptez, deſquelles nous nous priuôs volontairemēt, que ce n'eſt pas dans les plaiſirs de ce monde que nous mettons noſtre beatitude, mais en Dieu ſeul: & que nous aymons beaucoup

mieux perdre tout le reste, que d'estre frustré de nos esperances, qui nous font attendre le séjour des bien-heureux.

Voyla donc pourquoy la raison fait l'office de rapporteur, & de conseiller pour aduiser qu'elle peine il faut que souffre le corps, & l'appetit brutal, qu'elle a sous sa charge, & en sa curatelle, apres l'auoir couaincu d'auoir esté rebelle à l'esprit, & de n'auoir suiuy la droite raison; & puis l'ayant condamné à endurer cecy, ou cela, elle prend elle mesme les armes à la main, & le punit comme il faut, iusques à ce qu'elle voye que c'est assez.

C'est ainsi qu'il est permis, & *Les pen-
sées per-
mises en
la loy de
nature.* grandement louable non seulement à vn Chrestien, mais à tout homme tant barbare, tant docte,

tant riche, pauvre, fort, ou foible qu'il soit, de se punir apres auoir contreuenu à la loy de nature, laquelle est grauee dedans nostre esprit: & sçay que iamais homme de bon iugement ne reprendra ceste procedure, pourueu qu'il se donne le loisir d'en considerer la raison, la iustice, & l'vtilité.

*Response
au 87
quatrième.*

Venons à la troisieme raison du Deiste, qui est, que c'est estre frenetique de se procureur de nouueaux malheurs apres vn si grand nombre, qui nous tallonnent tousiours; iecroy qu'il ne deviendra pas frenetique en ceste façon, car il a fait vne trop estroite alliance avec les plaisirs. Or vous voyez qu'il choppe des l'entree, car les tourmens que nous embrassons, ne nous sont pas des malheurs, au contraire ils nous

seruent comme d'entree au bonheur, si le bon-heur d'icy bas s'acquiert par la vertu, & par le mespris des voluptez; & si celuy de Paradis s'acquiert par l'amour, & par le tesmoignage d'amour, que nous portons à Dieu, à la vertu, & à tout ce qui plaist à Dieu.

Il faut donc que ce rimeur oste de sa caprice, & de ses quatrains, que ce que nous endurons de bon cœur pour l'amour de Dieu, & de la justice, nous soyent des malheurs; si il se fust souuenu que iamais vn malheur n'arriue que contre nostre volonté, & lors qu'il nous fait perdre vn plus grand bien que celuy qu'il nous apporte, il ne se fust pas égarre en si beau chemin.

Difons donc qu'il ne peut arriuer vn plus grand heur à vn hom-

me dás ce monde icy, que quand il a tellement combattu son appetit deregulé, & rendu son corps souple, & soubmis à la raison, & à la loy de Dieu, qu'il ne sent plus aucune rebellion, ny contrarieté dans soy-mesme, & que l'esprit, & le corps s'vnissent parfaitement pour obeyr à Dieu, & pour embrasser solidement la vertu. Encore ne voudrois-je pas luy accorder que ce qui nous arriue contre nostre gré, fust vn malheur, bien que nous en receuions vn dommage notable, car nous en pouuons faire nostre profit, & pouuons tirer de la force de ce desauantage, pour nous roidir plus fort contre les accidens de cette vie, & accroistre la constance, & la valeur, laquelle est necessaire à vn bon Chrestien pour vaincre les assa^uts du diable.

du monde, & de la chair.

I'estime que ces raisons vous
ont satisfait; mais ie veux respon-
dre par les quatrains suiuians au 87
quatrain de vostre Poëte,

Ce n'est donc augmenter nos naturels malheurs,
Comme va presumant le discours Deist: que
Que de nous procurer les heurenſes douleurs,
Et rien ne reſſent moins v're ame fr:netique.

Car les tourmens par nous volonti:rs embrassez
Ne ſont pas des malheurs; non, malheurs ie n'ap-
pelle

Que les ſeuls maux deſquels nous ſommes op-
preſſez

Contre la Volonté qui s'y treuve rebelle.

L'amour qui nous agite, & les feruens deſirs
De pouuoir obtenir la vie ſouueraine,
Font qu'en tous ces trauaux nous trouuons des
plaiſirs.

Et que nous rencontrons le repos dans la peine.

Ce qui nous fait auoir de tous biens le meilleur,
L'appellerons nous mal? nômerons nous miſere,
Ou malheur ce qui cauſe vn ſouuerain bonheur?
Pour qui toute ſouffrance eſt icy bas legere.

LE D. Pleust à Dieu qu'il vous souuint de tous les autres quatrains, afin de me les donner pour rembarrer le poëme, lequel m'a peruertie avec sa maudite poésie, car ie treuve que ceux-cy sont plus forts, & remplis de meilleures raisons que les siens, pourueu que tous les autres soyent de mesme. Veritablement ie m'estimerois heureux, si vous plaisoit me donner ce poëme.

LE THEOL. Vous sçauiez que ie ne prens pas plaisir à me détourner de nostre suiet iusques à ce que nous ayons acheué, c'est pourquoy ie vous prie d'attendre à la fin de nostre discours, ie vous promets que ie vous le donneray pour vostre consolation, afin qu'il puisse seruir d'antidote aux rimes de vostre Poëte. Mais quittons ce

87 quattrain, car ce n'est pas là, où il met la force de son obiection.

La derniere raison qu'il apporte, semble nous rendre plus insolens que ceux qui vouloient escalader le Ciel en mettant Ossa sur Pelion, ou en batissant la tour de Babel, car il dit que celuy qui se chastie, vsurpe l'autorité diuine. Vrayement cette conception me plaist fort, puis que nous la pouuons prendre pour nous, & guarir la playe par le mesme scorpion, qui l'auoit faite. Il est vray, c'est sous l'autorité de dieu, que nous tourmentons nostre corps, car sans doute dieu nous donnant la raison pour guide, & maistresse de nos actions, il luy a donné quant & quant l'autorité de faire tout ce qui estoit necessaire, afin que le corps obeyt à la loy de l'esprit; de

Responſe
au 88
quattrain.

mesme que le Roy donne la puissance au premier President, & aux autres juges de faire tout ce qui est necessaire pour punir les coupables, & faire que ses ordonnances soyent gardees en son Royaume. Mais il n'est pas vray que nous vsurpions cette autorité, puis que Dieu nous donne cette puissance, si bien que nous en sommes en possession legitime malgré les voluptueux deistes, qui ne cherchent qu'à assouvir leurs appetits brutaux, & sensuels. quelque protestation qu'ils fassent és compagnies esquelles ils ont peur d'estre reconnus, ou repris.

Pour ce qui est de l'office des diables, il n'est pas besoin de nous mettre beaucoup en peine de luy respondre sur ce sujet, puis qu'il ne croit pas qu'il y en ait, toutes-

fois puis qu'il est tres-vray, qu'il y en a, & que vraiment ils tourmentent les damnez, ou que du moins ils les accompagnent dans leur supplice, ie luy respons que ces malins esprits ne nous punissent pas pour nous amender, ou pour nous faire profiter à la vertu, mais plustost pour nous faire desesperer, & quitter toute sorte d'honneur, & de respect deu à Dieu, si bien que c'est fort mal à propos de dire que celuy qui fait penitence, vsurpe l'office des demons, qui ne fuyent, & ne hayssent rien tant que la penitence. Il me semble, qu'il n'y a Deiste au monde qui ne se doie contenter de ses responces; voyez neantmoins si vous auez encore quelque difficulté sur ce suiet.

LE D. Ie n'ay point d'autre di-

ficulté, sinon qu'il semble qu'on puisse conclurre de ce que vous avez dit cy-dessus, qu'il est permis, & louable de se tuer soy-mesme, ou de se faire tuer, car puis qu'on peut s'affliger, & se macerer le corps pour l'expiation de nos pechez, & pour les autres raisons que vous avez deduites, pourquoy est-ce qu'on ne se pourra pas mettre à mort pour les mesmes raisons? ce qui me semble fort estrange, car l'Autheur de la nature ne peut pas prendre plaisir à la destruction de la mesme nature.

*Pourquoy
il n'est
pas per-
mis de se
tuer.*

LE THEOL. Il ne s'ensuit pas de ce que j'ay dit, qu'on se puisse oster la vie, d'autant que le pouuoir que Dieu nous a donné sur nous mesmes, est œconomique, & tel que d'un pere de famille sur ses enfans, ou d'un maistre sur ses disciples,

Ou sur ses seruiteurs , desquels le pouuoir n'a autre but que le bien de celuy qu'ils chastient, sans interest de la vie , dont la seule authorité publique peut disposer. Nostre corps n'est pas moins à nous que nostre ame ; il faut conseruer l'un, & l'autre , & faire en telle façon que la partie la plus noble commande à la plus basse : c'est pourquoy nos penitences doiuent tellement estre reglees , que les operations de la partie spirituelle n'en ressentent nul detrimēt, mais plustost qu'elles en soient aydees , & que les sentimens suivent tout ce que voudra la raison, afin que le corps deuienne en quelque façon spirituel , entant qu'il fuira les actions brutales ne s'addonnant qu'à celles, qui seront necessaires pour cooperer avec

l'esprit, qui porte la ressemblance,
& l'image de Dieu.

Il n'est pas besoin que ie m'estende dauantage sur ce sujet, car la raison naturelle nous fait assez voir qu'il ne nous est pas permis de défaire ce qui n'a pas esté fait par nous, ny par aucun qui depende de nous, tel qu'est nostre corps viuant, qui appartient à Dieu, aussi bien que l'ame, à laquelle il doit seruir d'eschele, & de moyen pour se perfectionner, & se disposer à la gloire eternelle, de laquelle ils iouyront tous deux ensemble, s'ils gardent vne mutuelle intelligence, & s'ils s'entr'aydent à seruir, & honorer leur Createur.

LE D. Il faudroit estre bien insensé, si on ne quittoit ces maudites erreurs, apres auoir entendu les raisons pour lesquelles les bós

Chrestiens s'affligent; pour moy ie ne doute nullement que nostre Poëte ne soit fort ignorant, ou malicieux de combattre ceste sainte coustume, qui est si bien appuyee. Pleust à Dieu que toutes vos responces fussent par escrit, ie me ferois fort de les luy enuoyer, & d'en retenir vne coppie par deuers moy pour desabuser ceux qui sont tombez dans le mesme labyrinthe que moy; si vous plaist prendre la peine de les reduire par escrit, quand nous serons arriuez à l'hostellerie, i'escriray aussi tout le poëme, afin que l'impieté qu'il contient soit estouffee, & renuersee par vos responces, & par vos raisons.

LE THEOL. Monsieur, nous verrons quand nous y serons arriuez: si la commodité me le permet,

ie vous donneray ce contentement, si ie treuve que le discours que nous auons eu par ensemble, soit vtile au public, car comme il y a de malheureux esprits, qui tournent les plus douces liqueurs en poison, il faut prendre garde qu'en pensant estoufer le mal, il ne s'accroisse dauantage.

LE D. Monsieur, vous pouuez asseurement quitter ceste peur, car i'ay souuent apperceu lors que i'estois le plus enfoncé dans ces erreurs, que quand on en a decouuert que'qu'un, tout aussi tost qu'il a commencé a l'esuenter, nous auons aussi tost commencé à le quitter, & à nous ietter dans quelque autre, demeurans tous estonnez, & comme estourdis.

Je ne sçache rien qui ait tant de force pour retenir dans l'aveuglement,

ment, & dans l'erreur ceux qui y
sont entrez par des voyes screttes,
& par des papiers courant sous
main entre les confidens, que de
n'euerter point le secret, & l'im-
pieté, car cepédāt que i'ay tenu ce
poème caché, & que i'ay creū qu'il
n'y auoit que peu de gēns curieux,
qui en eussent la cognoissance,
i'ay esté si presomptueux, & si ar-
rogant, que ie n'estimois person-
ne capable de mon entretien, ny
qui eust vn bel esprit, que ceux qui
suiuoient, comme moy, la doctri-
ne de ce poème; mais aussi tost
que ie vous l'ay decouuert, il me
paroist maintenant si sot, & si bru-
tal, que ie ne l'estime digne d'autre
chole que du feu, non plus que son
auteur. Je ne doute pas qu'il n'en
arriue autant à tous ceux qui ver-
ront vos responses, de sorte que ie

ne croy point qu'il puisse arriuer vn plus grand bien pour desàbuser tous ceux qui sont de cette cabale, que de faire voir le iour à ce discours.

LE THEOL. Nous àduiserons à cela avec plus de loisir, quand nous serons à la fin, cependant poursuiuez le reste de ces quatrains, afin que nous couppions toutes les testes de cet hydre.

CHAPITRE XXIV.

Dans lequel les quatrains des Deïstes
sont renuersez depuis le 89 iusques
au 101: & est monstre que les Chre-
stiens ne seruent pas Dieu par hy-
pocrisie: que les Religieux ne sont pas
oyseux, & qu'il est bon de s'abstenir
de beaucoup de choses pour l'amour
de Dieu.

LE DEISTE.

Ils sont hors du sens de se feindre la pieté,
& d'en faire vne Comedie, de nous masquer
Dieu, & de se moquer de nostre auenglement. LXXXIX.

Puis qu'ils se moqueroient d'un respect
controuue par les ignorans, pourquoy ferons
nous conte de leur enuers Dieu? XC.

Ils tournent les yeux au Ciel en fletz de va- XCI.

nité, sur laquelle leur vertu est fondée, & sont si impudens qu'ils parlent plus irreueremment de Dieu, que du moindre du monde.

2C11. N'importe point à Dieu qu'ils quittent le fauceurs qu'il leur fait, car ils font cela pour vsfer en oysuete des douceurs, ausquelles leur appetit les porte dauantage.

LE THEOLOGIEN.



O v s ces quatrainz icy ne font que calomnies, & impostures, car tout cela est tres-faux; commençons à le monstrier par le premier, où il dit que nous faisons vne comedie de la pieté, comme si nous croyions le contraire de ce que nous disons, ou de ce que nous faisons, & qu'en nostre ame nous

creussions qu'il n'y auroit point de Dieu ; c'est là le sublimé de la malice des Athees, & des Deistes, lesquels taschent de persuader à ceux qu'ils treuuent disposez à leurs erreurs, que les Catholiques scauans croyent tout au rebours de ce qu'ils preschent, ou de ce qu'ils font : car voyant que les predicateurs decreditent entierement leurs opinions erronees, & profanes tant par la viue force de leurs discours, que par le bon exemple de leur vie, ils veulent qu'on croye que tous les beaux esprits sont de leur aduis.

Il ne faut donc point de res-
ponse à ce 89 quatrain, c'est assez de le ^{Response}
nier tout à fait, car il n'est pas veri-^{au 89}
table qu'aucun Chrestien estime, ^{quatrain.}
& croye autrement qu'il ne dit,
ou qu'il ne fait : il ne monstre rien

par ses œuvres, ny par ses discours, qu'il n'ait au cœur, estant fidele, & sincere en sa deuotion, & en tout ce qui appartient à la pieté, sans aucune feinte, ou hypocrisie, quoy que ce rimailleur bouphon s'efforce de tourner tout ce qui est de plus saint en raillerie, & en comedie. Le Chrestien est bien esloigné de se moquer de ceux qui croient en Dieu, & en Iesus Christ son Fils vnique, & qui suiuent tout ce que commande l'Eglise Catholique, car il est grandement fasché de voir des personnes si meschantres, qu'elles se moquent de tout ce qui appartient au seruice diuin, & qui veulent faire à croire, que ceux qui seruent Dieu de tout leur cœur, ne le font que par vn semblant, par feinte, & par hypocrisie. Assurez vous que c'est là la plus

grande fourbe, qui fut iamais : & vous proteste que ie suis prest de mourir pour cettere verité, sçauoir est que tous les vrayz Chrestiens disent, & font serieusement tout ce qui appartient à la religion, comme ils le croient ; & n'y a pas vn seul parfait Chrestien, qui ne soit disposé à mourir pour la defense de la mesme verité, sçachant par la certitude de la foy diuine, qu'il est aussi veritable que la religion Catholique est la vraye, & vnique, laquelle Dieu approuue, en laquelle il se plaist, & laquelle Iesus Christ Fils de Dieu viuant a plantee par son sang, par ses miracles, & par ses predications, comme il est veritable que Dieu est, car il n'y a que Dieu seul, qui puisse faire les merueilles qui ont esté faites en toutes sortes de façons,

pour tesmoigner la bonté, & la vérité de nostre religion.

Je demanderois volontiers à ce malheureux deïste, si il estime que ce soient feintes, ou hypocrisies que les supplices des Martyrs, les austeritez des Confesseurs, la chasteté des Vierges, pour laquelle elles sont mortes si courageusement : le trauail des Docteurs, tels que sont saint Hierosme, saint Augustin, saint Chrysostome, & mille autres, qui ont vsc leur vie à la gloire de Dieu, s'abstenant des plaisirs de ce monde: ie laisse la nudité des Capucins parmy le froid, la solitude des Chartreux, & la constance des Iesuites au martyr, la pluspart desquels auoient esté nourris dans les delices chez leurs parens, & qui pouuoient se reposer à leur ayle, & se donner du bon

temps, lesquels neantmoins ont
preferé l'amour de Dieu, & le zele
de la religion Catholique à tout
cela. Je n'ay pas peur que vostre
Poëte les puisse accuser d'igno-
rance, de legereté, ou de malice,
car leur suffisance, leur doctrine,
leur preud'homie, leur constance,
& la saincteté de leur vie font as-
sez paroistre qu'ils sont hors de
tout soupçon; s'il ose dire le con-
traire, tous les hommes de bon
iugement, & tous ceux qui ont
l'esprit bien fait, s'esleueront con-
tre luy, & tesmoigneront qu'il a la
ceruelle renuersee, & qu'il est in-
digne de viure parmy les hom-
mes.

Pour ce qui est du 90 quatrain,
à peine sçauroit on deuiner ce
qu'il veut dire, si ce n'est qu'il
vueille comparer l'honneur que

nous portons à Dieu , & la façon, par laquelle nous seruons à sa gloire, & à la grandeur de sa Majesté, à quelques façons de viure , & de croire , que quelques idiots auroient controuuees , & establies par leur ignorance ; & par consequent comme nous nous moquerions de ce respect , aussi les Deïstes s'offencent du respect que nous portons , & maintenons sur peine de nostre vie , qu'un chacun doit porter à Dieu , & taschent de persuader à leurs confidens qu'un chacun se doit offenser des façons, dont l'Eglise Catholique se sert, pour monstrier le respect qu'il faut porter à Dieu.

Mais cecy n'est que la mesme chanson repetee du quatrain precedent, car il est impossible que la religion Chrestienne soit vne chose controuuee , autrement

Dieu ne l'eust iamais approuuée par tant de miracles, comme il a fait; & puis il n'y a chose aucune en toute nostre religion, qui ne soit bonne, sainte, & raisonnable; qui ne cōduise à la vertu, & à l'horreur du vice; si bien que s'il estoit possible qu'elle eust esté treuuee par les hommes, & que Dieu ne l'eust pas instituee, encore faudroit-il la retenir, puis qu'il est impossible d'en auoir vne meilleure, comme ie pourrois monstrier par toutes ses parties, & par tous ses axiomes; ie défie qui que ce soit de me pouuoir obiecter vne seule chose dans toute nostre religion, qui ne soit conforme à la raison, à l'équité, à l'honnesteté, à la vertu, & à Dieu mesme, qui est honoré par toutes, & chacunes des actions du vray Chrestien, & du fidelle Catholique.

*Reſponſe
au 91
quatrain.*

Le quatrain nonante-vniefme ne butte qu'à faire croire que les Chreſtiens n'ont autre choſe que vanité dans la teſte, lors qu'ils eleuent les yeux au Ciel, ce qui eſt auſſi faux, comme ce qu'il a dit au precedent, car en ces eleuations il teſmoigne qu'il n'attend ſon ſecours, & la gloire eternelle que de dieu createur du Ciel, & de la terre. Pour l'impudence, dont il nous charge, elle ne peut retomber que ſur luy-mefme, puis qu'il eſt tres-faux que nous parlions de dieu irreueremment, car lors que nous en diſcours, c'eſt avec tout le reſpect qui nous eſt poſſible. Mais ſçauiez vous pourquoy il dit cela? Aſſeurément il penſe à la juſtice, de laquelle il voudroit dépouiller la diuinité, afin qu'il peult plus librement ſe porter à toutes

fortes de vices fans aucune crainte d'estre châtié, & fans aucun scrupule; voyla seulement à quoy vise ce sardanapale.

Enfin il attaque, ce semble, de plus pres en son nonante deuxiesme quatrain ceux qui abandonnent les voluptez, & les plaisirs du monde, & de la chair, & qui se priuent de beaucoup de choses pour l'amour de dieu. Vrayement on sçait bien qu'il n'importe à dieu que nous nous abstenions de cecy, ou de cela, car il ne reçoit rien, ou ne perd rien, soit que nous fassions, ou ne fassions pas cecy, ou cela. Mais c'est à nous qu'il importe, parce que tant plus nous ferons, ou que nous nous abstiendrons de choses indifferentes pour l'amour de dieu, tant plus ferons nous heureux.

*On se
peut ab-
stenir des
choses in-
différen-
tes pour
l'amour
de Dieu.*

Il est vray que Dieu nous présente l'usage de ce qui est icy bas, & qu'il a créé tout le monde pour servir à l'homme, mais il ne nous a pas obligé de nous servir de toutes choses; il a laissé cela nostre choix, celles-là estans propres pour l'un, celles cy pour l'autre. Or il faut remarquer qu'il a voulu qu'elles nous servissent principalement pour nous acheminer, & nous élever à luy, & aux choses spirituelles, & éternelles; si bien que si nous treuons par expérience, & par l'advis de personnes sages, & sçauantes, que nous abstenans de cecy, ou de cela, nous avancerons davantage à la vertu, & nous nous élèverons plus facilement à Dieu, il est raisonnable que nous quittions ce qui nous eust retardé de ce progres ver-

tueux, pour lequel Dieu nous a particulièrement creéz.

Les ieunes hommes qui se retirent dans les religions bien viuantes, lors que leur vocation est diuine, ne s'y mettent pas pour quelque plaisir sensuel, autrement il faudroit qu'ils y vissent d'autres amorces que les peines, & la pauure chere qu'on y fait; au contraire ils s'y retirent comme à vn port de leur salut, à cause de la sainte vie qu'on y mène, & afin que par les austeritez, qu'ils esperent y pratiquer avec les autres, ils satisfassent pour les fautes qu'ils ont commises estant au monde parmy les compagnies, qui sont le plus souuēt causes de ce qu'on offense Dieu. C'est pourquoy ie nie qu'on entre dans les Monasteres pour viure en oysiuete, ou à cause que l'appetit

Pourquoy
les ieunes
hommes
entrent
en reli-
gion.

nous y porte , si ce n'est que par l'appetit , il entende le raisonnable , qui a presté l'oreille aux conseil diuins , & qui se porte à embrasser la Croix de Iesus Christ pour s'en rendre le disciple , & l'imitateur.

C'est vn erreur inueteré dans l'esprit de plusieurs , que les Religieux passent leur temps en oyssiueté, ie ne veux autre chose pour persuader le contraire , sinon que ces Deïstes , & ces Libertins , qui ont cette opinion , viennent vn peu demeurer huit , ou quinze iours parmy les Religieux , & qu'ils pratiquent ce qu'on y fait , ils verront si on y passe le temps , comme ils s'imaginent. Les liures , les predications , les inimitiez reconciliees , la visite des prisons , & des malades , & mille autres bonnes
œuvres,

œuvres, esquelles ils passent leur temps, monstrent assez qu'ils ne fuyent rien dauantage que l'oyseté : s'il s'en treuve quelques vns qui soyent oyseux, ie suis content qu'on les despouille de l'habit du saint Ordre, qu'ils portent, auquel ils font vn tel deshonneur. Il est donc certain que les bons Religieux n'entrent point dans les Monasteres pour estre oyseux, ou pour contenter leur appetit sensuel, mais pour seruir à Dieu purement, & de tout leur cœur; pour les mauuais ie ne les excuse point, au contraire ie desire qu'ils soyent punis, & qu'on les iette dehors, s'ils ne veulent s'amender, & correspondre à la volonté de Dieu, & à leur vocation; poursuiuez sil vous plaist.

LE DEÏSTE.

*Celuy-là seroit-il loüable qui refuseroit vne
XLIII. viande exquise de la main d'un grand qui l'au-
roit appellé à sa table?*

*XCIV. Celuy-là nous refuseroit-il vne obole, qui
nous voudroit estreiner d'un million d'or? Dieu
nous pourroit il plaindre vne chose frivole, s'il
nous veut donner un regne infiny?*

*XCV. S'il faut esperer que nous iouyrions du Pa-
radis apres ceste vie, ne devons nous pas user des
delices de ceste vie en attendant celles de l'autre?*

*XCVI. Bref si Dieu permet que nous usions des
sensibles effects de sa beneficence, pourquoy les
refuserons nous, & luy en dénierons nous nostre
reconnoissance?*

*XCVII. Vous voyez donc de tout ce que dessus, qu'il
faut fuir l'impie erseignement du Bigot, &
imiter la pïste bien-heureuse du Deïste.*

LE THEOL. le vous assure que

ce Poëte prend beaucoup de peine pour neant, car il ne faut point de raisons pour persuader aux hommes qu'ils se donnent du bon temps, & qu'ils se seruent de toutes les creatures, car ils passent bien au delà, puis qu'ils en abusent à tout propos: il seroit icy beaucoup plus necessaire de retrancher, que d'ajouter. Or tous ces quatrains buttent à persuader qu'il ne faut pas s'abstenir d'aucune chose, que demandent nos yeux, nos mains, & tous nos autres sentimens, tant le iour, que la nuit, car leurs objets nous viennent au deuant, & Dieu a créé tout ce qui estoit necessaire pour les assouir: Voyons ses raisons, entre lesquelles la premiere est, que celuy-là est vn sot, qui refuse vne viande de la main du maître, qui l'a conuié à son banquet:

4 raisons,
ou obie-
ctions du
Deiste.

La seconde, que Dieu ne veut pas que nous refusions de prendre les voluptez du corps, puis qu'il nous reserve de plus grands biens: La troisieme, qu'il faut user des plaisirs de ce monde icy en attendant ceux de l'autre: La quatrieme, qu'il ne faut pas refuser l'action de graces à Dieu pour les sensibles effects, qu'il nous donne icy bas, & par consequent qu'il en faut user: ce que faisant, le Deïste qui se donne du bon temps tant qu'il peut, conclud que celuy qui ne prend pas ce plaisir, est impie, & qu'il n'y a que luy seul, qui suive le bon chemin

La premiere raison n'a aucune force, parce que Dieu n'a pas la mesme intention en nous donnant les biens de l'ame, ou du corps, que le maistre presentant

vne viande exquisite à celuy qu'il a conuié, parce que celuy-cy donne la viande afin qu'on la mange, & Dieu nous donne les biens, à ce que si on treuve expedient de s'en seruir, qu'on en vse, autrement qu'on les laisse. Et puis Dieu n'a pas fait les biens de ce monde en telle façon, qu'il vueille qu'un chacun vse de tous ceux qui sont au monde, car cela ne peut pas se faire; & ce qui est bon pour l'un, est souuent mauuais pour l'autre: il faut donc que nous y apportions de la discretion, & de la moderation.

Je passe outre, & di que Dieu a créé plusieurs biens à dessein, afin que nous ne nous en seruions pas, car il a preueu, que quād nous aurions tel, & tel bien en nostre puissance, que nous nous en abstien-

*Il est bon
des'abste-
nir de
l'usage
des biens
que Dieu
nous don-
ne.*

drions pour l'amour de luy, ce que faïsans nous l'honorons dauantage, que nous ne ferions en nous en seruans, parce que nous montrons par là, que nous faisons plus grand estat de Dieu, que de tout autre bien, & que tout ce qui est au monde, ne nous est rien au prix de luy. C'est pourquoy voyans que mille plaisirs, qui sont au monde, nous empeschent de contempler ses grandeurs, & ses perfections, & de vaquer continuellement à son seruice, nous quittons vne partie des plaisirs de cette vie, qui plus, qui moins selon l'amour que nous portons à Dieu, pour tesmoigner que nous n'auons aucun plaisir solide qu'à le seruir, & à passer toute nostre vie à contempler ses merueilles.

Or puis que Dieu ne nous a pas

obligez à nous servir de tout ce qu'il a fait, & qu'il ne demande rien davantage de l'homme, que son cœur, & son amour, il ne faut pas blasmer ceux là, qui quittent les voluptez sensuelles, à ce qu'ils se portent à dieu avec plus d'affection, & d'ardeur, duquel les diuerses affections enuers les creatures nous excentrent bien loing, car tant plus la puissance finie s'estend à diuers obiects, & moins est-elle puissante pour vn chacun, si bien qu'il n'est pas possible d'aymer Dieu parfaitement, si on ne détache son affection de toutes les creatures; desquelles comme il est permis d'vser, aussi est-il bien facile d'en abuser, si on n'y prend garde de bien pres.

C'est pourquoy plusieurs en quittent l'vsage, de peur qu'ils ont

d'en mes-vser, faisans comme ceux
 lesquels de peur qu'ils ont de pe-
 rir dans la mer, ne veulent seule-
 ment pas approcher des falaises,
 de la rade, & des bords. Vous voyez
 donc que ce Deiste prend les cho-
 ses tout au rebours de ce qu'il faut,
 & que les Religieux sont grande-
 ment louïables de s'abstenir des
 plaisirs, qui sont cause que tant de
 personnes se perdent, & deuien-
 nent pires que les bestes brutes
 par leurs impudicitez, & leurs
 autres pechez. Ce seroit assez pour
 satisfaire à tous ces quatrains, mais
 afin qu'il ne demeure rien en ar-
 riere, voyons le nonante-quatrief-
 me, qui suit, & contient la seconde
 pretenduë raison.

*Response**au 94**quatrain.*

Je l'appelle *pretenduë*, parce
 qu'elle est nulle, car bien que Dieu
 nous vueille donner la couronne

d'immortalité, ce n'est pas à dire qu'il vueille que nous nous donnions du bon temps en ce monde; au contraire il veut que nous endurions, & combattions icy, car la couronne ne se doit donner qu'aux victorieux; or ce n'est pas vn combat de nous abandonner aux plaisirs, c'est plustost manque de courage, & vne foiblesse d'esprit, qui cede à l'appetit brutal, le combat estant entre le corps, & l'esprit.

Il faut respondre la mesme chose à la troisieme raison, car les voluptez de ce monde ne sont ny le chemin, ny l'entree des plaisirs de l'autre: c'est pourquoy les Deistes se trompent lourdement de penser qu'ils seront icy bien heureux, & en l'autre vie: car il est tres-certain qu'il n'y a rien pour eux en

l'autre monde, qu'une damnation
eternelle. Le Fils de Dieu nous a
monstré une autre voye, ne propo-
sant autre chose pour entrer en Pa-
radis, qu'espines, que douleurs,
que macerations, que croix, qu'in-
jures, & calomnies, qu'il faut en-
durer icy, pour iouir du bon-heur,
qui nous est préparé là haut.

C'est là la piste que les hommes
les plus saincts, & les plus doctes,
qui furent iamais, ont suiuy pour
estre sauuez; c'est la voye, par la-
quelle ont marché tous ceux qui
ont prophetisé, & fait des mira-
cles; bref c'est le chemin royal,
dans lequel on ne s'égarre iamais,
& au bout duquel on treuve la
grande Cité de la celeste Ierusa-
lem, dans laquelle sont tous les
plaisirs, & tous les contentemens
qui se peuvent desirer.

Pour la quatriefme raifon elle fuppoſe vne choſe fauſſe, car nous recognoiſſons ces faueurs, & rendons graces à Dieu pour tous les bienfaits qu'il reſpand ſur nous, & ſur toutes les creatures, bien que nous n'vſions pas de tous, ſi ce n'eſt que vous appelliez *uſage*, qu'ad ils nous ſeruent pour meriter en nous abſtenant pour l'amour de celuy qui nous les a donnez. Or n'eſtant pas beſoin de ſe ſeruir d'une choſe, pour en remercier le donateur, ce Poëte ne ſçauroit que repartir, bien que celuy qui donne, fuſt quelque homme, ou le maiftre du banquet, lequel n'a pas intention, que celuy, à qui il preſente quelque morceau exquis, le mange, ſ'il iuge d'autre part, que cela luy feroit tort, ou qu'il n'en a pas beſoin pour ſe ſuſtenter.

De tout ce que dessus ie conclu, que toutes & quantesfois qu'on s'abstient de quelque plaisir pour estre mieux disposé à servir Dieu, & à contempler son excellence, qu'on fait fort bien; & que toutes & quantesfois qu'on apperçoit que les plaisirs nous emportent au desordre, & au mal, qu'on est obligé de les fuir, & de s'en abstenir, ou tousiours, ou pour quelque temps. Et mesme que tant plus on se priue des plaisirs de cette vie, & plus est-on apte à la vertu, & plus agreable à Dieu, si bien que le Deiste est fort loing de son conte, qui concluoit dans son 97 quatrain, qu'il estoit le plus heureux du monde, parce qu'il s'abandonnoit à toutes sortes de voluptez & de passetemps.

Il ne faut que retourner la pro-

position pour dire la verité, ſçauoir eſt, qu'il eſt le plus miſerable du monde, de ſ'aſſouuir brutale-ment de tout ce que ſa chair, & ſon appetit luy ſuggere, faiſant de ſon ventre ſon Dieu, & ne teſmoignant par aucun labeur, l'obligation qu'il a à ſon Createur. Croyez qu'il ne ſeroit pas difficile de perſuader cette pretenduë religion à tous ceux qui ont fait banqueroute à la vertu, & à l'honneſteté, car elle mène le grand galop à toutes ſortes de lubricitez, d'ordures, & de vilenies. Quittons cét impie, & ces maudites penſées, ou acheuons vitement ce qui reſte de ſa peruerſe doctrine, afin de nous eſgayer en d'autres diſcours plus ſerieux, plus agreables, & plus honneſtes.

LE DEISTE.

XCVIII *Le Bigot ne fait rien que sous esperance d'estre recompensé, & ne fuit pas le vice si ce n'est pour euiter le supplice deu à son méfait.*

XCIX. *Et s'effraye de Dieu, comme les enfans d'un monstre espouuantable, & le blasme par tout sous pretexte de louer sa justice ineffable.*

C. *Il est le seul ennemy iuré de sa propre lumiere entre les ignorans, ne voyant pas les erreurs que les ans ont enfantez, & qui detiennent son ame prisonniere.*

LE THEOL. Il faut icy vn peu examiner ce qu'il veut dire par le *Bigot ignorant*, afin que nous découvrions mieux toute la malice, & la ruse de ce rimeur. Par vn *Bigot*, qui est vne diction, qu'on dit que Calvin à le premier inuentee, on peut entendre deux sortes de

personnes : Les vnes, qui ont vne
vraye deuotion reglée selon la vo-
lonté de Dieu, & suiuant les loix
de l'Eglise, & la direction d'un
homme sçauant, & vertueux, tels
que sont ceux-là, qui communient,
& se confèssent souuent, afin d'aug-
menter leurs vertus, & de tenir
leur ame plus pure, & plus nette,
& qui font tous les iours vne de-
mie heure de meditation tou-
chant les mysteres diuins, & l'exa-
men de leur conscience ; qui ne
voudroient pas auoir manqué à
vn iour de ieusne, ou à la Messe aux
Festes, & aux Dimanches, & qui
pratiquent le plus exactement, &
le plus diligéement qu'ils peuuent,
tous les commandemens de Dieu,
& de l'Eglise Catholique, ou qui
suiuent les conseils diuins pour se
perfectionner dauantage, & imi-

*significa-
tion du
mot de
Bigot.*

ter de plus pres le Fils de Dieu en se rendans conformes à tout ce qu'il a enduré pour nous.

Si vostre Poëte parle de ceux-là, comme il y a de l'apparence, son quatrain est aussi faux, comme il est faux que le blanc soit noir, ou que la lumiere soit les tenebres, car le vray Catholique agit principalement pour l'amour de Dieu, n'ayant autre but que de luy agréer ; il ayme tellement la vertu, qu'il aymeroit mieux mourir que d'en quitter le desir, l'affection, & la pratique, de sorte qu'il ne viuroit pas moins vertueusement, bien qu'il n'y eust ny enfer, ny Paradis, se contentant que ses actions soyent conformes au vouloir de Dieu, qu'il conçoit comme son souuerain createur, son pere, son maistre, & son protecteur, de qui il dépend

dépend plus que la lumiere ne dépend du Soleil: si bien que tout ce qui est dans ces trois quatrains, ne luy peut estre attribué.

Voyons maintenant l'autre sorte de *Bigots*, lesquels on peut prendre pour deux ou trois sortes de personnes, sçauoir est pour ceux qui feroient scrupule de ne dire pas leurs heures, ou leurs chapelets, & ne font pas scrupule de tempester, de iurer, de blasphemer, de mentir, & de mesdire de tout le monde: on pourroit encore icy rapporter tous ceux qui s'abstiennent d'offenser Dieu en petites choses, comme en paroles oïseuses, & en mensonges legers, faisant semblant d'estre fort deuots, & en derriere sont pires que des diables, & traistres comme Iudas, faisant des choses, qu'il n'est seule-

ment pas licite de penser. On peut encore icy mettre tous ceux-là qui viennent iusques à la superstition.

Or nous n'approuuons point ces sortes de gens , au contraire nous les detestons, & les auons en horreur ; mais il semble que ce Deïste n'ait autre intention que de rendre la religion Catholique odieuse, & de faire que les bons Chrestiens soyent mesprizez par tout le monde, car bien que tout ce qu'il dit en ces quatrains ne conuienne à pas vn Catholique viuant comme il doit, neantmoins les quatrains precedens ne font que trop paroistre son intention. C'est pourquoy ie luy responds à cela, que tout ce qu'il dit n'est qu'imposture. Qui ne soit ainsi, prenez quelque Chrestien le plus idiot, que vous pourrez, & l'inter-

rogez fil s'effraye de Dieu, & fil en
 a peur comme d'un monstre; sur
 ma vie, il vous respondra inconti-
 nent, qu'au contraire de s'effrayer,
 qu'il a toute son esperance en luy,
 & qu'il n'a iamais vne plus grande
 consolation, ny vn plus doux re-
 pos, que quand il a recours à Dieu,
 & eleue les yeux, & l'esprit vers sa
 diuine bonté, & la grandeur: &
 lors qu'il apprehende sa justice in-
 finie, cela n'engendre autre chose
 dans son esprit, qu'une compun-
 ction, & vne douleur d'auoir of-
 fensé cette bonté eternelle de
 Dieu, & vne grande reuerence
 enuers la diuine Majesté, ou vne
 crainte d'estre damné, laquelle le
 fait reuenir à soy, luy fait conce-
 uoir vne haine contre le peché, la-
 quelle ayde à le remettre en grace
 avec Dieu; il sçait que la justice

*Quels
 mouue-
 mens a le
 Chrestien
 quand il
 contem-
 ple la ius-
 tice diui-
 ne.*

infinie de dieu est aussi bien pour recompenser les bons , comme pour punir les meschans , si bien qu'un vray Catholique iettant l'œil sur cette iustice recompensante , n'a point sujet de s'effrayer, tenant desia par esperance la couronne de l'immortalité.

2 fausses
accusa-
tions du
Deïste.

Mais ie vous prie de prendre garde au nonante huietieme quatrain, dans lequel il veut persuader deux choses: La premiere est, que le Chrestien ne fait rien que pour la peur qu'il a de l'enfer, ou pour l'esperance du Paradis; La seconde, qu'il veut tirer de la premiere, est que ce qu'on fait par crainte, ou par esperance, ne sert de rien. Or l'une, & l'autre est fausse, car pour ce qui est de la premiere, qui ne sçait que les Chrestiens font leurs actions pour l'amour de

Dieu, & non pour la recompense,
ou pour la peur? En voulez vous
des tesmoignages pris des Chre-
stiens mesmes, lesquels vous ne
sçauriez refuser, ou reprocher;
Voicy les paroles de saint Augu- Traict 2
stin, *Quia gratis dedit, gratis ama, noli* sur saint
ad præmium diligere Deum, ipse sit præ- Jean.
mium tuum. Saint Bernard n'en dit l. de dili-
pas moins par ces paroles, *Licet Deo* gendo
seruire sine premio non possit, non ta- Deo.
men est ei intuitu præmij seruendum;
& par apres, *seruiamus Deo in charita-*
tate quæ timorem expellit, laborem non
sensit, præmium non requirit, meritum
non intuetur.

Je ne veux pas m'amuſer à rap-
porter vne infinité de semblables Que les
passages de tous les docteurs de Chrestiens
l'Eglise, pour preuuer cecy, car font leurs
c'est vne doctrine, & vne couſtu- actions
me si receuë parmy les Chrestiens, pour l'a-
mour de
Dieu.

que tous sont d'accord qu'il faut faire nos actions l'amour de Dieu, & qu'il le faut servir parce qu'il est souverainement aimable, & digne d'un amour, & d'un honneur infiny. C'est cet amour qu'on appelle pur, chaste, & amour de bienveillance, lequel est si recommandé parmy nous, que nous disons, que celuy là offenseroit Dieu mortellement, qui aymeroit seulement Dieu à cause de quelques biens, soit temporels, soit spirituels, qu'il auroit receus de luy, car pour lors il aymeroit plus ces biens qu'il n'aymeroit Dieu, puis que selon la maxime commune, *propter quod unumquodque tale, & ille magis*. Or il n'y a pas moyen de preferer quelque chose que ce soit à Dieu, sans offenser sa diuine Majesté, ny sans meriter les peines eternelles de

l'enfer : par où vous voyez combien nous detestons ce que ce malheureux nous vouloit imposer dans son nonante-huictiesme quatrain.

*Qu'il est
permis de
bien faire
pour l'es-
perance
de la re-
compen-
se, &
pour la
crainte de
la peine.*

Venons au second poinct, & disons qu'il est permis à vn Chretien de faire bien à cause de l'esperance qu'il a d'estre recompensé en Paradis, & pour la crainte qu'il a d'estre damné, pourueu que ce ne soyent pas là ces principaux motifs ; la raison est parce que quand il est question de deux biens qui ont quelque rapport entr'eux, il est permis de rapporter le moindre au plus grand, or les actions que nous faisons icy, ont vn rapport avec la recompense que Dieu nous a promise, & sont moindres que cette recompense, qui est la beatitude eternelle, con-

cluez donc que nous pouuons faire nos actions pour la recompense, pourueu qu'elle ne soit pas nostre derniere, & nostre principale fin.

Elle ne sera pas nostre fin, si nous la rapportons à Dieu, & si nous sommes tellement disposez, que nous ne lâissassions pas d'aimer Dieu plus que toutes choses, encore qu'il n'y eust ny peine, ny recompense. Je veux fermer cette verité par l'anatheme du Concile de Trente, lequel excommunie tous ceux qui disent qu'on offense, lors qu'on fait quelque chose pour la recompense: c'est à la 6 session, Canon 31, *si quis dixerit iustificatum peccare, dum intuitu æternæ mercedis bene operatur, anathema sit.*

Pour ce qui est de la crainte, c'est yne chose tres-certaine, qu'elle

le ayde à nostre conuersion, car
c'est elle par laquelle nous parue-
nons à l'amour de Dieu, & qui Sap. 1. &
Ps. 110.
nous fraye le chemin de la sages-

se, *Initium sapientia timor domini.*

Est-il pas vray que la foy, & la reue-
lation diuine a esté necessaire
pour nous faire croire les peines
eternelles deuës aux damnez? or

tout ce qui vient de la foy, & tout

ce qui se fait par son mouuement,

est bon, & sert à nostre salut; c'est

pourquoy saint Clement Ale- 2 Stromas.

xandrin a fort bien dit que, *fides est*

prima ad salutem inclinatio, post quam

timor, & spes, & pœnitentia; & saint

Augustin, *stimulat timor, sed noli ti-*

mere, intrat charitas, quæ sanat, quod

vulnerat timor. Timor Dei sic vulnerat,

quomodo medici ferramentum putredi-

nem tollit: opus est ergo, ut intret timor

primò, per quem venit charitas: Timor

*Tract. 9
in Ioan.*

Mais pourquoy tant de passages? puis que le Concile de Trente nous apprend, & nous declare qu'il y a sept actes, par lesquels les meschans sont iustifiez, qui sont la foy, la crainte, l'esperance, l'amour, la penitence, le propos de recevoir le Sacrement, & celuy de s'amender, & d'embrasser vne meilleure vie, & de garder les commandemens de Dieu. Et dans la 14 session chap. 4, nous lisons ces paroles en faueur de cette crainte des peines, & de l'enfer. *Illam vero Contritionem imperfectam, quæ Attritio dicitur, quoniam vel extirpitudinis peccati consideratione, vel ex gehennæ, & pœnarum metâ, communiter concipitur, si voluntatem peccandi excludat, cum spe veniæ, declarat non solum facere hominem hypocritam, & magis peccato-*

*As lieu
 sus-alle-
 guè ch. 6.*

rem, verum etiam donum Dei esse, & Spiritus sancti impulsam, non adhuc quidem inhabitantem, sed tantum manentis, quo pœnitens adiutus, viam sibi ad iustitiam parat. &c.

Ce qui me fait conclurre que ce Poète a trempé dans l'herésie de Calvin, ou de Luther, auant que d'estre deiste, car ce quatrain nonante-huictiesme ressent le Huguenot à pleine bouche: aussi est-ce contre les heretiques que ce chapitre, & le quatriesme Canon de la mesme session combattent. Je prie desormais ces Deistes qu'ils n'ayent pas vne si mauuaise opinion de nous, & qu'ils croient que nous ne nous effrayons pas que bien à propos, & selon qu'il plaist à celuy de qui nous redoutons les tres justes iugemens: passons outre, & disons, que le Catholique ne

blasme pas Dieu, lors qu'il exalte
sa iustice, car cette iustice est Dieu
mesme, puis que *quidquid in Deo est,*
Deus est. Certainement ce pauvre
Deïste me fait compassion d'auoir
tellement en horreur la iustice de
Dieu, qu'à peine semble-il qu'il
ose y penser, sans s'effrayer, & bles-
mir, monstrant assez par là que ce-
la luy pèse bien fort sur les espau-
les, & qu'il desireroit que Dieu
n'eust point de justice. Or sus di-
tes moy de grace, est-il possible
que vous ayez esté si auéuglé ius-
ques icy, que vous n'ayez point
creu que Dieu eust vne iustice? Et
quoy si Dieu n'est iuste, il est donc
injuste, ce qui ne peut pas mesme
tomber en la pensée, tant la repu-
gnance est grande, que Dieu soit
Dieu, & qu'il ne soit pas iuste.

Que si il est iuste, il faut qu'il le

soit infiniment, car il n'y a rien en Dieu qui ne soit égal, voire plus qu'égal, puis que tout ce qui est en Dieu est vne mesme chose; ie le coniure donc par le mesme Dieu, duquel il louë l'amour, qu'il confesse aussi, & qu'il louë sa iustice, telle que les Catholiques la croient, la reuerent, & l'adorent.

Il adiousté dans son 100 quatrain, que le Bigot est detenu prisonnier dans les erreurs inueterez, estant ennemy de son propre bien, & de sa lumiere, ce qui est vne tres grande calomnie, si l'on parle des vrayz Chrestiens, car il n'y a point de si grand amy de la lumiere, & de la verité, que le Chrestien, qui a la mesme verité pour sa conduite, laquelle ne peut estre deceuë, ny deceuoir, & laquelle dit *ego sum via, veritas, & vita; qui sequi-*

tur me, non ambulat in tenebris, sed habet lumen vitæ: il ne peut se retrouver aucun erreur en sa presence qui ne soit dissipé plus viste, que les tenebres par la presence du Soleil.

Mais ie vous prie, contemplez vn peu la façon de proceder de laquelle se sert vostre Poëte, & tous ceux de sa secte; ils n'ont rien autre chose pour toutes leurs meilleures raisons, sinon qu'ils disent que les enseignemens, & les articles de nostre religion, & de nostre foy, sont erreurs, que le temps a conçu, & fait passer pour veritables: il est bien aysé de dire cela de chaque chose, & n'y a pas grande finesse a nier vne verité; mais ils n'ont autre fondement de leur impieté, que le dépit qu'ils ont de ce que ceste loy Euangelique ra-

bat leur ioye, ou du moins est cause qu'on fait des loix, par lesquelles on punit ceux qui tiennent des propos ridicules, faux, & scandaleux de Dieu, de la foy, & de la religion Catholique; il n'y a que ce point, lequel ils tiennent de dure digestion, sçauoir est, *que tout ne leur est pas permis*, car ils ne se soucient point du reste; que les Chrestiens s'affligent tant qu'ils voudront, qu'ils prient, qu'ils adorent, qu'ils ieusnent, tout cela ne leur importe, pourueu qu'ils ayent la pleine carriere, & l'entiere liberté pour faire, dire, & penser en quelque temps, ou façon que ce soit, tout ce qu'ils souhaitteront.

Si ne suis-ie pas d'auis qu'on leur laisse tellement la bride sur le col, qui n'y ait des roües, des gibets, des foüets, & des feux, pour

venger la querelle de Dieu, & réprimer l'audace, & la temerité de ces impies. C'est en quoy les Iuges & les Magistrats, les Princes, & les Roys doiuent veiller, car ils ne sçauroient faire chose plus agreable à Dieu, que de poursuiure, & ruiner de fond en comble ces malheureux Deistes, qui prennent leur nom du nom de Dieu pour nous surprendre, & cependant ils ne croient aucune diuinité. Voyez s'il reste encor quelque quatrain.

CHAP.

CHAPITRE XXV.

Dans lequel le reste des quatrains du Deïste, sçauoir est depuis le 101 iusques au cent sixiesme, sont renuersez; la ruse du Poëte Libertin est découverte, & le Deïste minute sa conuersion.

LE DEÏSTE.

Le Deïste n'agit que pour le bien mesme, & non pour le salaire que les loix proposent, d'au-
rant qu'il sçait bien que la Vertu n'est point seruite.

CI.

Par laquelle nous sçauons qu'il faut adorer
Vne premiere cause, & aymer en elle nostre
prochain sans luy faire aucun tort.

CII.

Il observe tout seul la religion, & adore ce-
luy qui a fait le Ciel, & la terre, hayssant ensie-
rement l'irreligion.

CIII.

CIIII.

Il ayme Dieu, & en luy tout ce qui vit, & qui respire, se monstrant estre tel enuers chacun, qu'il souhaite naturellement qu'on soit enuers luy.

LE THEOLOGIEN.



I le Deiste faisoit ce qu'il dit, il luy seroit fort facile de quitter ses erreurs, & d'embrasser la religion Catholique, laquelle n'a autre intention en tout ce qu'elle fait, & ce qu'elle ordonne, sinon qu'un chacun viue, & fasse toutes ses actions pour l'unique amour de Dieu, qui est le souverain bien, & la source origininaire de la vertu. Mais qu'il agisse en ceste façon, c'est ce que ie ne me peux persuader, autrement comment seroit-il possible, qu'il fût si amateur du plaisir, & de la volupté? puis que la vertu est si espi-

neuse, & remplie de tant de difficultez, qu'il a faillu que Dieu mesme se soit fait homme pour nous l'enseigner par son exemple, & nous exhorter à vaincre nos appetits, & nos inclinations, lesquelles sont le plus souuent dereglees, & opposees à la raison.

Si ce n'est que le Deiste appelle vertu, quand il donne vn parfait contentement à tous ses sens, & qu'il assouuit sa concupiscence brutale par toutes les sortes d'objectes, lesquels il peut rencontrer, souhaitter ou s'imaginer; si ce n'est qu'il appelle vertu la bonne chere, la lubricité, l'ambition, & tous les autres vices, auxquels il est addonné; en fin si ce n'est qu'il mesure la vertu à l'aune de son cerueau mal timbré, & selon son inclination, & ses affections: bien qu'il

proteste de bouche dans ces quat-
trains icy, & dans les compagnies
qu'il veut abuser, que c'est la pure
vertu, qui le cõduit en ses actions,
& guide ses pas, & toutes ses de-
marches, afin qu'il surprenne la
ieunesse. Dites moy, de grace, si
cela est vray, car vous auez esté de
tes gens là, & sçauiez de quel bois
ils se chauffent, c'est pourquoy ie
suis content de m'en rapporter à
vous, comme à vn tesmoing ocu-
laire, & bien experimenté.

LE D. Monsieur, ie vous prote-
ste que tout cela est faux, car ie
n'ay apperceu ny dans moy, ny
dans ceux de ceste troupe, aucun
desir solide de viure selon ceste
vertu, qu'il décrit, ny selon Dieu,
mais seulement de passer le temps
sans soucy, & sans apprehension
de la mort, laquelle seule est la

plus capable de les faire trembler, & de les effrayer. Je peux vous en rendre vn fidelle tesmoignage, car i'ay trempé vingt ans en cet erreur, non sans mille craintes, & mille scrupules, mais ie les étouffois par la bonne chere, & par les compagnies en m'en diuertissant tant que faire se pouuoit.

Veritablement ce Deiste est bien éloigné de faire tout pour l'amour de l'Autheur du Ciel, & de l'onde, comme il dit ~~tres~~ fausement, car ie suis assuré qu'il ne croit point de dieu, ou du moins tasche à se défaire de cette creance tant qu'il peut, car enfin s'il y a vn Dieu, il faut qu'il soit tresbon, & tres-juste, & qu'il recompense les bons, & punisse les mauuais; on a beau dire, il en faut tousiours reuenir là. Pour ce qu'il dit qu'il hayt

l'irreligion, outre que ses opinions ne sont qu'irreligion qu'impietez, & blasphemes, il ne hayt nullement ce qu'il dit, car il n'y a personne avec qui il se plaise tant qu'avec les Athees, quand il en rencontre; & Dieu sçait pour lors les beaux discours, qui tiennent ensemble, vraiment la religion Catholique est bien remuee, & sifflee, assurement il n'y a qu'impieté, & irreligion dans leur propos, ny dans leur esprit, côme il appert à tous ceux qui les hantent.

Il est bien vray que quelques-uns de ces malheureux ont cette prudence tres-pernitieuse, qu'ils se comportent avec toutes sortes de personnes selon leur religion, & leur humeur; car avec le Catholique, ils font semblant d'espouser la vraye religion; & avec le

Caluiniste , ils tranchent du Caluinisme ; & se transforment en plus de couleurs qu'un Cameleon, ou qu'un Protee ; mais lors qu'ils sont avec leurs confidens, ils changent tout aussi tost de discours, & de creance. En un mot ie vous asseure que les meilleurs d'entr'eux ne valent rien.

Il n'ayme pas aussi tout ce qui vit, & tout ce qui a estre, en Dieu, comme il dit, car ie sçay par experience qu'il n'ayme autre chose que ce qui luy peut profiter, & ce qui le peut mettre en bon predicament, & en bonne reputation enuers les hommes, particuliere-ment enuers ceux desquels il peut craindre, ou esperer quelque chose, de façon que tout ce qu'il a dit en ces derniers quatrains n'est qu'un perpetuel mensonge, & un

beau pretexte, duquel il veut pallier son impieté, & la faire passer pour vertu, & pour religion; c'est ce que ie suis prest de signer, & tesmoigner de mon propre sang, car i'en ay vne longue, & certaine experience, n'ayant pas esté vn des moindres d'entr'eux, beny soit mô Dieu, qui m'a retiré de cette malheureuse impieté. I'acheueray si vous plaist ce detestable poëme, bien qu'il finisse par 2 quatrains les plus meschans qui furent iamais, afin que toute son impieté soit euentee, & que cet homme detestable soit tellement traité, que tout le monde luy courre sus, & attise le feu pour brusler le meschant arbre, lequel a produit des fruiçts si venimeux, comme sont ses maudits quatrains, qu'il finit par ceux-cy.

LE DEISTE.

*Au regard de l' Athee encor qu'ingratement
Il nie l'eternel, & sa sainte police,
Si n'en parle-t'il pas iniurieusement
Comme fait le Bigot traitant de sa justice.*

CV.

*Ainsi l' Athee seul ni' la diuinité,
Le Bigot pirement meilleur que Dieu s'estime,
Le Deiste entre tous l'adore en verité
Attendât qu'il paruienne où son but se termine.*

CVI.

LE THEOL. Je vous assure qu'il faudroit estre merueilleusement aueuglé, qui ne se riroit de ce fâlot, qui en donne de si belles; ie suis bien aise d'auoir sçeu de vous ce qui en estoit, ne pouuant auoir vn tesmoignage plus autentique en ce suiet icy. Certainement il est manifeste, qu'en son penultiesme quatrain il ne dit pour autre raison, que l' Athee ne parle pas si iniurieu-

fement de Dieu, que le Chrestien, que par ce que celuy cy professe, & proteste haut & clair, que Dieu est tres-iuste, & qu'il chatira eternellement les Athees, les Deïstes, & tous les Heretiques avec les mauvais Chrestiens d'un supplice eternal; ce qui est bien raisonnable puis que tous ceux-là sont si opiniastres, qu'ils ne veulent point quitter leurs impietez, & leurs vices.

Voyla donc pourquoy ce Poëte dit, que le Chrestien, qu'il entend tousiours par le *Bigot*, est pire que l'Athee, parce que cestuy-cy nie l'enfer, la iustice, & Dieu mesme; voyez vn peu quelle pertinente raison il a eu en faisant ce quatrain; & neantmoins on dit qu'il est si presomptueux qu'il croit n'y auoir personne qui puisse respon-

dre à ce qu'il met en auant, bien que toute sa machine se puisse ruiner par vne simple negatió de toutes ses calomnies, & impostures.

Or pour l'oster de ce doute, ou de ceste creance qu'il a des Catholiques, ie ne desirerois autre chose sinon qu'il s'arraisonnast avec quelque docteur Catholique, car il verroit combien nous detestons toutes sortes d'erreurs, de superstitions, & de *Bigotisme*; (a fin que i'vse de son terme) & quel prix nous faisons de la vertu, & de tout ce qui appartient à la diuinité: il confesseroit que l'amour que nous portons à la souueraine cause, est le premier mobile de nos actions; que le bon Catholique aimeroit mieux mourir soudainement, que de se plaire, ou consentir à vne mauuaise pens^{ee}; &

qu'il n'y a personne au monde qui chérisse tant la vertu, & l'honesteté, ny qui haïsse tellement le vice, que le Chrestien, comme il fait tous les iours paroistre par sa foy & par ses bonnes œuures.

C'est pourquoy ie dy que le vray Catholique parle tousiours honorablement de Dieu: tant s'en faut qu'il en parle iniurieusement, car il n'attribue rien à Dieu, que ce qui est tres-excellent, & ce qui a vne perfection infinie, & ne luy denie rien, que la seule imperfection.

*Responce
au der-
nier qua-
train.*

Acheuons avec ce dernier, & cent-sixiesme quatrain, d'as lequel il y a quasi autant de mensonges, & d'impietez, que de mots; car avec l'Athee, tel qu'il l'entend, les Deïstes, & les Libertins desaduouient la diuinité, puis qu'ils la dépouil-

lent de sa iustice, & de sa prouidence ; mais passons outre, & disons que quoyqu'il entende par le *Bigot*, qu'il est impossible, qu'un homme usant de la raison, s'estime meilleur que Dieu. Sçavez vous pourquoy il dit cela ? c'est par ce que le Chrestien croit, & proteste que Dieu punira les impies eternellement, s'ils meurent en leur peché; car s'ils veulent se conuertir, & quitter leurs erreurs, & reuenir à l'Eglise Catholique, Dieu leur fera misericorde, & leur pardonnera.

Bon Dieu! vous sçavez si le Chrestien s'estime meilleur que vous, bien qu'il ne punisse pas ses enfans apres l'auoir offensé, d'un supplice eternal, car il sçait qu'on ne luy doit pas vn honneur infiny, & que l'obligation que luy a son en-

fant, est finie, & par conséquent que la peine de telle offense doit auoir des limites, & il sçait qu'on vous a vne infinie obligation, & qu'on vous doit vn honneur souverainement infiny, & infiniment souverain, & par conséquent que la peine de ceux qui vous mesprisent, & qui ne font conte de vos saintes ordonnances, doit estre infinie, s'ils persistent en leur opinion obstinée. Ils sont bien esloignez de se croire meilleurs que vous, puis qu'ils protestent, & croyent fermement, que leur bonté n'est que l'ombre de la vostre, & qu'elle n'est rien qu'une pure dependance de vostre puissance; ils sçauent asseurement que la vostre est si immense, & si prisable, qu'il vaudroit mieux que tout le monde s'en retournast au neant, que de

faire, dire, ou penser aucune chose contre vostre volonté, & vostre honneur.

C'est donc fort mal à propos qu'il conclud que les Deistes adorent Dieu en verité, puis qu'ils n'ont qu'un perpetuel erreur, & vne impieté continuelle dans le cœur, & dans la bouche, afin que leurs actions respondent à leur creance, & qu'il n'y ait aucun vice qu'ils ne commettent: c'est pourquoy nostre Poëte a renuersé ces derniers quatrains du malheureux Deiste fort à propos, lors qu'il a dit, parlant de cet imposteur.

Ennemy conjuré de la religion

Feignant aymer la paix, il combat tout le monde,

Subtil fauteur qu'il est de l'irreligion

Il méconoit l'auteur de la terre, & de l'onde.

Car que tout simplement il ayme l'éternel,

Et en luy ce qui est, ce qui vit, & respire,

Sans que par les effets il se declare tel,
Il est par trop aisé au menteur de le dire.

Si personne iamaïs mentit impudemment,
Le Deïste a menty dans vne fausse rime
De son dernier quatrain, où il dit sotement
Qu'un fidelle Chrestien meilleur que Dieu s'e-
stime.

Quelqu'un meilleur que Dieu se peut-il esti-
mer?

Croiroit-on pas plustost qu'une goutte d'eau clai-
re

Pourroit estre cent fois plus grande que la mer,
Ou le Soleil moins clair que le rayon solaire?

Au regard de l'Athee, encor qu'apertement
Il nie l'éternel, & sa sainte police,
Si n'en discours-il pas du tout si faussement
Que le Deïste fait en niant sa iustice.

Ainsi l'Athee osant nier la Deité,
C'est en vain que meilleur le Deïste s'estime,
Car il n'a point de Dieu s'il dit la verité,
La foy du seul Chrestien est seule legitime.

Je vous donneray tous les au-
tres quatrains avant que nous par-
tions d'ensemble, comme ie vous
ay desia promis, si ie ne l'oublie.

Or

Or il faut mettre fin à ce discours, car vous voyez que vostre Poëte est vn homme effronté, qui n'a ny crainte de Dieu, ny honte de ses impostures, ny aucun sentiment de pieté. Mais ie vous prie, comment se pourroit-il faire que celuy-là adorast Dieu en verité, qui se moque de ses commandemens, & nie sa prouidence? comment honoreroit-il celuy-là duquel il voudroit que la justice, & la puissance fust destruite? comment aymeroit il Dieu, puis qu'il appelle ceux qui employent toute leur vie, tout leur esprit, & toutes leurs actions à son seruice, Bigots, & superstitieux? bref comment adorerait-il Dieu, puis qu'il cherche, & medite toutes sortes de raisons, & de moyens pour esloigner de son esprit la pensee du vray Dieu,

n'ayant point de plus grand tourment que l'apprehension d'une veritable diuinité, qui ne punira pas moins griefuement les mechans, qu'elle recompensera les bons auantageusement, estant infiniment égale en ses actions.

Sus donc que ce mal-heureux Deiste attende tant qu'il luy plaira son but, & le terme de sa vie, car il est tres-assuré qu'il n'aura point d'autre recompense, que les flammes eternelles des damnez, s'il ne commence à changer d'opinion, & de vie. Il a beau se promettre la gloire au bout de la carriere, ce n'est pas en se donnant du bon temps, ny en assouuissant ses passions, qu'il y paruiendra; il ne seroit pas raisonnable que ceux qui ont pris toutes sortes de plaisirs iusques a en regorger, eussent la

mesme recompense de ceux qui ont tant enduré pour l'amour de Dieu. Il ne se doit donc rien promettre de la recompense eternelle, si premierement il n'expie tous ses pechez par ses larmes, & par vne juste penitence. Je prie nostre grand Dieu, qu'il luy fasse cette grace, & à tous ceux qui ont trempé en semblables erreurs; & pour vous, M^{onsieur}, ie vous conjure par toutes sortes de respects, & particulierement par l'amour que vous portez à Dieu, que vous taschiez à desabuser tout autant de personnes que vous recognoistrez auoir esté peruerties, & enforceeles par le mauuais leuain, & par le dangereux venin de ce malheureux poëme.

LE D. Assurez vous que i'apporteray toute sorte de diligence,

afin de retirer tous ceux que ie
ſçai auoir eſté peruertis par les fan-
taſies de cet impoſteur, car ie croy
que la grace que Dieu m'a faite ce
iourd'huy en me deſſillant les
yeux, & me retirant de ces maudi-
tes opinions par voſtre moyen,
m'oblige non ſeulement a em-
brasser la religion Catholique, la-
quelle ie reuere, i'adore, & reco-
gnois pour la ſeule, & la tres-veri-
table, & à laquelle ie veux m'ar-
reſter pour iamais, mais auſſi d'eſ-
ſayer par tous moyens de ramener
à la religion Catholique tous ceux
qui ſe ſont perdus par ce malheu-
reux poëme, & par le diſcours, & la
hantiſe des autres Libertins.

Or ie vous prie de m'enſeigner
comme il faut que ie me compor-
te pour abiurer mon erreur, & me
faire quitte de tous les pechez que

i'ay commis depuis que i'ay fuiuy ces opinions extrauagantes, & à qui ie me pourray adresser, sil me reuient quelque doute, ou difficulté touchant les erreurs, que i'auois espousez iusques à maintenant.

LE THEOL. Pour ce qui est de vostre conscience, il faut que vous la mettiez entre les mains de quelque Confesseur docte, prudent, & pieux, auquel vous fassiez vne confession generale de tout le mal que vous avez fait depuis vostre ieunesse iusques à present; vous n'aurez pas plustost declare vos pechez, & n'aurez pas plustost eu regret de les auoir commis à cause qu'ils sont contre la volonté diuine, avec vn ferme propos de les euitier desormais, & de seruir, & aymer Dieu de tout vostre cœur le

*Ce que
doit faire
le Deiste
apres a-
uoir quit-
té ses er-
reurs.*

reste de vós iours, que vous ressentirez vn contentement, & vn plaisir extraordinaire, & confesserez hautement qu'il n'y a nul plaisir qui soit vray, & solide, que celuy que le Chrestien ressent en son ame, lors qu'il ayme Dieu de toute son affection; & ne se passera iour en toute vostre vie, auquel vous ne benissiez, & remerciez la bonté diuine, de ce qu'elle vous a retiré des tenebres de l'erreur, parmy lesquelles vous vous perdiez miserablement.

Pour ce qui est des difficultez qui vous pourroient reuenir dans l'esprit, vous ne sçauriez manquer de doctes personages, lors que vous ferez arriué à Paris, lesquels vous esclarciront sur tous vos doutes, car vous auez ceste tres-excellente compagnie de la Sorbonne,

laquelle contient autant de So-
leils comme elle a de Docteurs,
qui sont les Hercules Spirituels,
lesquels couppent la teste à toutes
sortes d'erreurs. Je m'asseure que si
vous les allez voir, qu'ils vous re-
ceuront à bras ouuerts, & avec vn
grand signe de la ioye qu'ils ont
que les Deistes, & les Athees, &
toutes sortes de Libertins reuien-
nent à l'Eglise, & quittent leurs er-
reurs, & leurs fantaisies.

Ce sont les Oracles de toute la
France, desquels mesme les na-
tions estrangeres tirent resolu-
tion des plus grandes difficultez
qui suruiennent és choses mora-
les, & diuines : ce sont des bou-
cliers tousiours prests à defendre
la foy Catholique, Apostolique, &
Romaine, contre toutes sortes
d'impietez, & d'erreurs, & mesme

contre les portes de l'enfer: ce sont les orneimens de la France, la terreur des Heretiques, le fleau des impies, la consolation, & le refuge des gens de bien.

Mais il est temps que nous nous separions, car ie croy que vous n'avez plus nul sujet de douter en ce qui est de la religion Catholique, auisez si ie vous peux servir en quelque autre occasion.

LE D. Monsieur, ie croyois que vous me donneriez encore vne iournee pour resoudre les difficultez, lesquelles m'ont arresté parmy vos responses selon que vous me l'auiez promis, c'est dequoy ie vous conjure maintenant.

LE THEOL. Ie suis marry que la commodité ne me le permet, mais ie me dois treuver à quarante lieues d'icy dans quatre iours, ce

sera tout ce que ie pourray faire de m'y rendre. Au reste ie repasseray par icy dans vn mois, ie vous promets que ie vous donneray satisfaction sur tout ce que vous aurez treuue difficile dans mes discours, si vous voulez prendre la peine de vous rendre dans cette ville, cependant vous pourrez faire vn voyage à Paris, afin de conuertir quelques vns de ceux qui se sont perdus par la lecture de vostre poëme, par la conuersation de tous ces Libertins dont vous m'avez parlé, & par la lecture des mauuais liures.

LE D. Je ne manqueray pas à me treuuer icy dans vn mois iour pour iour, & vous attendray de pied ferme, à ce qu'il vous plaise me resoudre sur les difficultez que i'ay sur ce que vous avez dit, s'il me

vient quelque doute, ou quelque nouvelle difficulté sur ce qui est de la religion Chrestienne, ie vous la propoleray pour en estre éclaircy, & vous rapporteray fidèlement ce que j'auray découuert à Paris touchant les malheureux Libertins, avec lesquels ie m'estois peruersty.

LE THEOL. Plaise à la diuine bonté nous conduire, & nous assister durant nos voyages : vous n'aurez que faire de m'attendre, car ie seray icy de retour dans vn mois précisément, quand ie deuirois precipiter les affaires, qui me pourront suruenir au lieu où ie vais.

Or puis que nous auons acheué de combattre l'erreur, & le mensonge, il est tres raisonnable que nous rendions graces à l'eternelle

bonté, auant que de nous entre-
 quitter, puis qu'elle a menagé vo-
 stre salut, & la conduit au port du
 bon heur avec tant de facilité,
 qu'il estoit ce semble impossible
 d'esperer vne telle faueur de celuy
 lequel vous auiez tant offensé; di-
 sons luy donc avec cet excellent
 Poëte, duquel ie vous ay desia cité
 les vers.

O Dieu tout bon tout grand, eternel infiny,
 Createur trin, & vn du triple monde vny;
 Qui du throne hautain de gloire, & d'excellence
 Avecques le grand œil de ta grand prouidence
 Gouvernes toute chose, & donnes & depars
 Estre, vie, & raison au tout, & à ses pars.

Actions
de graces
à Dieu.

Dé ce rond ornement tu produits le modèle,
 Tu confirmes du Ciel la tente vniuerselle.
 Tu soustiens en leurs rangs les quatre premiers
 corps,

Tu entretiens en paix leurs discordans accors,
 Et ne delaissses lieu en tout ce grand espace
 Où ton pouuoir, sçauoir, & to vouloir ne passe.

Echieh.

O toy היהוה qui es, qui fus, & qui seras,
 Tu fais les Serafins, tu les feis, & feras,
 Tu affermis le tour de la sphere Empiree
 Dedans vn lieu sans lieu en lose, & assuree:
 Et ne delaisse point le rien dedans son rien,
 Ainçois le mesme rien tu combles de ton bien.

Iah.

O היהוה les Cherubins cōme enfans tu enfantes,
 Et ne cesses iamais de traiter, & mollir
 Le non formé Chaos, afin de le pollir.

Iehoua.

ou Ado-

nai.

היהוה tu assieds les Trosnes en leur ordre,
 Et le ciel estailé tu viens virer & tordre,
 Mesme viens imprimer dans le coulant ruisseau
 De la prime Nature, & la forme, & le seau.

El.

O היהוה tu establis les hautes seigneuries,
 Et l'astre Saturnal tu tournes & varies,
 Et à la masse encor du corps lourd & pesant
 Tu donnes la façon d'ouvrage plus plaisant.

Iehouah.

היהוה les Vertus en euidence ameines,
 L'estoille Ioniale en douze ans tu promeines,
 Voire & des elemens la nature glissant
 Par toy du centre noir en lumiere estissant.

Elohim.

אלהים dessous toy les puissances auoues,
 L'orrible astre de Mars incessamment tu roues,
 Et le temperament tu donnes aux metaux
 Pour endurer le feu, la trempé, & les marteaux.

Iehoua

היהוה tu mets au rang plus proche
 Iseuaoth. Toutes Principantez, tu guide le beau coche.

De ton Soleil vital, & d'un ray vas entant
Le visaccroissement au rige vegetant.

Elohim

יְהוָה צְבָאוֹת tu ordonnes & rauages

rsenaoth.

Le scadron triomphant des glorieux Archanges,

Lorniere de Venus la belle tu conduis,

Et tous les animaux pour l'homme tu produis.

אֵל שַׁדַּי tout puissant, tu depars comme Prince

El sadai.

Les anges bien heureux en chacune prouince,

De Mercure le ciel tu roules de ta main,

Et formes la raison de tout le genre humain.

O Roy אֲדֹנָי tu produis l'assemblée

Des Ames dont l'éther à sa voute comblee,

Adonai.

Et de la blanche Lune en moins de trente iours

Tu hastes la carriere, & achue le cours.

Par toy des saints Eleus en la mortelle vie

Par la mort du baiser la pensee est rauie,

Quand tu viens l'embrasser d'une amoureuse
ardeur,

Et de ton beau visage y seelles la splendeur

O immense grandeur, puissance redoutable,

Hautesse, & profondeur, sagesse incōprenable

Combien sublimes sont, merueilleux & entiers,

Et combien sont cachez, & secrets tes sentiers.

Toute langue y defaut, la raison y rebouche,

Tous discours y sont cours, la pensee y est louche,

Ainçois toute eblouye, & le plus clair-voyant

S'y perd ainsi que l'œil en l'esclair foudroyant.

Se taise donc la voye, le discours ait relasche,
 S'estonne la raison, & le penser se cache
 En son centre profond, puis que ton digne los
 Dans le sombre silence est seulement enclos.

A toy, ô Deité, j'éleue donc mon ame,
 A toy, ô pieté, mon pauvre esprit se pâme,
 Vnique ie t'adore, à toy j'ay mon recours,
 O ma seule esperance à salut, & secours.

Le t'implore humblement, & d'un cœur lar-
 moyable

Qu'il te plaise de l'eau de ta grace incroyable,
 Du non tary source de ta benignté
 Lauer toute ma faute, & mon iniquité.

Purge-moy, & purge que ta face millustre,
 Illustre parfay moy, & parfait de ton lustre
 Vucille me conseruer, si que ie sois conjoint
 Au tout-pur, tout-illustre, & parfait de tout
 point.

Esteins en moy du tout la vehemente force
 Du venin du serpent, & du peché l'amorce,
 Tranche le propre amour dedans mon cœur plâté,
 Et que du bois de vie y soit tousiours enté.

Radresse à son vray point mon ame deuoyee
 Qui dans l'abyssme obscur d'ignorance est noyee;
 O beau soleil diuin monte sur l'horison,
 Et vien chasser la nuit qui couure ma raison.
 Qu'à toy sās plus ie sois, duquel seul i'ay mō estre,

Que pour cognoistre tout ie te puisse cognoistre,
O amour, ô bonté, vien mon feu sublimer,
Comme tu m'as aymé que ie te puisse aymer.

Entendant eternal qui te pourroit entendre
Eternal entendu qui scauroit bien comprendre
Ta generation? & si profondement
Verroit des deux sortir l'eternel entendement

Tu as dit toute fois, Verité perennelle,
Que ceste là sans p'us est la vie eternelle, (prit
Te cognoistre Vray Dieu, & par ton mesme es-
Celuy qu'as enuoyé au monde Iesus-Christ.

Fay d'oc que tō rayon viēne dās moy depeindre
Tes trois faces, autant que l'homme en peut at-
teindre,

Afin que descendant de toy, en toy, par toy,
Par tout te voye empreint grand Prestre, Juge,
& Roy.

LE D. Pleust à dieu que nos
Poètes voulussent imiter cet ex-
cellent personnage, qui parle si
dignement des loüanges de dieu,
ô quel plaisir il y auroit a les lire;
ie vous proteste que vous m'avez
grandement obligé en me don-

nant ces vers ; or auant que prendre congé de vous, ie vous demande seulement vne heure de temps pour vous proposer quelques autres raisons, lesquelles m'ont autrefois donné de la peine.

CHAPITRE XXVI

Dans lequel le Deïste dit Adieu au Theologien, apres qu'il a proposé les raisons, pour lesquelles beaucoup de Libertins se perdent ; & puis il declare sa conuersion, & sa resolution de bien faire.

LE THEOLOGIEN.



I vne heure ne suffit pour ce sujet, ie vous en donneray trois, proposez hardiment ces raisons.

LE D.

LE D. Vous m'obligez par trop, ie croy qu'une heure tout au plus sera suffisante pour mettre en auant ce qui a perdu, ou du moins ce qui a fort esbranlé plusieurs ieunes hommes tels que ie suis. Voici l'artifice duquel ils se seruent.

Premierement ils ne voyent rien parmi les Catholiques qu'ils ne taschent à reprēdre, & à sindiquer, afin que ceux auxquels ils parlent, se scandalisent de la moindre chose; par exemple s'ils voyent par hazard qu'un Prestre, lequel s'expose dans les Eglises pour entendre les confessions, prefere quelque Seigneur de marque, ou quelque honnestes homme de qualite à un pauvre manœuvre, ou à quelqu'autre personne de basse condition, ils publient par tout où ils treuuent leurs confidens, qu'il n'y

*s'obie-
ctions d'a
Deiste.
L.*

a rien dans l'Eglise, qu'un respect humain, que tout ce qu'il y a, ne butte qu'à l'argent, à l'ambition, & aux commoditez temporelles.

Que diriez vous qu'ils en viennent iusques là, que quelques vns d'entr'eux ont embrassé le Libertinage, & ont quitté toute sorte de religion à cause qu'on les auoit trop fait attendre dans l'Eglise pour entendre leur confession.

1. Secondement fils voyent, ou rencontrent quelque Prestre, lequel ne soit pas si modeste, si sage, ou si sçauant comme requiert sa qualité, ou comme ils iugent qu'il deuroit estre, ils en font mille risées, & taschent de calomnier toutes sortes d'Ecclesiastiques sous pretexte qu'ils en ont treuueé quelqu'un qui abusoit de son deuoir, & de sa dignité.

Tiercement, fils rencontrent
quelque fausseté en lisant quel-
que liure d'histoires, ou quelque
liure des proprietéz naturelles des
plantes, des animaux, des pierres,
des mineraux, &c. ils tirent in-
continent vne consequence au
delauantage de la religion Catho-
lique, & disent que ce qu'on dit
des miracles, & de la religion, peut
aussi bien estre faus, & controuué,
comme ce qu'ils ont remarqué
dans ces liures, desquels nous a-
uons parlé.

4 Quand ils lisent la Bible, (ce
qu'il ne leur arriue guere souuent,
parce qu'ils n'y treuuent pas les
rimes, ny la douceur qui les cha-
toüille en lisant leurs Poëtes im-
pudiques, leurs Romans, & leurs
Fables) ils tournent tout ce qu'ils
peuvent, en rîsee, & sont si impu-

dens qu'ils disent qu'un croche-
teur pourroit composer vne Bible
mieux faite que la nostre.

5. Enfin lors qu'ils voyagent, &
qu'ils voyent diuerſes façons de
viure, & diuerſes ſortes de religion
entre les diuers peuples qui habi-
tent là terre, ils ayment mieux ne
rien croire du tout, que de ſuiure
celle cy, ou celle-là. Voyla vne par-
tie de leurs fantaies, & des rai-
ſons, pour leſquelles ils abandon-
nent, ou n'embrassent pas la reli-
gion Catholique.

LE THEOL. Ie vous aſſeure que
vous auiez raiſon de dire qu'une
heure nous ſuffiroit pour respon-
dre à ces raiſons, car elles ſont ſi
friuoles, ſi legeres, & ſi niaies, qu'il
eſt impoſſible qu'un homme de
iugement en ſoit frappé, ou eſ-
branlé. Si vous deſirez voir plu-

ſieurs autres raiſons, pour leſquelles quantité de ieunes ſolaſtres ſe laiſſent aller au Libertinage, & à l'impieté, vous en treuueriez dix-huit dans le 3 article de la Queſtion que j'ay faite contre les Athees, entre leſquelles vous en verrez quelques vnes qui approchent des voſtres, auſquelles neantmoins ie veux reſpondre pour voſtre contentement.

Il faut donc que vous ſçachiez que comme la gloire ne deſtruit pas la grace, ny la grace la nature, auſſi les loix diuines, & les Eccleſiaſtiques ne deſtruiſent pas, & ne repugnent point aux loix de l'honneſteté, ny aux loix de la raiſon, au contraire elles les perfectionnent, & les rendent beaucoup plus excellentes: or la raiſon nous dicte que celuy qui a les affaires du Roy-

aume, de la republique, ou du Parlement en main, & lequel est le plus souuent contraint de perdre le boire, & le manger pour rendre la iustice, & pour expedier de pauvres gens qui l'attendent à sa porte, & que celuy là lequel est pressé par des affaires de grande consequence, doit estre preferé à celuy qui n'en a point.

*Pourquoy
c'est que
les Con-
fesseurs
peuvent
user de
preferen-
ce en en-
doyant
plustost
les uns
que les
autres en
Confes-
sion.*

Il est donc tres-raisonnable que le Confesseur entende plustost celuy là que cestuy cy, puis que les Sacremens ne sont pas instituez pour empescher le train de la justice, ny d'aucune affaire honeste, & licite. Et puis Dieu, & l'Eglise veulent qu'on porte respect aux Magistrats, & à tous ceux qui ont quelque grande charge, ou quelque grand merite, qui les rend dignes d'une singuliere recomman-

dation, si bien que ce n'est que manque de iugement, & de consideration, si quelque Libertin se scandalise, ou plustost feint d'estre scandalisé, quand on prefere vn homme de qualité soit à la Confession, soit à la Communion, soit à quelque autre chose qui depende de l'Eglise.

Cette preference n'est que du lieu, du rang, ou du temps, car cela n'empesche point que le moindre du monde ne recoiue les mesmes Sacremens. Je veux qu'il luy faille attendre vne heure, ou deux pour se confesser, le voyla bien malade, luy qui employe les iours, voire le mois entiers à ses plaisirs, & passe-temps. Il deuroit plustost prendre occasion de reformer tellement sa conscience, cependant que Dieu luy donne ce loisir, qu'il sortist a-

uec vne si ferme resolution de bien viure, que iamais il n'offensast Dieu.

Au reste s'il a des affaires, ou qu'il soit pressé d'ailleurs, qu'il attende vne autre occasion; si c'est le iour de Pasques, ou celuy de quelque autre feste, qu'il reserue sa confession pour le lendemain, ce que faisant il n'aura nul sujet de se mécontenter. le vous donne à penser si vos Confidens ont raison de conclure leur impieté de ceste preference, & s'ils ne sont pas merueilleusement estourdis, & depourueus de iugement, quand ils disent qu'on n'a que l'ambition, & l'auarice en recommandation, vrayement ceus la se soucient fort de l'auarice, ou de l'ambition, lesquels ont quitté tout ce qu'ils auoient, & toute la pompe, & la va-

nité du monde pour suiure les
conseils Euangeliques de nostre
Seigneur: il y a bien de l'apparen-
ce que ceux qui se sont rendus mi-
serables (si i ose ainsi parler, afin
que ie suiue les propos, & le senti-
ment des Libertins) pour suiure
Iesus-Christ, en se depouïllans de
toutes sortes d'honneurs, & de ri-
chesses, avec lesquelles ils pou-
uoient viure splendidement dans
leurs maisons, tels que sont la plus
part de ceux qui se font Religieux,
il y a dis-je bien de l'apparence
que ceux là cherchent l'argent, ou
l'honneur.

*Que les
bons Pre-
stres, &
Religieux
n'ont
l'argent,
ny l'hon-
neur pour
la fin de
leurs a-
ctions.*

Vrayement s'ils ne confessoient,
s'ils ne preschoient, & ne faisoient
toutes leurs autres actions que
pour l'argent, ou pour l'honneur,
& qu'ils n'eussent pour fin vni-
que, ou du moins pour la principa-

le, & dernière, la gloire, l'honneur, & l'amour de Dieu deuant les yeux, ils seroient plus miserables que les bestes, & serois content qu'on les enfoûist tous vifs dans les entrailles de la terre.

Non, non, qu'ils ne se persuadent point que les Prestres, lesquels font bien leur deuoir, ayent autre intention principale que de plaire à Dieu, de chercher le salut des hommes, & de faire la sainte volonté de Dieu, quand ils administrent les Sacremens. S'ils les auoient hantez, & qu'ils sceussent la façon dont les bons Ecclesiastiques se comportent en leurs actions, ils treuueront que les bons Prestres n'ont point de plus grand regret, que lors qu'ils ont laissé passer quelque vne de leurs actions, ou de leurs paroles, laquel-

le ils n'ont pas rapportee actuellement, ou virtuellement, expressement, ou implicitement à la gloire de Dieu.

Or pour ce qui est des autres, lesquels ne vivent pas en Religieux, ou selon que requiert l'estat Ecclesiastique, ie cōfesse qu'ils meritent vn grand chastiment, puis qu'ils sont causes par leurs dereglements, & par leur vie depravee, que plusieurs ieunes folles, qui ont desia l'esprit disposé au Libertinage, se laissent aller à l'impieré. Les Euesques, & autres Prelats qui ont la charge, & le pouoir sur tels Ecclesiastiques, doiuent soigneusement prendre garde à cela, car ils en respondront corps pour corps, & ame pour ame au grand iour du iugement, & en rendront conte au iugement

particulier, lequel se fait tout aussi tost que l'ame se separe du corps.

Mais vn homme de bon esprit, & de bon iugement, ne se scandalise pas si facilement, car il sçait qu'il y a des meschans en toutes sortes de compagnies: au contraire il deplore leur condition, & leur misere, & en aduertit les superieurs Ecclesiastiques, s'il le treuve à propos, à ce qu'ils y apportent du remede. Je ne veux pas m'amuser à ce qui est des mensonges, & des faussetez qui se rencontrent dans les auteurs profanes de l'histoire, & dans ceux qui traitent des plantes, des mineraux, & des animaux, car nous aduoüons cela, aussi bien qu'eux; mais c'est estre bien sot que de cōclure le mesme de la Bible, car c'est tout de mesme que si on inferoit que Dieu fust foible,

*Que la
doctrine
de la Bi-
ble est tres
vraye.*

ignorant, ou menteur, par ce que les hommes sont foibles, ignorans & menteurs, d'autant que la vérité des des histoires profanes n'est appuyee que sur l'authorité des hommes, mais la verité de l'Eſciture ſaincte eſt fondee ſur la verité meſme, puis que c'eſt Dieu, lequel nous la donnee, & reuelee, ce qu'il a témoigné par vne ſi grande multitude de miracles, & de faueurs, qu'il eſt impoſſible d'auoir aucune iuſte raiſon d'en douter.

Ils aioûtent encore malicieuſement que la Bible, ſçauoir eſt qu'elle n'eſt pas bien faite, & qu'un ſimple maneuure en pourroit faire autant; ie ne croy pas qu'il puiſſe y auoir vn plus grand défaut de iugement, n'y vne plus grande ignorance ſur la terre, que de blaſphemer de la ſorte touchant l'Eſcri-

*Qu'il n'y
a que
Dieu qui
puisse a-
voir en-
seigné ce
qui est
dans la
Bible.*

ture sainte, car quand tous les hommes du monde seroient assembles, & qu'ils passeroient toute leur vie à l'estude, ils ne pourroient pas composer la valeur d'un seul verset du premier chapitre de la Genese. Il n'y a Philosophie, ny Metaphysique, ny Cabale, ny experience, laquelle puisse nous enseigner le temps, auquel le monde a esté créé, ou par quelle partie la creation a commencé; & si ie demande à un Cabaliste, ou à un Platonicien pourquoy les corps sublunaires sont corruptibles, ou pourquoy il y a des binaires, ou des dualitez au monde, veu qu'il semble qu'il seroit meilleur, qu'il n'y eust que l'Agent vniuersel, les Principes simples, & épurez, & l'unité, personne ne me pourra satisfaire sur ce sujet.

Ie demande ſeulement aux Athees, aux Deiftes, & à tous ceux qui ne recognoiſſent pas la verité de l'Eſcriture ſaincte, & qui penſent que le monde n'a pas eſté fait, qu'ils me faſſent la faueur de lire le trente-huiſtiesme chapitre du liure de Iob, & qu'ils prennent les paroles de Dieu pour eux, lequel reproche l'ignorance de ſes œuvres à tous ceux qui ſe meſlent d'en diſcourir.

Quis eſt iſte inuoluens ſententias ſermonibus imperitis? Accinge ſicut vir lumbos tuos; interrogabo te, & reſponde mihi. Vbi eras, quando ponebam fundamenta terræ; indica mihi ſi habes intelligentiam. Quis poſuit meſuras eius, ſi noſtri: vel quis tetendit ſuper eam lineam: Super quo baſes illius ſolidatæ ſunt; aut quis demisit lapidem angularem eius. Cum me laudarent ſimul aſtra matu-

*na, & iubilarent omnes Filij Dei? Quis
conclufit oftij mare, quando erumpebat
quafi de vulua procedens.*

Ie laiffe le refte, de peur d'eftre
trop long; qu'ils lifent feulement
ce trente-huictiefme chapitre, &
les trois autres fuiuans, ie m'affeu-
re qu'ils recognoiftront qu'il ne
peut y auoir autre verité du com-
mencement du monde, & de tout
ce qui eft propofé dans ces chapi-
tres, que celle que Dieu nous a re-
uelee par fa fainte parole, & qui
eft contenuë dans l'Efcriture sain-
te, laquelle nous apprend que
Dieu a creë le monde au com-
mencement, *In principio creauit*
Deus cælum, & terram; בראשית fur
lequel fe torne, & fe fonde toute
la Cabale, fans lequel elle ne pour-
roit fubfifter. Si vous voulez fça-
uoir pourquoy il a fait la terre,
auffi

Genef.

aussi bien que le Ciel, veu qu'il se pouuoit contenter de cestuy-cy, qui represente la forme, ou la plus noble partie du composé, ou l'estre corporel le plus épuré, le Prophete Royal vous respond dans le Pseaume 113 vers. *כל אשר-תפץ עשה* *col ascher chaphets hassah*, c'est à dire que Dieu a fait tout ce qu'il a voulu, *omnia quacumque voluit, fecit.*

Il n'auoit pas besoin du Ciel, ny de la terre, ny de la forme, ny de la matiere, non plus que du medium, ou principe mitoyen, ny de la substance, ou des accidens; bref il se fust aussi bien passé de toutes les creatures, comme il s'en estoit passé de toute éternité: mais il luy a pleu de les creer, à ce que toutes les corporelles seruissent à l'homme, & l'homme à Dieu, dás lequel il a mis son image, afin de le redre

*Pourquoy
Dieu a
créé le
monde.*

bien-heureux, s'il suit la sainte volonté.

Ce n'est pas merueille si vn tas de ieunes étourdis treuvent à redire à l'Escriture sainte, premierement par ce qu'ils ne l'entendent pas, & ne sçauent pas les thresors inépuisables qui y sont cachez; Secondement, par ce qu'ils ne suivent que la volupté brutale des sens, c'est pourquoy ils ne peuuent priser, ny gouster ce qui est de l'esprit, *Animalis homo non percipit ea quæ sunt spiritus Dei.*

1. ad Cor.
2.

*Histoire
notable de
ce temps.*

Pleust à Dieu qu'ils fissent comme vn certain ieune homme, lequel ayant vn bel esprit, ne prisoit pas dauantage la Bible qu'eux, mais apres qu'on luy eut mis vn nouveau Testament Grec en main, il ne l'eut pas si tost leu, qu'il changea de vie, &

d'opinion, car tout aussi tost il confessa haut & clair, que iamais n'auoit rien treuüé de semblable parmy toute la Sageſſe, ou les liures des Grecs, & des Romains, ny parmy toute la Philosophie, & ſe fiſt incontînēt Religieux dās vn ordre reformé, dans lequel il vit maintenant avec le grand contentement de ceux qui le cognoiſſent.

Je me promets que tous ceux qui ſe ſont moquez de l'eſcriture Saincte, feront le meſme, ſils veulent prendre la peine de lire le nouueau Teſtament, ou du moins les Epistres de ſainct Paul avec attention, & confeſſeront que iamais n'ont rien leu, ouy, veu, ou penſé de ſi ſublime, ny de ſi excellent, cōme ce qui eſt dans la Bible. Et puis les miracles ne ſe ſont iamais faits en faueur d'aucun liure,

côme ils se sont faits en faueur des veritez qui sont dans l'escriture Saincte: or il ny a nul doute que les liures, la verité desquels est tesmoignée par le Ciel, & par les faueurs extraordinaires de l'Eternel, ne soient meilleurs, & plus excellens que ceux qui n'ont autre tesmoignages que celuy des hommes, quels qu'ils soient.

O pauvres gens, ô miserables folastres, hélas que ie vous plains! de vous estre abandonnez à vos fantaisies, & à vos imaginations chancelantes, & vagabondes; plaise à nostre Seigneur les ramener à la verité de la religion, & à la reconnaissance des veritez, lesquelles Dieu nous a proposees par sa parole contenuë dans les saints liures.

Les diuers voyages, & les diuerses cognoissances, & conferences

qu'ils font, est encore cause de ce qu'ils se iettent tantost d'un costé tantost d'un autre: aujourd'huy ils se tournent vers le Calvinisme, demain vers le Lutheranisme, puis apres vers le Mahometisme, vne autrefois vers le Iudaïsme, & quād ils ont quelques bons interuales, vers la religion Catholique; bref ils ne cessent de chercher, torner, & roder iusques à ce qu'ils soient tombez dans l'impieté, dans l'Atheïsme, & dans le Libertinage. Je leur demanderois volontiers ce que demanda Elie aux Israélites, *Vsquequo claudicatis in duas partes? si Dominus est Deus, sequimini eum.* Iusques à quand changerez vous tant de fois d'opinion, & de religion? iusques à quand demeurerez vous boiteux, & estropiez? voyans d'un costé que la verité vous contrainst

*Incoſtance.
& legereté des
Libertins.*

3 Reg. 18.

de confesser qu'il n'y a point d'autre religion que la Catholique, & de l'autre ne voulans pas fuiure, ny faire ce qu'elle prescrit.

Et quoy? pour ie ne sçay quel mot de gaufferie que quelque malheureux dira de la religion, ou pour quelque éceruelé que vous rencontrerez, lequel vous estourdira de son caquet, & voudra controoller la parole de Dieu, vous quitterez la foy Catholique! Vous ne ferez pas si lasche que cela, & me promets que si vous auez vn bon esprit, que vous ne quitterez iamais la foy diuine, quelque Royaume estrangier que vous puissiez visiter, car vous apperceuerez facilement qu'il n'y a rien de semblable, ny de si excellent dans toutes les coustumes de viure, ou dans les façons de seruir Dieu, & de l'ado-

*Que les
diuers
voyages
ne peuuent
estre cause
qu'un
bon esprit
se fouruoise
de la
vraye re-
ligion.*

rer, dont se seruent les payens, les Turcs, & les autres nations ennemies du nom Chrestien, comme il y a dans nostre sainte religion, laquelle seule adore l'auteur de la terre, & de l'onde par les voyes, façons, & ceremonies qu'il nous a luy mesme prescrites, ou qu'il a inspirees à la sainte Eglise Catholique, Apostolique, & Romaine, contre laquelle tout l'enfer, & tous les efforts des hommes ne peuuent rien faire qui la puisse ébranler.

Que les Calvinistes, & les autres Heretiques soient tant empeschez qu'ils voudront de resister aux Deistes, ausquels i'ay ouy dire qu'ils ne peuuent respondre, & deuant qui ils tremblent, car nous ne craignons non plus les vns que les autres. Pour moy ie treuue que

Que les Calvinistes, ny les autres Heretiques ne scauroient respondre, ny resister aux Deistes.

ceux cy ne sont qu'un rejeton de ceux là, & quiconque voudra m'aboucher d'entre les Heretiques, ie me fais fort de luy monstrier qu'il n'a pas meilleur droit que le Deiste, & qu'il faut qu'il embrasse le Deisme, s'il veut maintenir son heresie. Voyla où les reformateurs conduisent le monde, lesquels au lieu de faire des Chrestiens reformez, engendrent des Deistes, des Athees, & des Libertins. Mais c'est assez discouru touchant la foiblesse de ces pauvres esprits, auisez s'il ne vous reste plus aucune difficulté, à ce qu'il n'y ait rien qui vous puisse troubler pendant mon voyage; si tost que ie seray de retour, ie vous expliqueray ce que vous n'aurez pas entendu dans tous les discours que nous auons eu par ensemble.

LE D. ie n'ay rien pour le present qui me tourmente l'esprit, c'est pourquoy ie ne veux pas retarder plus long temps vostre voyage, au retour duquel ie m'attends de vous proposer toutes les difficultez, lesquelles vous avez remises à la fin du discours, afin que i'en sois parfaitement éclaircy.

ie m'en vais passer 10, ou 15 iours à Paris, pour voir si ie pourray ramener quelqu'un de mes Camarades à la religion Catholique; si vous m'eussiez donné le poëme qui refute celui du Deïste, iel'eusse opposé au sien, mais i'espere que vous me ferez la faueur apres vostre retour, de m'en donner vne copie. Au reste si i'apprens quelques nouvelles raisons, qu'ils ayent pour s'opposer à la vraye religion, ie vous les rapporteray fidèlement, à ce qu'il

vous plaife m'enseigner en quoy elles manqueront.

LE THE. ie vous promets que ie vous donneray toute sorte de satisfaction, quand ie seray de retour, pourueu que vous trouuiez icy dans le temps prescrit : retenez seulement toutes les obiections, où raisons, dont ils se seruent pour combattre la verité, afin que vous soiez armé contre toutes sortes d'impietez, & que vous puissiez imposer vn perpetuel silence à tous les libertins, & Deïstes, avec qui vous vous rencôtrerez deormais. Or il seroit bon que vous témoignassiez a nostre depart vostre conuersion, & l'abiuration de toutes vos impietez par quelque forme de confession de foy, cela vous affermira dauantage en ce qui est de la vraye Religion, & sera cause

que la diuine bonté vous remplira de ses graces , & de ses benedictions.

LE D. Monsieur, il me semble que ie vous ay rendu des preuues assez signalees de ma conuerſion par mes parolles, & par le contentement que i'ay pris a tous vos discours, & par l'auenu que i'en ay fait: car vous pouuez assurer que ce n'a pas esté des ſeules leures que i'ay quitté les erreurs, qui m'auoient tenu captifs iuſques a voſtre rencontre, mais de tout mon cœur, & de toute mon affectiō. Ie croy que la façon dont ie me cōporteray dorénauant en toutes mes actions, & mes parolles, vous fera paroistre avec quelle ſincerité i'embrasse la foy Catholique, & quel horreur i'ay des impietez, ausquelles i'auois

fauorisé en quelque façon que ce soit, iusques à present.

Ie desirerois seulement pou-
voir retirer de la mesme impieté
tous ceux qui sont de ma cognois-
sance, car ce m'est vn grand d'es-
plaisir que ceux lesquels i'ayme
passionément, & pour qui ie vou-
drois endurer la mort, s'il en estoit
besoin, trempent si auant dans le
libertinage. Ie ne scache rien que
cela de mal en eux, car ils ne sont
point scandaleux, & font plaisir à
leurs amis fort librement: ie croy
que ce sera ce qui me donnera
plus de desplaisir, & d'affliction. Ie
les recommande tant que ie puis a
vos prieres, a ce qu'il plaise a sa di-
uine majesté de les regarder de
l'œil de sa misericorde, & leur don-
ner vne si grande repentance de
tous leurs pechez, & vne si grande

auersion de toutes sortes d'impie-
tez, qu'ils n'ayent aucun repos ny
le iour ny la nuict, iusques à ce
qu'ils ayent quitté leurs mal-heu-
reuses opinions, & qu'ils ayent
embrassé la religion Catholique.

Or il est raisonnable que ie vous
témoigne encore vn coup ma con-
uersion, puisque vous le desirez,
car que ne dois-je en faueur de ce-
luy qui ne m'a rien refusé, & qui
ne me demande rien que ce qui
fait pour mon salut? Pleust à Dieu
que ie rendisse ce tesmoignage du
vray sentiment que i'ay de la veri-
té, avec mon propre sang: mais la
bonté diuine aura mes paroles
pour agreables, iusques à ce que
i'en vienne aux effets, si iamais l'oc-
casion s'en presente.

I'embrasse donc la religion Ca-
tholique, Apostolique, & Romai-

ne de tout mon cœur pour iamais, & deteste les erreurs, les fantaisies, & les malheureuses opinions des Athees, des Deïstes, & autres Libertins, auxquelles i'auois fauorisé iusques à ce qu'il eust plu à Dieu me faire recognoistre l'aveuglement ou i'estois, & le peril que ie courois : iamais la verité Chrestienne ne sortira de mon esprit, & n'auray iamais d'amour que pour mon Sauueur, & Redempteur Iesus-Christ.

Adieu donc malheureux, qui m'auiez peruertit par vos caïoleries, & par vos impostures : adieu vers impudiques, auxquels ie me plaisois tant, auant que le rayon de la lumiere eternelle eust frappé dans mon esprit. Adieu maudites voluptez, par qui i'ay esté aveuglé, en prisonné, & charmé si long

temps. Adieu toute sorte d'impie-
 té, dans laquelle ie m'estois enfon-
 cé si auant: adieu vanité, adieu tout
 ce qui m'a separé de la religion
 Catholique, & de l'amour, de
 l'honneur, & du respect que ie
 dois à mon Dieu, auquel i'adres-
 seray desormais ma priere par ces
 vers.

Repent-
 rance de
 Deiste
 conuerty
 à la reli-
 gion Ca-
 tholique.

*Vous des meschans l'etonnement
 Dieu qui veille incessamment
 Dessus les actions des hommes,
 Qui plus que iamais sont tachez
 En cet ingrat siecle où nous sommes,
 De toutes sortes de pechez.*

*Daignez ietter les yeus sur moy
 Pour viure selon vostre loy,
 J'abandonne celle du vice:
 Ce monde n'est plus mon vainqueur:
 A vous seul ie fais sacrifice
 De mes desirs, & de mon cœur.*

*Plongé dedans l'aduersité
 Où le vice m'auoit ietté,
 Je souffrois vn mal incroyable:*

Mon goust ne treuuoit rien de doux:
 Bon Dieu! que l'homme est miserable
 Quand il est éloigné de vous.

Ce monde doit finir vn iour,
 Qui par vn illicite amour
 Rend nos ames si criminelles:
 Vous seul pouuez tousiours durer:
 Les recompenses eternelles,
 De vous se doiuent esperer.

Aussi depuis que i'ay goûté,
 Seigneur, de la felicité
 Qui dans le Paradis abonde:
 Au pris des delices du Ciel,
 Je treuve les douceurs du monde
 Plus ameres que n'est le fiel.

Le bien que vous auez promis
 Dedans le Ciel à vos amis,
 Ce n'est point vn bien perissable:
 Le monde n'a que de l'ennuy,
 Et c'est bastir dessus le sable
 Que de s'appuyer dessus luy.

Auant que Dieu m'eût visité,
 I'estoy tousiours espouuanté,
 Mais iouissant d'un bien si rare,
 Le recit ne m'estonne pas
 Des tourmens que l'enfer prepare
 Aus meschans apres le trespas.

Adieu

Adieu ces écrits & ces vers
Dont ie voulois par l'Vniuers
Que mal loüange fust semée:
Si ie ne suis plus amoureux
D'une si vaine renommée,
C'est signe que ie suis heureux.

Quand ie cherissois ces escrits,
Et que mon cœur, & mes esprits
Bruloient d'une impudique flame:
Sans repos ie passois les nuits,
Et tous les iours dedans mon ame
Naïssient nouveaux sujets d'ennuis.

Maintenant que i'en suis sorti,
Et que vous m'auiez garanti,
Seigneur, d'un si cruel naufrage:
Assuré dedans vostre port
I'apperçois au gré del'orage
Les hommes courir à la mort.

Viuaus parmi l'ambition
Ils n'ont que de l'affliction,
Et ne sentent que du martyre,
Le repos ne les suit iamais:
Aussi n'est-ce qu'en vostre Empire
Où regn' absolument la pais.

Grand Dieu, qu'un rayon de vos yeux
Eleue leurs cœurs dans les Cieux

834 Impieté des Deistes, renuërsée, &c.

Au mespris de toute la terre,
Et que d'un saint amour touchez
Ils sortent vainqueurs de la guerre
Qu'ils ont avecques les pecheurs.

F I N.

FAUTES PRINCIPALES surueunës en l'impression.

P Age 85. lisez,

Touſiours d'un meſme pas finis, & conſommez;
page 132 ligne 13 *conſpicatus*, page 144 l. 4 pour le 2,
mettez vn 3. pag. 164 liſez 7 pour 7. pag. 166 l. dernie-
re liſez la premiere lettre du mot Hebreiu doit eſtre 2.
page 167 ligue 3 *de la Cabale*. page 180 ligne 1 par
ceſte. l. 2 touchées. pag. 187. l. 9 a vn *tas*. pag. 212. *Aude* pag.
281 l. 18 effacez les l. *impietez*. pag. 259 l. derniere que. pa.
281 l. penultieſme occaſion. p. 283 l. 16. 19 anſp. 286. vers 4

Deſſus comme pivot qui ferme le ſouſtient;
pag. 288 l. 9. effacez &. pag. 468 l. antepenul. *Dieu eſt*. p.
543. l. 1. *quomodo* pag. 570. vers 21 oſtez le ſecond *les*. p.
615. l. 11. *intention*. pag. 650 l. 11. *euchymeme*. pag. 692. l. 9
preludes. pag. 701. l. 1 eſtre. pag. 711. l. 2. *ſecrettes*. pag. 724.
l. 4 *les*. l. 7 *d'avantage*. pag. 731. l. 6 à noſtre. pag. 797 vers 3
rangez. pag. 798. l. 1 *voys* pag. 811. l. 15. effacez ſçavoir eſt
qu'elle pag. 810. l. 9. *teſmoignage*. pag. 821. l. 16 *claudicatis*,
pag. 817 l. 13. *captif*.

Je n'ay point mis en ligne de conte les monosylla-
bes oubliez, qui donnent grace à noſtre langue, tels
que ſont *dans*, *en*, *les*, *mes*, &c. ny les diſſions mal orto-
graphiées, ou accentuees, car le lecteur pourra facile-
ment ſuppleer ces defauts,




TABLE DES CHAPITRES CON- TENVS EN CE LIVRE de l'Impieté des Deïsses.

Chapitre premier, folio I

DAns lequel l'excellence de l'homme est declaree.

Chapitre II. fol. 25

Comme l'homme fait tout, se serui de tout, & commande à tout le monde.

Chapitre III. fol. 32

En quoy consiste ce qu'on appelle viure moralem^{nt} & quelle difference il y a entre une action morale, & naturelle.

Chapitre IV. fol. 54

Où il est declaré c. que c'est que de la moralité, & de la bonté morale qui se

retreuve en nos actions.

Chapitre V. fol.72

Dans lequel le Theologien preue que Dieu est, contre les Athees, & Liberins.

Chapitre VI. fol.96

Dans lequel on continuë à preuuer que Dieu est.

Chapitre VII. fol.121

Par lequel les Medecins sont iustifiez contre ceux qui disent qu'ils sont le plus souuent Atheistes, & où il est monstré que les hommes sçauants soit en Mathematique, soit en Philosophie, soit en la Cabale, ne sont ny Athees, ny Deistes, ny Libertins.

Chapitre VIII. fol.143

Dans lequel on voit que c'est que la Cabale, & quelles sont ses parties, & auquel le Deiste declare ce qui a esté cause de ce qu'il est tombé en impieté.

Chapitre IX. fol.180

Auquel le Theologien porte son iu-

gement touchant les œuvres, & les opinions de Charon, & de quelques autres Eſcrivains, & où ſes impietez ſont déconuertes, & refutees.

Chapitre X. fol. 215

Dans laquelle Theologien porte ſon iugement touchant les œuvres de Cardan, & de Iordanus Brunus.

Chapitre XI. fol. 241

Dedās lequel le Theologiē preuue que la religiō Catholique eſt la ſeule veritable.

Chapitre XII. fol. 253

Dans lequel le Deïſte rapporte ces trois premiers quatrains, avec leur refutation: & eſt monſtré que le Chreſtien n'eſt pas ſuperſtitiieux; que Dieu fait tout par vn meſme acte: qu'il n'eſt ſubjet à aucun changement, ou perturbation, & qu'il punit tres-juſtement les meſchans, bien que le peché ſoit vn rien.

Chapitre XIII. fol. 289

Dans lequel les quatrains du Deïſte

depuis le quatriefme iufques au neufiefme font refutez; & est monftré que Dieu declare l'amour qu'il fe porte en punifant les damnez; & comment il ayme, il hayt, & fait tout par vne mefme action.

Chapitre XIV. fol. 320

Auquel est preuue que Dieu fait du bien aux damnez: que nous pouuons hayr les mefchans, & que Dieu les punift iufteement fans cruauté; & les quatrains du Deifte depuis le neufiefme iufques au dix-neufiefme font renuerfer.

Chapitre XV. fol. 366

Que l'amour de Dieu eft immuable, quels font fes objects: comment il nous a peuracheter, veu que nous luy appartenions: comment il peut s'afferuir a l'homme, & comment nous luy pouuons faire refiftance, avec la refutation des quatrains du Deifte, depuis le dix-neufiefme iufques au vingt-neufiefme.

Chapitre XVI. fol. 405

Dans lequel il est monstré que la science, ou la volonté diuine n'est point cause de nos pechez : & quelle distinction, ou identité il y a entre les perfections diuines, avec beaucoup d'autres choses, par lesquels les quatrains du Deïste sont refutez, depuis le vingt-neufiesme iusques au trente sixiesme.

Chapitre XVII. fol. 455

Auquel les quatrains du Deïste depuis le trente-sixiesme iusques au quarante-troisiesme sont refutez : & est monstré quel ordre Dieu tient en ses actions, & en ses pensees, comment il connoist tout, comment sa prescience, & son decret s'accordent avec nostre liberté, &c.

Chapitre XVIII. fol. 495

Dans lequel le quarante-troisiesme quatrain du Deïste est refuté ; & est monstré que Dieu n'est point la cause de

nos pechez, & que l'homme est seul in-
excusable en son peché: & que Dieu est
iuste, bien qu'il nous ayt donné des loix,
qu'il sçauoit que plusieurs n'o b,erue-
roient pas.

Chapitre XIX. fol. 524

Dans lequel les quatrains du Deïste
sont refutez, depuis le quarante qua-
triesme iusques au cinquante quatriesme,
& est monstre qu'il n'y a qu'un chemin
pour estre sauué; que Dieu peut faire la
mesme chose avec nous sans pouuoir estre
accusé du peché: que vrayment il y a
un enfer: & que le lieu, ny la naissance
ne nous donnent pas la religion, avec plu-
sieurs autres choses.

Chapitre XX. fol. 572

Auquel est monstre que nos actions
ne suivent pas l'absolu pouuoir de Dieu;
que Dieu ne reçoit pas de l'offence de ce
qu'il veut: que son essence n'est point en-
richie de nostre misere: que nous ne

croyons pas que Dieu soit agité de vengeance : & dans lequel les quatrains du Deïste sont refuteZ depuis le cinquante-quatriesme iusques au soixante-quatriesme.

Chapitre XXI. fol. 594

Dans lequel les raisons pretenduës des Deïstes sont renuersées, depuis le soixante-quatriesme quatrain iusques au septante-vniesme ; & où il est monstre que Dieu est exempt de colere, quand il punit les meschans : que le peché merite un supplice eternel, & que Dieu use d'une plus grande douceur enuers nous, que nous ne faisons enuers nos semblables, &c.

Chapitre XXII. fol. 640

Dans lequel les quatrains de l'impie sont renuerséz depuis le septante-deuxiesme iusques au 84 ; & est monstre que Dieu punit tres-justement les meschans d'un supplice éternel, avec plusieurs ca-

lornies, & mensonges refutez.

Chapitre XXIII. fol. 687

Dans lequel les penitences que font les Chrestiens en se chastiant, par diuerses austeritez du corps, sont deffenduës contre les objections des Deïstes: & auquel est prouué qu'elles sont fort agreables à Dieu, & leurs quatrains sont refutez depuis le 84 iusques au 89.

Chapitre XXIV. fol. 723

Dans lequel les quatrains du Deïste sont renuersez, depuis le 89 iusques au cent-uniésme, & est monsté que les Chrestiens ne seruent pas Dieu par hypocrisie: que les Religieux ne sont pas oyeux, & qu'il est bon de s'abstenir de beaucoup de choses pour l'amour de Dieu.

Chapitre XXV. fol. 769

Dans lequel le reste des quatrains du Deïste, sçauoir est depuis le cent-uniésme iusques au cent-sixiésme, sont renuersez; la ruse du ~~Libertin~~ est de conuer-

22, & le Deïste minute sa conuerſion.

Chapitre XXVI. fol. 800

Dans lequel le Deïste dit Adieu au
Theologien, apres qu'il a propoſé les rai-
ſons, pour leſquelles beaucoup de Liber-
tins ſe perdent; & puis il declare ſa con-
uerſion, & ſa reſolution de bien faire.

FIN.

Bibliothèque des Facultés

BP 210

60331 CHANTILLY Cedex

TEL. (03) 44.67.24.00

